

盘洲文集

洪适

文硕阁

wenshuoge.com

目录

关于我们	5
提要	7
卷一	8
卷二	15
卷三	22
卷四	28
卷五	36
卷六	44
卷七	52
卷八	59
卷九	70
卷十	82
卷十一	89
卷十二	94
卷十三	98
卷十四	103
卷十五	108
卷十六	113
卷十七	120
卷十八	126
卷十九	133
卷二十	140
卷二十一	146
卷二十二	152
卷二十三	158
卷二十四	164
卷二十五	171
卷二十六	178
卷二十七	182
卷二十八	187
卷二十九	193
卷三十	198
卷三十一	202
卷三十二	206
卷三十三	210
卷三十四	214

卷三十五	218
卷三十六	223
卷三十七	228
卷三十八	233
卷三十九	238
卷四十	243
卷四十一	248
卷四十二	252
卷四十三	256
卷四十四	261
卷四十五	266
卷四十六	270
卷四十七	275
卷四十八	279
卷四十九	283
卷五十	287
卷五十一	291
卷五十二	295
卷五十三	300
卷五十四	305
卷五十五	310
卷五十六	315
卷五十七	320
卷五十八	325
卷五十九	330
卷六十	335
卷六十一	340
卷六十二	345
卷六十三	350
卷六十四	356
卷六十五	363
卷六十六	368
卷六十七	374
卷六十八	379
卷六十九	384
卷七十	389
卷七十一	396
卷七十二	405

卷七十三		412
卷七十四		418
卷七十五		423
卷七十六		427
卷七十七		431
卷七十八		435
卷七十九		440
卷八十		447
附录		455

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部四

盘洲文集 别集类三【宋】

提要

【臣】等谨案盘洲文集八十卷宋洪适撰适有隶释已着録许及之撰适行状称有文集一百卷藏於家周必大撰适神道碑则称其论着为四方传诵有盘洲文集八十卷与行状互异考陈振孙书録解题张萱重编内阁书目俱作八十卷则及之所称其家藏之全稿必大所称乃其行世之刊本也其书流传颇夥王士禛居易録谓朱彝尊所藏盘洲文集仅有其诗则藏书家已罕覩全帙此本为毛

氏汲古阁所藏犹从宋刻影写惟末卷劄子第三篇蠹损特甚其余虽字句间有脱落而卷帙完好亦古本之仅存者矣适以词科起家工於俚偶其弟迈尝举所草张浚免相制王大宝致仕制浙东谢表生日诗词谢启诸联载於容斋三笔然考适自撰小传自其少时拟复得河南贺表即有齐人归郢讙之田宣王复文武之士句为作者所称其内外诸制亦皆长於润色藻思绮句层见叠出不但如迈之所举也至於记序志传之文亦尚存元佑法度尤南渡後铮铮者矣所作隶释隶续於史传舛异考核特精今观此集如跋唐瑾传跋丹州刺史碑跋皇甫诞碑诸篇皆能援据旧刻订北史唐书之谬盖金石之学最所留意即隋唐碑志亦多能辨证异同又宋史本传称其父皓谪英州适往来岭南省侍者九载桧死皓还服阕起知荊州旋卒今以集中自撰小传及皓行述考之则皓安置英州居九年始复朝请郎徙袁州至南雄州卒後一日秦桧亦死非桧死而皓始还足订宋史之误其他表启疏状诸篇亦多与宋史参稽是又不但取其文词之工矣乾隆四十六年十二月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

盘洲文集卷一

宋 洪适 撰

诗一

拟古十三首

行行重行行

行行重行行南北各倦游昔人重别离一日嗟三秋如何三秋暮相见尚悠悠方寸正纡轸何以写我忧仰瞻衡汉移俯对兰菊遂臭味虽云同光尘若为异回风凄且发飘我别时袂欲知长相思披衣不胜体

青青河畔草

青青河畔草英英篱边菊雅雅当牕女濯濯手如玉渊渊锦中意粲粲未盈幅藁砧天一涯刀头误行卜却监怨新眉谁教远山绿

青青陵上栢

青青陵上栢櫚櫚庭中竹人壽能几何譬彼电过目一觴命昵交且以慰心曲驾言长安游川光晨可掬神州何赫戏高城矗延属嶢榭千星斗雕栢错珠玉鳞鳞王公第华缨夹绣毂放怀恣盘虞端忧竟谁逐

今日良宴会

今日良宴会朋簪故人家摇情绿绮棊度曲渔阳挝放歌掀醉髯晤语粲春葩列坐各知心游扬相齿牙芬芳须及时东扶忽西斜胡不厉逸翮天津问仙槎无为甘寂寞痼疾守烟霞

西北有高楼

西北有高楼偃蹇轶千门绮栊纳飞月璧璫碍翔云上有弦歌女哀声啓莺唇谁能为此曲无乃返香人一章三致意修蛾有余颦不惜饶清响暗惊梁上尘所悲听者心中无淫渭分愿作南溟鸟夕饮玉池津

涉江采芙蓉

涉江采芙蓉芳蕤幽沚相思不相见
芬香欲谁遗秋容感人心浪浪睫涵泪
不如膝上琴哀音入君耳

明月皎夜光

明月皎夜光瑟瑟扇商籁衡纪直西躔
云草斜左界感彼林薄凋岁律倏云迈
蜻蛚谁汝怜凄凄鸣户外昔我耐久朋
着鞭道方泰尉藉缁缟轻金兰旧盟改
东井不及泉须女无俦配君看贡公綦
白头媿倾盖

冉冉孤生竹

冉冉孤生竹成陰幽谷中聿来君子室
葛藟施乔松乔松千百寻攀附犹可穷
思君江水深褰裳往难从同心而偏栖
愧彼摩霄鸿灼灼芙蓉花凌波媚芳风
非不努力爱秋至无归鸿昔盟倘不寒
谁叹久西东

庭前有奇树

庭前有奇树黄鸟巢其枝之子不顾返
失此熙春期采采未盈匊夕风已纷披
路远怅莫致虽多亦奚为

迢迢牵牛星

迢迢牵牛星奕奕停梭女寻盟整瑶轡
絨情遵汉渚欣讌未斯须别愁眉已度
黄月不我留残机忍重顾翻羨巫山云
朝朝楚王遇

人生不满百

人生不满百蟋蟀等春秋花月多风雨
何不蜡屐游朱光忽以驰退舍未易留
生前一杯乐难与昧者谋临流羨芳芷
欢言泛轻舟

孟冬寒气至

孟冬寒气至冲风一何厉宿楚失故陰
思虫柱【上声】哀喙客来门冬冬袖有
尺书遗一读泪先零再读心已醉妾如初
开花君如长流水花挽水回难水捐花去
易流水何时休春荣难久恃

明明何皎皎

明月何皎皎舒光莹?绮宛转羞空床披轩步庭际故爱同一心新愁今两耳咫尺相会难迢迢
若千里况复千里隔忧端无穷已

谢洪庆善提刑遗法帖

纷纷渴骥竞秋蛇镌鑱收拾俱名家吾宗尺牘擅天下年来野鹜谁肩差庭前书带凝寒緑架
上牙籤富新轴中藏墨妙更奇奇长物不留沾賸馥生平小楷拘蝇头岂知蚕尾与银鈎从今
已叹笔成塚学奇还许登门不

春思

自闻郊外景多病负年光沐雨桃容腻耽春蝶兴狂幽期知我背遲日为谁长一枕虚牕寂炉
烟续旧香

晚望

古堞高亭暮登临远眺时菊芳栖渥露荷盖偃清漪遵渚归鸿集投林嘯狖悲关情聊绘句独
立自遲遲

欲雨

雨意泄琴床桃笙骤觉凉冲飈方贾勇藻景荐韬光去室怜鸠妇封闻看蚁王青灯可吾伴黄
卷任更长

客至

闭关听剥啄有客欵蓬蒿谭垒万人敌词源八月涛园蔬供菜甲盘食釘桃毛冷淡琴书味由
来属我曹

秋怀二首

送喜得新凉秋情未慙忘弱枝红皱重平野碧滋长林迴蝉初乱篱疎菊自芳吟成转萧瑟径
醉任苍苍愁绪苦萦人寒螿殆叵闻瓜畴残蔓去兰畹秀蕤薰远水涵秋态余霞冠夕曛扬扬
今夜月独与广庭分

送人之姑苏

吴门千里役别话不堪闻暂发参商叹长怀星斗文菊丛黄彩乱槐路緑行分日冀书邮至冥
鸿接暮云

送吴傅朋知盱眙

龟山其下古淮壖上驷駸駸稳着鞭千里八年开皂盖九重一旦下青氍名郎他日曾趋禁静镇今朝叠典边簪笔侍书公雅意薰风殿阁待诚悬

方福州生日行

雪峰高高雪如许海门潮生浪吞浦郎罢携团街西东到处欢然闻好语旧日大官多养高民词狱寄充官曹横行阡陌喧夜鼓唯征关市析秋毫只今事事无长蠹五月政成歌召父尺一方来问凤仪魁三快刷联鸳羽三山岌嶭摩曾空便是方丈蓬瀛中他年图画凌烟了却向山中访赤松

谢唐守送朱樱二绝句

铃斋一树滴堦春翻走髭盘赠野人欲进麴生呼伯雅却无樊素启丹唇

乳酪醍醐僻郡无多酸梅子岂吾徒香擎翠笼青冥出旧事从谁说上都

荅林神童

快覩终童英妙时趫然衒袖出明玕家声不诧大哉问文律何愁知者希益利锋铓临大敌养成羽翼看高飞红尘可厌忙车马挹取西山爽气归

海棠花二绝句

雨濯吴粧腻风催蜀锦裁自嫌生较晚不得聘寒梅【金城记犂举常云欲令梅聘海棠柎子臣櫻桃及以芥嫁笋但恨时不同然牡丹酴醾杨梅枇杷尽为友】鸭觥非难致蛟胎业已成夜深宁覓睡相照月偏明【张宝就印録宝使子弟常巡市乞取鷄鸭卵殼鷄卵以煮药鸭卵以金丝织海棠花名蛟胎盞醉後畏酒时多用之】

瑞香花

袞袞香球次第开结根幽独谢纷埃芳蓉妬入鸳鸯社异馥清传锦绣堆睡里魂交非自衍醒时心赏可无猜品题盍在春林石不是花王喜後來

题信州吴传朋郎中游丝书

上饶毗俗醇且古千室鸣弦方按堵黄堂人人今循良河南治平追鼻祖讼棠留景分清陰炉篆方羊燕寝深笑谈了却邦人事游戏翰墨惟书林自从真行易篆隶草圣书絶驰极艺游云

惊龙初振奇渴骥怒猊争作势臣中第一兹谓谁寥寥典则其几希文人尺牍妙天下咸去收拾生光辉作古要须从我始直欲名家自成体手追心摹前无人一扫尘踪有新意纵横经纬生胸中落纸便与游丝同绿瓮茧车飞白雪织檐蛛网破清风一行一笔相联属姿态规榘骇凡目临池漫劳三十年千兔从教後人秃旧闻吕向连锦书百字环写紫髮如惜哉泆汨已无考盍使北面称台与独步不复名相甲端恨二王无此法只今四海书同文使者来求至将押

雪诗用晁无咎韵

密雪舞冬昼祁寒反夏炎竹枝低未湿梅萼莹先沾怯冷昂肩立欣繁矫首瞻随风方北渡际海必东渐轩簸来如掺缤纷势转严枯荑新点缀曲砌巧争添伺隙花穿户承隅簷插檐高飞迷皎鹤夜影逼清蟾砧净绡横石牕虚粉杂匳岷丘千壁碎武库五兵銛烟径杨吹絮香蹊蝶奋髯鲸鲵陆骨腐鹄鹭野翎燭白髮秦人遯龐眉汉尉潜渍蚕功孰及平地瑞初占窖卧行人节门扁志士恬已甘穿履困奚避割臄嫌醉慕双螯毕寒怀五袴廉飘飏疑宓【阙】刻画谢无盐河濶凝新浪峯高失旧尖山陰宾欲返淮右寇将殲穆满三章着桓玄五板兼君恩捐卫粟天意絶齐店江上蓑堪画篱间甍可覩客观眸已眩儿咀手频拈足没寻萱屐腰闲刈藿鎌马驰毛愈素乌啄首难黔冻折騷人笔光临织妇檐螟牟宁待火疫疠诘烦砭甲长寒蔬细根肥宿麦纈年丰虽欲颂神助愧江淹

前韵虽险用之未尽掇其余复成三百言

一苦寒威重清晨雨脚□严风号宇宙?雪下间阎布地盐初撒穿帷粉乍黏裴回轻点袖紫积满盈檐骋巧飘虽急乘危势或沾梨花芳小圃桂魄射疎帘烟湿茶翁竈竿低酒舍帘清泉埋沼沚苍干耸梗桺玉匣齐君履银封鲁国檐盆收新琢壁堦展未裁縑木杪疑飞絮江干襍秀兼正随云阵合未放日光暹处壮山屠虎高兴泽殪蚍重巔闻折木邃野絶飞鷯隼击翎添厉鳞藏口敢噉狼随姬满驾鹄集叔才苦授简词臣敏乘车海若谦汉传王母绛周贡嬴【丘俭切】山甜王峻师方整高昌衆欲?汉光开帝业苏烈贯兵铃豹曳荆人舄牙抽孙子籤肤寒方起粟手坼正忧□挟纊冬裘燠倾囂夜饮厌寒光欺宝监素质夺朱綬犬喜蹄方遑儿餐舌未箝梅林催皛皛麦壠长蕲蕲置兔难探穴叉鱼已漑鬻鸱蹲饥愈噪马缩冻难拊见晁将消释歌诗兴佞儉妍辞慚谢客诘敢示羣僉

用雪诗韵谢三外弟见和

我昔樵李寓君方锡山潜欲驰咫尺书驶足无飞廉相望参与商引首徒遐瞻竭来萍梗踪远野得茅檐获与谭奎接何询龟筮占青山整烟鬟澄波开监奩乔松与怪栢如虬老龙髯悠然一望间野色皆可覩范甑飞埃尘墨突寒不黔好友岂厌频鷄黍供炊爨外家三遗珠脱穎皆囊尖交情谢流俗不问凉及炎着鞭挹清风从者屡我淹高论极根源师友识所渐大略催治忽细谈析毫纖皮里有阳秋褒贬追齐殲古称学如殖秋成观执鎌吾匪董夫子家居下帷檐言经虽败绩宁妨整冠嫌抽轧强成章句鄙不任拈翫骹且艰澁疵瑕费鍼砭君诗粲珠琲光焰古人兼诘覆伦父酒不道胡儿盐陈檄愈头疾杜诗却寒店轻縑边幅富健笔锋鋋鋋语句

既適麗格律何森严我穷思已竭君方涌泉添三峡争倒流未肯波澜恬短才媿匪匹尚期膏馥沾吟罢觉夜永明窗耿孤蟾

读秦本纪

应侯一语幽宣后长信蒙辜徙萑阳秦室无亲类梟獍借箕诟语亦其常

侯公

淮陰束手九江闲谁信功成頼舌问不惜鸿沟分二国太公今日得生还

楚怀王

武关谋诈却称臣冤魄游魂尚在秦墓木萧条豕犹湿流闻其子作婚姻

读战国史

折足黔徒未易欺箠中死士亦何为魏齐断首龐涓死祸报由来不可知

读召公世家

齐晋瓜分四国王嬴秦为吕芊为黄六雄当日皆新主独有甘棠泽未亡

穰侯

推穀曾闻荐武安威伸三晋走荆蛮厠中犬彘图攘夺犹道藏兵不出关

田单

齐主轻忘在莒时解裘淄水遽相疑若无貂勃明勲业几使功臣枉见夷

长平

一败长平振古无赵邦臣主亦何愚当时已中冯亭计犹自区区遣郑朱

春申君

珠履三千尽在门争无国土解衔恩棘门难作无遗类死党宁闻报李园

题陈体仁判官休斋

翔缨影组盍中留绿水芙蓉且漫游过耳从教千不是处心浑欲一宜休炉中异馥非多爱架上新籤弗外求寂寂掩扉何所事饱听风竹韵凉秋

次韵陈体仁惠诗并示游山诗卷

人生名利场羁绊无休假沈迷鴈鹜行梦寐鸡豚社见谓游子欺更妨官长骂何如山中乐松牕肆嘉话陈侯青云客英声蜚日下当年金马门掉鞅示闲暇小试芙蓉池未整骊驹驾台岳十日行樛萝若相迓来归探古囊篇篇可图画倾耳金石声郑卫敢争霸

次韵李举之县丞秋日偶成

当年使节反穹庐解绶归来得少娱底事微官又縈缚强顏文墨受噫呜

朝来倾耳得街谈颇说尘容亦可慙从事未知三尺守醉心空向六经酣

官途陆陆未回车秋桂春萝总负渠目送飞鸿千里去故山应草絶交书

笔底渊源万顷多卷中句法不随波覃思正作青云计寡和聊成白雪歌

次韵题谢景思少卿药寮

壮岁挥金迈二疏眼看余子伏盐车芷兰清馥浑纫佩芝术新苗几荷锄剩作好诗传近体谁言巧宦胜闲居北牕睡起琴声寂便若身登太皞墟

盘洲文集卷一

卷二

钦定四库全书

盘洲文集卷二

宋 洪适 撰

诗二

蔡瞻明寺丞有诗见简次其韵

漱芳倾液饱心胸久矣高名在郢中遂请丛祠方养气卜居萧寺且谈空结交许入芝兰室招
饮奚须桑苎翁妙语鼎来惊创见益惭白豕过河东

酬李举之

象载凝华落笔工一时英妙盍居中交情耐久惟同味诗意求新更凿空挥尘宁谈何堵物联
珠不数啜嚅翁文成间被鷄林得复有声名到海东

次韵曹功显都承赏梅

纷纷凡卉怯严冬独有清姿对雪中拂幌更宜粧妩媚巡檐谁惮履穿空南来未见传声使东
望方思避俗翁闻道联鑣得幽趣无因同醉玉堂东

次韵李举之立春四絶句

东皇先遣雪清尘一夜山川眼界新共喜太平今有象更将歌舞为迎春

三冬文史摠空虚独有施行寛大书坐对南墙千个竹何妨留客煮园蔬

雪後疎梅正压枝春来朝日已晖晖痴儿公事何时了一醉花前心似飞

他乡春日思如何屏去茶瓯任睡魔且得小牕成好梦片时江上逐烟蓑

次韵蔡瞻明惜花五絶句

底事春愁减玉肌谁能獭髓为扶衰可怜傍巘临池处非复嫣然一笑时

无情谁似东风薄相见那思雪夜初欲把红顔借桃杏便教枝上白纷如
月地云堦满意开牵花準拟尚裴回抗琼解佩已仙去骇緑纷红徒後來
试因子墨赋瓊姿独记朝容在一披着粉直嫌粧太白只今何似梦中时
一声横笛晓林空知是春风十日东来岁花时在何处探芳还有几人同

陈体仁以心清闻妙香作诗惠末利花香次韵为谢

尘劳昏独志禄利蠹良心扫地香一炉澹然清兴深假寐倾刻间烟霏遂盈襟联翩珊瑚钩逼人何駸駸东风将小雨一夕池中平春声在疎竹琅琅有余清公退远世氛心地莫与京宝薰凝窗牖为君寻鸥盟鼻观拜嘉贐名香如前闻尘容方一洗藻思期三薰久坐欣有得飘飘欲凌云都梁与迷迭芳馨此其分英英末利花素蕤馥清晓谁将煮水沈采擷得奇妙吾非范蔚宗品题能了了杂佩媿报酬芑音发譙笑春日紫宸朝合殿紫天香玉笋粲风采鸡舌相芬芳陈侯金闺彦指期簪鵷行安能久鬱鬱俛首回刚腸

偶得梅一种疎枝清香附萼之花五出与江梅无异但花色微红而五出之上复有一重或十叶或九叶他日皆并蒂双实俗呼为鸳鸯梅昔上林有赵昭仪所植同心梅疑即此也因成四絶

却月凌风一种香更匀粉面作红粧枝头自结鸳鸯社为倩东风谢海棠

重重香蘂故多情索笑初开解薄醒翻恨前村雪深处一枝幽独太憨生

客子逢花心欲灰异方初见眼还开故应临水横斜日曾作于飞一念来

开花已作鸳鸯侣着子还成鸿鴈行旧日同心上林种至今千载亦流芳

次韵蔡瞻明登巾山三絶句

朝来爽气冠曾丘急雨惊风正麦秋要得云轩聊放目何妨松径暂低头

名缰局促祇怀慙飘忽熙春月过三矫首白云千里外此心无日不江南

好句联翩得未曾品题今日欠鍾嵘登临自有江山助岂是胸中不得平

得二弟消息

倚栏春昼静花柳自芳香消息三州远尘埃两地忙鹊声传近喜鸿影忆初行抄得新书策归时补墨庄

次韵李举之风雨中书事四絕句

挂壁鸣琴久断弦强翻书帙本相便词源顾我非流峡藻思如今已挹天

雨势风声何太雄羣山答响乱贲镗青奴今夕安用汝玉友此时留得依

怒号通夕搅空虚好梦那能到玉除枕上泰然无一念只愁雨滴架中书

向晓登楼凭小栏萧然归兴在江干痴儿未了公家事且把云山子细看

次韵蔡瞻明秋园五絕句

芥毛金爪勇难干肯作霜花对乍寒若说乘轩有痴鹤司晨如此合峨冠【鸡冠】

翔仞当年览德辉传芳花品未思归晚来雾鬢凭轩处直恐金翘相对飞【金凤】

泽兰萱草比多言谓汝分陰久夺鲜政恐洪园修竹劲不如秦岭老松坚【芭蕉】

高标幽艳自宜霜弱草繁葩莫中伤肯与红莲媚三夏要同黄菊向重阳【芙蓉】

临风裊露早秋天范出南金色更鲜若向东篱比标格定知花市不言钱【金钱】

宿佛窟寺

篮輿登佛窟高阁望中清古木尔许飞泉无限声雨消今日暑云作晚来晴独对青山久相逢如有情过瑞岩寺示胜上人【空照禅室尝坐一石长唤主人公自云喏惺惺阙他後莫受人瞒时有瑞气金辉映烛岩下因以名岩而号其石曰惺惺石】

逗晓乱山中来寻古佛宫荷间留夜雨松下进秋风瑞气旧如许巖姿今亦同惺惺有盘石应记主人公

惺惺石

簿领久沈迷谁能不忍欺我来慙此石拈出问吾师

滴滴泉

石罅来泉滴松风杂涧声天明有公事还忆此时清

题灵石寺并简景思

闻道飞来石当年却畔亡烟杉行【行列之行】客路风竹护禅房有酒对玉麈无诗夸锦囊
尘缨自羁束真赏负山光

夜饮药寮次景思韵

主人知我乐郊居药圃嘉招走尺书笑语池边欣促席醉归林下却【却去之却】肩輿正闻
鴈过猿啼後更是风清月白初见说长安消息近却须高兴谢鲈鱼

题景思水芝亭【白莲一名水芝】

远意闕干云亭幽不受尘来为池上客本是社中人影密龟鱼?花开【阙】
还如山遂志应许卜比隣

黄巖道中

两口黄岩县纷然百虑侵乍听幽鸟语复起故园心冒热度峻岭憚劳休茂林潮来知海近三
岛可能寻

过妙绿寺听怀上人琴

断涧复危岑红尘且满襟疾驱触炎热小憩得禅林煮茗对清话弄琴知好音秋风不借便去
辙已駸駸

行县道中寄曾猷父

云山初见非昔游一瞬不许回双眸二年依州已强半七月行县难罢休溅溅微溜响萦谷薙
薙多稼光盈畴兵厨愿留一樽酒霜螯醉嚼期中秋

登宁和岭【岭属宁海】

初识宁和岭有怀占梦时闻诗千里隔断织九京悲草木应相记烟云浑异宜西风袭怀抱泪
睫不胜垂

怀孙邦求

酒开桑落泛觥觥行子驱车恨不留鴈塔自是文人行麟台更参儒者流官居二年有十月别思一日真三秋水轮今已可人意何时来赏城东楼

宿大龙山寺赠海上人

看山论旧事拂石认前题雨滑苔径阻云收松峤迷三秋文豹隐一夜寒蛩啼又复问程去清游满虎溪

大龙山五咏用家君所和胡别驾韵

经藏

万法俱一空忘筌亦忘字勿置齿牙问回观方寸地

龙祠

夹日授五飞论功中兴主【龙父有五子建炎未护行幸有功皆封侯赐庙额】宛宛龙父尊兹山职霖雨

密室

小室坐蒲团死灰念不作所以护明珠精修企先觉

小池

山椒有龙湫清泉日夜流疏岩作方沼漱甘非外求

汤炉

螾眼候松风云腴挟霜月炉下岂常炎灰飞即烟灭

怀李氏昆弟二十韵

城南两佳士英躔名碑碣相之妙才具玉筍班中阙胡为影长纓去去事輓輶举之登词坛龙虎榜未揭归循南陔兰不使芳馨歇胸中蟠五车一一思英发有中清庙瑟审声知度越我来貳银菟接袂俱墨发情期胶漆坚门受车马谒笔阵几鏖战君盈我先竭别来勤相思十日倏飘忽迟明蒙霏尘毕景迈嵒岨跻高怯肩舆挹秀欣挂笏泉清甘着齿巘幽冷萦骨西风涌波澜极望际溟渤是中三神山缥缈云出没问津旧乘槎引舟今舍筏俛首倾缥瓷独醉径兀兀起看天宇开诗成走邮卒归与及中秋高楼共嘉月

宿广润寺书伦上人灵云庵【灵云禅师因桃花悟道有偈曰三十年来寻劒客几逢落叶几抽枝自从一见桃花後直至如今更不疑】

宝地深深俯碧潭有僧酌茶延我谈千巘状秀蹑风磴万竹含翠藏云庵西来指柏本无着一见悟桃须再参登临已是秋欲半霜叶枝头才两三

摘星岭

披山凿道何嶮巇上摘星汉摩虹蜺七襄终日往曾问一握去天今可跻叱驭已排萝蔓去下车不复烟云迷举头此际长安远愿借六翮凌丹梯

交翠亭

政和丙申家君主宁海簿明年作交翠亭是秋而某生後二十有八年某来贰郡事踰年行县至此感旧怀远赋诗二章

三十年中事鸾栖筑小亭寒声长新箨清閤拂疎棂水转前时绿山浓远处青重来勤问讯此别记秋萤

三瑞堂

久矣驰魂梦今登三瑞堂故山有乔木近事话甘棠展骥惭充位占熊忆问祥白云留未去极望是吾乡

留别县僚

满城鼓吹出林垧珍重来思此日情共说栖鸾留政迹自怜展骥坠家声一时宦侣推儒雅百里民编乐治平山意川容若相挽不堪整驾问归程

过梁王寺书家君祠堂【旧有道流妄引地记乞废寺为宫外台下其事於州州下之县家君时摄邑事力为辩明乃寢】

生还未列麒麟画旧德犹怀鸾凤栖共问翰林今孰似凜然眉宇染风?

山行遇雨

天公作意轰雷霆风雨骤至神如兵翻手为云只俄顷举头见日尤精明蚁君一战方奏凯鸱妇复还已和鸣税驾欲投佳处所林间隐隐疎钟声

蔡瞻明以诗还行邑鄙卷次韵谢之

凉秋野趣已萧骚方驾看山念我曹十日空归才每下一篇来
况曲弥高词华若我惭?霓笔力惟公掣巨鳌欲作歌诗兴协律清朝今日有王褒

酬李举之用前韵见寄

閱尽千峰不憚劳归来文墨厌官曹浮槎问汉秋期近埋劒冲星夜气高那复精思如吐凤初无壮志欲乘鳌诗坛轩輊归题品滥得阳秋一字褒

褒字诗已得十二章请各赋其一以足巨鳌

纷纷吏道夸吹毛未肯留心效此曹象齿好辞降二妙鲈鱼归思羨三高吟毫未秃一千兔诗轴须联十五鳌敢道严霜起中夏益知趣韵有龙褒

次韵蔡瞻明木犀八絕句

谁为花王定等差清芬端合佩金犀上林他日移根去应记诗仙彩笔题

香清为借三秋露葩绚宁禁五日风俯对猗兰振寒緑静看飞叶陨轻鸿

风流直欲占秋光叶底深藏粟蕊黄共道幽香闻十里絶知芳誉亘仙乡【此花亦名十里香】

笑含菊彩媚疎篱巧作葵粧傍曲池顔色从他矜速肖芬馨如此孰争驰

心稟犀文饶地力体薰蝉影夺天香图形好命丹青手絺句须烦锦绣肠

广寒秋桂映天池休说当年折得时韵胜今逢岩下种价高宁靳橐中资

簪鬟新枝立晚晴淡粧异馥称双清梦魂不记前来事愁逐江潮日日平

黄绢家声映古今随和发彩惊词林高楼宴坐清商晚独向此花垂意深

盘洲文集卷二

卷三

钦定四库全书

盘洲文集卷三

宋 洪适 撰

诗三

次韵李相之观溪涨二首

愁霖方注射骇浪忽冲斜宿鸟行惊鴈游鱼目失虾夕波奔析木春涨过桃花沸渭今如此谁乘犯斗槎风声随雨急水势满川黄巨舰困澎湃穷阎悲混茫为鱼怀雒汭撻竹谢宣防共徯陰云巷水轮替戾冈

次韵酬丁致远司户

翰墨場中识面初珠玑粲粲似相如盍簪多士登台省却椽诸曹亲簿书白社不妨闲泚笔赤城更好命巾车寸心洎汨方茅塞快读新诗得剪除

次韵蔡瞻明江楼秋晚二首

斜照穿林迴归云敛岫迟蜗文寒壁篆蛛巧暮檐丝待月是愁处对山无倦时掀髯阻谈绮细读寄来诗竹外秋风急楼头夕霭微遣怀须命酒怯冷几更衣严鼓紫城去轻舟劈浪归登临多少意坠叶满庭飞

九日官舍种竹

独整陈编对北窗烟云浑欲助凄凉庭前且使竹交翠篱下从他菊自黄远宦只今同旅泊壮怀谁复问行藏携壶已失登临便不待微吟恨夕阳

天台道中

滩声因雨急山势向云斜橘绿谁能画枫丹远似花春锄怀浅水郭索上寒沙渐听鸣梭近林中三数家

赤城

平生几读兴公赋今日霞标对赤城此是南门入山路山只乞我一番晴

玉京洞

飚轮曾此宅灵仙洞府今称第六天规往不辞萝蔓险回看云物起琼田

国清寺

紺字今方盛名知国已清【李邕寺记云智者尝梦定光曰寺若成国必清因以为名】万松九里影双涧四时声【贾岛云山门九里松图经云五峰回合双涧萦抱天下四絶之寺】杖策将穷覽巾车不计程登堂山更好人去晓猿鸣【光老作更好堂方成而有旨移住灵隐时丈室未有继之者】

清音寺

久坐俯潺湲流清诗思慳跳珠鸣薜石淙玉下松关此日耳尘静几人心地闲抽琴作新曲归去要怡顏

禅林寺

振策快秋晴伽蓝倚翠屏看云不留瞬对竹已忘形银地声千载虹桥拱百灵至今钟磬响如讲净名经【智者始至佛陇定光指此曰南峰金地我所居北峯银地尔宜居之後讲净名经陈郡袁子雄见堂前有瑠璃山梵僧数十擎香跨虹桥而来】

山中阻雨欲登华顶峰而不果

昔闻天台山一万八千丈层峰目华顶魂梦几驰想竭来乘清秋明发将独往小雨巧作难祥云约仍爽风磴渍苔薜霜厓乱榛莽峥嵘一何峻梯空不可上便思捐竹輿徐行倩藤杖老僧揖而言兹山韬万象举头天宇逼寓目岩扉敞重溟倒寒影万 振幽响峡迴啼猱猿林高陨檣橡仙袂挹浮丘飘然顿尘网今兹风雨时烟雾接穹壤劲寒或薄人跬步迷俯仰不如游石梁重来事真赏斯言既纚纚诚哉非我诳俗驾为之回芜言不堪榜寄声山中灵心期空鞅鞅

石桥

悬磴跨幽崖奔流漱深壑宛然卧苍龙天巧谢镌凿万木森前山笙竽真籁作长啸斥猱猱来巢怖乌鹊莓苔助危梁下瞰心胆落横前限翠屏峭壁旁如削於此判尘凡只尺遂绵邈飞锡蹑空虚楼台变林薄宝辉觐华灯金翰过神雀二年佐铜虎渠能解羈络【阙】烹紫云腴寒瓠散葩萼奇事订前闻诗成识层阁

雨中宿万年寺

梦回深夜耿秋灯泉窦争流一味清过鴈不闻天外影寒松长送枕边声鬢风但可久无赖急雨那能使寢行已问琼台双阙路此心何必羨层城

闲上人览衆亭

篮輿行尽白云层来欸禅居得小亭乱石引泉归曲涧寒风吹雨过中庭四旁野色朝昏别一览岩姿远近青宴坐蒲团作何想光陰不复问尧蓂

贺子忱吏部抱膝庵

主人蚤岁抽华簪隐居时作梁父吟於今松窗在人境空有蕙帐留烟岑风来翠筱自摇玉秋着黄花仍散金拂拭尘埃记行役兴来命酒还孤斟

桐柏观

岬然双阙峙琼台仰见彤云郁郁开三井穷源知海眼六符垂象应天台【徐灵府天台山记曰山上应三台故曰天台三井甚深不测尝有投纶其涧纶尽而不及底或云海眼其一今塞或云女人濯手而然】松杉满道欣初过芝术何年得自培更听鸣泉杂风籁直疑鸾鹤紫霄来

衆妙台【台有八棱柱司马子微朱漆书三体道德经】

白云仙蹟纪琅函三体丹书宝翠岚欲问仕涂今捷径不须高价借终南

石道士妙声堂

泉溜古今同临流万虑空采芝归絶嶂添竹映疎丛影漾高秋月声宜深夜风真清长在耳何用抚孤桐

仙坛院【王子晋坛所】

旧闻王子晋云卧夜吹笙控鹤冲天去松风千古声

天台观

芝田环拱碧崔嵬流瀑高从天际来飞沫有风长是雪寒声无日不如雷岩前八桂人谁折溪畔千桃路未开便觉仙都清昼永翻愁归路染黄埃

刘阮洞

桃花当日未成蹊只有幽禽语翠微楚峡行云空入梦秦台鸣凤要齐飞仙家常若三春好
人境何知万事非访问丘园荒旧迹却应迴首悔来归

赠护国昌老

缓轡到禪扃高谈得细听茗花泛轻椀烟篆度虚棂门外云千片轩中水一瓶我来无好语
留此待丹青

慈云祖老相邀至悠然阁倦不克往

几日陟云烟危峯懒着鞭聊将临别意为我谢悠然

明岩寺

路转烟标外云开绶带前几层山底屋一线竹间泉洞口石孤耸岩头峰倒悬故应风雨际
行于总回鞭【临海记云寒山有石室前有立石参差如侍卫者悉五色远望似绶古今相传为
绶带山】

寒岩寺

峭壁插青冥层岩覆化城空中清磬发幽处慧灯明万瓦足云气四檐无雨声丰干不饶舌
此地孰知名

宁国寺

几日山南北端期汗漫游水痕秋雨过竹色晓烟收宦海何时了僧房为少留却寻归去路
余兴漫回眸

晓发秦安驿

秋梦不能晓起行山径迷小车惊宿鹭列炬误鸣鸡冷觉霜华重光瞻斗柄低金庭有佳处
芳桂想幽栖

以糟螯送曾守

太湖九月霜波寒郭索不幸逢渔蛮谁令骨醉糟丘里使我涎流书卷间黄堂丈人思幼玉
耳边不复亲丝竹一杯聊使破愁颜要遣诗情踵山谷

得景严弟书

往年同入洛此日各监州惯见浮云改相思野水流有书将远意何处话新愁莫为痴儿事乾
萤满案头梦中送妙兴寺僧【绍兴十六年十月二十五夜梦息檐山中独游旁近处至妙兴
寺欲回阻雨寺僧西指云是方霞彩如此少顷必开霁田家常以为占而束顾凝陰雨下如注
寺前高山樵径中水争下流予因并山而南复东折有桥长可二十许丈自深涧耸立巨松每
五七步必夹桥蜿蜒枝干俯就桥上若龙然谓之盘龙桥直东至所憩处时有一僧自妙兴相
从欲先去口占一诗送之既觉复梦携家登陆日既高而儿曹尚告未办家君命趋之见内子
方梳栊而董氏妹解篋授于衣遂侍家君偕景严景卢弟步寻近境至一桥畔指西隅有小寺
欲往予视所取道颇协向所经行因话前梦而二弟告予此妙缘寺也欲度桥而雨复作予辈
欲辍行而家君强之使往疑若彼寺有先世槨葬其间者家君杖策命一兵张盖既登岸子踵
而前斯桥危甚因返顾二弟勿偕未至妙缘而寤欲验他日故诗书之】

西望霞光东望云划然晴晦此区分小桥过尽盘龙险回首高人多谢君

次韵曾宏父探梅未开

梅枝浑待雪山意渐呼风欲索檐间笑那忧径外穷英辞窥玉洁拙句媿雷同只恐花开日纶
言下法宫

招曾宏父待雪

欲把诗催雪先将酒送寒冻云方作意微霰已开端目断乡城远心惊岁事兰拟同今日醉待
取玉花看

次韵钱处和运使郡斋晚集

风声止雨岁云暮雪态兼云昼欲昏共喜高轩归别墅肯临画戟对清樽埋轮前事空豺路授
简英辞踵兔园是处梅花寝消息更凭玉藻为招魂

游盖竹洞

晓出山城故着鞭荒荒寒日满晴川幽栖未卜诛茅地乘兴来登盖竹天霜凝【去声】陰崖
疑积雪云跻重障杂飞烟洞门今古无关键俗客那能见列仙

仙居道中

雪英方瑞腊雨势欲凋年此日信泥轼来风侵坐氊为官浑漫尔行役又徒然为报仙居令无
劳负弩前

寄吴明可正字

岁晚仍多病春来尚异乡愁城谁与破谈垒漫相望体怯山岚重心随驿路长後亭梅若放为寄一枝香

次韵范子芬雪中同访曹功显

明朝春琯欲飞葭腊里重看舞雪斜笔下百篇非事业樽前一醉即生涯初疑高柳狂吹絮却伴寒梅好放花踏冻不辞方驾远闭门留客更谁家

忆梅呈曾宏父

重忆城东路盈盈十里梅弥旬阻风雪几处杂尘埃已是春移律何时酒泛杯好花那忍落直待使君来

题王氏秀野堂

饱闻居处好远意快心胸树接高低影山分朝暮容佳时能自适闲客几相从勿讶题诗晚新来百事慵

【阙】

青编送似补山房妙语相酌掩夜光盗瓮不须睇吏部将军何日命元方

盘洲文集卷三

卷四

钦定四库全书

盘洲文集卷四

宋 洪适 撰

诗四

送范子芬赴浙东机幕

男儿三十富春秋况复才华出辈流传家不坠右丞相入幕少佐东诸侯梅花颇惜诗人去草色正牵行客愁修楔兰亭访陈迹应怀同醉仲宣楼

送季元衡教授赴调

三年淹讲席斗酒动离情此去登台省诸公熟姓名骅骝看地絕鸾凤为时鸣春日西湖上烦君一寄声

送石初平归四明

析别梁谿七换春海边相过意能勤袴襦不羡千金子简策无惭万石君豪气掀雷须给札他时修月待挥斤
鵲又揖东风去情话无人可夜分

送李相之提干闽中十二韵

官柳讫春事落絮束复西门外高轩过行行将何之七闽绣衣属非如州县卑少留长者辙酌酒话别离五年官他壤一面即故知
辯囿塵仍落诗坛襟屡题撞钟问今古遽然五总龟迢迢千里去风过衫裳吹我亦及兹晨归耘楚江涯河梁携手叹参辰後难期曼倩宁自衒长卿固同时
征途慎勿遽会看轺车驰

题左达功秀才桂香斋

小斋面蓬瀛昂霄得双桂黄卷对圣贤欣然有余地笔端妙言语挟此波澜势
荧荧百链刚自是青萍器冲星不我识铅刀且争利于今修月手益振凌云气
明年广寒宫声名郤说似归来八桂乡浮丘挹仙袂

还李举之太平广记

稗官九百起虞初过眼宁论所失诬午枕黑甜君所赐持还深愧一瓠无

酬光吉叔用前韵见寄

怨鹤今谁侣驯鸥讵可亲颇思同渌酒久已厌红尘归梦常通夕微吟漫惜春牀头易在否触手不应新

次韵蔡瞻明雨中书怀

梅雨冥冥晴复陰小轩终日起归心自怜宦业初何补独喜交情久益深忆得微醺看锦瑟愧无好语比南金青山千里江南路他日邮籤幸见寻

赠传神陈秀才

举世人心别端如面不同山川险难测笔墨思何工未索形骸外聊先阿堵中自怜无骨相不到汉南宫

次韵向宪见赠三首

理财无管晏言利析秋毫吐论千人废摩空六翮高未簪安世笔先佩吕?刀楚泽东风劲宁辞揽辔劳四望荒楼观登高动土思山川相映带桃李已纷披汉节人重仰黄陂世莫窥三章堆锦绣唐突古西施河东空有赋人不道扬雄贵贱云泥隔夤缘并邑同平番依列宿谈笑霁威风终赖帡幪力能成尺寸功

次韵向宪道中偶成

四牡驰原隰侯邦害必除疲民端可念茅舍未如初消息三春异创痍二纪余君王心在远谕意倚相如

闻景严弟迁西掖并寄景卢

俯仰梁谿岁几寒回来墨沼已中乾传家紫橐荣三子得路青云喜二难爵位方知稽古力论思当使覆盆安自怜骨相宜尘土那得丝言动笔端

次韵向宪留题荆门惠泉卒章见及

对泉一洗心如水诵诗三叹颍有泚字比渴骥駉駉来文如翠潄鳞鳞起皇华辙迹环诸道济物良筹载襟抱双泉复见等故人竹马儿童半羸老吾君丰泽要下流惭愧长澜力不侔一方始此一滴润千亩长有千锺收去瘼未尽惠未施可使剜肉生新痍尘埃满面语甚恶虚辱逢

人说项斯

独步惠泉用石刻中韵

拂崖看古字倚策仰前英雕章细细读清思源源生文传岷山石句敌溪陂行一字或华袞五言有长城林蝉衆作噪下里羞混并坐令蕞尔国宇内浑知名兹泉发地脉有玉潜山庭神龙职呵护老蚌呈煌荧楚人力水耨倚沼仍畦瀛霤沸昼复夜输出无穷声演迤银汉接旋折数日程膏润亘原陌谷价年年平非才忝敷惠下考乃为荣疲民未击壤循吏难联横独行浥清泚谁与论丹诚销忧赖季雅遣兴烦客卿信美非吾土千古仲宣情

杨元素题蒙泉诗云源有雌雄分碧白注谓南泉色白为雌因为之解嘲二絶句

小孤宁有匹织女自无家浪比人间世增添白玉瑕雄风波不动雌霓影空垂欲洗蒙泉谤须删蜀客诗

曲水

杯去浑无勇退时偶然遇坎亦安之不教坐有独醒客便与投醪倒接?

金莲

緑衣黄里水苍筤朝暮凌波步武齐一种清高乐泉石移根不肯污涂泥

古柳

异时古木蔽岩阿去盗来兵厄斧柯老柳如龙壽千百独全煨烬傲清波

同姚当可胡元质钱舜仁张昭甫游上泉

避暑远簿书寻幽踏营蒯寒泉浮玉根巨石开眼界灵湫几千年洗尽尘土碍老藤走长蛇茂木欹翠盖扫叶坐水旁可喜此风快炎云不能神潜虬秘奇怪满酌白玉鍾咽甘犹沆瀣何如习家池举鞭同倒载

次韵朱宣州见寄

十载萧萧麋鹿姿那知出守得同时黄山白水空孤讽叠嶂双溪属好诗击析晓传邾子国举鞭春到习家池只今霖雨思贤佐会见丝纶下玉墀

谢景高兄惠鱼鱉

霜风激水蛸舍寒渔火献俘清夜阑不烹五鼎若賒死使之骨醉尤加餐尺半之鱼鳞六六同入糟丘随小牒鼎来兼味口流涎可使盘中食无肉浔阳从事姿南金高山调古谁知音宁同姬隅作蛮语生憎郭索多躁心檐头雪消春有意洗盏开尊宜一醉持螯颇忆左手同尺素不妨时遣使

送唐左史纸墨

黄山奇峯三十六耸壑壽松多节目真工曲突扫芳煤介圭拱壁陈玄玉淞河千里兹滥觞万穀之皮搗冰霜肌理细腻色白晳蜀网刺藤难鴈行使君来自岷峨麓曾赋客卿朝奏牋细字不作蝇头书高文富有牛腰轴向来平步第一螭勇退宛在番之湄陶泓毛颖幸旅进快写元和圣德诗

送李泉

周人九府有圜法汉京金布在令甲炊炭冶熔多乱真纷纷轻薄如榆莢即山不复私下臣张官置吏几王春君子谓之阿堵物方兄不知何许人十羊九牧其弊近谈何容易趣销印事权顿使归民曹鼓铸伊谁察诸郡诏书恳恳修废官诸公争言谿度难向来矫枉亦太过畴咨英俊乘輶轩鼎新能事推心计贯朽不须夸古始共瞻使者振绣衣曾见真人兴白水荀卿自有富国篇高视管萧宜并肩钱流地上小术尔便合论思雨露边

江州尘外亭

使君人物风尘表亭下纖埃远白苹佳传缅怀方外友漫郎端是社中人山光水色长排闥鸂鶒侣鸿俦已卜邻莫语软红车马客香鑪峰下有遗民

喜景徐作小圃因怀东阁二絕句

数顷澄湖练有光小亭处处得疎篁梦中春草多佳句一洗尘埃速寄将

白白朱朱手自栽两年忆着满林开莫教童稚轻攀折惜取浓陰待我来

次韵董伯鲁

读破羣书有远谋逢时便可动凝旒不辞岩邑千山险肯作铃斋十日留辩舌未容蠡测海归心已梦蝶为周松关万一逢佳友为说相如故倦游

端午日应贤小集戏用坐中韵

短檠长忆桂岩东翰墨新来莫论功日日簿书成俗吏星星鬓发逼衰翁公【阙】难缓三人

帶小全聊吟一马驄共飲昌蒲修故事山肴野?是家風

次韵黃子余惠双井茶二首

荻花楓葉醉爲鄉每憶臨分一鼎香枉費光陰驚老大略無治行媿循良歸心來往鷄豚社清
思消磨鴈鷺行且喜弦歌余樂地好詩句句挾風霜

峰橫萬仞臨双井調護旗槍春怕深白雪有芽鷹作爪黃粱無夢蝶何心聞名可信非虛語知
味端如賞好音祇欠谷帘一杯水未能相就盍朋簪

送范至能

愁雲暗千山欲雪意未歇雨脚侵夜分鷁首勇朝發軟紅英俊林定不冗干謁磊磊胸中書高
談傾上笏結駟映天街登瀛有仙骨摩娑先友碑姓名或湮沒却顧浮丘亭寄聲頻日月

次韵王偉文二首

山城碌碌負魚符尺五家園好坦途可惜光陰迷簿領漫無惠露到樵蘇鷄豚小社元相接鷗
鷺新盟不敢渝莫話彈冠仍結綬祇宜襍褻與夫須

街石難夸和氏場揮犀久避蓋公堂筆端風雨真無敵紙上寒溫細作行結屋竟傳千畝竹奉
祠聊對一爐香朝中環賜無虛月遙想眉黃已效祥

次韵程觀過

山城寂寂簿書稀梅際春風一夜歸忽喜烹魚中有得恍然揮塵久相違折腰豈愛蘄州竹問
漢須尋織女機奇絕黃山待佳句何時小雨濕征衣

和州

嘆息和州事兵戈未易除驚濤飲邊馬壯士葬江魚列戍俱奔命斯民不奠居元戎猶擁鉞資
斧定何如

三將

鼎立淮南將朝來竟退師折冲潛白羽告捷開黃旗已報瓜州敗還驚采石危邊防恃天塹百
萬豈熊羆

寄題陳阜卿總秀堂

佳丽并包地曼花子夜香望中团野色尘外发天光小队高牙驻轻裘清啸长故应堂上燕相与贺雕梁

詹氏仁壽轩

修竹林林贯四时厖眉扶杖到期颐子孙长忆当年事留取轩楹客赋诗

道中怀景卢

官路多睽别春游隔弟兄频年再登陞十日又离京吏责仓台少官曹省闼清牀头何夕月冷语听残更

闾阳驿二絕句

略略春晴天亦慳雷惊雨作转头间浮云又逐东风起不见前山出髻鬟

触石泉声高下闻曾将两耳洗埃尘相逢尊酒今谁侣细草青花是故人

次韵范守翠微亭

带郭长堤十里春是中佳处外风尘层层危磴浑依旧一一高亭已斩新领略江山初纵目翦除荆棘不劳神携壶一笑须投隙官事何时可脱身

次韵施德初游齐山

诗尘谁复数齐梁小杜文章楚大邦曾为黄花酬九日至今陈迹擅三江新亭高下依乔木远岫参差倚曲牕着屐与君时茗饮後车何必酒盈缸

再赋

向来边马远跳梁奔命纷纷不一邦景物何期新斷壑梦魂犹自怯防江看山小隐红帘幙批敕须临青琐牕无事肯来文字饮为将红酒倒鹅缸

喻江宁欲遗蕲笛辞之

蕲州美竹今古名白云吹裂笛一声臞儒所对笔墨客长物虚寻疎比僧还君不用君莫怪绮牕办得千金买谁与移根到草堂他日风来听天籁

烈士

烈士死知己交情重同心反眼如不识怨深恩更深忆昔邂逅初一诺百黄金口血顾未乾旧盟何许寻

景卢自右史假北门出疆再用前韵

汉节螭坳出青毡映父兄天方摧劲敌人已望神京使指今兹重边尘定可清归来陈口伐莲烛问严更闻应贤景高文特少张景孙同客景庐官舍

使回亲旧集虎穴问穹庐半夜柝喧马高秋盘进鱼真成聚东井谁复话南徐底事桃源客新来书也踈

左举善求草堂诗

孤山佳处着茅庐饱看烟云自卷舒莫向淮南恋戎幕松关恐有絶交书

次韵景裴赞喜农扈之除

北固金焦顾盼中裴回於此再踰冬徒劳金谷供诸将未有田园问老农且喜边亭罢区脱不须水战习蒙冲九卿已媿班行忝敢向明时叹不逢

答木縕之用前韵见寄

魁星秀句挟东风便觉阳春变盛冬媿我供军济绹灌美君汲古到羲农北隣再讲衣裳会京口今为冠盖冲已具扁舟勇归去粲花清论度难逢

得江楼

官事何时了凭高思豁然逐江开北户望岫顿修椽繁卉浑相亚新篁便可怜归心入春梦已遶故山前

花信亭

解报花消息江边有好风吹香四时别问讯几人同梅坞难藏白桃蹊岂借红但能长检校定不酒尊空小雨同裴弟深甫坚上人登新亭次韵

移梅种竹趁阳春举目江山发兴新曲檻疎牕那草草飞檐碧瓦已鳞鳞鼎来好语酬佳景更有高僧话净因步履踟躇乌亦喜不嫌风雨垫冠巾

春雪再作戏成絶句

常年穷腊无一白盈尺冬来已屡书?事天公太手熟又同春絮到堦除

盘洲文集卷四

卷五

钦定四库全书

盘洲文集卷五

宋 洪适 撰

诗五

使北道中次韵会亭

平野风烟濶孤村父老存薄云低故堞落日逐輶轩分裂时云久澄清敌未吞春光满花柳天道竟何言

过谷熟

玉帛齐盟亦可寻东风着面客尘侵隋堤望远人烟少汴水流乾辙迹深桃李不言应感旧山川无主祗伤今遗民久厌兵戈苦辟谷谋乖负此心

次韵马上偶成

天遣祥风扫塞氛越疆輶传礼仪新御戎可鉴秦无策规国谁夸郑有人鸣鹤九臯闻彻响翔龙千载仰攀鳞垂鞭日日陪清话谈笑成章泣鬼神

次韵车中倦吟二首

旧国于今作两家邻翁有酒不能賒明朝又逐归鸿去祗有尘埃满一车

叱驭宁辞历险难投戈且幸迺遐安羶车轩簸长危坐恰似舟行八节滩

次韵初入东京二首

乾坤正欲稔天骄会见降兵歟圣朝蓄锐乘机先自治莫令武库五兵销

五门双阙未央城碧瓦朱甍云雾生真主南巡正尝胆从今瞻仰泰阶平

过黄河用上介龙深甫迁居旧韵

风埃如雾满川黄马上朝来识太行水浮浊河桥甚壮沙连远塞路何长皇华复讲衣裳会京阙
今为瓦砾场夹道桑麻过千亩野花时有一枝香

絕句

宣防瓠子挠西京向者河堤役不宁边骑任教流就下始知谈舌悞朝廷

次韵北使邀观常丰湖

一派澄湖何处来鸣榔渔子聚还开主人甚顾他乡客莫使归途欠一杯【此处欠一杯盖北使语】

次韵初望太行山

层峦逾碣石形胜镇神州可惜羊肠险今多虎踞忧天心端有待人力岂能谋未老如凭轼壶浆为曲留

次韵伊洛道中

万里修邻好羶裘不乱羣边烽方两解春事已平分发轫鸡三唱挥毫酒半醺问途殊未已返顾羡归云

次韵汤陰寒食遇雨

殊方遇寒食节物负年华小雨偏宜柳轻风未落花见????如隔岭对月共忘家俗重之推庙谁祠万里沙

次韵讲武城

汉鼎三分霸业成并吞犹未戒佳兵故城四壁存陈迹荒冢千年断乐声何必枕戈防诡计岂容横槊窃诗名我来吊古停车辙堇上农人也辍耕

次韵赵州石桥

访古汶河上聊忘道路劳仙踪尝策蹇海怪或镌鳌济远徒枉小凭虚乱石牢何时冠盖集题柱共游遨

过中山

三关标重镇自昔护边陲观者堵墙立纷然帘幙垂欲谋千日醉恐悞十旬期可喜中庭月何妨尽一卮

过保州

艺祖粉榆社唐人保塞军百年邻毳幕今日聚兵氛故老垂黄髮妍姬艷彩裙白沟才一舍何计可中分

次韵早行

夙驾星光动徐行雾气迷塞鸿翻月去边马向风嘶柝静谯门晓轮欹沙路低颇思眠蕙帐枕上听邻鸡

次韵得保州老张瓦研

毛穎传既成陶泓名不朽陈楮接武来论交篇籍囿千年铜雀台瓦解沦坤厚何人澄其泥颇能髣髴否龙公天上客金兰幸同臭结束万里行聯翩五旬久清谈落玉麈痛饮尽金斗咳唾珠玑粲挥翰不停手穷边得佳硯可出老吕右瓦缶莫雷鸣龙尾羞牛後

次韵保州闻角

觉来屈指数修程历遍中原长短亭谁向城头晚鸣角北音嘈囀不须听

北音嘈囀不须听整顿征衫待啓明已把哀笳变清角可伤任昧杂韶英

次韵梁门

双垒依然柳作陰故疆行尽倍伤心时平且得无争战苔上戈枪卧緑沈

次韵白沟河

唐余画壤媿鸿沟西闭关门汉道柔一自旄头入京洛至今泉水不东流

次韵回程至涿鹿

回首燕然日再西一杯相属使輶归残花媚野不妨好倦鸟投林自在飞可惜光陰销客枕不嫌尘土染征衣大明退直清和日已约梯云访翠微

燕馆日餽得四鴈笼之以归

提携乘鴈脱庖丁等待他年羽翼成
月摩云须有便莫教更作不平鸣

次韵杨花二首

桃花开落不同时燕子衔泥相伴飞
若向章台问春色可无清泪湿征衣

官路风轻落絮迷望中高下杂游丝
糝氈拟雪春无际只有骚人尽得知

再至保州

再入中原境相迎有暮鷗柔桑新迸叶
高柳细吹花乱後人烟少兵消雉堞加
指期淮可渡宁叹在天涯

次韵再至中山

路指中山国人归析木津终风震檐瓦
细雨压车尘落纸诗章速开尊酒力醇
无功惭报国来往漫劳人

次韵中山雨後

好雨连宵鸠唤晴晓行襟袂有余清
远游朔塞殊风景梦到东阡看火耕
红退桃溪三月晚綠添麦陇一川平
纖尘不逐车轮起喜听驱驴叱马声

次韵村店得牡丹

花品称王擅洛京朱朱白白莫齐名
相逢河朔春将暮半吐檀心若有情

次韵陈留闻鷺

恰恰啼莺马上听凝云欲雨晓寒轻
满郊碧草皆春色祇欠山光与水声

次韵宁陵憩驿

野外人声寂林间鸟羽翻朱樱喜堆案
青杏助开尊故国多荒草遗黎有怨言
雨余尘土静不复污归轩

次韵南京道中

密叶成陰行路寬鳩鸣鷺噉足开顏半
涂泥滑夜来雨数片云飞何处山薄暮
每寻樽俎共殘

春能伴节旄还尘襟好濯西湖水偷取禅房一日闲

次韵游臞庵不果

水纹如縠送归船渐近觚棱尺五天适意蓴鲈公有兴寻盟鸥鸟我无缘远怀并轡穿红皱近阻携筇欸碧鲜却待湖山最高处醉中一笑挹臞仙

寄别景卢

禹穴遗书不可寻坐看緑叶再成林千岩竞秀非吾土三径就荒劳我心谁是周人思召伯今无老叟出山陰台堦稳上添花萼时倩来鸿续好音

蓝宪遣人往吴门移洛花未至而去

雒京隔絶花难得茂苑移将信已通世事好乖犹献鹄雕栏不用怨东风

新檀巧斲列东西准拟看花倒接?交臂失之端可笑傥来外物尽难期

三春桃李家家有不费阳和特地恩名品异芳天亦靳未教容易到丘园

登芝榭见景卢所增月台

台榭相望闻语声茹芝观月有余清旁连小隐分三径细数修篁限一城日日杖头思径醉年年铛脚玩欣荣谁人知我归与乐趣此登临未憚行

许倩报白榴已得玉茗未谐以诗趣之

万里移根安石国何年傅粉未知名须邀玉茗来岩壑便结琼花作弟兄诗客定疑天外得园人已办腊前迎东家阿措休相妬不学穠粧照眼明

次韵景卢喜得安州牡丹

洛中花信已沉声泾渭宁分浊与清近出黟山空接壤【徽州虽出牡丹吾乡亦难致】远来安陆【阙】连城虚坛仅免游人间浪蘂从教着处荣更欲丁宁新芍药【维扬新送勺药五十本】莫夸多少便横行

次韵景卢野处解嘲之什

地偏不接市?声古木参天鹤唳清台榭迴穷千里目诗章突过五言城花移琼树真无敌酒换

金貂未足荣灯火归时笙管作解嘲何事有歌行

再赋

幽壑藏云水作声纫兰入室好风清【云壑兰室皆野处所名】高蜚便有飘飘意进筑如开
荡荡城百尺楼成同日涉四时花发匪朝荣园池如许谁言小但【平声】放刍豢雉兔行

酬景卢赋圃中种橘移花

瓮头玉友已销声小试山斋百未清十客对花休避席千奴呼橘拟专城微霜到处叶未落小
雨移来根易荣情话团栾亦终日坐中惟欠十般行【景孙有小鬟解作此戏足日不至】

酬景卢谢菊

涉秋无复滴堦声夜雨随风尘已清平日爱山营一壑老来学圃列三城园夫种树元无术篱
菊分丛独晚荣蹑屐问花兼问柳不须乘橈可泥行

答景卢

鴈翅齐飞有隼声文章何止赋华清谁教短策长寻壑不拥高牙且典城台省向来非独冷身
名此日已俱荣盈旬诗轴牛腰大抱牍须同饗虱行

病酒

三日惟闻煮药声一中可怕圣之清移花种竹已得地逢酒当歌须闭城远避霜风严北户静
看朝日满东荣双螯退步输年少谁与抽琴作蟹行

答景严

向来代马沸边声曾出良筹助廓清六载倦游潜楚泽一枝同折记栾城北门西府仍班缀後
鴈前鸿媿宠荣两鬓星星吾老矣看君重上赤墀行

景严送冬杏

苍头呼梦杂鸡声蕊杏诗来句转清独傲风霜爱冬日不随桃李媚花城一枝得得能相对凡
卉纷纷孰并荣大队开时春且尽醉吟当续丽人行

景卢送瑞香

翠幄藏春巧寄声熏笼织锦晓天清幽香端是花中瑞仙????初来尘外城酒海何妨三雅进鬓云谁称一枝荣雨来顿使邻墙远不到阑干深处行

野处有诗羨山居小隐之广而有拓地不可之叹

败叶翻风策策声山根可掬石泉清东隣美舜久成坞北陌新柑小筑城台在家边来更好地连郭外得非荣层楼纵目无穷景安用垂涎杖屨行

再赋

厌听朱弦裂帛声携锄斲壑赋临清赏心尽得难并景舒足休嫌踏破城夜璧朝琼宁独乐春兰秋菊岂争荣闭关不使高轩过只许渔樵为辅行【周智光镇涪州尝日夜眠不敢舒足恐踏破长安城】

忆城东来禽【为景孙弟】

远送来禽我独无後来才得两三株隐园野处花难比祇恐人评棣萼图

忆古城柿【为景陈弟】

果园幽僻少能知丹柿乌桕手自移欲学郑?书坠叶何人解有寄来时

忆隆庭竹【为魏彦成】

闻道隆庭竹满园许分苍翠长儿孙看看冬尽无消息始信庄周是寓言

忆吴中洛花【为蓝叔成】

书邮浸失鳞鸿约栏檻长教蜂蝶猜待拟子虚乌有赋东宾仍遣耳孙来

戏陈孙二弟

城东卜筑有期无须为檐檻动百株可忍非时归?下合尖何似助浮图

古城栽种畏人知定是根盘不可移【酉阳杂俎木中根固柿为最俗谓之柿盘】车载斗量稗贩走果纲却有入州时

傍囷经营杂果园翻愁他日逐王孙不如种竹招风月此意难逢俗子言

林居草创名花少柳径苔生过客猜
不管空言无实惠只嫌巧取近嗟来

再赋

外求他壤曾攀桂近舍家园尚守株
待得枝头如赤柰【广志林禽花似赤柰】
却来看我百花图

圃在前村若个知山逢愚叟会须移
前言戏耳君休怪七絶成陰自有时【杂俎柿有七絶】

何人种柳成门巷几处看花到子孙
【高适诗门前种柳成深巷罗邙诗买栽池馆愁无地看到子孙能几家】
且尽山斋一杯酒此君相对已忘言
长惭无地起楼台覓果寻花颇受猜
且向园林聊寓意不教丝管逐人来

送景卢

涉世难防犬吠声放怀安可俟
河清昂霄莫辨千寻木凿牖聊看三里城
丹橘黄柑随处好美花香草逐时荣
晚来寒雨催归骑酷似邹人接淅行

送朱叔召归吴中

长忆吴中鸣橹声风高月上水波清
旖旎掩映花成聚笠泽微茫烟若城
十载相忘存梦想一帆此去喜归荣
老来无复蓴鲈会尚看骅骝得路行

景孙以妇病稽赏柑尝蠨之约景卢以诗诒之

郑庄好客底虚声药裹关心兴未清
应恐被围因鲁酒也防完璧弃秦城【谓德兴二客】
双螯弗讲连宵会千橘谁教满路荣
见说高台新断手何如自索玉杯行

戏景卢

千橘亭前莫听声岂无邺酌和汾清
【齐武成勅河南王曰吾饮汾清二杯劝汝邺酌两盃】
轻裾长袖闲列屋碧瓦朱甍高照城
台上金波催夜集楼边玉树待春荣
赏花斫鱸言犹在还被题舆诮却行

盘洲文集卷五

卷六

钦定四库全书

盘洲文集卷六

宋 洪适 撰

诗六

隆庭竹至四絕句

忆昨分抄种树书三荆今古美同株闲将草木供诗戏待把渔樵足画图

竹里巧传幽鸟语月台高视客星移乡园何幸立分鼎鸣鼓铦钟乐圣时

斑箨远移湘岸种猫头亦是渭川孙百金得诺今无恨千亩封侯不在言

装景松篁浑可喜忘机鸥鹭不相猜南牕情话有时尽唤取青州从事来

答景卢久陰遣闷

几日思君环佩声方冬天宇未澄清冲寒也到临春阁处暗如登却月城整顿建瓴愁雨作商量设醴卜花荣锦囊不用诗排闷起看朝云亦倦行

喜小隐新得山茶

芳园封植阅年华异卉搜求閤小车不羡竹林生石竹独来茶坞补山茶游人认柿枝头子归鹤求雌叶底花我去临川寻玉茗遥将白雪映红霞【有人以山茶子为没蒂柿者】

答小隐惠山茶

何处仙官萼绿华鞭鸾独御五云车来从月窟曾依桂分种盘洲不碍茶枝耐岁寒犀换叶蕊藏朝雾锦羞花红颜不逐东君老须着频来鬪脸霞

答小隐闻野处开尊

遗我双鱼集棣华尚疑信马误随车丝声自是不如肉酒薄须知大胜茶翠袖明朝看倚竹兰灯昨夜报开花饮阑同步荒台月古堞危亭见绮霞

答小隐喜得白山茶之报

素质宁嫌潘鬓华来时应有【阙】 车赋传山谷文堆绣种出麻源韵胜茶不向桂宫藏玉兔
合横蕊观俪琼花冥摅未获诗先作注目轻帆泝落霞

忆东阁手植花木用雍陶过旧宅看花诗韵

分根徙核望春栽曲径幽蹊手自开今日成林浑着子花时不折一枝来【雍诗云山桃野杏
两三栽树树繁花去後开今日主人相引看谁知曾是客移来】

玉茗未有耗而小隐作诗以琼花为二絶当专美野处可也

休论官业出金华共乐家林鹿挽车何日寻春携漉酒有时留客试搗茶望梅止渴宁非梦却
月横枝始是花祗恐偏枯慚好句空教步障锦如霞

和景严送方蒂柿

万株红叶咏光华【昌黎咏柿诗正植万株红叶满光华闪壁见神思】嘉实堆盘走紺车【
柿之七絶其一曰嘉实】方蒂宁同牛奶柿朱唇应笑鸠【上声】盘茶园官急送须足蚩童
子争观多眼花罗列林珍生饮兴讵思辟谷更殮霞【谈苑鷲栗子诗既似柿牛嬾义如铃马
兜笑林有邻夫自外归见妇吹火赠诗曰吹火朱唇动添薪玉腕斜遥看烟里面一似雾中花
邻之丑妇亦求夫作诗遂改作吹火青唇动添薪黑腕斜遥看烟里面一似鸠盘茶柿有青者
但堪打油故借用】

答景卢怀旧

了无梦寐到京华来往园林整钓车缓步竞移霜後橘清谈旋碾雨前茶虚名长媿称三凤旧
事休怀判五花共把诗筒销永日喜君襟韵秀朱霞

园中观种树

望中赤叶渍霜华林下徐行便当车好处见山仍见水兴来呼酒不呼茶旋移朱橘添卢橘更
拣红花间白花出郭最欣尘事少饱看孤鹭逐飞霞

答景卢报月台将毕工

新筑崇台欵桂华凌虚如跨白鸾车西瓜来自余吾水远物谁询悉里茶不减平泉书草木更
寻南部録烟花落成有约【阙】 讲舞袖还看举彩霞

答景严咏山居夹道种松

投𦏧归来发半华居民怪我出无车树当樵径频争席地接禅房好覓茶要使行人长?樾不教侍女独司花十围五鬣他年事会见摩空薄【读作博】绦霞

和景卢饯朱叔召往宣城

与客窥园春未华也须日昃始回车松间共赏猫头竹酒半先尝雀舌茶云覆踈桧香起篆风侵密坐烛吹花双谿叠嶂催行色佳句重吟绮散霞

答景卢

落落乔松说岁华【阙】霜骨想专车沦脂此地能和药结实殊方却入茶山客拾钗分翠叶野人敲粉聚黄花翛然一径穷芝岭晓见飞云夕见霞【顷年官池阳见九华山有数松亦结实乃梁时胡僧移来者】

和景卢雨中叹

工徒滞雨望朝华好倩泥蛮指日车茉莉怯寒先近火瑞香蒙润免浇茶莫嫌云暗青油幕尚恐天开端木花待得严霜变陰翳便须酌酒赏金霞

和景卢喜晴

共赋往时杨柳华戍边聊出武刚车天公欲遣风催雪僧舍方疑烟湿茶巡圃观橙无坠叶隔溪移杏恐伤花举头忽见云间日急草诗章庆半霞

闽商货千叶牡丹疑其非而却之并怀蓝宪所许

星文陨石应皇华鹊语参差雨洗车忽报商人絨韦筐初疑闽产杂官茶栽培况乃三冬月真贋难分千叶花宁使双坛且虚左空吟轻日护香霞【罗邺牡丹诗门倚长衢攢绣轭幄笼轻日护香霞】

和景卢咏新得歙县牡丹

旁撝嘉卉对韶华宝玩明珠【阙】照车可使东坛无蔓草如游北苑得名茶【阙】多炊黍准拟襟期共赏花醉语美人无【阙】不教拖帔泣归霞【李贺牡丹种曲美人醉语园中烟又归霞帔拖蜀帐昏】

野处送百结花

盘屈枝仍垫葱青叶未稀双衔疑凤带百结类鹑衣弱骨长连锁轻腰孰解围若教花自在应作彩云飞

野处送金灯花

银灯未茁有金灯翠叶森森比劒棱待得花光无断续却须拈出问邻僧

和景严咏冬开木犀

桂枝冬更好浪蕊到今稀逸韵催吟笔幽香傍舞衣月分千里影风突百花围倚策山亭暮寒鷗亦倦飞

和景严约赏木犀

蟾宫桂冬开自昔稀犀通一点骨蜜染六铢衣樽緑拚深酌炉红渐可围赏花宜卜昼莫待晚霞飞

喜景卢有落成琼楼之约

地近篮舆便心清俗事稀檐花琼结佩牕月练垂衣松竹添三径溪山豁四围落成歌管集仰首暗尘飞

和景严咏新得葡萄

名传马乳久物比【阙】
醪醑架【阙】铺薜荔衣孤根临水窟踈蔓接篱围急酿凉州酒西园盖欲飞

得洛中牡丹

洛花天下选千里【阙】
园望岫方絨恨凭莺【阙】践言羣葩俱退舍胜日便开樽莫惜诗偿债真同香返魂

蓝宪所送牡丹道远失时颇多枯槁

殷勤人有信惊喜得花饶可惜三冬晚来从千里遥根荄愆润泽芽蘖顿枯焦傥有更生路宁辞楚些招

答景韦赴调还家见寄

迎归乌鹊竞传声摆落尘埃襟宇清薪桂岂容留帝阙幙莲且得近乡城眼边触处梅争破陌上分行柳向荣如约速来春可探肩輿须去静中行【韦弟乘车频有可笑故云】

许倩遣舟送花栽

双舟十日涉长湖甃斛筠篮且百株可喜石榴初变白更惊玉茗不施朱临风含笑劳花使映水分行拥木奴装点园林娱杖屨好来一醉倒金壶

余得圃芝山之麓去春始治畦径名曰山居中为芝榭四楹其秋双芝产於榭南今夏复得四本而盘洲亦有其二因刻诗以志之

山中曾有采芝仙此日灵根讎偶然题柱漫将诗纪实凭栏真共酒忘年英华可是丘园瑞造化元非雨露偏留与山居作嘉话未甘草木羨平泉

双溪堂

负郭藏嘉处清溪夹岸流风漪前後起云态浅深浮入户松横岫开牕橘满洲心闲身自在【阙】事底能留

穢斋二絕句

野色山光列画图坐看渔子入菰蒲恰如放鷁穿三峡何事航家问五湖

青翰不动柳陰多桂棹无声鸟语和有此孤舟寄丘壑可怜平地起风波

侶鸥亭

憩策新亭上波光入坐来鱼游能自乐鸥狎肯相陪风快尘襟豁云深俗驾回寻盟须日涉未怕落霞催

小隱芝草

芝丛盈百见闻希不数嘉禾连理枝紫盖堆云光点漆金茎蒙露色凝脂一时竞秀园林胜十载深藏天地知急办轩楹尊瑞物泥封诏墨有来期

招二弟赏盘洲双头莲

何须艷质鬪鲜粧并蒂红蕖本自双却恐花飞成造次急来相就倒甃缸

紫薇花以六月至自溧阳在道已五十日今有花满树因示二弟

六月炎天千里移不期繁蕊便盈枝向来浑是西垣客忆得看花草制时

九日欲为云松之集以病倦而辍

半秋翻药裹九日负云松黄菊从他好清尊不我容零丁怜败叶旁午羨游蜂今古登临恨云迷五老峯

景卢约赏朝天菊不克往

暮节真无分头风祗自知朝天虽有菊向日不如葵久旱千株槁深秋百草萎吾衰亦相类饮兴谢东篱

除夕

岁尽春虽浅更长夜亦阑枕边鸡送晓牕外鴈冲寒学圃心常在筹边力所难老来惊节序那复问椒盘

观园人接花

植杖看园吏挥斤接果栽夺胎移造化类我借根荑一似雀为蛤能令桃作梅天工待人力信手便春来开岁三日有夜雨屡闻雷声继以大风晨起飞雪已盈积景卢作诗即事次其韵

旱灾已叹失秋成春到谁教夏令行风阵骤来收雨脚雪花未集听雷声陰阳改变才俄顷冷暖乘除若晦明待向斜川会邻曲占晴须问蜀君平

雪後游盘洲

书事斜川日月同行年过四逼衰翁纵情自洗和陶笔乘兴谁开访戴篷梅萼仅存难聚雪竹根未稳不禁风莫将野趣逢人说水上轻鸥西复东

穰齐观耜

城下经营二顷田倒囊不惜买山钱一犁注目雨初歇三径藏身地自偏乞米帖来须领略相牛经在与周旋尝新指拟翻匙雪早魃诛夷胜去年

景卢新治西园而亭榭未立以诗趣之

斫新曲径治西园野色春来已可观
便好作亭供客醉望中流水有时乾

答景卢和篇

致君无术合归田谁敢贪荣食万钱
且对清尊希北海最欣别墅接西偏
转头麦陇龙工往缓步花蹊蚁磨旋
辛苦三农营一饱莫教牟贼坏丰年

上元日圃中归

春风环柳岸夜雨湿沙痕种竹期新笋
移花护旧根身闲贪独乐舌在戒多言
是处无灯火荒凉一上元

次韵梁宪盘洲之集

轻风吹雨称行春丘壑装怀我辈人
照水轩牕如进艇穿花旌节屡移轮
携壶【阙】讲三杯酒挥麈曾无一点尘
明日兵?寻故事已教园吏拂华茵

再和

於越归来三见春买山学圃狎渔人
非嫌厚禄轻捐印所畏空餐咏伐轮
时运可惊如过隙人生何苦不同尘
明年此会谁重讲唯把书邮问鼎茵

江守置酒盘洲张贰卿两宪及景卢同集时江新【阙】司

皇华分鼎坐添春隐雾巢松三散人
半月陰云浓似墨今朝晴日大於轮
不辞多酌娱浮蚁何用清歌落暗尘
归去池塘入新梦句中芳草醉中茵

再赋

到处争持麴米春闾闾花底湊游人
同盟非是新倾盖巧匠谁云老斲轮
倚竹岂无人拾翠凌波谁想袜生尘
後期直待荷花发欲唤轻裾上舞茵

醉中三用韵

小车追逐赏光春花坞行盘走隶人
水面落英如濯锦云心初月未安轮
今宵同举盈觞酒後夜还凝满席尘
倒载归时童稚舞莫教驹哄淬冯茵

雨中排闷

生怕花飞减却春半句苦雨恼幽人山房挂壁有双屐村径冲泥无只轮但见渌波侵碧草不须皂荚去黄尘拥炉更【阙】转觉寒威逼坐茵

次韵梁宪再集盘洲

春风步履共优游【阙】园庐匪拙谋罗列清尊资啸傲安排好语待赓酬【阙】香草装三径恰恰鸣禽想十洲玉节寻盟端不【阙】便回天上近凝旒

浮杯

南北芝泉一涧开穿花度柳势滌洄不须元已方修禊才遇良辰便泛杯行止岂由人智巧沈浮长与客惊猜急流一去谁难进却有先游殿後來

送吴远泽赴南宫

文压秋闱擥桂华一鸣天陛稳乘槎归来须踏盘洲路要看荷衣醉藕花

九曲有感

忽忽光陰转駸駸华发添迹陈三可叹心赏四难兼

岁三日插柳

欲教垂柳匝池台寻覓长河处处栽待得成陰身益老攀条能得几番来

次韵梁子正咏棕亭

翦得栟榈制数椽绣衣拈出少陵篇倚檻见水幽情畅驻屐迷花诗兴牵便觉茅轩俱退舍若谈竹室不同年满山所欠青青药且趲流觴集醉仙

盘洲文集卷六

<集部,别集类,南宋建炎至德佑,盘洲文集>

卷七

钦定四库全书

盘洲文集卷七

宋 洪适 撰

诗七

梁子正有诗谢牡丹及聚仙花次其韵

天教国色傲春华不肯争先伍杂花西洛尘埃长太息名园今日属谁家

痴坐林间类守株一年春事已无余直须九曲添清涨洒扫?亭进一盂

玉蕊茸茸映四筵团圞如集饮中仙下方簇蝶非俦匹上比琼花难并缘

病中忆九曲

新穿九曲望时霖水到渠成病已侵见说小舟穿柳岸那知清涨入桃林五旬药裹长经眼几日荷花复赏心梦里亦知行乐处老来尤更惜光阴

六月郷城不雨祷赛无应得建康书一雨连半月至以望日句晴感而有作

苍苍太手熟岁岁厄吾乡千里均州县三旬殊雨阳谁云不私覆乃尔分此疆遂令远游子转盼生炎凉江鸣玉遗苍梧二苍鹤其一病两日而死陆鲁望诗云医鹤自须监吾乡人医尚无良手况禽医乎

病骨摧颓警露难草埋长胫委苍翰吾乡尚欠肱三折况有禽医为一看

八月下旬观邸报二絶句

黄卷漫穷年天梯欲上难闻阁听小子竞欲裂儒冠叹息东坡老聪明误一生不须多识字捷径自横行婺源乃歙之剧邑素有汤鼎之谤顷治此郡俾邑官作止沸之亭而不果吾宗应贤下车而风俗易书来求扁因为赋诗

琴堂少值烹鲜手壮县空遭沸鼎名止火絶薪俱下策风移全在长官清

宗人应贤婺源张氏之壻也治邑清介一无所私其列岳诒书郡幕至以邑尊称之其里谚如此戏成絕句

自昔为门壻于今是邑尊秋毫无假借清话与谁论

朱叔召遗文官花二絕句

幻出荷衣点雪衣更将龟紫换牙绯人中巧宦谁知此好向天街插翅飞

綠心变却初时白紫色由来昨夜朱学得文官何足道但堪花径骇僮奴

再赋

不用风人怨綠衣身兼魏紫与潜绯司花真为文官地可忍春残一片飞

解褐方闻上玉除宠光转眼叠金朱大夫不博乔松贵嘉橘千头也作奴

景卢蠙洲

芳洲编地志老蚌隐澄湾轩楹今清絕全胜合浦还

蠙桥

堤长交柳?桥狭束荷香掩户回逋客凭栏狎漫郎

索笑亭思景严二絕句

往日江梅发巾车数数来自今花索笑不复共銜杯常棣春来减人如折脚铛倚栏思旧事老眼泪纵横

次韵景卢赏梅

曲坞梅藏白东皇解出奇不嫌歌板閤直与酒尊宜倚竹盟三友凌风粲一枝清标何水部千古说能诗

石鼓诗

天作高山太王荒鸞鷟一鸣周剪商郑鄘卜年大蒐讲诸侯敛衽尊天王六月中兴绳祖武平荡犬戎恢境土石崖可凿诗可镌千载神光薄西汧橐驼挽入大梁都璧水湛湛河出图中间

两鼓备章句日惟丙申不模糊左骖秀弓射麋豕有鰭有 君子渔光和石经屹相望诅楚登峰非吾徒辛壬癸甲鴈分翅桥门观者堵墙如星沉东壁干戈起首下足上天倒置景锺糜碎九鼎飞王迹皇风吁扫地羣凶扛石徙幽燕兵车乱载包无韞敲火斫角小小尔为基础为砧多历年宣和殿中图复古冠以车攻次十鼓韩诗欧跂尽兼收云章剖判定鱼鲁先君辛苦朔方归文犀拱壁弃弗携一编什袭自鐫秘更有司马凤翔碑我生不辰今已老岐阳三雍身不到匆匆奉使接浙行在耶亡耶问无报整齐篆籀饰牙籤简撮篇咏劳穷探致主有心歌小雅江顔无术下登三

丙申腊二十五日落一左齿

行年六十已中枯雪映衰髯岁至除一齿骤然离左辅益怜大嚼远庖?

野处孔雀为狸所毙

远程万里起南溟文采葳蕤掩画屏展翼来朝金翠晃竦身轻举鹄乌停园中但有辟蛇法山下相望瘞鹤铭野鹭家鸡随处有孽狐何事独淫刑

过濠上

心随溪水清目逆岫云生不憚躡芳屐桥南鸥乞盟豹岩之北修竹数亩中有丛冢数十百处皆绍兴末年所寄予得此地先定规橰某处起亭榭某处植花木七八年间成畦迳矣所寄之椁愿移者从之不强也作噩之春有姓淡人来啓菑【阙】日携插掘土数尺败棺俱在朽骨为土所蚀颇亦不具皆包裹而去後数日忽诉于县于州于外台追问证治踰月始定今不复塞其故穴欲使孙曾知之故作此诗

未央长乐宫中有樗里墓沉沉天子居咫尺穴狐兔乃知古圣人如天覆下土虽袒裼裸裎四目曾不顾贤哉季武子杜殡迫西庑堂皇步武接松檟暗锺鼓桃茆不屏除刍灵许来耐忌讳後愈多今人不如古曹瞒好发丘凶德孔璋数掩骼埋其骸人当事斯语我老得归田买山因学圃鬱鬱琅玕林丛冢不知数岂忍去枯骨为我展杖履恣其笋侵置不使种瓜瓠花木列四旁亭榭亦回护数年畦迳成或徙或如故尚有犷悍人珥笔巧诬诉无言事自明有物衆所覩旧圻今弗堙朽木且支柱尚恐妄男子轻传市中虎书事示孙曾无心覓佳句

席上见姚泉寿母诸子求诗

潘輿随五采三釜古今荣兰玉盈堦砌追攀千佛名

董伯鲁以诗送川海棠用韵荅之

花栽趲上春重趼疲双足何日对仙姿分题同刻烛

次题景卢题龟巢

拙速谁云胜巧迟新亭结罢得成奇细看远水兼天净可但中秋观月宜出郭自欣三径乐枕流今有几人痴巢莲千岁同藏穴一笑泥涂曳尾龟

三月十六日龟巢观月渭师携宠同赏後两日大雨复作景卢有诗同其韵

潜鳞故故上钩迟翠?凭栏自一奇半夜醉归闲有趣一年春尽事如宜盍簪何惮再三瀆览镜堪嗟六十痴已办寻盟临斫鱠不将可否问蓍龟

四月十三日流杯次景卢韵寄渭师

今年无好雨曲水未胜杯谁伴山翁醉难令俗客陪青苔迎马入绿柳【阙】步濠梁上垂缙更乐哉

流杯同景裴韵

三春少雨未行觞槐影交加更漏长半夜水来山涧满四檐竹密酒尊凉新亭方作龟巢叶画栋何妨燕语梁满引三觥一醉老来真个惜时光

流杯次日连雨渭师有诗次其韵

入夏浓云日夕昏举头烟雨暗前村风随重客清葵扇月为佳人射翠樽依旧建瓴欹屋角几番携杖失溪痕小桺已在纱牕下欲把明琼看倒盆【赵侍儿覓小棋局次日与之】

再答

投老无能千虑昏归田【阙】令村长因步月成三影难得朋云共一樽水涨溪桥孤钓隐雨侵山径洗鞞痕寓公在此宁黔?会有容光照覆盆

景卢开尊阻雨展日复用前韵寄之

逐妇鸣鸠急定昏不堪烟霭弄千村掩关尽日资筇杖改席何时对瓦樽云暗松皮多节目雨伤梨颊有瘢?溪神若也心无事迎出常娥照玉盆

雨中排闷

饭牛戴笠牧云昏掩得斜阳过别村户外涎蜗行半壁牀头渴鼠侧空樽花残莺老浑如梦水到渠成不见痕天意未晴人未饮家奴欵曲办粃盆

再赋

月在云中破镜昏几时清影散林村杖藜难去寻渔艇洗盏无因续蚁樽竹叶弄风添秀色榴花带雨露啼痕不如坐卷珠帘醉唤取佳人笑拊盆

庚子山居采茶有感

忆昔采茶时雨後山蹊湿鹰爪喜盈?𧈧眼思朝汲归路取盘洲下吴行踪急珠汗透裳衣更换登梯级徙倚曲栏干鸣鴈圆沙集晚景不胜春寒气潜相袭诘旦傍装台鼓侧人扶立輿疾望医来谁煮青黏汁举桡念齐眉幻泡何嗟及重到故园门不忍携筇入引领顾前丘空对旗枪泣

一春置酒必苦风雨今日幸晴而景卢有行色

一春风雨厄游遨此际开樽始解嘲恰恰鸣禽藏柳陌欣欣嫩叶迸花梢离筵欲动愁分袂胜日何妨剩出郊燕寝香凝公事了频将书札问龟巢

次景裴席上韵

桃李纷纷已半春海棠睡觉晚粧新龟巢剩有千般景琼报浑无一点尘酒未举杯风逐客诗方拈笔雨催人从今只拣晴和日草草杯盘勿厌频

用景卢诸公诗轴韵招监司太守

浅白轻红笑倚门何须雪夜忆前村韶光定入诗人句胜事难逢俗子言风振绣衣须命驾云随皂盖欲窥园人生易老愁春老问柳寻花故事存

景卢数日枕疾复用前韵

半载悠悠只闭门不知红绿遍千村山川满目供衰境桃李成蹊出怨言可惜花飞聊洗盏何期雨作阻行园车公不出须重讲检校芳菲心兴存

答景裴

春来啄剥少登门澍雨慳风笑我村桥上垂纶装好梦花边倚杖记前言长杨美竹虽当户语燕流莺不到园此会明年千里隔诗筒犹有置邮存

席上遗景卢

白发归休【阙】 生棣华酬唱得娱情双旌欲指闽中去三径谁同月下行蕙帐风清知鹤怨
苹洲波细忆鸥盟新坛留【阙】 人千里【阙】 相思淚睫橫

枕上示景卢

朱幡皂盖有行期暮景无情惜别离枕疾半旬乖语笑急风吹雨泪垂垂

南憩番禺北抵燕片帆西上驻荆门平生不作东瓠梦荔子丹时【阙】

荅太守谢牡丹

华髮归来不记春优游学圃傲江村已欣胜日临千骑漫折香霞佐一尊对竹便当寻水曲藏
花那肯效慈恩行厨若有真消息奔走畦丁急扫门【剧谈錄唐慈恩院浴室有鞞红牡丹一
窠千朶不使一见会昌中老僧漏言为朝贵强掘去】

怀景卢

菖蒲节近暑风高常棣丛疎月影交清夜不曾空鹤帐浮生何幸老龟巢酒杯独引今无侶书
卷闲开共苦抄想得公堂鳬鹭远须怀西坞欠诛茆

答徐守

改日开尊已十成冬曦烘地晚来晴江梅独报春消息应笑羣花太薄情

不教丝竹沸曾台促席飞谈怀抱开夜半梦回聊趣韵媿无好语答琼瑰

排闷

数日雷中雨凝寒向陌头出游闲豹舄危坐索狐裘怕冷杯常执扶衰杖屡投满园冰木稼天
遣阿谁忧

雪中叹

连绵春雪助凶年十地盈庭大可叹词客罢吟雷散漫园夫渐报竹平安鸟鸢腹馁飞穿屋牛
马毛寒病倚栏天意欲添人殍野四时玉烛古来难

答裴弟

常棣成陰慰暮年困人春雪好长叹闭门终日诗频和伏枕盈旬病未安已遣携锄移竹径更

思杖策整花栏饱闻冰下游鱼跃所恨双溪一笑难

忆昔

跨马春衢袅翠鞭垂纶圯下解鱼船霞飞绮散无踪迹依旧清霄月在川

寄景卢时往豫章

闻得茶蘼语牡丹蜂回蝶散恨春残西山柱笏晨光爽北海空樽夜漏寒徐孺堂中全下榻滕王阁外久凭栏归来已失兰亭集照眼榴花待细看

辛幼安稼轩

济时方略满襟胷卜筑依城乐事重岂是求田谋万顷聊因学圃问三农高牙暂借藩维重燕寝未须归兴浓且为君王开再造它年植杖得从容

盘洲文集卷七

卷八

钦定四库全书

盘洲文集卷八

宋 洪适 撰

杂咏上

芝径

金茎岂受尘三秀已通神不竞铜池瑞逢兰肯卜邻

种秫仓

种秫无多子犹胜避俗翁尽将供酿具不复用青铜

芝泉

美瑞山只管幽泉地脉通漱甘冰熨齿短纆走溪童

草塘

茸茸春草茁碧水涌方塘入梦无佳句看云忆对牀

鱼台

掩关麾俗子裂网禁畦丁台下鱼相贺溪边人独醒

兑桥

桥横桑下涧望处极西郊有客同飞盖何人伴结茅

泛杯？

酒进鸬鹚杓花随翡翠盘岩边多怪石岩下有奔湍

九曲

风轻杯荡漾岸曲水逶迤遇坎亦可喜倒行羞接？

？亭

乞得梧桐叶都将当屋茆青青夸药甲可怕杜陵嘲

一咏亭

有水足浮醴宁拘秋与春共将诗拟古不必语惊人

小垂手【九曲二名】

醉袖起如舞翩然三岛仙约君为石友伴我傲林泉

醒酒石【平泉醒酒石以水沃之有林木自然之状】

名高牛氏品地接燕儿窠有客图沉醉翻嫌石是魔

墨沼

凿地肖风轮洗云吞月扇败墨起缁尘山陰劳北面

既醉亭

酒半兴方浓甌空罍弗耻更看一筹输各尽三觥醉

溪帘

雨过溪添绿横澜自在流水精帘欲卷何处着银钩

可止亭

循除泉漱石改席酒分船到此须知止行前将坠渊

鹅池

路转左画方水来斜中矩不解写黄庭倚筇看白羽

流瀑

高坡势建瓴触石惊涛沸入耳转声清
庐峡参差是
苍卜涧

夹涧荣苍卜倚竹颜如玉溪鱼大上时
临流香可掬
菊蕊

夕英色衰落小摘尚盈襟错会离骚意
元无满地金
未利菊

化工将未利改作寿潭花零露团佳色
鹅黄自一家
双溪堂

溪光摇四壁瓦影落中流洗耳百闻寂
清心千虑休
?斋

随波堪泛宅因壑遂藏舟坐稳无维楫
任他风打头
云叶【双溪四石】

支机何代石风截秋云根一叶下人境
坐令台榭尊
啸风台

於菟啸空山万窍寒风出堤防飞将军
汉箭有神物
蜂房

石是蜂巢变蜂来有处藏不须开户牖
薜荔为穿房
磐矶

有竿不见纶无纶焉用饵终日坐钓矶
旁人笑儿戏
问柳桥

濡毫求露柱堕履望奇书问讯缘溪柳新条可拂裾

凤柳

春情百尺牵午影三眠过修眉漫成颦细腰谁类我

蓼岸

□蓼花如糝残霞照晚汀不教资麴蘖留得隐鷓鴣

碧芦步

津头晚风急欹倒一丛芦宿雁逢清泚飞来作画图

西许

春凭西许?夏卧西许榻待月最宜秋探梅还度腊

扁舟

非厌人间事不携西子游聊将去越意指此作扁舟

飞庐

浮家今得计举棹疾於飞一笑儿童舞芳莲当妓围

采莲舟

圣得三峯藕剜为一瓣莲着身犹不稳何用济长川

彩鷁

兴来飞画舸泛泛水中鳬绿皱移歌扇红鲜迓酒壶

饭牛亭

冬耕春复犁麦秀禾方插少放牧儿休莫教牛力乏

西畴

代耕荒幼学投老乐归田
卤莽人之罪丰凶勿怨天

土湖

波涛送客帆松竹围僧舍
野趣望中来西湖当减价

石衡【竹弟石兄出玉川子诗】

一丘封竹弟万石齿金昆
收拾甲乙品庄严可款门

有竹轩

前身岂汲直枉尺天所难
贤哉耐久朋结盟同岁寒

斑竹

帝子登湘岸临风粉泪弹
梨花多少雨点点透琅玕

紫竹

拾青容色混着紫宠光偏
幽迳留风月行多履易穿

方竹

体方如就矩干直匪从绳
杖有削圜厄提携先摸棱

人面竹

怪奇存相法妍丑出天真
此君无二貌正是葛天民

猫头竹

穹枝回凤尾健笋迸猫头
安得真致比勿为羣鼠羞

慈竹

义居传九世瑞物记三荆
何似同根竹春风一死生

笛竹

蕲产名天下含颿别样青中郎如一见应不数柯亭

箭竹

美箭东南出成林地不慳安边如有将寄与定天山

洗心阁

殢霞吞沆瀣一吸千顷湖默坐更深省心尘今有无

橘友亭

倚栏歌橘颂巡圃款甘林更待商山老於斯朋盍簪

绣橘

后皇权植物奴婢徧江干绣蹙一林橘高擎黄玉团

脆橙

谓橘不盈握胜橙颿进皮香藟难共捣遮莫蟹螯持

金橘【道州者】

朱橘千里变金弹一分增入口蜜相避怀归谁不能

罗甘

罗包肌理细霜颗辅车香封殖贵濒水踰淮非我乡

常棣径

已废蓼莪篇难荒常棣径步履不思归共看花弄影

花信亭

时时风报信处处雨催粧大賚一年景均输万斛香

牡丹

绮丽偏宜昼香霞独占春洛阳荆棘久谁是惜花人

勺药

名标溱洧赠根自广陵分所欠盘盂玉黄楼尽不羣

丹桂

无癖不誉儿有诗非责子丹桂几枝芳对之空颺泚

瑞香

紫苞杨柳叶奇絶锦熏笼香气闾襟袖清尊为汝空

白山茶【亦曰玉茗】

自读文成赋经营巧作难涪翁真溢美何似鹤头丹

白榴

耻上舞裙带愿依九琳窗韶颜今换骨阿措使心降

末利

肤莹过凝脂香浓远随步应有看花人入园心见妬

素馨

?盛闽南粤潜藏霜雪天素云生宝髻賸馥借龙涎

含笑

自有嫣然态风前欲笑人涓涓朝泣露盎盎夜生春

木犀

逋客敢欺桂秋巘曾遣风古香吹一再如到广寒宫

文官花

破白便怀青紵朱旋着紫鼎鼎一春忙浮梦均梦蚁

聚八仙

圆整装花蕊周遭列饮仙琼英难上僭簇蝶不同年

袞绣球

流苏团小蝶伯仲聚仙花袞绣名非是瑶琨未足夸

水栀【鲜支即支子出子虚赋】

鲜支形相小石罇解蟠根香凑芝兰室居便水月村

重杏

重英迷宿雨巧笑聘春风寿汝一卮酒勿嫌肌太红

紫薇

十年三雁序接翅紫薇垣花下哦前什难酬明主恩

木兰

未识春风面先闻乐府名洗粧依出塞进艇客登瀛

荼蘼

青条散蛟螭素艷欺琼玖体薰尘外香骨醉壶中酒玉珑【此花得之临川谓之玉堂春或云闽中谓之玉珑浙中谓之睡梅唐人有霏淞花诗云阁林初日静无风霏淞花开处处同记得集英深殿里舞鬟齐插玉珑疑即此花也】

品轧酴醾架名疑霏淞花【阙】假借可但鄙金沙

山茶

平泉穷胜事南守送名花寓意惩多爱劳人召怨嗟

黄蔷薇

彤闕收紅綬金門賜鞠衣【闕】無纖?冒一摘便須稀

紅蕉

嶺外花無數分移頗歷年破除猩血染舒卷蜀城牋

海仙【本名錦帶】

人來認海棠却訝枝條弱嫩蕊不勝春生怕東風惡

綉帶

蜀艷停針久柔莢着意描五文紫綫百寶簇芳腰

荳蔻花

冶葉擁香苞盈盈二月交相思意安在試去想花梢

麗春

纖蕊小作罌瘦殼元無栗色麗品少雙詩成看未足

長春

四季花長發朝朝得細看絛英能受暑綠刺更禁寒

水仙

龍宮陳酒器金璣白銀台欲結壩簾伴無踰綠萼梅

剪春

巧剪蛟綃碎深塗絛蜡勻殘英枝上隱踰月逞鮮新

玉簪

月娥新琢玉何夕忽遺簪斜插風鬟濕蟾宮底處尋

麝萱

手捻雏莺羽鼻参香麝脐千忧何处散芳径酒争携

玉灯

叶如薏苡长花比金灯白一簇蕊宫仙银灯臧与获

鬬日红【一名落地锦】

红英鬬日开暮落锦成堆不藉西风力孤根委草莱

佛桑

展叶柔桑沃装丛醉缣繁定应西域到略不耐轻寒木芙蓉【离骚采薜荔兮水中搴芙蓉兮木末盖言水中无薜荔可采木末无芙蓉可搴犹缘木求鱼之意与古诗涉江采芙蓉皆指藕花也韩文公木芙蓉诗云采江官渡晚搴木古祠空乃误用耳】

川陆有芙蓉名同物不同采江搴木句作麽误韩公

黄拒霜

芳林秋冷落木末改黄裳可笑名虚忝何曾拒得霜

小黄葵

拂金铺细靱骑鹄堕新翎花小也倾日芒寒犹聚星

金凤

九苞滋雨露五采烛轩楹奉送归丹穴朝阳幸一鸣

鸡冠

未观金距鬬已怪左轮殷一夜风霜作垂头急挂冠

石竹【文与可诗蜂啮红蕊烂虫啼碧丛短】

藟红蜂好啮路细麝来眠若也栽幽处踰冬色不蔫

黄莺儿

鹧鸪翻柳去拾羽渍轻花战战枝如压无风势亦斜

真珠

细簇盘洲岸初惊合浦还娉婷邀十斛借取买青山

鼓子

抽蔓类牵牛含芳伍萱草上上不知休高柯压纏绕

金钱

鑪炽陰阳炭金钱满地流何人能点铁笑覓富民侯

盘洲文集卷八

卷九

钦定四库全书

盘洲文集卷九

宋 洪适 撰

杂咏下

金灯

灯焰既埋光幽蕤不露黄阿谁驴唤狗为我问花王

百结

体轻难受雨枝软不禁风全赖结蟠力能超造化功

後庭花

月满临春阁云随张丽华隔江虽度曲破国不因花

凌霄

天借凭依便云霄若可凌莫教风拔木却羡水飘萍

杜鹃花

山深啼杜宇溅血染花心阆苑未归去不妨留鹤林

玉蝴蝶

赞皇褒簇蝶京洛古来稀一阵雄风起穿林粉翅飞

苔【亦名绿钱陆龟蒙石竹诗而今莫共金钱鬪买断秋天是此花】

赤憎宾舍满雅称落花留纵使金钱好如何买断秋

虞美人草

尤物鍾芳草虞兮奈若何动摇缘体弱非是感悲歌

睡足亭

露重宿粧凝地偏春睡足卜夜到横参却须高举烛

黄海棠

汉宫娇半頰雅淡称花仙天与温柔态粧成取次妍

垂丝海棠

脉脉似崔徽朝朝长看地谁能解倒悬扶起云鬟坠

孤松

昂霄苍鬣五独立几寒暑不肯在鸡羣自然羞吟伍

菱湾

食芹知献君嗜芰不忘亲大节全忠孝劳心思古人

芡曲

芡盘平冪水雁喙饱吞风剖蚌珠惊坐清谈拳屡空

林珍亭

主林时献供它壤昔移根秋後收梨栗倾奩得弄孙

樱桃

园官来献熟万颗滴堦红緑李高名品须知论未公

蒲萄

虺蔓奋长须累累明月珠休传酿酒法万一误分符

雪梨

魁然釘坐珍落刃雪分身酒渴思吞海加笏纵與人

鵞梨

新鵞借顏色甘蜜添滋味忆得赏花时阑干带春泪

林禽

蒙润碧千颗迎曦红半颊阅古憩鵞池牵连青李帖

竹村

一任笋侵疆何妨鞭碍道千户广侯封三家结村保

竹屋

栋梁无一木眼底尽龙孙千亩清陰合出门人灌园

灌园亭

好手善和羹非才当抱瓮加点苜蓿盘丁宁及时种

西瓜【癸亥年先公自北方带归】

万里随边使分留三十年甘棠遗爱在一见一潜然

罌粟

美艳亚羣花千罌倒储粟饮客醍醐浆可以代醺醪

琼报亭

珍物再三投英琼修永好以兹君子德不作衆人报

木瓜

硕果宣城得花肤易地无上楼要脚健不假瘦藤扶

矮桃

结子卑枝繁成蹊长策舍饱杀驹朱儒谁牵果下马

崑仑桃

满树鸠【上声】盘茶曾开胜锦花夺胎春薄相刻画搅诗家

朝天李

长柯浑直上茂叶不横生缟夜心倾藿朝天荷美名

破核李

苇绡欹鼠穴翠质临螭井自破核不钻通行冠可整

嘉庆子【壬午年仲弟使边遇此果熟带其核归种】

雪艳燕脂萼京都核远来游人初识面不作李花猜

茧瓮亭

倚槛课条桑作茧看成瓮我亦效吴蚕踏破愁清梦

沃桑陌

植桑非一日斩伐良不忍亦欲後人知爱奇仍务本

六枳关

分付司花女谁何六枳关少年轻薄子驱去勿教还

碧鲜里

劲节旧捎云新添老大根何年居此里着处长儿孙

柞林

柞树何人种成林不乱行汉家全盛日宫殿对长杨

桃李蹊

粲烂九张机交加五杂组蜂蝶胜於人东来又西去

凌风台

老根呈冷艳鼎立傲刚风危坐层台久衰顔得酒红

苍鹤

吭赤羽毛苍华亭雪羞比昂昂警露仙翻作辽东豕

驯鹿

呦呦忘野性掉尾草中眠寄语射生户深山空岁年

猿

掷果心频喜攀条臂暗通有怀清远峡云断玉环空

野緑堂

缘流排劲草盈野鞠长芦烟树高低见如开平远图

壁立万仞【野緑五石屏】

立壁无蹊径纖尘不可留若知心匪石那复为身谋

千岩万壑

屏开山弄巧岩秀壑争流漫作剡中梦难寻雪夜舟

横坤一练

沧浪东入海神禹了天功谁解闻鸡舞来招击楫风

叠嶂

愚公移叠嶂神助到盘洲细问昭亭路今非风马牛

月娥留照

星稀天陨露山静谷生风
万古云中月炎凉无异同

隐雾轩

平昔慕文豹管窥才一斑
谁言披宿雾吾欲老兹山

豹岩

九仞基人力千峯夺地灵
日长频拄颊雾暗可藏形

楚望楼

鲁詹尊岱岳楚望指江流
地占山川胜小哉云梦游

巢云轩

羌庐腾爽气非雾拥楼居
夜鹤能知我鷓鴣甚起予

驻屐亭

长林劳屐齿植杖解冠衣
覓句题青竹不知孤鹭飞

郊扉

尺五螭洲境绳枢每日开
抱关无约束俗驾望风回

濠上

大鱼缓扬波小鱼轻触芰
鱼乐我能知我来鱼不避

野航

短篷收辑濯栏楯占濠梁
受得两三客更添垂钓郎

龟巢

眼看莲叶巢藏六可论交
但得沧洲趣何嫌蚯蚓潮

鱼

心嫌大吞小不忍唤渔蓑皱月年年减潜渊渐渐多

白龟【张籍诗天欲雨有东南风南溪白龟鸣窟中】

往作清江使身遭七十钻南溪今自在鱼鼈报平安

绿毛龟

青髯千岁寿绿发九江稀巢叶相渐染沙边曳水衣

泽芝亭

花开常比两叶巧或盈千独步南风里繁英愧在前

双头莲

骈花先总角一体素心同可是鸳鸯瑞于飞幻碧浔

重台白莲

绿房韬紫的玉片踊重葩公论评优劣难私解语花

多叶红莲

步有凌波袜掌为承露盘尚嫌花片少千叶映朱栏

槐

花黄秋欲半昔岁一番忙谬应魁三象深惭王氏堂

流憩庵

日日来无数周流足也疲安排憩策地准拟曲肱时

欣对亭

临清莫三叹对景非一欣缓踏溪南路怕惊鸥鹭羣

锦鸡

冠距山雌比谁来断蜀机斓斑兼衆采似戏老莱衣
溪??

笼寛毛不损境熟意能驯自得寒江乐何忧采捕人
拔葵亭

?中饶菜把足以给盘飧不逐露葵去定遭修竹弹
容膝斋

寸地有别天斗牖无长物吾身容易安此膝不可屈
芥纳寮

地战两蛮触气吞九云梦何以纳须弥是中甚空洞
梦窟

世事一场梦山栖冬复春花边侣蝴蝶不省宰官身
榿

剖心青掌露蓬首紫髯垂花孕鱼堪饌枝重鸟不窥
木竹

竹叶木枝柯葱青光可监桃竹最名浮自知萧洒欠
兰

清馥畏人知辞山便泣岐请将纫杂佩不去傍蛾眉
药畹

自笑桑榆景犹贪草木滋烟霞成锢疾良药岂能医
仙茅【临江许仙观所出庾岭亦有之羊食之者为乳羊】

许仙初拔宅灵草迸香茅能使羊无血云何命在庖

黄精【一名鹿竹亦名菟竹】

叶细浑疑竹丛轻却象花果然能辟谷谁不护萌芽

藟芜【其根芎】

菲菲芳袭予采菜叶敷碧捐躯陆羽轻箝口陈琳檄

芷

为爱草中香灵均咏药房行山踏虵虺系肘有名方

地黄

塞耳可治聋下咽多去病九曝不辞劳蚤衰谙药性

茱萸

览尽辋川图击节茱萸泝九日秋子来黄花为酒伴

玉虹洞

天晴玉连蜷洞邃香吞吐趁逐牡丹时游人推不去

緑沈谷【杜诗苔卧緑沈枪皮日休竹诗一架三百本緑沈森冥冥】

塞翁马论谷山房谷名竹千驷後无闻一竿清亦足

聚萤斋

广野萤如织凉郊书好看借光须【缺】晷莫遣案头乾

萤

得夜不韬藏飞星乱草塘都缘光影误无路出书囊

美可茹亭

勿夸万钱食可畏五鼎烹采山逃後悔碧涧有芹羹

蕨

块破擎拳出盘行转眼空抔荒非小补粉骨不言功【辛卯大荒村人掘蕨根捣粉谓之乌糯赖以脱死者甚衆】

荠

犯寒青匝野信手各盈檐不与草争长听教茶比甘

笋

出戕瘞五皮获麟髡一角煮簣太憨生非关渠善谑

云起亭

水穷云四起出岫本无心莫负苍生望须为旱岁霖

西户

行乐惜分陰或风雨有疾细数一年中户开能几日

山居二十咏

山居

经始得山居幽寻迹不疎自开溪上径花露泣前鱼

竹坡

有圃无修竹其如借宅何宁忘三月味不厌此君多

芝榭

筑榭芝山麓仍年再产芝欲求茹芝法已与赤松期

樵径

松钗藏曲径林浪积枯枝足了园炊用何须坏屣屨

茶丘

半世别玉州梦忆仙人掌经丘获枪旗清思飘云上

栗岭

霜栗大如拳皱开穰献熟借问嘉卉山何如白鸦谷

茅轩

翦茅聊复尔步履欲何之风卷三重去危檐雀护儿

蜂庐

分【去声】窠能择地识路自寻花不候谯门鼓羣飞晚趁衙

情话斋

意到非饶舌情亲易解颐或时铛脚坐不効劒头炊

榴花城

榴艳对枯筇西来解后同折花羞鬓白未插已顔红

锦被堆

锦衾铺緑野山麝可曾眠蕙帐尘凝席花残鹤惘然

蘋桐【一名百日红】

花涵百日红色到三秋重叶大好题诗丛卑难集凤

双鱼

犀角透鱼龙石肌蘊星斗亦有无情花枝头鱼贯柳

蔷薇

竹外霞为幄花间锦作篱离宫多怨女吃吃竟亡隋

迎春【一名黄雀儿】

桃杏正酣酣光春当仲月吐艳既後时嘉名安可窃

长生草

经时久枯槁得水即青葱起死医无药返魂香有功

云松关

叶生新易旧岁寒凋独後不改四时柯贤言非圣耦

山樊

蘂碎叶伤多风韵弗娱目独抱絶尘香无心出幽谷

踯躅庵

一气浹羣芳漫山踯躅黄有谁相领略自解度春光

野草

发生宁有种滋蔓妨人路不得十月霜扫除难尽去

盘洲文集卷九

卷十

钦定四库全书

盘洲文集卷十

宋 洪适 撰

挽章

钱仲仲挽诗二首

佩兰扈芷楚三闾抽秘骋妍汉子虚甘向黑头辞印绶肯将白眼对图书清规尽入先贤传總
帐空驰长者车千里纏悲付虞殡西风吹泪着襟裾

秋来鸿羽得新文不谓回风限九原起起若为偿岁梦嘻嘻无复对朝言一编徒挂延陵劔三
径谁开靖节樽尘迹盖棺浑莫问墓头黄石拜儿孙

程通判挽诗二首

力行先孝友潜处伴渔樵日奉斑衣戏风移尺布謡白头方得禄朱绂便登朝车作骅骝折松
烟喝鼓箫日游通德里会面盖先倾我作南垂去君成东蓼行忽持刍束奠忍听薤歌声为看
三珠树门高莫与京

熊直阁挽诗二首

文石荣三接君王膝屡前蒲鞭如汉日盐筴有苏天未上甘泉道俄闻京兆阡传家文史足不
在一囊钱居巷相南北登门久岁时温言流肺腑和气见须眉日旻长沙傳年凋绦县师春云
冒丹旄同会袂成帷

中大族伯挽诗二首

笑谈登月窟转眄夏天池十载董狐笔两州龚遂祠文章传古法名姓畏人知忽作龙蛇梦今
无甲子疑久矣宫盘谷幡然筑大逵方瞻乌亦好已问鵬何之无复竹林会忍闻蒿里期行行
遡西日有泪若连丝

朱承事挽诗

乡关闻德耀子姓有佳声五十贵不验三千功已成山幽双剑合桂近一枝荣他日先贤传求

之月旦评

臧县尉挽诗

共在乡人後相高君子前家声郤大鼎利器楚龙渊不相买臣贵竟传梅福仙只今空渍酒落笔更凄然

程参政挽诗三首

身近长安日官无州县劳黄麻袭姚姒赤舄等伊臯量与南溟阔名如北斗高十年蟠緑野轩冕一秋毫圣主更琴瑟真儒政事参上阶占两两东第得潭潭忽卧漳滨疾虚传滹水谈骅骝好千里底事学吴蚕一顾弩增价兼收雁作行篇章非子墨藻鉴误雌黄云淡番君国年荒陆氏庄眼看飞旂出雨泣漫淋浪

李沆州挽诗二首

籍籍台郎日臯苏远拍肩疏陈三尺法制可九重天不使金横带俄惊酒渍縣平亭知有报高盖拂修椽朱幡今素幔归路乃长迷露菊荒三径春棠叠五溪新丘悲寓马陈迹记谈犀泪迸无乾袖重云入望低

程司户挽诗

把酒论诗日高标迴絶尘那知三语掾便作百年人山雾铭旌湿松风挽铎频流光须有後何必在其身

程枢使母永嘉郡夫人挽诗二首

华族鸣徽久闺风蔼德门鸿枢看子贵象掇拜君恩纯孝纒吹棘端忧陨得萱板輿无复御旧迹识家园赫奕家声振吾乡今所稀北堂黄发壽西府黑头归方美含饴乐俄闻侍膳非万家旁置处空怆白云飞

郭太尉挽诗

闲适珍台腆旧仪趣归方俟诏封泥人生七十古犹少执政二三今与齐忽见墓门陈石马空怀宾合奉金犀不须知识方流涕处处俱成桃李蹊

罗尚书挽诗三首

周旋仪禁路契合本孤忠帝识尚书履人惊御史骢贵名青史上说论皂囊中不入三台志盐

梅事竟空当年持从橐白发奉亲闱安否君王问尊荣简策稀祥琴曾未御丹旄已同飞萧瑟
千章柏深藏五彩衣连蹇鱼符忝宗师藻监亡但瞻扬子宅莫避盖公堂远水松区对东风
路长九原精爽在遗恨一庄荒

向通判挽诗二首

屡荐声名白低飞鬓发苍平生几朱绂梦寐一黄粱利刃盘根出明珠後乘光洪都囚不死陰
德未渠央里社承顏旧情非数面亲令名高月旦和气藹阳春乍阔谈挥麈俄惊冢卧麟濡毫
记遗事顾我不如人

俞淑人挽诗

名父尹京日移天冠柏台齐眉丰俎豆继踵脱尘埃德比人如玉情鍾子在梅山高云不去虞
殡有余哀

何宜人挽诗

心了金刚偈身膺石窞封灵津双劒合平壤万家容感慕风吹棘悲凉雾喝松乡人清泪落可
但辍邻耕

魏恭人挽诗

儒门传礼法妇道有初终石窞重封贵金章上壽同含饴谈往日吹棘怆来风拂路刍灵隘春
朝里巷空

沈淑人挽诗

尊章欢二姓八座对彫眉井井传家法绳绳赖母仪川灵双劒跃壤吉万家移多少龙湾树云
藏不尽悲

余吏部挽诗三首

石月颞门学儒林誉翕然蠶盐家有塾菽水坐无羶孝永趋庭日名成佩鞶年流芳千载下不
减汉韦贤入台光六察言事过同寮可畏触邪豸元非开口椒召来仍襆被老去但乘轺未报
蒲轮聘巫阳已下招清音扁新阁山色送溪声尚欠题诗债难寻把酒盟囊空无长物甑堕底
浮名拂路他州远临风泪睫横

章通判挽诗二首

丹霄籍荐口白首滞微官涉世无圭角论交出肺肝翔鸾说秋浦展骥到新安泉下齎遗恨丝纶趣挂冠富州春再见风月款平分翠竹曾留我红梅独对君遣书成挂剑挥涕屡沾巾千里佳城闭哀笳不得闻

陈左相挽诗三首

盛德波千顷清风偃俊躔两朝隆柱石四海入陶甄致主唐虞上齐名房杜前期颐慳上壽底处问苍天往昔旄头起羣心共震惊指麾戎幕固谈笑敌氛倾绣黼重当国纒裘即敛兵岩岩谢安石不数晋公卿天意尊黄发人扶上玉墀传呼昼接後邈逅日斜时瞻仰三台坼沦亡一监悲千秋名不朽奎画在丰碑

杨和王挽诗二首

矍铄猊鞞出魁梧玉带轻良家三世将幕府万人英长啸临天堑兵氛散敌营黄垆有遗恨不见朔方平三纪羽林卫千秋彝鼎铭拔材多勇爵教子宝遗经淮上开王社云边落将星後來思燕颌麟阁仰丹青许倩幼失所恃得地办葬名其亭曰棘风求诗纪事

择邻传懿范负土踵前规回首树萱录动心吹棘诗幽亭三鼎变吉壤万家随度曲薰弦絶临风泪满颐

汪德邵挽诗

监郡能名播分符治行高俄惊驹过隙不见鹤鸣臯三径宾朋散重楼柱石牢伤心丹旆举旧事记松醪

彭叔容挽诗

襟宇无畦町乡评有誉言宦途材智出名阀典刑存未试牛刀手俄招马鬣魂有怀尊酒日挥泪北山昏

章令人挽诗

肥家尊淑范閱世悟浮沤风棘慈顔隔堂萱子舍忧六珈齐上壽一劒跃中流绋路倾隣曲凄其松露秋

梁竑夫挽诗二首

材高易盘错语妙出波澜和气如春暖交情耐岁寒牧民千里治奉使五刑寬杖屨褒陈迹琴亡曲罢弹向来持国秉贡禹合弹冠予节缘心计飞章或面谩开陈疑已释腾跃事非难覆餗

长絨恨何知便盖棺

魏彦诚挽诗三首

星文推独步风采偃先声
沉虑千人废高谈一座倾
苏枯崇治效去草折奸萌
春雾新阡陌裁诗泪睫横
偃月欺天日淫刑及反唇
程论传学者粤岭作流人
貽後端无憾瞻前詎有隣
太刚终齟齬袖手老江滨
昔年同揽辔累日到门阑
题竹飞松管观鱼走玉盘
着鞭顏有愧推轂力何难
翻坐葭莩累尘凝贡氏冠

汪枢使挽诗二首

两朝尊辅拂一德赞规恢
简劾人所畏囊封天可回
指挥兵事密谈笑塞氛开
尺五魁三象俄惊山岳颓
天陞黄麻出同时拜宠荣
荐贤窥汲引谋国冀昇平
睽阔仍寒暑吁嗟隔死生
门人有碑誄不数汉公卿

荣国李夫人挽诗

斗枢光梓里壺德讲鱼轩
教子诗书足齐家礼法尊
相随双劒逝来吊一刍存
松雾铭旌暗悲歌塞墓门

许硕人挽诗

敬兰光相闕采藻助儒宗
偕老金犀贵增封石窞重
川深双劒合壤吉万家容
遥想铭旌举悲风喝雾松

向侍郎挽诗二首

策足王城日声名显妙年
剗裁无肯綮施置不拘牵
惊坐瞻挥麈丰财赖筭鞭
中兴良吏盛佳传压甘泉
沃饗环天下澄清今范滂
带牛奸破穴问马智盈囊
踰七春秋足尊三爵德光乡
间失耆旧緋路送车忙

余文特挽诗

决科荣彩服诺仕振芳埃
金玉胸怀好珠玑言语堆
一麾临白首八载厄黄能
情话今陈迹悲惊袞袞来

张待制挽诗

松关辞旧隐平步汉甘泉
破敌资长策丰财简细旃
揅荒陰德大尚齿达尊全
觴豆怀陈迹风

悲马鬣阡

彭仲光挽诗

吉德传乡党家声企大儒九霄欣得路五马议分符叹息人琴逝凄凉邻曲孤霜风丹旆举松
雾暗黄垆

枢弟挽诗三首

少小犹朋友陈编昼夜开同时题雁塔旬月聚麟台词掖君先达台阶我後來伤心今古隔楚
挽不胜哀投老开三迳联翩北郭门潮花诗插架对竹酒盈尊叹息千秋宅荒凉十亩园谈丛
铛折脚云暗脊令原静镇多遗爱存桥有远谋禁林传大册宥地简前旒疾也劳心得生乎撒
手休三年棠棣径倚杖泪争流

陈公秀吏部挽诗

顷陟词坛日初瞻雁塔名坐毡甘独冷揭节守真清?蛭能陰中骅骝使郤行佳城千里外无处
送铭旌

张龙学挽诗二首

今代风云会何人善论兵丹墀凝睿想黄石踵家声瑞国仪千仞筹边妙两楹重泉有遗恨不
见复神京中台双挈橐重镇四分符井地观佳政林蛮铄异图犁添长乐犊鞭截豫章蒲处处
甘棠泪黄童白叟俱

周尚书挽诗二首

九师迷易说皇极倡先天学苦韦编絶名高雁塔悬朱幡多惠露紫橐表甘泉叹息佳城闭乔
松锁墓烟忆昨登瀛日官曹幸接联再来闻国论及见上经筵渊识闢灵宪嘉谟凑细旃生刍
千里奠覓句一潸然

姚参政挽诗二首

发轫词坛日曾同萧寺盟望洋吞渤澥历块指幽并不竞二三策难淹九万程君王颺赐第千
佛漫联名晋昼光三接霜台肃纪纲栽培指佞草重叠上书囊笔橐留施設钩枢忆赞襄伤心
左溪路松桧已成行

周知郡挽诗

德比圭璋润言如布帛温休心驰宦路寓意傲家园侯国思遗爱吾乡欠达尊佳城邻别墅松
雾望中昏

叶提刑挽诗

冠带桥门拥曾披星斗文属鞬寻耿贾投笔远渊云献纳频三接平反自一欣凄凉真率会鸥
鹭也离羣

彭叔阳挽诗

买邻乔木近不隔一牛鸣甲第夸新作高楼待落成未教长纵壑亦合且专城矫首天难问伤
哉挽铎声

参议弟挽诗

新筑久同隐崇桃存旧栽壶中春漫别花下我频来议幙三年隔丧舟千里回琴亡情话絶泪
落有余哀盘洲文集卷十

卷十一

钦定四库全书

盘洲文集卷十一

宋 洪适 撰

内制一

缘边残破州军德音【隆兴元年】

朕惕奉慈谋务行仁政惧赤子之蒙祸敢起争端会邻国之厌兵弗渝和好比遣王拚远抵颍滨得其要领而归靡有毛厘之隐寻澶渊盟誓之信仿大辽书题之仪正皇帝之称为叔侄之国岁币减十万之数地界如绍兴之时怜彼此之无辜约叛亡之不遣可使归正之士咸起宁居之心魏杞使车已越疆而通问淮南侵骑皆空壁以退师重念数州之民罹此一时之难栋宇或遭於煨烬田畴并丧其犁鋌老穉有荡析之裁丁壮有系累之苦三冬匱薄千里绎骚顾尔何辜皆予不德宜推洗涤之宥少慰凋残之情【入赦文】於戏歌鸿雁之诗期奠桑麻之业息貔貅之戍俾无金革之声尚冀循良之臣共敷汪濊之泽用陶協气复见乐郊咨尔羣黎体予至意

郊祀大礼御札

勅内外文武百寮等朕受太上之燕诒宅域中之广大将迎景至初款圜丘念报本反始匪尚乎虚文而交神塞明在颺乎诚意稽皇祖之诏令敕攸司而讨论凡粢盛祭典则不改故常若鹵簿赐式则俱从省约行潦潢污之可荐斯举邦彝駉鸾路之勿修敢劳民力庶函蒙於繁祉以大庇於黎元丰年无患於虫蝗斥堠不惊於烽火遂成熙事用答鸿休大号是盼先期迺戒朕以今年十一月二十九日谒款於南郊咨尔有司各扬厥职相予肆祀罔或不恭故兹札示想宜知悉

郊祀大礼赦文

门下朕仰受燕谋获承洪业刺六经之王制监百代之礼文治坛燎以祭天警边氛而迁日盖昌陵始避於近晦在太宗尝改而用辛诚意动而二仪通孝道专而九庙格致邻国有休兵之好实上穹开悔祸之期前事俱捐弗念乎薄物细故烝民咸乂靡分乎尔界此疆五辰循宣夜之躔三白示丰年之兆进玉卮而界亲壽爰创缛仪偕椒屋以庆母慈有光徽躅只荷博临之况敢忘昭报之?后蛰而郊飭周人藁秸之具奉牲以告协汉世竹宫之时式履孟陬之端遂逢先甲之吉灵心可卜帝武是绳乃裒四极之籩用洁一纯之荐款闕宫而朝献假太室以裸将酌沿袭不同之宜取齐戒自新之旨瑄璧缙?权火配藜高旂滇滇胪所求美光旁烛百官济济

敬厥事熙典备成载惟我宋之肇禋乃当乾德之盛际法皇祖纪元之义采羲文行健之辞诞易嘉名以宁大器宜推作解之宥益广好生之仁可大赦天下其隆兴三年改为乾道元年於戏逆三神之厘既横流於春泽接千岁之统期丕显於文谟尚赖臣隣协恭小大服采同济更张之治用承?选之休

郊祀前二日朝献景灵宫圣祖册文

伏以丕显圣德垂光在天源深流长基命积累肆予微眇获保宗庙神丘备物亶惟其时沈沈闕庭灵旂所御其香始升克綽永福

前一日朝飨太庙帝后册文

伏以天祚炎图圣圣继武盛德必百世祀是之谓流光施及菲凉嗣无疆大历服爰熙紫坛初交於神先事一日入太室裸骏奔济济列陈嘉筵假哉皇祖启佑我後人永缉熙于纯嘏

别庙册文

伏以晬晬管彤卓卓坤极绥予孝子服尧之服上辛改卜礼神颂只絜粢广牡既右飨之兆蒙祉福天下乂安

郊祀昊天上帝册文

伏以惟泰元尊丕冒下土旋转三辰闔辟陰阳元功无垠荡乎难名粤惟冲眇继天为子仰宪聪明求端谨始兹执牺牲圭币肇禋于郊筵簋非馨於荐诚慤高高降监是飨是宜事亲保民惟皇其右之谨以玉帛牺齐粢盛庶品涓选休成肃若旧典

皇地只册文

伏以至哉坤元穆穆柔只播生品彙配天其泽惟冲人不德传国于慈父用辛之吉礼行於郊宴娯安鵠粤其敢不察时和岁丰皇建有极用永受於蕃厘

太祖皇帝册文

伏以五季抢攘远迹如沸实天生德经武纬文灭除凶灾用肇造我区夏燕及曾孙获绳祖武崇崇其坛陟配上帝庶几临飨克昌厥後

太宗皇帝册文

伏以天造草昧圣武布昭席卷畔援卒其伐功传序无疆于今九叶恭承禋祀瑄玉升坛烈祖

烝哉克配彼天於万斯年介以繁祉

立皇太子册文

维乾道元年岁次乙酉月朔日皇帝若曰在昔帝王稽夏商家天下春秋之法立嫡以长主器继明盖取诸震离所以尊宗庙重社稷也咨尔皇子少保永兴军节度使邓王食邑二千户食实封八百户愔生有异表序居上嗣敦厚温文金昭玉裕问寝视膳则尽彩衣之孝亲师就傅则乐圣人之道令德逐日以新英声随风而流元良正本久矣企望朕服尧之服兢兢四载仰奉慈训肇辟春闱协华复旦日宣重光懿哉铄乎有国有家之庆也是用撰嘉辰御路朝盛仪备物迎休于乾坤册命尔为皇太子於戏悉尔心修尔身勿蹈非彝勿迓邪佞惟诚可以格物惟仁可以济衆正言正道闻斯行之敬之哉用永我祖宗之丕命

除张浚少师保信军节度使判福州依前魏国公加食邑实封制

门下宅百揆而督五兵正赖筹边之效冠三孤而张六纛曲隆制阃之权我有明缙扬于拱着具官某材尊王佐道耸民瞻节操坚刚曾岁寒之不改规橛远大宁日仄而遂休蚤逢阳九之交上应魁三之象叱王尊之馭亘井络以蜚声下杨仆之船空潢池而扫祲更险夷而一致谓文武之兼资粤从緑野之游殆为苍生而起肆予嗣服即俾来朝提江淮表里之封尽颺总统佩将相安危之寄式重倚毗三年于兹庶绩用乂蒐乘补卒亦既输劳增陟浚隍未尝彻警孟明报彭衙之役独负壮犹武侯引街亭之愆靡形愠色朕念疆陲之久戍诏师衆以代更分遣从臣往宣使指棘门如儿戏耳庸谨秋防袞衣以公归兮庶闻辰告叠览指瑕之劾且披请老之章欲畀旧官盖无故事是用出枫宸之异渥超棘位之巍班荡节有光择合肥之名镇甘棠弗翦临长乐之价藩衍以圭腴侈其真食於戏春秋责备於贤者慨功业之惟艰天子加礼於大臣固始终之不替其绥吉履母有遐心

除汤思退都督江淮东西路建康府镇江府江陰军江池州屯驻军马依前特进尚书左仆射同中书门下平章事兼枢密使岐国公加食邑实封制

门下位上宰而通四海久成调鼎之功开幕府以督诸军有赖止戈之略参考古今之制独颺内外之权式倚宗臣用凝丕烈刚辰允协显册具宣具官某学博而识明器宏而用远稟五行之间气盖彪外而弼中冠四辅於两朝实光前而絶後主盟公道杜塞幸门业可侔於皐夔言必称於尧舜当羣疑之未定每潜画而有余事不一书既鏗鉤於竹帛智惟千虑迨契合於著龟聿高忧国之风遑恤盈庭之咎枢机周密犹神爵五凤之时庙堂雍容增大吕九鼎之重臻兹殊效本自至诚朕获纘皇基常怀戎事顾边尘之未靖方议寻戈总兵柄而非轻孰能和衆若时英袞正幹洪钧文武为宪万邦真有兼资之美精神折冲千里当收无竞之勲蔽自予衷谐乎人欲俾仍提於相印往尽护於师干焕泰阶三台之躔益隆瞻仰括尺籍伍符之数咸听指麾自然增气於貔貅何特知名於草木乃陪井户并衍原田於戏兵事节度皆付公吾岂从於中御天下平治谁舍我尔盍励於远犹缅惟真儒宁烦多训

除杨存中都督江淮东西路建康镇江府江陰军江池州屯驻军马依前太傅宁远军节度使和义郡王加食邑实封制

门下听鼓鼙而思帅孰能折於遐冲赐斧钺以视师殆无踰於英望仍其制阃宠以扬廷具官某识遽而明气刚以果声扬朔野知虎头燕颌之名书受邳沂非风角鸟占之术勇爵号万人之敌洪锺铭百战之勲左右凝严掌西汉羽林之卫始终福禄继汾阳异姓之王近整辕门外开幕府饬备有金汤之固分屯如箕翼之形邇彼北邻制於悍将靡思践好不戒穷兵若李斗之旄星有踰淮之候骑虽丞相一劳弗憚偶未禡牙念元戎三令已行宜申跪轂庶几独任可以有成是用诞举徽章特隆异数颺锡盾雕戈之柄增淑旗元袞之威况国家或置督军皆宰辅用之立武惟此总干之命是为絶席之恩更广圭臬益光竹帛於戏诸将於是皆以兵属朕既付以重权匈奴不灭无以家为汝盍追於前哲必图来效庸副眷知

汤思退罢尚书左仆射同中书门下平章事兼枢密使特授观文殿大学士提领江州太平兴国宫依前特进岐国公制

门下冢宰佐王治国意实注於安危大臣以道事君时具瞻於进退睠惟雅望久翊繁机既殚上印之诚宜厚秉钧之礼诞扬坦制亶告羣工具官某器宇清明材猷超诣乐尧舜之道阿衡专美於有商品渊骞之篇扬雄度越於诸子轩然俊域籍甚要津烜赫北门凝丝纶於雅诰从容右府运帷幄之良筹结慈陞之深知应台阶之上象粵予纂绍复俾赞襄积熙载之忠规罄安边之潜虑循名责实所期公尔忘私应变守文常以今而视昔方仰成之无间何引去之甚坚选衆举臯陶任盖尊於一相事亲若曾子养已泊於千锺遂其尝药之怀失我和羹之助兹推渥典用贲归途鼎秘殿之崇资食珍台之优禄式笃股肱之义以全体貌之恩於戏明哲以保其身靡失青氈之旧喜愠不形於色可娱緑野之游无起遐心斯能终誉

除陈康伯尚书左仆射同中书门下平章事兼枢密使依前少保进封鲁国公加食邑实封制

门下咨四岳有能奋庸实系朝廷之轻重图旧人越惟共政尤藉老成之典刑允谐虚左之求盖积处中之望诞敷涣册亶告听廷具官某用博而适时量宏而容物闾奥莫窥乎畛域奴隶皆知其清明学过况雄贯古今之千载道侔伊吕踰前後之数公咸德慈闈有声揆路如蓍龟之决事以柱石而尊朝敌骑投鞭軫抱火寝薪之虑周京奠枕赖济川作楫之功辅我重华历夫再岁转洪钧之一气块圯无私陈泰阶之六符规摹可久方焦心多垒之日岂袖手东山之年申戒使貂趣迎公袞庶交修於内治能潜弭於外虞是用再冠魁衡仍司枢筦侈多田之真赋荒大国之新封以昭物采之仪以宠岩廊之寄於戏武丁得一传说斯商道之复兴江左自有夷吾宜晋人之相庆尔惟敬明乃训邦其永孚於休大同军节度使提举万壽观蒲察久安进封开国侯加食邑实封制

门下朕?卜上辛肇称元祀合圆丘方土之祭诚格万灵倡七始华始之声孝臻四极既涓成於縟典难专乡於蕃厘式獎彫臣诞?丕号具官某性资纯固气识靖深灌瓜昔在於边亭削衽来归於乐土陪周行而甚久知忱节之可嘉不顾望以事君远追大【缺】以笃敬而传国将若

秬侯兹推赐胙之恩用答奉瑄之助乃荒侯社并广户租以彰惠术之行以示褒章之劝於戏甘泉歌邹子之乐爰布青阳之祺徐卢同仆?之封有加白马之约往肩忠报永迪燕康

除吴璘太傅依前奉国军节度使四川宣抚使领御前诸军都统制充利州西路安抚使判兴州进封新安郡王加食邑实封制

门下拥斋钺以护坤维夙赖长城之扞奉介圭而朝魏阙宜膺华袞之褒疏絶席之殊恩讲临轩之显册乃涓刚日用诏羣工具官某忠义本於天资智勇谓之人杰书传圯上非鸟占云祲之文气盖关中固玉垒铜梁之圉乘边兹久按堵如初左启右肱聳戎车之四牡前兄後弟超轘门之二龙灵旗远憺於雄棱彝器屡铭於洪伐寬予忧顾时乃勲庸爰注想於英规俾来趋於召节驰驱万里恭谨一心周邦戎有良翰與人咸喜吴公隐若敌国奕叶相望嘉懽臆之壮犹称魁梧之异表盍盼徽数庸答元功象鼎面槐应上公于台宿苴茅裂壤开异姓之王封衍彼圭畚敦其井赋以重登坛之寄以隆制阃之权於戏戢弓矢而散马牛方审包桑之意被介冑而生虬螭敢忘细柳之劳往服宠光式酬亲倚保平军节度使龙神卫四厢都指挥使提举江州太平兴国宫王彦加食邑实封制

门下鲁人类帝用駢刚於上辛汉代祀天歌青阳於肇岁朕考前王之成宪遵烈祖之丕谟乃逢祈谷之辰获展钦柴之礼爰彰景况普洽縣区有若劲臣可稽涣命具官某识潜武志材壮戎昭从枕席以过师屡书功伐执干戈而卫社尝护边陲久分斋钺之荣曲遂丛祠之佚兹推茂渥不替旧勲用增采邑之封更侈食田之户以广逆厘之庆以申锡胙之恩於戏开天庭以延羣神既格宴娯之美建皇极而敛五福厥敷殍隐之休往服辉光益臻弗祿

推诚顺化崇义怀忠保信向德安远承和秉礼归仁协恭励节继美功臣静海军节度观察处置等使特进检校太师安南都护上柱国南平王李天祚加食邑实封加遵度功臣制

门下朕卜辛日而用郊获逢嗣岁陟午阶而奠币仰格飈旂幸熙典之涓成与殊方而同庆具官某性资纯一节槩沉深绍奕叶之勲庸守藩条之信誓仁惠周於南纪声名慕乎中区輶賁航琛不懈朝宗之礼撞牙茸纛所资屏翰之雄视槐庭霖雨之臣兼柏寺风霜之职宠之焘社?若抚封兹循饮福之文用益纪功之号陪之外户侈厥真畚以褒侯度之恭以表灵厘之广於戏主祭而百神咸享敢专乡於万祥昭德于异姓之邦岂遐遗於四裔其迎戩谷永底荣怀

盘洲文集卷十一

卷十二

钦定四库全书

盘洲文集卷十二

宋 洪适 撰

内制二

抚谕四川军民诏

朕嗣守神器於斯三年乃睠坤维邈在万里会边尘之未靖致戎备之不除乘塞护关久矣采薇之戍踰山越谷远哉输粟之劳或郡邑不值於循良故田里尚生於愁叹兹选近臣之彦往专外阃之权挟纆以慰军情下当户晓褰帷以求民瘼大则驿闻推吾軫恤之恩酌以便宜之制必令四境之安堵惟恐一夫之乡隅傥休息之有期庶荣怀而相庆

戒戢赃吏诏

朕闻先王之时人有士君子之行在位者皆节俭廉清冰霜其操羔羊素丝之诗所为作也今则不然贪夫徇利廉耻道丧亶以广田宅厚妻子为计谿壑无厌漫不忌憚甚者掩公帑之积私仓庾之赢贼民剥下浚其膏血呜呼岂设官之意哉朕自临御以来崇俭德蠲浮费庶几虐风厉天下奸赃之吏未有闻而不治然速辜相继何耶是朕德不能化罚不能惧也古者刑不上大夫唐虞画衣冠而民不犯孰谓搢绅之士心无愧耻不若古之齐民欤夫先甲後庚申飭教告而抵冒不已至於用法岂得已哉凡我诸臣其洒心迁善励淳白之节副总统核之政以长保其禄位无或不悛奸我重辟播告中外使明知朕意

激论将士诏

朕只奉慈训嗣有基业永念祖宗陵寢朝献路絕黎元涂炭屯戍未休朕为人之後而不能报上世之愤为人之君而不能振斯民之厄故食不知味寢不安枕未尝以尊位为乐也特以战争之役肝脑涂地不忍南北之人枉罹非命自即位以来两发聘使冀寻旧盟而邻帅主兵及境弗纳行人再往始则立式邀求继则迫胁囚辱朕以兵隙难开隐忍自屈仍遣魏杞銜命复行不较礼文书辞屡易不爱四郡割以奉之乃渝元约又求商州且索临阵系虏之人是其更变无厌必欲寻衅初无休兵结驩之意今使命逗留议论不决积粟出船包藏罔测朕以太上圣意不敢重违而宰辅羣臣前後屡请已尽依初式再换国书岁币成数亦如其议在我可从无一顾惜若彼坚欲商秦之地俘降之人则朕有以国毙不能从也傥或不谐前好至於交兵天实临之非朕得已想彼兵民厌其黷武亦当嗟怨况我将校六师受国家爵禄之久忠义所激自应奋勇捐躯为国雪耻夫立非常之事彰无穷之名醴赏厚赐朕不敢吝呜呼兵凶器也

朕既无德以修二国之睦又无威以寝敌人之谋时当三冬而使军士有暴露之叹人民有转输之劳害贻尔衆痛在朕躬凡百臣子当念兴师用衆匪朕本心我直彼曲动则有辞共输报国之忠永享安居之乐

抚谕归正将士人民诏

朕遣使约和首尾三载北帅好战邀执不移自卢仲贤初议则有画定数事叔侄通书之式唐邓海泗之地岁币银绢之数及缘边归附之人朕志存好生宁甘屈已书币土地一一曲从惟念名将贵臣皆北方之豪杰慕中国之仁义捐去旧染投戈来归与夫军士人民厌厥殊乡喜我乐土朕知其设意欲得甘心断之於中决不复遣前後书辞再三峻拒故彼逞怒无厌入我边境若朕利於和好之速成不顾招怀之大信依随所欲驱迫北归则与淮北之民同为鱼肉矣尔等当思交兵衅隙职此之由视彼如讎共图扫荡高官厚赐自有明科传之子孙永保宁泰天地鉴昭朕不食言

亲征诏

国家一祖八宗积累基业至於太上传序在朕乘兵戈扰攘之後境土裂为南北陵园废於烝尝二帝蒙尘终天抱痛皇族荼毒所不忍言自践位以来焦心疾首思欲报皇祖之讎快四海之意而慈闱务行仁德羣臣多主和议朕识不能料事诚不能柔远屈已寻盟反堕奸计今彼拥衆涉淮犯我郡县尚犹遣介持书邀索降将朕宁与之百战岂忍驱逐归义之士【缺】就屠戮昔春秋之时郑小国也介居晋楚之间城下之盟君臣同耻收合余烬尚能成功朕今不冒东南幅员之广带甲之衆若忍辱事讎不图一战岂不贻万世议已稽考故事展郊祀之期朕将亲临江淮率励六师用行征讨凡我文武军民怀十圣二百年涵养之恩痛中原四十载分崩之难奋忠出力不与讎敌俱生大可以成功名而取富贵次可以宁父母而保妻子皇天后土实佑此行布告迺遐使知朕意

视师诏

朕以南北生灵久苦兵革会敌帅有通和之议不憚屈已委曲如约既得四郡尚复邀求书札方来兵锋已接朕识不能料事诚不能格物志在寻盟反堕其计使我士卒暴露民庶流离蚤夜痛心噬脐何及已稽典故改卜南郊将临江淮亲御戎辂师有曲直盖不得已凡我文武军民怀十圣二百年涵养之恩愤中原四十载分裂之难奋忠出力勿负国家大可以取富贵而求功名次可以宁父母而保妻子皇天后土实鉴此言已令有司择日进发所过务从节省并不得有所搔扰布告迺遐使知朕意

又视师诏

朕以连年用兵战士苦於暴露两国交恶居眈不能乂安会北师之欲和走行人而就议凡往来之要约皆委曲而听从即归四郡之疆庶结万年之好岂期得地又复踰淮书札未回兵锋

已接使师旅冒矢石生灵失其田庐嗟尔何辜由吾不德想迹遐之扼腕空蚤夜而痛心已展燔柴之期将寻细柳之举亲乘戎辂用靖边尘夫师克在和理自分於曲直兵应者胜鉴可质於神明动盖有辞事非得已惟我荷戈之衆士推轂之劲臣怀累圣二百祀涵养之恩愤中原四十载分裂之难相勉忠义共图功名犹蠹蠹之嚙肤所当驱逐若熊羆之奋力岂畏艰难

改郊祀诏

朕惕临宝位始祓泰坛已勅攸司肃蚩栗蠶盛之备将因长至展膋萧圭币之诚会有边烽尚驰羽檄方治劳军之计恐亏类帝之仪盖事既问於甲兵则心不专於斋戒若昔鲁史礼屡变於卜郊惟我昌陵日尝移於近晦况当至道之载适值继迁之虞诏以来春行兹元祀旧章具在故事可稽参两朝烈祖之规改嗣岁正阳之月庶几只敬可荐馨香宜颁一札之书用谄四方之听

改上辛郊祀诏

朕比以军兴未遑郊见欲涓建巳之月已戒先庚之期幸消弭於外虞惧稽迟於大报敬惟元日正得上辛合鲁经启蛰之文法周室用辛之礼神厘可逆犹汉帝拜于甘泉祖武是绳盖太宗行於至道式从改卜?举彝章

皇帝答皇后诏

勅皇后夏氏朕只临宝祚初展祫容涓肇岁之上辛得元日之吉亥嘉筮荐飧雅乐绎和曾霄呈明概之祥繇?洽彪鸿之庆端由内助获举精禋载閱芳函益深褒咏

赐王彦獎谕诏

军律之弊久矣握兵者背公徇私相率成风朕当馈而叹将谁使革之卿智勇笃诚山西之桀召自万里倚重江介不唯赖卿威望筹策以训兵固圉亦欲号令纪律为时标准也故将之去偏裨輿皂纷然升进羸弱冗食者衆曾不经意卿甫入辕门即能厘正忠实可嘉不负亲擢人悉如卿朕何忧焉

赐刘宝獎谕诏

古之良将心在国家者当待敌之隙必以屯田为事今并塞多旷土朕欲举行便宜十二利遣九卿持节商度之未有大将奋然为诸军倡卿奉公体国自请留屯将以丰边储而省漕挽与避难怀诞者殊科至於修治障隧汰简将士咸振阃外之职忠勤如此朕甚嘉之

赐王彦威方时俊皇甫倜獎谕诏

淮之西濒塞数千里朕留意戒备不敢忽异时将帅不以国事为怀视它壤有故陰拱而不恤若秦越肥瘠者有之卿提兵扞城根於忠赤列戍同心谋无崖异兴治关隘修设烽燧所以固封守杜侵軼势若常山之蛇諫大夫谕使指而归具为朕言之防边有赖嘉叹不忘赐潘清卿等乞以秦国大长公主所留金银助视师犒劳之费不受獎諭詔

汉武帝时干戈日滋大农所储不足以奉战士至出御府禁赃以贍之而鼎贵高訾之家不拔一毫以佐县官之急轻财体国四海之内卜式一人而已耳卿等戚畹之彦心在王室愿输橐装以助军须忠款如此与熾嗇为我者殊科顾卿新有陟岵之难养生送死之费未艾也朕亦安忍取而用之婺不恤纬允蹈斯言载览所陈不忘嘉叹

赐吴璘为发遣吴拱於祁山堡等处掩杀敌人大获胜捷獎諭詔

强敌骋兵骚我四鄙乃睠西垂之远尤深中昊之忧卿忠智根心策虑超卓遣发将士动中事机祁山之役大有斩获捷布既至良用叹嘉所期元戎殄殲劲敌用驰一札少寓褒怀

赐吴拱於祁山堡等处大获捷獎諭詔

敌人寇边再变月律将帅罢怯未成伟功朕当馈而叹时无颇牧赖汝父子家传方略天授智勇必能为我扞西鄙之患果闻捷音大翦獍悍更期尽力勿使生存国有恩章朕所不惜

赐王彦时俊戚方獎諭詔

夫设险隘以固国严烽火以守边自古不易之道也卿董我师旅久屯於淮外无犬吠之警则已贤於长城矣辅臣有言汝悉心竭力修障隧备塞之具无一不治嘉汝忠勤喜见於色金帛之赐庸示眷怀见知则说尚其勉之

赐姚宪乞以籾到米一万石助平江府常州阙乏獎諭詔

夫以邻国为壑者徒知乎为我视越人之瘠者不足以语仁尔治郡可称救菑有术损赢余之万斛助比近之二城免吾移粟之忧嘉尔泛舟之役用颁细札以示褒怀

盘洲文集卷十二

<集部,别集类,南宋建炎至德佑,盘洲文集>

卷十三

钦定四库全书

盘洲文集卷十三

宋 洪适 撰

内制三

赐金安节辞免吏部尚书兼侍读不允诏

勅安节省所奏辞免除权吏部尚书兼侍读恩命事具悉朕惟六官之长莫非民誉三铨之柄尤在得人以卿笃实刚方扬声中外再仪禁路迨今累年硕画嘉谟据公守正琐闥之望如乌台时松柏後凋在廷寡二小天典选见谓清平申命于兹作我常伯露门进读班列益尊奚为执谦尚格成涣所请宜不允

赐徐林辞免给事中不允诏

朕爱惜名器不轻假人侍橐才难宁刊印而不予卿古之直谅为国老成勇退再三色无喜愠久不见贾形之寤寐琐闥虚位无以易卿曷为引疾未闻命驾一节以趋当事斯语

赐张浚再辞免恩命不允不得再有陈请诏

王者守大公之道用舍不可以私君子高易退之风出处谁得而议卿三朝旧德四海美名虽尝垂翅於回谿必欲快心於狼望掌握重任勤劳累年精神既折於遐冲体貌宜加於异礼洊披来奏未谅兹怀亟只涣汗之恩可絶谦撝之请

赐张浚第三辞免恩命乞致仕不允不得更有陈请诏

朕去月丁丑尝告大昕之庭以贰公极品重镇节旄贲卿七闽之行卿乃轻轩冕薄方面殆欲长啸东山继韦贤疏广之迹翛然之志节则高矣美矣人其以朕为忘耆哲而忽典刑也三章固辞命不可反

赐兵部尚书湖北京西路制置使虞允文乞宫观不允诏

朕以遗祿未清戎事为大专阃重寄倚我宝臣卿潜筭可以料敌雅望可以折冲备御之策厥有功绪襄汉仍年无犬吠之警贤长城远矣需封再至乃欲优游林壑以成易退之名将使朕焦心西顾日昃不得食於汝安乎少须艾宁归断国论

赐资政殿学士知潭州黄祖舜乞宫观不允诏

长沙壤阔民繁一都会也夷獠错杂其间连率不称职则有弄兵山泽之忧卿机宥之老望实隐然息偃于蕃效见宁谧朕方以得人为喜贡章旬闲难以曲徇赐汪应辰辞免敷文阁直学士四川安抚制直使不允诏

坤维之壤邈在一隅方伯之权隆於九牧卿有尊主庇民之学负昂霄耸壑之材偃藩累年方驾前哲将驰一节入补从橐之虚乃睠四川会有高牙之阙与其尊朝以纳朝夕之诲不若制阃以宽宵旰之忧万里甚劳此行六阁未足为宠如尊乃勇顾蜀道以何难维周之翰使雪山之益重

赐宰执汤思退等乞全免南郊支赐不允诏

朕将执牺牲圭币初见上帝实赖二三股肱之臣秉德显相以竣祠错事卿等行为世表济我俭德匪颁之式三分损二仲春丙子制书着为令矣忽揽来牒又欲悉免所赐虽由衷体国陈义甚高若尽废旧章殆非中道赐龙图阁直学士赵子瀟辞免知福州不允诏

七闽居鲸波之湊亡命者或沉浮其间必威爱两全能苏枯鋤奸然後胜连率之任卿材堪理剧所至瘉人尹京之美如汉赵张弭盗鄞川桴鼓不警徙镇有命宜疾其驱毋使吾民叹於来暮

赐户部侍郎淮东宣谕使钱端礼乞宫观不允诏

朕垂意边防日昃或不暇食自淮以往简兵调马丰财积粟谨堡障备器械其素定之策固已断然於中卿智略辐凑有忧国之风嗤空言务实用朕故辍之论思倚以治外虽官以谕指为名实行督军之事卿叱馭甚勇图上方略剗剔蠹弊咸契朕心遄归奏陈备见计虑岁云秋矣岂以疾求去时耶日昃再行宽我忧顾

赐钱端礼辞免吏部侍郎不允诏

卿学问渊源於今古论议烛察於是非再掌民曹久劳心计出使淮甸如朕亲行念累岁之用兵独武铨之挠法仕者徼幸而得志吏或并缘而为奸非资通练之材曷埽放纷之弊虽然少进盖匪超迁何须踵故之辞尚事循墙之避

赐户部尚书韩仲通辞免荆襄制置使不允诏

善保家者必固其四壁然後穿窬之患可弭善养生者必卫其四体然後晦明之疾不作朕轸虑边陲常若临敌东起淮泗西抵秦蜀以吾三从臣分专阃之权矣襄汉介乎其中縣地数千里百将所屯障隧相望指麾总统厥寄匪轻卿蚤历险艰能知兵事久仪禁路备见嘉猷忧国

惓惓实惟素蘊折冲制胜倚俟茂勲上牒执谦乃为稽命

赐尚书左仆射汤思退生日诏

仲商之吉清龠将中咏崧岳之降神梦傅岩之賚弼有若伊陟格帝式赖宏樞可与王乔争年
宜膺壽嘏乃申蕃锡庸体睠怀

赐皇兄岳阳军节度使开府仪同三司居广生日诏

九秋强半万宝寢成惟时宗英集此间气庸举廩庖之锡以荣弧矢之辰宜服宠光用迎昌炽

赐崇信军节度使开府仪同三司充万壽观使赵密乞致仕不允诏

卿识潜李法名压花卿蚤扬贝冑之威入护羽林之士伍符甚整师律可称兹闲馆之均休俾
昕朝之借重据鞍矍铄谁谓伏波之衰扣楫扫清未减祖生之志奚为上牒遂欲挂冠益务葆
宦毋轻眷倚

赐吏部尚书金安节乞致仕不允诏

朕读诗至於虽无老成人尚有典刑书至於尚猷询兹黄发未尝不辍卷三叹盖养老乞言古
昔之令典而限年致仕仕进之常规也礼经之制乃为碌碌凡材戒之在得者设若不得谢岂
虚文哉卿年高德邵名声四驰魁垒尊朝徒得君重今百僚楹然绅佩相映顾不能容厯眉一
老以表仪班列耶舍朕而去人谓斯何

赐贺允中赴阙诏

朕总揽纪纲规恢绪业思得黄发台背之杰尊我朝廷若覩景星凤凰之祥编之图牒卿器宏
而用远学广而闻多道可侔於臯夔言必称於尧舜清节懿行表诸荐绅说论嘉猷烂其章奏
令德无古今之间美声洽中外之传崇易退之风尚抽簪於壮岁佐更张之政实补袞於慈闈
有怀典刑每劳注想兹借露门之职俾均云阙之休盖大臣以忧时为心非常人拘谢事之制
矜期朝夕之诲勿托春秋之高安石将如苍生何难循墙而固避鲁人犹望高子也其叱馭而
疾驱特讲旧章始盼温诏睠惟硕辅必体至怀

赐汤思退等为水潦害稼待罪不允诏

朕德不足以感召和气乃邪陰奸阳常雨为罚水不润下伤我百谷今驻蹕於兹吴中盖根本
之地而膏腴之乡也岁一不登如公私何卿等宜图内外之治思政刑之失求揅菑之方叶心
力行消去变异以副朕应天忧民之实合辞引咎非所愿闻

赐汤思退等为水潦再上表待罪不允不得更有陈请诏

朕以政之失中水不就下思销复之策方尽心焉引燮调之譬既闻耳矣菲躬有过台辅何嫌解琴瑟而更张赖於协力归印绶而自劾勿复费辞

赐赵密辞免少保乞守本官致仕不允诏

卿执戈卫社有籍甚之雄名结发从戎迨皤然之暮景久奉祠而均佚忽贡牋以遗荣恳请既坚去心莫遏兹陞华於少保用疏宠於老臣何须伛偻之词未体宠光之意亟其只服夸彼等夷

赐金安节辞免敷文阁学士不允诏

疏广盛东门之饯观者皆贤孔戡怀北陌之游去之何果卓然夙望踵此高踪卿道不诡随言皆至当乌台谔谔宁抑厌而退藏青琐昂昂实刚方之素蕴良金既已百链乔木耸其千寻忽轻禁橐之荣遂起安车之兴念羽仪之迫赖况筋力之未衰屡揽枕封勉从雅志虽无人乎子思之侧长者不留抑使亲闻伯夷之风顽夫丕变用跻内阁之职俾对昕朝而归优任子之常科尽贪贤之异礼尚劳冲挹曷副眷私

赐虞允文辞免显谟阁学士知平江府不允诏

卿名驰禁路材轶英躔羽扇纶巾尝扫舟中之敌轻裘缓带久宣塞上之劳会吴郡之阌人听輿言而出命陟之内阁重我辅藩使道路不复拾遗则京师於是蒙福事无可避行也勿迟

赐贺允中辞免落致仕提举万壽观兼侍读不允诏

朕愿见耆艾不啻饥渴惟时旧德近在数百里间乃下尺一之诏使之乘驿造朝济我国论卿左右承弼天下达尊闻命幡然朕心以悻悻不忘君真古之所谓忠臣也欵祠庭经幄何以辞为

赐皇子镇洮军节度使开府仪同三司恭王生日诏

节两间而吹律式对盛秋艮三索而得男是占吉梦惟璿源之毓粹宜贝阙之延休爰飭恩盼以崇壽岂赐资政殿大学士左通议大夫致仕贺允中辞免知枢密院事兼权参知政事恩命不允诏

朕假人不以名器宁或虚员执政其犹股肱相须成体眷本兵之任重久选衆而才难既得老成之典刑必致枢机之周密卿忠在王室行如古人博物洽闻言谟有补於世独行特立卷舒不随乎时造朝无俟驾之淹接昼非括囊之比蔽自朕志冠於宥庭仍参预于大钧乃弼谐之

旧物纪纲益振帷幄可尊亟只两命之荣勿执三休之美

赐淮东宣谕使钱端礼乞罢遣不允诏

赵营平画军册是其计者初什三中什五最後什八宣帝听之不疑故功名垂於亡穷卿銜命治边于今半载忠谋潜画纖悉曲折犁然当於朕心公卿议臣亦未尝有异同之论也何疑上书遂欲解印绶去朕方治使者车结二国之好庶几边城有晏闲之期夫为山九仞功亏一篑毋憚小留以讫成绩

赐起复检校少保威塞军节度使充河北路招抚使建康府驻劄御前忠毅军都统制萧琦乞宫观不允诏

朕捐高爵推赤心以待将帅熊黑之士无此疆尔界之殊庶几得人如金日磾浑瑊等辈宣力成功方驾前古卿骁毅冠军策略深远銳然右衽不爽初志入对便朝诚谅有余朕所以宠之斋坛授之将钺冀汝忠义奋发副我倚信神明扶持何恙不已求闲之事勿效虚文赐太傅宁远军节度使和义郡王杨存中生日生饴诏

日躔井宿对桑弧蓬矢之辰天佑将星得燕颌虎头之相彝鼎纪殿岩之绩袞旄膺王社之荣恩锡有常壽臧斯介

赐张浚辞免少师保信军节度使判福州恩命不允诏

朕以卿连年督军殫耗心志复调台鼎坐不爨席跋履江淮之间风纚露沐亦已劳矣方趣来归而抗章再三欲追赤松之游诏旨虽颁顾不得而留也跻荣亚师盖非常典斋钺之拜在儒者则以少为贵始终眷遇所以宠卿之归抑无负矣全闽之寄慰彼去思又何以辞为

盘洲文集卷十三

卷十四

钦定四库全书

盘洲文集卷十四

宋 洪适 撰

内制四

赐少保观文殿大学士充醴泉观使福国公陈康伯辞免判绍兴府不允诏

卿道蘊夔龙名参魏邴久处中而当轴能亮采以惠畴怀赤松之游遂轻元宰享緑野之佚既閱三时睠岳狩之辅藩起岩瞻之旧德几禡牙而为重兹击柝之可闻尚驰称疾之章未动趣装之意先一州而後天下已有愧於是言润九里而福京师岂遂忘於斯世即期引道勿事循墙

赐知枢密院事兼参知政事贺允中乞依旧致仕及还纳前後锡赐恩数不允诏

卿夙鍾蹕絶之材内抱经纶之志鍼膏肓於泉石惠然肯来访谋谟於庙堂酌焉不竭政赖同寅之助庶图再造之勲又欲挂冠曾不暖席岂朕尊贤之礼有所未至而卿致主之道亦不克终勿轻去就之怀有负倚毗之意

赐左仆射汤思退辞免都督江淮军马不允诏

夫有文事必有武备孔子所以克齐无智名而无勇功张良用之兴汉虽战阵不逮瑚簋之学而筹策自高帷幄之中顾方略之何如岂儒术之无益卿临机有断烛理甚明已能制胜於两楹何惮启行之十乘惟善致君者必欲立事恐不知我者谓之辞难宜略撝章以图成效

赐少保崇信军节度使赵密辞免落致仕权殿前司职事不允诏

昔马服善兵能成阙与之绩营平虽老不憚金城之行以卿久护周庐屡专勇爵必能追於鼻祖尚有志於肤公乃出异恩俾还旧服无谓挂冠之後遂忘持戟之忠其体眷怀勿拘辞避

赐太傅宁远军节度使醴泉观使和义郡王杨存中辞免同都督江淮军马不允诏

朕留神以治军政拊髀而思古人命丞相以董师将展百筵之饯有元戎而共服更增十乘之光卿甲令称忠太常纪绩闳茂深远洞龙骖应敌之机福艾奇厯得虎头肉食之相当兵革未能休息岂英杰可以韬藏谋上将以贰元台贤长城而开大府几万全之良策成七德之峻功

涣命已行谦辞勿讲

赐左谏议大夫淮西宣谕使王之望辞免参知政事不允诏

卿乘驷马车入蜀十年之间徧持使节兵民疆场之事无远近巨细皆知之而学可以伸其志文可以畅其说材可以任重致远谋可以见微炤隐邦家之杰君子之光也谕指淮壩边备其设奏函鼎来辍食嘉叹与其外治於军政不若归协於庙谟蔽自朕心跻之两地夫君臣遇合千载一时趣装亟来勿执谦槃

赐吏部侍郎淮东宣谕使钱端礼辞免兵部尚书都督府参赞军事不允诏

夫能折冲者君子之谋不避难者忠臣之职卿受任抚边悉心尽虑城隍兵甲刍粟之事处之善矣朕以交邻之始将帅之心未一故建督府以重其权命尔为大司马以赞之庶几制胜定功举无失策再三称疾朕何望焉

赐左仆射汤思退乞罢机政不允不得再有陈请诏

大丞相所与朕决中外之计以身为天下安危者也君臣之间无纖芥猜嫌何为连章直欲归印朕焦心励精内修政事遏冲固圉外治军旅以文武二柄剽属任一相庶几还安远肃奠枕于京使朕仰有以奉慈闱之欢俯有以遂元元之乐则卿亦有无穷之闻也夫忠臣在畎亩犹不忘其君卿图回庙堂任重济难劳亦至矣无谓大雅保身而轻为此去就也

赐左谏议大夫充淮西宣谕使王之望再辞免参知政事乞宫观不允诏

卿稟川岳之晖有公辅之器英名擅乎中外奥学达乎古今经武整军忧遂寛於旰食料敌制胜明盖察於秋毫既强本以折冲能运筹而合意俾参大政冀展壮猷有德进则朝廷自尊诈谋斯寝真儒用而天下无敌治效可成其报非常之绩勿牵至再之请

赐给事中吴芾辞免吏部侍郎不允诏

士君子公耳忘私当官而行乌有亲疏曲阿之患然三尺法大为之坊【缺】非为端人正士【缺】也尔能养刚大之气素擅直方之名甫入东台正赖纠駁辅臣有连必无偏党援此再疏【缺】甚力朕亦不欲使汝破律造端也小【缺】虽高抑汝要路夫何辞之有

赐参知政事王之望辞免督视江淮军马乞致仕不允诏

朕以境土分裂宿愤不摅顾瞻中原未尝一日忘於心仰稟慈谋俯从廷议屈意寻盟固已逆料其不成也敌人无厌竟为戎首卿习知边琐智略纵横揆策运筹吾见刚者钩轴之拜所恃有为今御侮扞冲机不容发非揖逊球焚从容拯溺之时以卿忧国之忠吞敌之气必能执言

不复避事视师之命舍卿而谁勿淹引道之期何俟清边之効

赐左仆射汤思退乞罢机政不允诏

昔越勾践苦身焦思图报强吴谓镇抚国家亲附百姓蠡不如种故举国政属之种而使蠡治兵甲之事内外得人终刷会稽之耻今强敌寻戈犯我边鄙虽卿受任董师前有成命念排难图全在予左右其责甚大一相之动【缺】

易摇非奠枕于京之计也虑之再三权其轻重【缺】

代此行举棋不定朕则有愧委而去之【缺】

同患之义乎

赐汤思退辞免观文殿大学士不允诏

卿再相枢垣忠劳备至塞氛孔炽尚赖画策出奇之助悠然而去朕甚惜之规殿美名所以增衮衣之光亦卿之旧物也过形冲牒岂谅朕怀

赐杨存中辞免都督不允诏

朕以敌人犯塞师衆在边欲专总统之权用注安危之意凡我戎役咸听指麾庶三令五申之明无十羊九牧之患以卿老於戎事积有智名必能展於壮猷遂克成於伟绩徽草已播輿诵谓宜益肩卫社之忠勿讲循墙之避

赐陈康伯辞免召赴陪祠不允诏

朕有怀英袞隆显相於郊禋已播明缙俾复持於国秉兹披前牒难废细书勿稽命驾之期终觐奉璋之助赐兵部尚书钱端礼辞免端明殿学士签书枢密院事不允诏

朕畴咨隲望入赞神机冀摠帷幄之谋用应甲兵之问兹披来牒乃徇摠文况当多垒之秋岂是循墙之日亟其承命副我虚怀

赐显谟阁学士虞允文辞免端明殿学士同签书枢密院事不允诏

朕以敌国阻兵怙强构恶非有厌难折冲之材者岂足以居本兵之地以卿文而【缺】武所虑甚长畴昔视师决舟中之胜名已知於江淮草木矣暨使陝蜀临荆襄驱驰兵间洵开幕府料敌之策整军之术盖从容于胸中乃稽輿言俾赞宥画摠章来上非我欲闻

赐陈康伯辞免尚书左仆射不允诏

朕外治边虞内虚相位区处甲兵之问不胜宵旰之劳望卿之来以日为岁卿以经邦元老固当与朕同忧拯溺拯焚非规行矩步时也

赐参知政事周葵生日诏

月律就盈星躔分秀笃生哲辅能攀房杜之名申锡恩盼用介乔松之壽

赐吏部侍郎吴芾辞免敷文阁直学士知临安府不允诏

王城杂五方之民强凌弱衆暴寡京尹威望不立则奸宄椎埋无复忌憚况有挠其前掣其後者非刚毅自信未易以办治称也卿屡把麾符威而不猛有兴利除害之政有苏枯摘伏之声典治吏铨浸耘蠹弊弹压輶轂直差易耳内阁峻职庸示宠光毋守冲怀亟图善最赐草土沈介辞免特起复原官显谟阁直学士知鄂州兼鄂岳江黄州汉阳军沿江制置使不允诏

夫忠孝臣子大节朕岂固欲夺人陟屺之哀而遂废凯风之诗也盖公家之事有急于私壺则君子当权其重轻不以报亲追远之情而忘忧国事君之志虽欲躬曾闵之行然移孝为忠古人盖有变礼而不可免者今敌人南侵扰我四鄙襄汉亦交锋刃惟长江上流所以襟带东南也思得有文武威风善方略者往当一面庶几遏冲御侮寬我旻食乃建使名俾临沔鄂畴咨中外无以易卿勉为朕行勿复固避

赐陈康伯再辞免尚书左仆射诏

夫天子以论相为职得贤可以永安人臣以忧国为心有疾犹当强起若济川必俟舟楫如作室难虚栋梁明良相须今古不易朕猥以菲德仰承燕谋惟我大儒首陪初政迨兹多事无出旧人虽老成当遂其燕闲顾内外适丁乎纷纠所资忠计用集治功况宰臣未至而先除在国朝絶无而仅有宜思注意之重勿以卧疴为辞日冀兼程副予虚佇

赐参知政事周葵乞赐黜责不允诏

卿辅朕踰年肃敬有守明於治乱忠无隐情赞襄政机罄竭劳瘁方今内治未举外寇孔炽政赖股肱之老同寅协恭计安天下上书引咎是彰朕之未烛也勉安厥位图所报焉

赐敷文阁直学士王刚中辞免翰林学士兼给事中不允仍特免回避祖讳诏

卿学博古今文摛黼黻有潜藩师氏之旧实儒党人材之英使之润色於训辞可以追踪於典故仍司封缴所赖论思兹览逊章具知冲守谓祖名之相犯在官称而有嫌惟公义当夺夫私情况王制可屈其家礼唐李贺不举进士已为韩愈所讥毕士安之居北门弗避义林之讳勿拘撝节即服恩纶

赐王刚中辞免改除礼部尚书兼给事中直学士院恩命不允诏

昔帝舜之戒伯夷曰夙夜惟寅直哉惟清朕以卿直清之操比方前哲既悬避家讳屈以玉堂之直矣秩宗虚位用尊禁朕夫批敕视草而决聚讼之议儒者之荣何以过此往哉惟钦勿复谦固

赐周葵辞免资政殿学士不允诏

君子达而在上居台辅之位使朝廷尊安遐迩赖福名遂而归啸傲丘壑以松竹为藩篱以鸥鸟为朋俦进退俱荣岂不超然有余裕哉卿望倾後学屡上要津遵道而行不合则去晚陟政地熟闻嘉谟所赖赞襄以格上治而赋归甚勇指疾辄辞挽之再三不得而强规殿美职厥有彝章成命已盼勿劳谦避

赐陈康伯辞免兼提举玉牒所监修国史提举编类圣政不允诏

夫修玉牒之文约金匱之史纂慈闱之政皆国家信书大典垂之不刊非鸿儒比良迁董者未易居其职上台典领厥惟旧矣机务之隙毋以笔削为劳也

赐郭振辞免捧日天武四厢都指挥使不允诏

十月己卯敌人絕淮始祸我濠焚我盱眙吞噬我楚迭我合肥蹂躪我固始侵掠我舒城?刘我临滁睥睨我六合我师分布於两路而外御之功无闻焉卿许国尽忠奋励士卒搴旗斩将首奏肤功有进死而无退生捷音既腾为诸将军之倡冠职交戟非曰赏功何必撝辞以遏成命

赐陈康伯辞免长男伟节除直秘阁次男安节赐同进士出身不允诏

夫寓直蓬山有登瀛之美列名科籍如折桂之荣要路由此权輿士林之所欣艳卿柱石之老邦家之光肯力疾以造朝见竭忠而忧国顾无优礼可示矜怀既给扶藜上于禁墀故疏宠用沾于子舍盖祖宗尝行之事在简牍具存其文荐览来章力辞异数当勉承於恩意勿固执于撝情

赐沈介辞免权兵部尚书不允诏

朕以卿资兼文武材出等夷运筹可以折冲整军必能固圉畀之名节夺尔倚庐闌外之事则制之专属荆襄之任舟中之指可掬也仍总江淮之师方边患之未清顾诈谋之难测勉思至计以解外忧惟兹常伯之迁实允輿人之诵当体艰难之寄勿为伛偻之词

盘洲文集卷十四

卷十五

钦定四库全书

盘洲文集卷十五

宋 洪适 撰

内制五

赐王之望辞免端明殿学士不允诏

朕承洪业托士民之上若涉渊水未知攸济思得天下之杰合谋相辅以成治功故高位厚禄所不敢惜以卿有慷慨之志更中外之久乃自首谏跻之政涂今盖未几也而雅怀莫遂公论弗孚虽欲留以自近顾不可得书殿美职乃进退大臣之优礼何至遂有挂冠之请哉赐步军司後军统制崔臯辞免鄂州观察使不允诏

朕注意戎事醴於用赏高秩美官未尝爱惜执此之信有如皦日卿扞敌淮壤厥有茂勲吉语首驰朕心以怪观风之任躡等而迁益思尽忠勿事冲避

赐钱端礼辞免参知政事兼权知枢密院事不允诏

昔舜命九官济济相逊奋庸亮采靡事不理朕甚慕之卿学足以行道识足以决疑入践钧枢能断国论畴咨选衆宜幹政机兼冠宥庭助我经武摛词相推无愧於古涣汗不反亟其只服

赐虞允文辞免同知枢密院事兼权参知政事不允诏

朕以眇身获保宗庙天下治乱在予一人非邦家之英同德一心裨助万务则安能有济哉卿充积学问练达事机中外践更所言可绩比参宥画具见良图宜副本兵兼预政柄赞襄之效倚俟有成只服恩荣无劳谦挹赐王刚中辞免端明殿学士签书枢密院事不允诏

朕兢兢业业一日二日万几寤寐有德之辅天下贤哲肯从我游者吾能尊显之卿有佐王之学有拔俗之材入从出藩咸着显闻复还禁路风望隐然入助筹帷孰曰不可循墙之避非所愿闻

赐戚方辞免捧日天武四厢都指挥使不允诏

宰辅以汝求免厢部事入奏夫爵禄者朕所以厉世磨钝也介胄之士有安边卻敌之効达於朕听赏不旋日惟恐忘其功也卿忠不顾身名副其实旗常有纪褒律匪私宜略摛词亟只茂

命

赐皇子少保邓王愔生日诏

新穗历於三微甫迎献岁视冀阶之
双秀厥有休符为吾元子之祥得彼列僊之壽爰推恩渥以颂炽昌

赐太尉昭信军节度使曹勛生日诏

岁龠更端方歌青炜之曲禁门通籍不隔赤松之游式盼牢醴之珍用介袞旄之壽

赐签书枢密院事王刚中生日诏

勅刚中献岁发春景躔三宿元精生佐秀括五行爰推盼式之常以相壽祺之永

赐左武大夫宜州观察使龙大渊辞免落阶官不允诏

朕践好之始择材为使必得长於专对者以坚二国之盟卿讲习古训识虑渊深久於潜藩终始如一尽忠致主畏远权势出入禁闕有休声张旌越疆弗憚遐阻俾脱横列正名廉车庆不虚行无事撝固

赐陈康伯乞解罢机政不允诏

朕以菲质膺太上传授之重蚤夜櫛櫛不敢以位为乐念宰相助理万几图任之失则不特噬脐之悔而已故力起旧德还以魁柄袞绣复来即日无甲兵之问显相肇祀天闔其祥殆亦變理之效也方倚硕望尊强朝廷虽目眚未平顾岂不能奉我清闲之燕坐而论道乎上印勾归朕不敢听

赐参知政事虞允文乞宫观不允诏

君为元首臣为股肱盖一体相须所以合谋同德计安天下者也卿辅政半载屡告嘉猷筋力方强思虑甚审何嫌何疑遂欲引疾而去详味来章深所未晓

赐虞允文乞宫观不允更不得再有陈请诏

卿秉尊朝之德有忧国之风造膝惓惓备见忠款朕方倚以为治庶几摩厉无前之绩未尝有纖介之间也移疾勾闲何易退如是耶载览所陈难以曲徇

赐知福州赵子瀾乞致仕不允诏

大夫七十而致仕盖血气既衰惧其漏尽钟鸣而不知止足之戒故先王制礼大为之防而後世以此约三尺之法也乌有神明之胄笔橐之杰齿发鼎盛治有能名而欲抽簪高蹈则国家安得而从之曩封后来政尔辞费亟其视事勿复卧合

赐凌景夏辞免复徽猷阁直学士不允诏

朕推紫坛之泽于四海无远迩之间况甘泉之旧乎卿性资夷粹操履端方出镇藩维有慈祥之政入司铨部有平允之声归憩丛祠未寻故步兹还内阁之职实听輿人之言奚用撝章尚留茂渥

赐王大宝辞免礼部尚书不允诏

卿履道醇固蓄德雄刚从列谏坡积有令问退休林壑恬适泰然趋节远来得倦倦不忘君之谊入对文石筋力未衰宜长春官用资献替之益已盼涣命奚事撝文赐赵密再上表辞免少保不允仍断来章批答

省表具知朕讲修军政睽遇一臣念坚甲利兵尝冒死亡之地故高秩厚礼特优终始之恩兹宿将之告休以贰公而佚老使师衆益思於报国知朝廷不负於用人朕命已行汝辞毋再所请宜不允仍断来章

赐贺允中再辞免知枢密院事兼权参知政事恩命仍断来章批答

二老来归於西伯以齿为尊九官相推於舜朝匪辞所命我图耆艾俾典事枢庶几制胜於两楹如彼运筹之三杰国有成涣人无间言当思遇合之难共讲治安之策畀之召节既不啻坏以为高览此奏函何乃叩阍而未已

赐文武百僚汤思退等上表请皇帝御正殿复常膳不允批答

涉秋以来天作淫雨害我穡事朕仄席辍餐惕然靡宁天裁荐至夫岂偶然朝思夕维顾无以仰答谴告虽沴气欲解而沈没之田农方告病公卿大夫有足国惠民之策能纾我之忧则为爱君复常之请姑置之可也赐汤思退等再上表请御正殿复常膳不允批答

永初遇雁雹之异不陈庭下之车祖已戒雉鼎之祥尚改庙中之祀顾予不德方古有慚雨集七八月之间遂成积潦郡灾什四分以上迨及数城虽采纳於谗言亦举行於荒政莫救西成之害不胜南面之忧惟卿荐贡於诚忱在朕正怀於抑畏上栋下宇难讲大听之仪右截左殽敢丰中昃之御

赐汤思退等三上表请御正殿复常膳允批答

朕罪已畏威便坐未尝安席斋心食淡厚味不复充庖永念咎端敢为文具虽恐惧於斯而踰月顾贬损何足以应天卿等咸造广廷屡腾需牍具陈稽古之训深见尊君之诚陞九级而上廉勉从来请物百羞以俟馈只愧多仪所冀责难之恭交修除害之利

赐杨存中上表再辞免同都督江淮军马不允仍断来章批答

卿材资果毅谋虑沉深百战摧坚屡奏藁街之捷八营掌武久尊兰錡之权时有弛张色无喜愠兹边尘之未靖岂王事之可辞当思注意之隆必奋折冲之効夫李靖专用兵之善盖房杜济之以文若子仪坚事上之诚故齐晋比之为偏宜蠲冲节往副庙谟

赐王之望再辞免参知政事不允断来章批答

朕临渊思济寤寐实?外而一路一州之寄内自郎吏九卿而上曷尝易以印绶与人况一二辅弼所与断天下事而系国家重轻者哉以卿通达治体文武宪邦事不避难精于远虑必能同德合谋兴今复古无愧於烝民车攻之诗兹用决之朕心峻登政路非以私卿一己之荣也卿当体朕责成之意夙夜孳孳同寅和衷发舒贤緼以振可大之业屡章不已非所望焉

赐钱端礼再辞免签书枢密院兼提举德壽宫不允仍断来章批答

朕仰惟太上皇迈德勋华以神器之重传归在予虽一月三朝竭四海之奉而彩衣问寝不获旦旦左右若稽皇祖尝以廷臣领使於慈宫朕跽以有请而圣德谦托因仍未遑也以卿受知两朝出入禁闥况材高识远筹边甫归当此治外宜在枢机之廷崇我孝养立我武事一举而两得之又何辞焉

赐虞允文再辞免同签书枢密院事不允仍断来章批答

夫右府本兵盖颢戎政北枢垂象实接阶符兹求艺圃之英俾赞筹帷之密既輿言之相庆犹逊牒之重陈虽谦冲者君子之常而忠力者股肱之事当思多垒遂展胜谋勿徇撝情以留涣命

赐陈康伯再辞免尚书左仆射不允仍断来章批答

辛巳之役中外骚然卿坐於庙朝智略辐凑雍容谈笑能解非常之纷今边陲受敌丞相位虚思我旧人式遏乱略扬廷之後诏札屡颁袞衣来归国人胥庆宜摅远业遂寝撝词

赐钱端礼再辞免参知政事兼权知枢密院事不允批答

卿练习世故有猷有为隄度世事犹烛照数计而龟卜也朕知卿之材旧矣迺者赞右府兼政柄启沃设施有久大之业试可而迁人望咸允辞至於再吾意不然赐虞允文再辞免同知枢

密院事兼权参知政事不允批答

文武之枋系於东西府二三大臣通国之望也朕以卿硕材不器輿诵所归俾佐事枢揆策详审俾参朝政告猷允臧详试而进朕命不易虽复深词难徇来恳赐王刚中再辞免端明殿学士签书枢密院事不允批答

朕延登民望参筦神机陟三杰以同时监百王而治内庶赖多筭匪求近功卿契合於潜藩崢嶸於禁路去国之久靡人不称甫持橐以尊朝宜拥枢而立武当遵批语遂絶摺函

赐文武百寮宰臣陈康伯等上表奏请御正殿复常膳不允第一批答

朕念戍边之暴露躬避殿之焦劳雨雪载涂有感出车之咏钩星在汉未遑交戟之朝上天储悔祸之休邻壤结寝兵之好虽擐甲枕戈之士将遂归期顾垂衣列鼎之仪敢寻盛典

赐文武百寮等再上表奏请御正殿复常膳不允第二批答

朕比警边尘歌采薇而遣戍每怀戎幕惭细柳之劳军难因多垒之平便讲正朝之礼荐披来牋具见勤诚宜思治内之方姑缓复常之请

赐文武百寮奏请御正殿复常膳宜允批答

朕彻禁卫于两阶甫閱七旬之久损牵牢之百品敢陈八物之珍念暴师露衆之劳行修德责躬之事虽得沉烽之报未施挟纊之恩顾卜郊近斋宿之期欲上壽讲昕朝之礼勉从忱请徒积愧怀

赐吴璘辞免太傅新安郡王不允断来章批答

朕执爵禄之柄以厉世磨钝虽五两之纶半通之铜未尝轻以假人况茅社之封槐鼎之任乎卿英望鸿烈为中兴第一卓马来朝国人相庆大庭孚号金曰允哉而执谦再三伛偻之恭犹未已使朕褒显功臣之意鬱而未伸卿亦安取此亟其拜命勿复费辞

盘洲文集卷十五

卷十六

钦定四库全书

盘洲文集卷十六

宋 洪适 撰

内制六

抚问犒设荆襄将士口宣

有敕卿等奋忠许国擐甲临边暑往寒来暴露良苦有怀制阃兹选近臣益勉功名用酬恩意
今差户部尚书新湖北京西路制置使韩仲通抚问荆襄将士其犒设依两淮宣谕司体例支
给想宜知悉

赐三省官满散天申节道场香口宣

有敕朕孝伸螭馭瑞接虹流卿等集朱紫於周行达缙黄之善颂名薰有赐神筴斯增今差某
官赐卿等香想宜知悉

赐枢密院官满散天申节道场香口宣

令行九夏节纪千秋有若枢机之贤式严蓬贝之祝芬香是锡福祉斯迎

赐殿前司满散天申节道场香口宣

六幕迎薰千龄纪节有若羽林之将载严贝叶之宫锡尔宝芬助予孝治

赐皇子邓王庆王恭王满散天申节道场香口宣

玉卮讲家人之礼金简受仙官之祥惟时王邸之贤能尽孙枝之孝宝薰是锡寿祉斯崇

抚问贺允中到阙并赐银合茶药口宣

卿驱驰道路密迹郊关乃将恩筐之颁往问行骖之次用申眷待益辅葆调

赐赵密辞免少保不允批答口宣

卿枕戈之久解绂而归已出褒章用光晚节摅文可略拜命勿迟

赐少保致仕赵密告口宣

卿恳辞宦路归憩家园缅怀百战之劳已陟三孤之贵出纶有赐承命为荣

赐贺允中辞免同知枢密院事断来章批答口宣

载稽夙望诞布明纶升筦斗枢茂经天緯輿情相庆冲节可蠲

赐汤思退口宣

卿鼎席望尊筹帷虑审不改燮调之职俾专总统之权已告听庭宜祇茂渥

赐杨存中辞免同都督断来章批答口宣

朕畴咨良帅共督诸军庶有橐弓之期遂臻奠枕之治往图伟绩勿事撝辞

赐皇子邓王庆王恭王满散会庆节道场香口宣

卿竭孝兰陔归诚莲刹介八千春之眉壽繙十二部之尊经爰赐宝芬益严胜会

赐三省官满散会庆节道场香口宣

卿等输忠卫戟展敬名蓝欲崇箕翼之符广集乾坤之祉乃加颁锡以助薰严

赐枢密院官满散会庆节道场香口宣

卿久问兵甲来归庙堂次舍之间神明所护宜有恩颁之宠以咨偃薄之劳

赐赵密落致仕权殿前司职事告口宣

朕畴咨一老复卫千庐士气既增輿言咸惬宜祇纶命庸副眷怀

赐王之望辞免参知政事断来章批答口宣

卿学擅洽闻材堪大任兹陟钧衡之贰甚谐中外之瞻宜视批章遂蠲来牒

郊祀毕宣劳将士口宣

朕修报觚坛迎厘斋幄卫社赖六师之武周庑三宿之劳式对严凝良深嘉獎

抚问少保恩平郡王璩到阙并赐银合茶药口宣

卿比趋召节来相郊禋蒙冒霜威驰驱江路庸推颁式以示眷私

传宣抚问宣押陈康伯赴行在口宣

朕焦劳宵旰注想仪刑申遣使璩往迎召驿所期倍道以副虚怀

赐汤思退提举太平兴国宫告口宣

卿洊腾需牒祈解冢司载嘉勇退之风莫遂挽留之意兹颁制渥宜体眷怀

赐杨存中都督江淮军马告口宣

边尘方起阃制匪轻赖总督之得人能扫除而安国已颁褒律宜服涣恩

抚问张纲到阙并赐银合茶药口宣

卿?趋一节密次九闾宜飭使貂往询来驿恩颁有式眷倚惟深

抚问陈康伯到阙并赐银合茶药口宣

卿不憚三冬载驰千里副吾论相之意知汝致君之忠宜有恩颁用申眷遇

赐钱端礼辞免签书枢密院兼提举德寿宫断来章批答口宣

比稽輿论俾陟宥廷仰以奉於慈闈远欲清於边祲宜祇茂命勿治撝章

赐虞允文辞免同签书枢密院事断来章批答口宣

朕延登邦杰进列机廷所赖远谋以排外侮宜肩忠报勿治撝词

赐陈康伯告口宣

朕眷求元老复位上台輿望迨归边氛自却宜膺书赞以展经纶

宣押陈康伯赴都堂治事口宣

朕延想柱石有如渴饥行旆非遥我心则喜申戒貂璫之使趣临政事之堂勿复趑趄用酬眷倚

赐陈康伯批答口宣

卿跋履川谷肯为朕来整顿乾坤谁出卿右其展经纶之蕴勿修撝避之文

抚问杨存中赐金合茶药口宣

卿久督戎旃兹周岁念风威之偃薄知幕府之勤劳爰出恩颁用资嗇护

抚问诸大帅并赐鞍马口宣

岁律将更边城良苦分禁闲之上驷助戎幕之神旗祇服恩颁益思忠报

赐钱端礼断来章批答口宣

卿望高两地象应三阶掌朝政於中台本兵权於西府当酬眷倚毋守谦撝

赐虞允文断来章批答口宣

卿学盖尊王材堪谋国进跻枢贰益起岩瞻宜体批章遂蠲冲牖

赐王刚中断来章批答口宣

比采师言俾登宥地乾纲独断涣命已行当谅至怀勿拘逊礼

赐蒲察久安告口宣

卿比逢郊类获相盛仪厥有明纶用敷祭泽往其祇服思称龙光

赐吴璘告口宣

卿拥旄乘塞卓马造朝爰举徽章用颁褒律亟其祇服式副倚毗

赐吴璘辞免太傅新安郡王不允断来章批答口宣

朕涓辰之吉敷命於庭褒答元勲谐契舆论其祇茂渥遂寢撝文

赐王彦加恩告口宣

朕比讲郊禋普推祭福若时虢将宜出纶言用示眷怀亟其祇服

赐三省官满散天申圣节道场香口宣

卿等萃千官於仁宇祈万寿於慈庭以若忠勤深嘉尚名薰之赐法会是崇

赐三衙满散天申圣节道场香口宣

卿等庀职周庐输忠报上开梵宫之法席祝慈殿之遐龄爰锡宝薰用严胜会

郊祀毕端诚殿受贺枢密宣答宰臣词

有制朕惕奉慈谋肇禋吉土赖上台之显相协吉日以涓成翕受厯禧言旋清蹕礼成之庆与卿等同之

端诚殿宣答枢密词

朕黄流假庙紫燎充坛惟元祀之熙成赖鸿枢之陪辅

端诚殿宣答筦军词

朕嗣守邦图初修郊类赖尔干戈之卫肃无陞栒之譁已受神厘遂回诏蹕

丽正门肆赦宣答宰臣词

燔柴泰畤接风马之灵旂旅軫端闈霈星鸡之渥泽敷锡之庆与卿等同之

赐四川宣抚使吴玠夏药勅书【五月四日】

勅吴玠卿权尊帅阃威震坤维当铄石流金之时劳锻甲摩劒之事远颁珍剂庸示眷怀今赐卿银合夏药并统制统领将佐官属并依年例分赐仍传宣抚问故兹示谕想宜知悉夏热卿等各比好否遣书指不多及赐保信军官吏军民僧道耆寿等示谕勅书

勅保信军官吏军民僧道耆寿等朕以张浚宣力於外閱时兹多眷惟耆哲之臣闵劳军旅之事趣来归而调燮乃恳请於退休已疏异等之恩特宠三孤之上相攸乐土畀以节旄谅草木之知名必室家之相庆今特授张浚少师保信军节度使判福州依前魏国公加食邑一千户食邑实封四百户故兹示谕想宜知悉夏热汝等各比好否遣书指不多及

赐南平王李天祚历日勅书

朕钦天治历稽古颁常仰齐七政之文用协九畴之叙矧言南服夙慕华风欲知来岁之宜当讲新书之锡谅循月令以格时和

回赐南平王李天祚勅书

卿奉藩丹徼慕义清朝拜覃渥之褒纶驰方输之珍物备殫忠恪深用叹嘉

赐阶文龙州经略使吴拱等夏药勅书

卿蒙犯隆暑勤劳极边城池斯固於金汤介胄或生於虬虱匪颁有式注想不忘

赐湖北京西路制置使虞允文淮东西路宣谕使钱端礼王之望夏药勅书

卿潜筭折冲皇华护塞宽吾旰食劳汝暑行乃颁赐式之珍以助生经之卫

赐福建路安抚使张浚夏药勅书

卿甫离揆路借重价藩当炎赫之御辰恐驱驰而失叙乃分良剂用辅生经

赐荆湖南路安抚使黄祖舜夏药勅书

卿在时旧德为国长城当三夏之炎晖念重湖之卑湿爰举匪颁之式庶迎善耆之休

赐江东安抚使汪澈银合腊药勅书

卿远拥帅牙时当寒飧虽有神明之相岂无偃薄之劳爰出恩颁用资颐蓄

赐江东安抚使汪澈银合夏药勅书

卿誉偃朝绅权尊宫闈兹履长羸之序恐违耆养之宜爰锡上奩用颁温检

赐御前都统制郭振等银合夏药勅书

卿权尊制阃任重干城式当炎燠之辰或有晦明之疾宜颁良剂用表眷怀

赐四川制置使汪应辰银合夏药勅书

卿远开幕府静镇坤维聿临九夏之时宜有万金之剂爰推赐式用示眷怀

赐吴璘夏药勅书

薰风入律畏日流金岂无沾汗之劳宜有卫生之助庸颁珍剂以表眷怀

盘洲文集卷十六

卷十七

钦定四库全书

盘洲文集卷十七

宋 洪适 撰

内制七

太一宫介福殿开啓太上皇帝本命道场青词

维年月朔日嗣天子臣某恭遇光尧寿圣太上皇帝本命之辰谨遣某官命道士二十一人於太一宫介福殿开啓灵宝道场一昼夜满散设醮一百二十分位点上生命灯一坛谨上啓圣位伏以风薰纪序迓慈闈元命之辰星度垂光崇睿筭长生之祉飊轮在上藁笈具陈庶通格帝之诚获尽事亲之孝臣无任

太一宫齐明殿开啓天申节道场青词

伏以仰东井之躔斯临永昼竭南陔之养更庆诞辰?叩层穹肃陈法席所冀博临之况益崇难老之祥万壽观纯福殿开启天申节道场青词

伏以电枢稽瑞垂金监於千秋云陛胪驩上玉卮之万寿宝坛夙啓秘笈屡繙更迎滋至之休永介无疆之祉

南郊奏告天庆观报恩光孝观青词

伏以燔泰畤之柴将迎长至降昕庭之札已肃前期仰觐博临助成昭报

南郊奏告元天大圣后青词

伏以事先稽古礼大报天将陟颂只之堂初歛栖真之宇乞灵藁御集祉觚坛

郊祀奏告天庆观青词

伏以祓神丘而称祀将讲盛仪歛琳宇以告期仰徼嘉贶惟乾坤之所助幸雨雪之不逢?布忱衷觐竣熙事

太一宫郊祀預告祈晴青词

伏以先庚假庙将严荐裸之仪万卫适郊遂展燎熏之报仰覬神明之佑俾无雨雪之虞渊鉴不违礼容斯备

太一宫郊祀前七日预祈晴霁青词

伏以卜献岁之上辛逢元日之吉亥始严庙裸遂举郊柴仰覬乾坤之休俾无风雨之阻

太一宫郊祀毕谢晴青词

伏以卜辛日而用郊陟午阶而奠币神明所相雨雪不逢既竣事以迎厘敢储精而拜祝

万寿观纯福殿开啓太上皇帝丁亥本命道场青词

伏以慈宫增德沓迎神策之休商律题期旋次命元之纪?遵冲式诞啓清坛仰徼金简之光长上玉卮之寿太一宫介福殿太上皇帝丁亥本命道场青词

伏以葭律吹灰初届清商之候萱阶视?斯推始命之辰仰渊覆之无私为慈庭而有祷庶迎帝祉式介皇龄太一宫齐明殿开啓寿圣太上皇后生辰道场青词

伏以日临西陆澄景多休天佑南陔纯坤有庆肃延真御前祓秘庭仰絜覆焘之仁丕锡炽昌之福

万寿观纯福殿开啓太上皇帝丁亥本命道场青词

伏以天运无穷临旻秋之季月日躔有次庆基命之元辰延飞驭於苍圆介寿祺于慈殿仰邀灵祝永祚昌图太一宫介福殿开啓太上皇帝丁亥本命道场青词

伏以气动潜葭换杪秋之懿律庆流慈宸推正命之休辰载祓邃庭聿陈馨醑仰导信基之福益增神策之符

茅山崇禧观啓建会庆节道场青词

伏以日临析木之津聿逢诞序天辟三茅之洞爰啓清坛仰延飏御之光其绎琅函之秘庶臻保佑永锡炽昌万寿观纯福殿满散会庆节道场青词

伏以良月就盈斯逢诞序上天佑德已锡蕃厘法会备成真科有考更赖照临之施咸跻仁寿之隆

太一宫崇禧殿满散会庆节祝太上皇帝太上皇后圣寿道场青词

伏以肇寒律于三冬聿临初度祝慈庭之万寿仰叩上圆愿迎藁笈之休式展兰陔之报

太一宫介福殿开啓太上皇帝丁亥本命道场青词

伏以天象盖高神心善应届慈庭之元命啓秘宇之清坛仰祈顾諟之私增畀炽昌之福

万寿观纯福殿开啓天申节道场青词

伏以伯赵司至气和吹律之中华渚流虹节纪称觞之次夙陈法席仰介慈龄更迎覆育之休永锡寿臧之祉

太一宫为民间疫疠祈祷道场青词

伏以高高在上丕冒绵区林林而羣仰依洪造兹履炎歊之序尚多疵疠之人爰祓灵坛大开醮席敢觐甄陶之施咸收药石之功

满散青词

伏以天降之灾或爽雨阳之候民殃於疫遂多哭泣之声兹啓清场已周法会仰祈慈覆益赐嘉生

太一宫满散会庆节祝太上皇帝太上皇后圣寿道场朱表

伏以坛开靖馆仪讫冲科?布诚心几九闾之格帝永伸孝养以四海而奉亲

郊祀奏告天庆观满散朱表

伏以律对黄钟【续改作节迺青逵】报伸紫峙肃清场而先告秩元祀以非遥仰集美光庆成鉅典

太一宫满散天申节道场朱表

伏以仪备清坛福徼宝笈复投诚于渊覆愿介寿于慈宫永庇羣编丕隆洪祚

万寿观满散太上皇帝本命道场朱表

伏以秘馆敷筵肃挹飏旂之馭僊科考式具繙宝牋之文仰赖天休常共子职

太一宫满散太上皇帝本命道场朱表

伏以展仪秘殿乞事清场惟悃悞之上通斯高明之俯格式资道妙永锡慈休

太一宫满散太上皇后本命道场朱表

伏以袞黄冠之衆志瞻紫极之荣光迎此神厘归诸慈壺永对九秋之龠共尊万寿之觞

万寿观满散太上皇帝本命道场朱表

伏以僊科如式宝笈终篇名薰缥缈以縈风列炬荧煌而夺月集殊休于法会隆曼寿于亲庭

太一宫满散太上皇帝本命道场朱表

伏以按琅笈之灵科飏旂来下企珠躔之景纬夜漏已深宝供备成修龄永锡

崇禧观满散会庆节道场朱表

伏以祓宝席于名山飞密章于穹汉用导彫鸿之祉式光震诞之期法会备成皇休茂对

万寿观满散会庆节道场朱表

伏以宝坛閱月具按冲科菲德动天密迎纯嘏更冀无私之覆益宏有截之休

太一宫满散太上皇帝本命道场朱表

伏以祓清秘宇披考真科期帝鉴之不违致皇龄之有衍永依慈宝共庇涵生

万寿观满散天申节道场朱表

伏以协华系统诞圣纪期清场仰接於飏旂冲式已周於月律兹罄再三之祝愿臻亿万之祥

太一宫满散太上皇帝本命道场朱表

伏以冬灰欲半夕漏甫中具閱灵篇已修馨供仰徼天佑永相亲闾

太一宫满散预告郊祀祈晴朱表

伏以?祓清场具遵洞式敢期默相赐以时阳仰瞻明概之祥获受宴娛之祉

万寿观满散天申节道场朱表

伏以仪肃清坛福种慈殿已匝三旬之式益崇万寿之祈渊监弗违庆图有赖

太一宫满散郊祀毕谢晴道场朱表

伏以宝坛肃啓法会崇成大哉覆焘之私有此清明之赐式迎景贶用庇函生

太一宫满散为民祈祷道场杨朱表

伏以就涓基宇备考仙科薰修已閱於半旬康乐浸绵於万井更徼鸿佑尽扫积疴

皇帝贺寿圣太上皇后生辰表文

伏以清商叶序灿南极之瑞星沙麓发祥纪东朝之诞节腾懽宫壺降嘏霄垠【中谢】恭惟德厚仪坤明遵遡日葛之覃兮于中谷久播徽音夏之兴也以涂山特书彤史六珈偕老万壽维祺臣仰奉慈顏欣逢令旦披图按牒覩芝茎十二之华设席肆筵上椿岁八千之颂

皇后贺郊祀礼成表文

伏以礼讲泰垓秩百神而受职泽流端阙敛五福以锡民熙事崇成羣伦胥庆恭惟重华协帝下武继文肇郊旅而分年偶边虞而迁日避新阳之近晦盖遵艺祖之规卜嗣岁而用辛遂踵太宗之制况值三朝之始益来四表之驩妾仰俪乾明猥居坤极际鸿仪之获考集柔抱以交忻

闰十一月起居攢宫诸帝旦表文

伏以柔荔迎时甫践长於信宿中榆立闰兹告朔之休辰共惟道迈百王德齐七政扇皇风於有截绵宝历于无疆式展孝思敢恭明荐

诸后旦表文

伏以葭吹六琯甫过书云斗指两辰斯为附月恭惟道光坤则德俪乾仪齐太姒之徽音嗣涂山之逸响敢?芳荐式罄时思

诸帝望表文

伏以置闰严冬归余畅月风力已侵于兽炭霜威颇犯于狐裘恭惟累洽重熙同条共贯纪无前之伟绩垂不拔之元基惕奉燕谋敢陈嘉献

诸后望表文

伏以寒龠过中斯遇归奇之象素轮既望载深追远之情恭惟沙麓垂光河睢协咏配紫宸之
圣德播彤管之芳尘式想柔仪采增孝慕

永佑陵攢宫翻瓦抽换殿柱等毕工告迁徽宗皇帝神御还殿奉安表文

臣伏以恭缮寝园载新楹桷严夙兴之香火奉月出之衣冠爰諏吉以宁神冀发祥而煮後

奉告昭慈圣献显恭显肃显仁懿节皇后表文

伏以土木讫功栋梁除旧企仙园而在望奉大练以来娛仰迪燕宁敢伸洁告

郊祀毕奏谢圣祖及上帝表文

伏以始登紫畴大报苍圆奏六变之音率循祫典谨一纯之荐丕讲弥文庆熙事之涓成按冲
科而拜颺

郊祀毕奏谢诸宫观帝后表文

伏以慈庭诒燕泰畴肇禋用日之辛盖袭卜郊之制事天靡阙远超蕝野之仪鸿祀既成先猷
所相敢伸昭报永迪孚休

南郊奏告诸陵并攢宫表文

伏以气迓黄宫礼行泰畴有膺协华之德初修报本之祠顾瞻威神徼求保佑

盘洲文集卷十七

卷十八

钦定四库全书

盘洲文集卷十八

宋 洪适 撰

内制八

六月朔日蚀祭太社祝文

伏以累三光之明震惊凉德修六官之教寅畏格言式遵伐鼓之文敢洁用牲之告

陰云不见祭谢太社祝文

伏以季夏之朔太阳有眚侧身修行未烛其咎云陰忽兴不见薄蚀惟神敷佑敢荐忱诚

修整太庙大殿屋脊及东廊奏告诸室祝文

伏以积雨建瓴太室穿漏载新茨盖已集工师涓日之良执边以告

祭告土地祝文

伏以暑雨盈旬庙瓦毁落乃练时日鳩工繕修神其相之以终吉

南郊奏告天地祝文

伏以慈闱有命凜乎基业之承阳律惟时肇此郊丘之荐报二仪之颺施敕百吏之共先事贡诚彝章踵故

南郊奏告太社祝文

伏以礼大南郊甫严祀典飨行八牖用报神休方诞告於先期敢絜修於明荐

南郊奏告太稷祝文

伏以礼大郊丘甫严祀典祠修官稷用报神休方诞告於先期敢洁陈於明荐

南郊奏告宗庙祝文

伏以受命慈闱承祧累岁始行郊燎之礼将荐庙筵之诚已戒前期敢伸?告

南郊奏告太一宫十神太一祝文

伏以祀有多仪事尊肆类已諏谷旦诞播札书徼福贵神告?嘉荐

南郊奏告安穆皇后祝文

伏以三岁一郊累朝故事御图之始初讲弥文钦惟淑灵监此豫告

南郊奏告安穆皇后攒宫祝文

伏以迎休圭景展事觚坛已降札书聿严柴燎顾瞻园寝先告吉蠲

南郊奏告南岳南海南渎东渎祝文

伏以祀着邦彝礼尊郊类候一阳于六律秩羣望之百神告此前期厥惟故事

郊礼修饰太庙奏告祖宗祝文

伏以礼讲觚坛祭先宗祐风雨久侵于墙圯斧斤将易於栋楹兹卜日以告迁覬在天之委祉

郊礼修饰太庙权奉安祖宗神主祝文

伏以工役已具日时既良廼祓斋房奉移匱主仰蕲昭假少迪妥宁

郊礼修饰太庙奏告安穆皇后祝文

伏以郊丘之祭宗庙必修易腐挠之榱椽治颓穿之墙壁动兹斤斧告以豆筵

郊礼修饰太庙祭告土地祝文

伏以郊祭有期繕我太室揆日之吉或斲或圻维土有神监兴兹役

太庙修饰毕工告迁神主还室祝文

伏以载新庙寝已讫工徒諏令旦以陈筵奉灵旂而反祐顾瞻在上昭假无疆

太庙殿室毕工奉安祝文

伏以郊柴不远庙祿为先廼修观德之宫仰迪宁神之祉奉安之吉洁告惟?【别庙告奉安之吉作音徽如在】

郊祀前二日奉告太祖太宗配侑祝文

伏以肃坛峙之严禋甫迎至景推祖宗而昭配【续改作卜坛峙于上辛式遵故事推祖宗而并侑】诞举弥文大报有期先事而告仰祈右序用相休成

太庙祝七祀祝文

伏以卜郊展报假庙荐芳祭咸秩于百神礼先行于七祀灵光来格熙事备成

分祭太社太稷祝文

伏以土谷大神生殖之本兹伸吉报于国之南刺豕刲羊坛有笾俎来假来享匪今斯今

土正勾龙氏后稷氏祝文

伏以惟神之灵配食社稷土爰稼穡实尸其功练日报天于郊用牡美芳嘉荐用迪孚休

郊祀奏告五岳祝文

伏以穆卜天正【续改作夏正】将郊上圜崇岳峩峩吐符作镇敢徼颺施济此明禋

又四渎祝文

伏以郊丘之日曾不三旬【续改作兼旬】有赫渎只灵光如在敢徼陰相俾訖严禋

改郊奏告天地祝文

伏以秩元祀于觚坛初伸大报候初阳于嶰龠将讲盛仪会边祲之不宁惧斋心之有阙惟艺祖避近晦之日至太宗行上辛之郊稽此前规卜之首夏觐乾坤之锡祉使疆场之销兵庶竭忱诚遂成熙事

奏告宗庙祝文

伏以郊类有期边尘遽起仰遵祖武改卜长羸之初敢觐神休克展泰元之报

安穆皇后祝文

郊禋有日边事忽兴宪我前规改之首夏钦惟英淑有以相之

安穆皇后攢宫祝文

始祓神丘将严大报会边隅之有警恐斋戒之不?遵改卜之旧章觐如存之陰相

前一日載祭嘉会门神祝文

伏以郊柴在辰皇輿夙驾两轺之祭昔者有仪于豆于登取羝以荐惟神拥右安行玉虬

郊祀日分祭九宫贵神祝文

伏以受乾坤之降嘏合丘泽以荐馨爰修蕙藻之诚用叩飞棊之峙冀垂冲监获藏上仪

敌人犯边用兵奏告四圣五岳祝文

伏以敌国犯边尚肆?刘之虐师徒驻野未收攘却之功敢布忱诚仰干英鉴阵云如马虽氛祲之结蟠社鼓用牲冀威灵之佑助假公山草木之力成京观鲸鲵之封

奏告显应观旌忠观吴山忠清庙祚德庙祝文

伏以敌人犯边迨兹踰月介胄棊布未有成功?露忱衷祈于祠下仰祈神相早遂驱除如公山草木之灵建淝水风声之绩

仲秋荐献安穆皇后祝文

伏以时及萧辰祭修园寝顾瞻咫尺想念平生荐此芬馨歆吾诚意

郊祀前二日景灵宫分诣奏告中後殿祝文

伏以迎日之吉事天益?【续改作履端之始卜日用辛】祭必有尊祗见发祥之祖礼非敢後分遣侍祠之臣鬯矣孝熙右兹禋祀

景灵宫天兴等殿孟秋朝献祝香文

孟秋届候法驾亲临恭焚宝香供养圣祖天尊大帝伏愿祀事崇成神休来萃奉慈宫而同庆跻寿域之咸宁恭荐苾芬载申颂祷稽首归依无极大道

寿圣太上皇后生辰功德疏文

伏以祥开长乐迓载夙之嘉辰教演真筌起无涯之胜福具严冲式益介慈龄寿圣太上皇后
伏愿渊覆护持神光临烛鲐背鲙齿庆寿母而永歌象服翟衣偕天王而难老

秦光大长公主出殡祭文

惟灵天津稟瑞帝渚腾辉兰行桃姿女图章灼采繁采藻妇职无亏问我诸姑介然遗老灾生
宝婺壽不百年乃瞻素帷无从出涕卜兆有日夕奠是陈尚其顾歆寄此悲恻

皇帝合春帖子六首

其一

藻景升阳谷条风拂紫宸只今天一笑万物总为春

其二

嶰律春灰动青阳奏雅音上辛元日是郊类合天心

其三

闰接残年腊春留半月冬雪深田易垦欢喜匝三农

其四

宝胜新幡下九霄千官接武趋春朝玉卮上寿慈颜喜岁岁年年舜事尧

其五

挽得天河洗塞氛非烟协气作新春使车已动兵车息活却生灵百万人

其六

退朝讲武与修文何暇寻春到玉津桃李不言浑望幸从来未识属车尘

皇后合春帖子五首

其一

雪放梅粧出风嫌花信迟发生皆帝力载物本无私

其二

池面冰渐破潜鱼圣得知倚栏观绿皱流荇欲参差

其三

君王盛德却纷华六寝蛾眉不好奢曾从芝輶看芝草争来椒壺颂椒花

其四

裁红翦翠不为难开尽千花顷刻间德寿宫中雕辇驻庆云深处彩衣斑

其五

葱葱瑞霭腾椒掖漠漠仁风扇葛覃四海预应期乐岁六宫今已喜先蚕

隆兴二年南郊鼓吹曲

六州歌头

严更永今夕是何年玉衡正钩陈粲天宇起祥烟协风应江海安澜重规仍叠矩圣主乘乾尧授舜盛事光前称寿玉卮边三年亲祀一阳回律八乡承宇【续改作璿杓东转上辛卜旦】觚陛紫为坛仰天颜斋居寂诚心肃礼容专存锺石约輿卫五辂不求全听金钥虎旅无眠俨千官须期显相嘉筵一人俭德动天渊费减大农钱神只格宗祧燕人民悦祉福正绵绵

十二时

庭有燎叠鼓鸣鼙更问夜如何信星彪列天象森罗虞旦闋宫毕觴清庙浆柘尊牺继猗那嘉颂可同科扈圣万肩摩飭躬三宿泰畴穉仪多丘泽合岳渎从曦娥神光烛云车风马芝作盖玉为珂奉瑄成礼燔柴竣事休嘉砰隐丹阙湛恩波共愿乾坤隤祉边鄙投戈覆盂连瀚海洗甲挽天河欣欣喜色长遇六龙过奏云和三脊荐嘉禾

奉禋歌

吹葭缇龠气潜分云采宜书壤效珍长日至一阳新四时玉烛和匀【续改作青阳振蛰气潜分仙掌非烟壤效珍年胜旧日逢辛四时玉烛初匀】物欣欣造化转洪钧郊之祭孤竹管六变舞云门自古严禋牺牲具粢盛洁豆筵陈袞龙陟降币玉纷纶彻高闳灵之旂神哉沛排历

崑仑九歌毕盈郊瞻燿燿斗转参横将旦天开地辟如春清跸移轮阗然鼓吹相闻繭祥云驩
牖八陛厘迓三神圣矣吾君华封祝慈宫万寿椒掖多男六合同文

右三曲严更警场作

降僊台

漏残柝静鸡声远到高燿入层霄云裘蟠瑞霭天步下嘉坛旗旆飘摇黄麾列伏貔貅整气压
江潮导前从後盛官僚玉佩间金貂望扶桑日渐高陰霾霜雪底处不潜消輶路祥飈披拂绛
纱袍云间端阙仰迢嶢播春泽喜浹黎苗礼成大庆鳌三拚受昕朝

右一曲礼毕皇帝降坛作

正宫导引

重华天子长至【续改作秦時】奉神虞九奏会轩朱星晖云润东方晓拜祝竹宫初归来千
乘护皇輿瑞景集金铺鸡竿高唱恩书下惠露匝中区

右一曲皇帝还宫作

盘洲文集卷十八

<集部,别集类,南宋建炎至德佑,盘洲文集>

卷十九

钦定四库全书

盘洲文集卷十九

宋 洪适 撰

外制一

钱端礼兵部尚书都督府参赞军事制

武部所掌五兵文昌甚高八座必望实素谐於舆论则登用可强於本朝具官某敏识炤微清才露穎浑金璞玉备和气於四时错节盘根发新硎於游刃自蹇禁密独步版曹因边祲之究怀以皇华而谕指宣劳半岁揆策万全借前箸筹之明於料敌贤长城远矣赖以折冲兹遣使以结盟尚整军而修备已开督府命将相以视师乃陟夏卿率宾寮而攸画共讲止戈之武以凝奠枕之勲往服恩荣益肩忠报

张宗元司农少卿制

国家驻蹕东南宫禁之须百官之奉师兵阜隶之食皆仰给於大农近郡新有水害朕已蠲民田租虑仓庾或不能足用也以尔出自勲阀以材譔称卿寺计台所居可纪兹用命尔掌九扈之事尔当会其多寡常使有余则为称职不独谨出内而已

韩彦古将作监丞制

朕留意武事凡将相功臣之世皆欲罗而致之以察其可用尔好学不怠秀于其家匠监美官吾所不惜往思振职毋或负丞

向洵提举淮东常平茶盐制

山泽之产所以供邦财者不一而鬻海为之最淮浙闽禺泻卤之地不一而淮东为之最使者非其人则国有遗利尔材健而通老于吏事把麾揭节良有可观盐筴之柄兹以付汝于官吏则有澄清之权于民又有常平之政往哉无瘵旷厥职

知盱眙军郭淑直秘阁制

爵禄天下之砥石也有劳必赏能者斯劝尔材智闳敏遇事风生一障之乘弗惮险易视探虎六如行坦途列职道山旌汝体国

权劔门县杜兼循资制

王师出塞以食为急尔千里馈饷军不乏兴进秩之荣用荅劳効

赵密落致仕权殿前司职事制

赐安车而就第甫遂高怀护钩戟以周庐仍寻故步人既谙於要束朝有赖于谁何具官某气略沉雄智谋宏远艺长弓劔出山西六郡之家学守韬铃得济北一编之法久掌禁门之卫浸高盟府之勲会疆戍之移屯致岩除之缺帅畴咨在列母易老臣以黄发而治兵见赤心之许国式崇武节可壮军声噫汉室置羽林之官盖仰侔于乾象唐人有灵壽之赐亦复总於师干益励忠规用酬恩遇

龚茂良太常少卿制

奉常居九寺之首繇法从而下亚卿冠乎庶寮秩清而选甚重况当始郊之年稽古礼文之事岂易属人尔学深渊緼溢为文华儒党所誉素有直声迺自六察寘之谏坡庶几虞闻骨鯁之论而获拾遗补阙之益也引嫌辞位屡挽不留陟之容台以观远器

给事中吴芾转左朝议大夫制

寄禄之阶二十九等有限年无限员独议大夫其数八十搢绅之士官极乎正郎望之而不能至唯侍从则不拘此法可以超秩而居之具官某直?聳乎霜台惠露洽乎三郡华问瓌望靡人不知再上禁途尊我朝着兹以黄扉之权而秉军旅之事固不以一秩为轩輊也有司校考寔应迁品出此言綍为之宠光

忠训郎戴青降一官制

驭军有律亡命必诛尔逋逃自归姑从未减尚思後効戒此薄惩

魏胜转右武大夫忠州团练使知楚州陈敏转成防御使知高邮军制

朕差择猛士扞城四方边最有闻岂缓褒典具官某忠义自奋鸷勇可推典治新邦閱日滋久控制外侮军声甚张招攜流逋绩効亦着易守淮垒谨吾藩篱用陟戎团仍超横列【陈敏作用陟兵防书之盟府】当思民社之寄不专军旅之容内抚疲氓远固疆圉恩威相济时乃之休

镇江府後军统制胡明转武经大夫制

尔将屯远边久佐新垒招攜控制劳効居多增秩之荣用劝同列

知涟水军夏俊转武节郎制

尔忠义奋发有志功名一障扞边备宣劳効是增命秩以夸辕门

单时秘书王东里著作佐郎载逵先莫冲校书郎制

册府储天下之材如梗枿豫章积日累月俟其昂霄耸壑然後择而用之尔等学行纯淑选在周行或自簿领而徙清官或仍笔削而佐太史或繇是正而进校讎并肩羣居相与言仁义之道而穷未见之书益尊所闻以涵远业

吴飞英太学博士制

爱其子择师教之国家为多士选模范乌可忽也尔顷游胶庠名出同辈推其所得不倦於诲人则有速肖之効矣

苏峴太常寺主簿制

尔四世祖精於礼学作太常因草书百篇行於世礼官有讨论资以折衷而无聚讼之患尔不坠家学近臣称之往游曲台思赞其长

揭阳县令余致和广德县令赵善礼循资制

国家除戎器以藏武库尝下诸郡作甲尔能勤其官先期趣办爰进一阶示信赏也

唐 都官员外郎制

六官之属二十四司事有剧易而郎位应列宿等耳尔学韬於中入朝久次陟之省户俾?所长昔薛能李频尝为中都郎而官曹增重其思古人以称推择

知枢密院贺允中赠三代曾祖屯田员外郎赠太子少保应机赠太子太保制

君子之泽五世聿流积德之光泰阶所陈六符斯厚显亲之典兹延登於硕辅复追贲於曾门具官某探道有涯怀材弗展傲青云而吏隐甘白首之郎潜余庆所覃後昆益大恩加愍册已陟东宫之孤宠逮幽局更增一品之秩尚其冥漠歆此休嘉

曾祖母和义郡夫人杨氏赠同安郡夫人平乐郡夫人侯氏赠文安郡夫人制

百川之水其源深者流必远昂霄之木其根茂者枝必盛辅拂股肱之臣享高爵厚禄而有英声鸿实者皆其先世垂光委祉之效然也某氏鍾礼郝法宗姻化之克配吉人庆延後裔副筭

翟莼载啓大邦庶几泉扃知此愍饰

祖朝议大夫贈少保抚辰贈太保制

昔于公治狱多陰德乃高大其闾门令容駟马高盖车谓後世必有兴者其子孙踵相躋为三公天之可以责报如此具官某被服儒术策名鼎科泽加於民仅躋卿位非此其身施於再叶宥庭政路赫赫岩瞻宠及九原进升公保营魂不昧尚克享之

祖母嘉国夫人王氏贈蔡国夫人制

朕三聘老臣再登政地宏模伟业既奠巩于邦基恤典綽章必宠光其祖庙某氏勤组紃之事服图史之箴温慈惠和称於宗党蕃衍盛大燕及闻孙位既峻於台阶恩益崇於王母小君惟旧大国始荒申加刻蜜之封用展含饴之报

父承议郎贈太子太傅坦贈少傅制

人子之事其亲常怀三釜之养大夫之祭於庙遂伸五鼎之仪惟时儒先复陟台辅孰慰循陔之孝爰推告第之恩具官某种学绩文道潜乎圣域砥节砺行名振乎俊躔斂六翮以卑飞侔百僚而漫仕是生英杰胥会明良运机筹于帷幄之中赞政化于陶钧之上积善必得其报教忠厥有自来幽窆甚光登春宫之传职愍章相继荣左棘之新名尚其如存歆此无斁

母太原郡夫人王氏贈贺国夫人制

朕考儿齿黄髮之章见奉亲之燕喜诵凯风寒泉之什知鞠子之劬劳常优锡类之恩用達扬名之孝矧吾枢极永怆栝菴寬其霜露之思宠以山河之象某氏性专静嫕德稟柔嘉嫕厥名儒采藻谨宗祫之荐海其哲嗣断机择师友之贤暨再应于台符徒有怀于甘旨从夫之氏有国在南乃开紫诰之封尚作黄垆之饰光灵不翳休宠是歆

妻永嘉郡夫人邓氏贈吴政郡夫人制

自古士大夫以诗书起家践于丞弼非独祖考焘後之祉也盖亦有壺内之助焉某氏胄出名门辅佐君子柔德淑范齐芳管彤饋祀有年不克偕老已正鱼轩之贵具膺鸾诰之荣改胙大邦式賁泉壤

范荣忠州防御使制

朕记人之功惟恐事同而赏异师还远徼可无饮至之恩乎具官某登锋履刃衆推拳勇誓川扣楫有志古人比总舟师往临海道扞御外侮威声甚张归休淮濱未忘武备班劳出綍用进州防益思奋忠以荅殊獎

王选高州刺史制

胸山之役累月交兵猛士登陴乘机战野摧陷强敌【御名】清重围守将之功尔居其最兹出褒典宠以州旗益思竭忠用答恩獎

郭刚达州刺史制

日者劲敌窥边薄我瓜渚尔输忠贾勇誓扫兵氛陷阵卻敌厥功茂焉遥领州符兹为醴赏益图卫社以保荣名

徽猷阁待制周执羔封赠父朝奉大夫致仕庭俟赠右朝请大夫制

朕嗣服之始庆覃中外禁近之臣时方端忧则俟其御祥琴而推祢庙之泽所以教天下之孝也具官某盛德着於州闾美名驰于仕路一经教子入从出藩黄髮彫眉享其荣养新阡属耳禔典鼎来追命文阶用光庙祀

母宜人吴氏赠令人制

妇人从夫与子而贵夫为大夫子为卿夫存则封邑不可踰其爵今亡矣故视其子无嫌也某氏徽柔庄靖夙着壺彝三徙其隣克成贤嗣降年不永板輿养阙宜家美号昔系其夫圣善令名兹因其子推此協华之泽慰夫念母之心

继母宜人刘氏赠令人制

朕覃踐阼之泽于四海靡间存没况从臣之亲乎某氏出自名族嫔于儒门驯德淑行六姻所称有子通显伸其孝思重泉有知歆此禔典

刘大辩大府寺主簿制

朕比下省官之令虽中都亦去冗员故九卿之属丞簿不并置惟司府两丞亦得以簿代之盖职掌文书之繁俟人而後举也尔以儒术决科好谈古今治乱事勾稽之任姑试尔才益摅所长以若予采

度支员外郎吴巘陞郎中制

在廷百官惟尚书郎以资历浅深而为之别若身登省户则畴昔岁月虽分陰不弃也尔少有雋誉久于剗繁司度剧曹甫观所蘊爰稽官簿当应星文服此宠荣益思自勉

商江等赠官制

尔等奋发忠勇气吞大敌力战丧元名则不朽宠之命秩式表重泉

贺允中资政殿大学士致仕制

出而谋国老成厥有典刑退则洁身君子所期明哲惟时硕辅复返故山乃发涣章以光行李具官某志骄富贵行中表仪强识博闻学周公仲尼之道同工异曲有相如扬雄之风蚤践禁涂进联政路结眷知于太上播膏泽於域中凡造膝之所陈或婴鳞而不避朕有怀耆德迎枚乘以蒲轮以壮本朝坐子房於筹幄渊然素緼卓尔远猷所赖股肱之良岂拘筋力为礼览封章之相继纳禄赐而欲归念踰七望八之年愍劳以事图咸五登三之治重惜其行勉遂初心用还旧物特欸清间之燕式全体貌之恩噫终始三休不改赤松之乐古今一揆莫难黄髮之留尚期存阙之忠无废忧时之论益颛颐养永介壽臧

李进右武大夫制

瓜渚之役敌势方张倪非臬俊之臣孰建荡平之绩其官某精忠自誓劲勇不羣擐甲执兵盖将死敌搴旗斩将有以安边既扫欃枪遂全壁垒宜陟横阶之峻用增尺籍之光益务捐躯以酬恩渥

吴芾吏部侍郎制

中台六职小宰之列甚高选部三铨右班之事最剧欲掇放纷淹滞之失须得严劲详明之人克允金期时惟邦杰具官某学足以适先王之正识足以烛天下之微顷独步于台端兹再仪于禁密批敕如风霜之奋才见一班执政有瓜葛之嫌狠陈三至方赖回天之助勉从易地之除大振纪纲尽资藻镜革此舞文之弊副吾立武之心益崇令名以对殊遇

陈俊卿知泉州制

闽粤之区泉南甚大倪非慈惠忠信之长曷继中和宣布之诗兹得其人无媿于古具官某器范夷雅议论通明蚤登鼎科休有华问振纪纲于宪府妙言语於纶闈顷畀是邦以疾为解顾左符之久阙申前命而复行既里社之相邻宜民情之素习当励维良之政慰其来暮之思

王槐孙赵壬杨友循资制

西师出塞屡奏肤公尔奔走供军前後无阙班劳进秩服此宠休

吕擢直微猷阁知建康府制

长江古为天堑建业今作陪都非智略辐凑有兼人之长者不足以称方伯连率之职尔才具纵横驰声州县盘根错节迎刃有余召对便朝信其可用乃跻延阁超畀麟符夫高牙大纛掌

我北门之管其望甚重地居水陆舟车之冲一都会也其事甚繁内有熊罴七萃之所屯外有扞防疆场之所系其责甚大惟刚柔相济施置协中则可以无过举而有能名勉之哉勿负予饰擢之意

保义郎阎揆降一官制

大冶至行在所才二千里尔部督纲舟私辄贸易所过逐利踰年始来姑镌一官服我轻典

敷文阁直学士王大宝转一官致仕制

闵劳以事朝廷施优老之恩归絜其身君子具遗荣之美式遂雅志用增令名具官某养气至刚逢原有要瑞於鰐水世谓间生策之龙墀士皆敛避久遭回于外服晚驰骛于禁途得难进易退之风鉴倒行逆施之迹夫引年知止所贵乎近臣称疾勾休曷虞乎清议兹披来牒尽出至诚俾陟文阶以娱里社光尔桑榆之景视兹纶綍之言

李益谦户部员外郎制

国家养兵之费浸广取财之路难增欲不益赋而用度足故地官甚难其选虽大小司徒心计於其上而为之属者可不择哉尔学有渊源行中规矩久于外官吏事甚习便坐赐对详整可采郎官上应列宿躋次而进当思有以助其长则予汝嘉

盘洲文集卷十九

卷二十

钦定四库全书

盘洲文集卷二十

宋 洪适 撰

外制二

徐嘉知绍兴府制

千里之内曰畿去天则迩十国为连有帅作牧非轻弄印踰时出纶示宠具官某襟怀夷粹问学精深再登表着之班备见论思之益强兵犯塞仗使节而敢前大郡承流惠民编而不扰顾稽山之巨屏拱狩岳之行都事简而有常俗醇而易治为吾镇抚赖汝慈祥当蹈烹鲜之言靡须束湿之政往哉夙夜对以春秋

尹穡右谏议大夫制

予违汝弼古存五谏之名君明臣良斯振七人之职长兹言路尊我公朝具官某操絜冰霜识侔著蔡蚤陟小坡之列浸高横榻之班殿上青蒲获补阙拾遗之益人中屈軼擅触邪指佞之声以仁义而竭诚不沽激以干誉从容接昼慷慨忧时说必可行事皆有据积此台端之望峻其庭诤之权人主亦有逆鳞孰云难犯忠臣谓之骨鲠无戒太刚益勉清埃以伸正道

晁公武侍御史制

御史府风霜肃然远近望而畏之南牀最为雄剧非修絜方闻之士宁刳印而不予也尔贯穿古今通达治体久劳于外事无不历入朝三接满岁九迁谏纸台评饱问黜论忧时谋国具见公忠禁路乘骢孰曰不可善善恶恶益期尽言副我虚怀以休广誉

参知政事王之望赠三代曾祖迁太子少保制

士有积善于身播德于乡而国有爵禄不沾於生前则天之报施宜施於孙子具官某清尘美行肩于古人重义轻财【缺】 讼州闻以无怨公称之我宋造邦谷城以进士起家自其孙【缺】 迨兹三叶赞我万几流泽焘後信可取必春宫三少用贲重泉灵爽未沦服此嘉数曾祖母向氏始兴郡夫人彤氏永嘉郡夫人制

国家之制官登朝列则宠及其父母一二股肱之臣乃得追荣于三世盖德厚者流光德薄者流卑也某氏归于儒门允蹈女宪令仪令德诒燕闻孙陟乎泰阶增贲庙祀雕轩象服裂以名

邦音徽不遐知有愍册

祖右朝奉郎文太子少傅制

臧孙有後于鲁管氏世祀于齐考于古而验于今丰其德则腆其报具官某抱道不展积行在躬居乡高月旦之评海子有羸金之训惟今硕辅乃尔孙枝爰推饰壤之恩以慰显亲之志亚於储传篆此蜜章明灵如存益胙其庆

祖母安人黄氏昌元郡夫人制

朕延登邦杰进穆政涂式资康济之材以成调一之効爰申闵典用侈大门某氏婉靚凝姿温良赋德克谨苹蘩之荐率循珩佩之和教子始登于儒科有孙遂参于钧轴积善之报垂荣无穷兹疏象揅之恩以示松区之宠光灵不昧尚克享之

父左朝散郎纲太子少师制

天下之为人亲者必欲其後致君泽民以践其诗礼之训天下之为人子者必欲其身问安视膳以尽其菽水之驩仕而至于三阶极为臣之荣可以伸重茵列鼎之养矣而白驹过隙风木兴悲顾瞻在堂亲不相待非国家优其显报之泽则亦何以慰孝子之心乎具官某学耕文获左右逢原破大邑之天荒拾儒科如地芥恬于势利?手下僚有子卓然材出侪辈赞我为政倚之中兴副其追远之思申以闵綏之册宫师之亚班品甚崇九原有知歆此无斁

母硕人张氏清河郡夫人制

朕卧薪尝胆思报朔庭谋皆予同时有人杰登之政地资以兴邦宜申告第之恩以显择邻之训某氏母道慈笃闺风靚专俪德名儒腾芬姻戚惟尔哲嗣作我大臣嗟黄髮之不遐使万锺之弗泊綏之翟芾賁及泉扃遗懿犹生恤章是宠

妻令人张氏咸安郡夫人制

诗首二南鹊巢咏鳴鳩之德权分六服鞠衣参?翟之华惟公侯有开国之尊故汤沐以从夫为贵某氏仪度?雅性资惠明嫕于儒宗有夙夜相成之益相其时祀竭春秋匪解之诚壺则甚章嫔风可法既宜家而偕老见得路以跻荣兹疏大郡之封以正小君之位其祇茂渥益广淑声

考功郎中沈度直秘阁知平江府制

吴门价藩密接行阙异时持橐之臣乞左符而不可得尔以名字典郡威而不猛刃游肯綮庭无逋事题舆是邦厥有遗爱辍自省户寓直道山用增森戟之重凡惠民戢吏听讼理财之事不待丁宁之训也惟枕江连海戒于外虞监牧之政营屯之寄所以寛我旻食者尔尚勉之

何熙志御史台检法官制

朕寄耳目于御史府畴咨时望以长风宪又使其举所知备寮案所以参论议广聪明公是非也尔博物洽闻莅官得誉御史以尔为蜀士之秀朕信之不疑俾尔接武霜台以俟简拔非曰从事三尺法而已

沈清臣太学録制

贤士之关教法有掌誉非素着衆岂心服尔通经术尝历校官宜居学职振我序音

起居舍人季南壽直秘阁官观制

士大夫足入中都则患得患失不知去朕甚病之尔学问该洽嫻于文辞示我周行滋有华问立螭簪笔其地甚要典朕三礼行且为真雅意一丘鋭然勇退瀛州寓直休以丛祠益裕器业以俟妙柬

陈大年循文林郎制

戎事既兴邦有赏典尔能以辑濯助我边防增秩之荣用以劝衆

李喆赠奉议郎制

尔齎恨泉下尝有恤章乡邑?蕃不复告第王师辟土有子自言复出丝纶尚其歆服

钱宗俊承信郎制

富者嗇财一豪不拔尔能捐私积佐急公上登名右列为尔之荣

归正官张彦循儒林郎制

尔久沦异乡心在王室纠合义士分梨伪官幡然来归宜有褒赏益思策励以荅恩休

虞允文端明殿学士同签书枢密院事制

文武之宪万邦政克符於二柄帷幄之筹千里象实并于三阶明良所由赓歌夙夜以之基命我有峻德谐于金言具官某挺昂霄耸壑之姿抱敛锷淬锋之器前言往行发为议论之英大册高文兼得典谟之体昨当牛渚之役独励戈舡之师一扫氛微管仲民其左衽再开幕府用李积贤於长城既边琐之周知殆戎?之暗合夕烽报警清蹕戒严惟本兵式赖于杰材则料敌无逃于沉画俾赞宥地共宁庆基噫齐有晏婴遂获折冲之效汉得汲黯可寝发蒙之谋益

务交修勿令专美钱端礼端明殿学士左通议大夫签书枢密院事兼提举德壽宫制

天子守在四夷所贵御敌之策公辅间于两社均为执政之臣厥任不轻非贤罔入具官某富渊源之学有夷雅之风献纳论思久掌民曹之计发纵指示尝颺莫府之权谕军致鳧藻之和料敌若蓍龟之智言皆可复忠在不欺朕德媿协华志期继伐问安视膳欲伸天下之欢分职设官当建宫中之使若稽祖武历选臣伶乃筹经武之英俾赞本兵之重庶仰司于慈禁仍外折于遐冲赐以贤科循夫故事噫刷会稽之耻必以范蠡为师寢淮南之谋是资汲黯之力益思长轡同穆丕机用酬倚重之心斯广无穷之闻

魏胜赠节度使制

执干戈而卫社有【缺】之勲援枹鼓则忘身果狗死绥之志特峻斋坛之锡用高盟府之书慰厥营魂涣兹愍册具官某心思英伟胆略骁雄慕中兴銳将之名有横挑强兵之计【阙】诚而归义立汉帜以成功易子析骸能坚【阙】鍛甲砥劒遂换山阳之符会敌国之穷兵出清【阙】犯境中流断继大振蒙冲之威广野交锋独贾螯弧之勇期戎麾之电扫惊武帐之星沉嘉尔尽忠为之屡叹神旗豹尾更增庙食之荣羽林孤儿庸侈门资之泽谅其精爽歆此恩休

张全赠拱卫大夫防御使杜斌赠拱卫大夫团练使李庠赠左武大夫团使制

羽林拔距夙驰勇鸷之声马革裹尸共惜奇彪之逝爰推恤典用尉营魂具官某材气沉雄机谋超迈结髮殆更於百战治军俱合于六弢名既冠于辕门勲浸书于盟府欲执俘而衅鼓宁尽敌以死绥嘉尔孤忠为之屡叹断匈奴之臂莫遂壮图归先轸之元空怀伟烈用崇横品仍列遥防【杜斌李庠并作遥团】尚其英灵知此愍饰

知漳州王曦亮秘阁修撰致仕制

年至遂老乃丈夫之常夜行不休亦古人所戒厥惟持橐之彦岂复挂冠之拘尔抱器甚高策名兹久偃儒绅而蹈景参嶰律以含和再入京华遂蹇禁密靖共尔位尝驰封駁之声畴若予工备罄论思之益一麾去国五綍宜民踵知止之高风上遗荣之需腴畀以论譔之职谐其燕间之怀家有安车斯示子孙之宠门施行马不妨故旧之游益荷美名以绥壽嘏

王逯右正言制

天子有争臣所以使造膝尽规纳君于无过之地中外大小之臣有不飭其躬不称其职者又得而纠之尔笃学有立论议据经守正朕得尔於占奏之间戮冠霜台名出人右兹用寘尔于諫省尔其公是公非不吐刚茹柔以副朕耳目之寄

程叔达监察御史制

宪府有六察不独检柅吏奸所以助台中之评伸天下之公也尔秉心端夷植学醇正题舆天府立政有声勾稽栢寺清论所与陟之冠豸兹号要津益思匪躬以俟甄拔

曾逮浙西提点刑狱制

朕驻蹕吴中浙西八郡之民跬步可至帝城其衔冤负枉者皆能欣于台省大则挝鼓投匭不难也部使者材称其职则民欣然得其直矣尔学有元本绍其家声甚秀而文达于从政曲台考礼正藉洽闻祥刑择官畀以使节非独宽我忧民之心亦以遂尔奉亲之志

王彦落龙神卫四厢都指挥使制

天子执赏罚之柄不可党偏士卒变勇怯之心在乎激励傥逡巡而不进与逗挠者何殊公论既誼薄惩难废具官某蚤推沉鸷远有风声由秦蜀万里而来颢江淮一面之寄所期李积为我长城宁使齐人笑夫百步方尅日俟濠梁之捷乃望风舍昭关而归辟易如斯扫清何赖庸按出师之律少伸退舍之诛屈此宪章镌其厢部噫探姑繒之壁当图尽敌之功复鴈门之蹠斯雪非夫之耻永怀宽典勿负异知

刘宝落节度使制

将士之勇怯视赏罚于朝廷人主有劝惩采是非于公论衆之所咎朕不可私具官某蚤谓沉雄起之闲废专扬楚一面之寄握貔虎六师之权所期固守于金汤可以坐清于氛祲暨蜂旗之犯塞以鬪舸而出淮当守将鏖战之未分乃辕门陰拱而不动即以会兵为解辄尔委城而归分阃如斯防边焉用庸按治军之法少伸退舍之诛用夺斋旄持宽禁罔噫徂蒲骚之役彼方逞于凶残复鴈门之蹠汝尚追于贤范能图尽敌之报可雪非夫之羞勿负深知以崇永誉

惠迪国子博士制

博士秦官也非资稟淑茂道术通明者不足以居之尔温故知新可以为师矣晨入成均则诏诸生海以正心诚意之学岂止章句文艺云乎哉

吴芾徽猷阁直学士知临安府制

京师盖浩穰之地輦毂以弹压为先威不振则盗贼公行政之修则纪纲具举必济宽之有术斯救弊而无偏我得贤能使之尹正具官某材见实用学非空言顷违表着之班叠佩蕃宣之寄发擿隐伏虽铢两之奸皆知抚字困穷无尺寸之肤不爱复入文部一清武铨会天府之阙人稽舆言而出命顾覆车之当戒期奠枕而相安前有赵而後三王遗风可想昔无襦而今五袴惠露是宜用副选抡益思干治

薛良朋直显谟阁浙西转运副使制

宇内漕挽皆置使者惟畿部治于帝所有剧繁之事仓猝之须故选材非它道比今水潦之後民艰于食仓庾亦不丰其储使者得人则可以宽中吴之虑以尔学邃识明长于吏道剖符持节有赫赫名乃辍之省闕任以计台又宠之以谏训之直虽尔以田庐姻亚为言吾不以小嫌而妨实用当体兹意勉旃毋忽

朱夏卿权户部制郎制

四鄙宿兵大农之费益耗六官服采版部之任最难惟得其人而理财则不益赋而足用畴咨在列选擢匪轻具官某稟资既良信道甚笃缘饰兼乎儒雅肯綮发乎新硎入为司稼之卿尝治供军之政输将二浙劳勤累年便朝每纳其面陈舆论咸称其心计惟乃显考相我慈闱取日虞渊独高忠烈紬书金匱具载勲庸有贤子之克家见流风之煮後当兹多垒所贵实材超地官笔橐之班揔天下货泉之柄勉图振职休于前人

王稽中考功员外郎制

司绩大夫掌仕者增秩之政吏或挾拾细故逞其私欲梗之毫厘失之千里以尔挺介特之操有刚严之声乃自宪台徙之郎位使在选者无沮抑滞留之叹则与明目张胆时无以异也

赵禹阁门只候制

上合之职右列所荣莫府以尔驭军有律宜用旌赏勉思报国无媿恩章

魏郊武功大夫忠州刺史制

汉人取从军死事之子孙养于羽林教以五兵号曰羽林孤儿有征伐之役则选用之汝父北首死敌忠勇无双汝年虽未冠朕不惜高秩厚禄使汝袭乃父之品金人者不戴天之讎也其思所以报之

唐尧封殿中侍御史制

天下之是非不公则有谏官御史寄一人之耳目以笔端挽黜陟之柄若听之不聪视之不明则白黑弗分而玉石俱焚矣以尔学为醇儒行为庄士议论正直无所党偏主盟贤关士不踰矩宜执霜简接武赤墀使签壬斂衽善良伸气则朕有知人之哲而汝无负于风闻顾不休哉

盘洲文集卷二十

卷二十一

钦定四库全书

盘洲文集卷二十一

宋 洪适 撰

外制三

晁公武权户部侍郎制

君子言必可行宁为一切之弊洪范食以为首孰明八政之源时有通儒长於心计详其说则若折枝之甚易试以事则岂刻楮而无成往谐地官式蔽朕志具官某学潜坟索材挺梗柟论思殚造膝之忠謇谔得匪躬之故纲纪正於穀下搢绅畏其笔端自四鄙之多虞或一日而再召充牣忧时之略科条足国之方论及理财盖纚纚而可听使之治赋会绰绰而有余与其专宪府而寄以抨弹孰若贰版曹而究其绩用傥以责人而责已斯能为上而为民即问钱谷几何可冀贯朽粟陈之効亦有仁义而已当无头会箕敛之非用观黠摹以耸輿望

王刚中礼部尚书兼给事中直学士院制

咨四岳能典朕礼孰为稽古之儒俾万姓咸大王言必赖缀文之杰仍居批勅之地斯极垂绅之荣具官某材冠伦魁词工体要西掖妙清泉之思坤维驰制阊之声论道下帷记甘盘之旧学因师获印迈仲进之前尘召对昕朝超登内职临文问讳惧奸祖庙之名辞尊居卑退就北门之直畀宗伯讨论之事兼夕郎纠駁之权稽首而逊夔龙昔光帝典拊髀而思颇牧今在禁林悉展贤谟用裨国论

周葵资政殿学士提举临安府洞霄宫制

执政其犹股肱所藉弼谐之助大臣斯有体貌况无纖介之嫌惟时硕儒厌参万务庸出均休之命俾闻知足之风具官某躬上贤之姿究先圣之壺青天白日人争睹其清明北斗泰山士咸高其景行见谓居今而行古未尝枉尺而直寻屡入修门晚腾夷路间两社而为辅久穆丕机有一言以兴邦每陈正道粤自曷垂之警浸勤夙夜之忧秣马治兵揆汉室备敌之策丰财积粟讲荀卿富国之篇正赖同寅用图再造儵尔易退确乎不移乃隆秘殿之班仍赐真祠之祿终始惟一身名俱荣噫富贵而归故乡自守冰霜之操谋猷则告尔后尚无金玉其音往企前英益迪华问

邓王夫人钱氏广国夫人制

朕以乾德始郊避新阳之近晦永熙故事改嗣岁之上辛适值边虞用循祖武虽蕃厘之未受顾庆泽之难稽钱氏德迈前尘行光内则服礼义之训飞周篇鲁册之华生忠孝之家参宋子齐姜之盛俪我冢嗣驩于两宫兹推泰畀之恩载裂番禺之壤彤管有炜既妇道之可书翟芾以朝在皇仪而甚美其隆闺范以耀纶章

庆王夫人韦氏华国夫人制

朕初修郊类以戒先庚之期会有塞氛遂移建巳之月迺敛泰元之福预推大眚之恩爰举邦彝式光子舍韦氏仪度雅性资惠和诵周召之声诗□风夙讲鍾姜任之余庆戚畹道推惟践履於女图故章明於妇顺胙之成国易彼旧封佩箴悦而问鸡鸣益隆孝道如山河而宜象服克称德容艳此华章昭于彤史

恭王夫人李氏定国夫人制

朕将燔郊燎偶警边烽仰宪先猷尝讲上辛之卜参稽古训遂改长赢之初虽未逆于神厘爰预行於邦涣李氏珩璜中节纷帨合仪出英卫之门听姆教而婉娩归间平之邸成妇道之肃雍嫔嬙誉其淑声娣姒知其端操兹徙封於望国犹拜况於泰坛象服是宜庸侈笄珈之美彤管有炜浸扬竹帛之芬往荷华章益绥柔履

张宋卿秘书郎郑升之正字制

往者大减冗员虽瀛洲学士亦损其泰半兹有乏材之叹而议者归咎储蓄之不广也闰月甲寅制书始复祖宗之旧宜有望士褒然充庭尔宋卿五领之英冠于贤级尔升之三衢之秀经为人师或别朱紫於麟台或事雌黄於蠹简益思涵养以称企期

阎安中国子司业制

古之盛帝投戈而讲艺息马而论道今仍年出车邦赋不足虽养士有费朕不敢惜盖长育秀异以备他日之用也尔材美於西州名高於鼎甲戴獬豸冠则羣而不党掌南宫牋奏则粲然有文订五礼之制则是古而不变非强学力行者能如是乎兹用陟之成均受以师说必能使诸儒乐循理而有士君子之行也模不模范不范抑无媿焉

王佐直宝文阁知宣州制

双溪叠嶂在昔名邦北枕大江南连黟歙诸山守土之寄所不可轻尔以文学冠于俊躔以治行最於左契久去柱下重入修门金华谈经发明王道摄空民部会计尽心上牒再三自请补外大臣多称其美同列咸欲其留宛陵之城方谋郡将姑徇所欲宠以奎【缺】

其贤嗣择师友而徙邻暨荣陟於禁途空永怀於甘旨兹推庆典用贲幽局尚妥尔灵益胙其

後

故妻陈氏令人制

朕初修郊类已戒先庚之期会有边氛遂移建巳之月虽神厘之未受岂邦涣之可留某氏毓秀名门媲德君子柔则肩于锺郝淑声轶于姬姜益?奉尝不克偕老锦韬象轴齐眉鬲一见之荣栢冢松阡刻蜜示九泉之饰庶几不朽右尔子孙

陈岩肖礼部员外郎制

太上皇帝取祖宗词学之科新其名更其制始许公卿大夫之世与登进士第者角其艺而选之尔褻然为仕子倡坎 不振人咸叹焉再入郎闾处非其地南宫掌翰金曰汝宜往修厥官以陟华近

程宏远太常博士制

奉常有博士所以议国家之礼定公卿之諡名鬼神之祠也尔学耕文获驰誉校官曲台者峻秀之地往游其间可不勉哉

王刚中转朝散大夫制

有司严考课之法积四载而应条从臣获异等之恩损一年而增秩合尧舜之陟典皆祖宗之茂规具官某以经纶之学而审是乎羲农以雅健之文而朋休乎燕许再光禁路即长春官青琐黄扉所冀回天之力白麻丹诏可期擢地之声兹諏律以进阶匪诣曹而齎阙虽媿尊贤之道实存厉世之公往服宠荣益崇闻望

郭振捧日天武四厢都指挥使制

远人不服肆烈焰以方张莫府摧坚喜捷音之为倡可无褒典用贲中权具官某识贯戎弢名高勇爵抚鸣剑而抵掌久抱壮图援枹鼓则忘身独潜忠槩兹率千庐之卫往屯六合之城会兵气之结蟠涉长淮而侵轶惟时爪士首奏肤公鹤唳风声已挫锋鋌之銳席卷霆奋遂增貔虎之威式表辕门之勲俾冠厢部之职伫期扫荡嗣有龙光

崔阜正任观察使制

边尘入塞方议益兵莫府论功首闻禽敌宜盼褒渥以宠战多具官某自负鸷强咸推梟俊陈师鞠旅久厉节於辕门折馘执俘屡书名于露版兹出千庐之卫往屯六合之城会兵气之结蟠涉长淮而侵轶惟时名将独奋精忠冒白刃以前驱挥公予而鏖鬪果能陷阵致彼退师已标勇爵之勲特峻廉车之赏益思报効嗣有恩光

唐 司封员外郎制

豕卿之属其司七间者并省司勲故主爵兼两曹之事用得其材则吏无并缘之奸人无稽滞之叹尔行安节和恬於荣进为郎则未久也跻之前列合乎公言往殚厥心以振其职

知天台县王琰转官再任制

天台之民件汝治行愿复借留三年守臣考其实以闻吾何爱一官而不徇斯民之请也益思尽力以望卓鲁

蒋芾起居郎制

国家之用人如工师之用材可楹者不可使为桷可榱者不可使为椳人物之英絶类离伦则一日九迁人不议其速録録无庸或十年不调人不叹其滞若是则选授公而衆职修矣尔以文艺登乎甲科以材器久於省户国人皆曰尔有荀杨之学有屈宋之文当在华近吾方陟尔曲台寘尔词掖而训辞犹未出也左螭虚位非尔其谁宜为往钦哉以称吾超拜之意

张进董江遥郡刺史制

熊罴之士不二心之臣立斩将艾旗之功则信赏之行盖不旋日某有履锋之勇有徇国之忠茨湖之役涉水力战执讯获丑咸犇於率书之盟府陟以州旃益思捐躯用荅恩渥

沈介起复权兵部尚书湖北京西制置使制

属大事而当一面有鈇钺之可专见素冠之能三年惟金革则无辟盖君子知断恩之义在先王存变礼之文我求宝臣起之凶次某学广而足用材高而不羣四禁代言得上规姚姒之体三铨分职继前有马裴之称治行着於吴门威灵耸於蜀道事靡不举人莫能欺适兹疆场之虞正讲甲兵之问顾荆襄之重镇连江汉之上游羽扇纶巾赖周瑜之制胜轻裘缓带谋羊佑以折冲夺其陟岷之哀授以防边之筭用尊莫府俾长夏官摠光黄湓浦之封是为新制集步骑舟师之衆咸稟中权宠使范以光前期戎翰之善後益摠壮略庸释远怀吕广问敷文阁待制在京宫观兼侍讲制

朕仰希尧舜三代之风乐闻诗书六经之说厥今帝幙尽虚讲读之员既得耆儒首寘咨询之列具官其言有坛宇性守宫庭能习是而胜非故闕中而肆外董狐古之良史尝立赤墀伯夷汝作秩宗遂窥紫闕怀章而去趋节复来陟西清次对之班修金华絶出之业国之治乱与臧否惟前言往行之师学有缉熙于光明赖博物洽闻之益往祇茂渥益振荣名

莫延萇银青光禄大夫检校太子宾客使持节南丹州诸军事南丹州刺史兼御史大夫知南丹州公事武骑尉制

率土之滨莫非王臣靡私涵覆九州之外谓之蕃国所贵怀来眷惟卉服之英能慕华风之美承祧有庆锡壤为荣某浴义浸仁资忠履信心倾葵藿远输就日之诚世受丝纶不阙梯山之贡既处天伦之长宜称海峤之雄当兹似续之初责以便蕃之渥跻银艾禄臣之秩兼风霜宪府之官儼储邸之元寮陟勲阶之华品并斯徽数为我遐藩噫尊君之道无他主乎恭顺抚俗之方有要务在温慈祗服训言益绥福嘏

何辅权工部侍郎制

朕履位以来劳人是戒苑囿服御无所益敢兴土木之谋技巧工匠精其能独治甲兵之器久虚起部兹得胜流具官某智略凑於朕前言语妙於天下人瑞有郑仁表久侍左坳古事问高仲舒兼司右掖王邸赖谈经之益中台分典选之权力陈宰路之有连愿勾他官而遂去顾博延於耆旧方自外来难近舍於文儒从其远引惟冬卿之非剧虽姻党而无嫌兹用出纶俾之持橐其广立朝之誉益殫致主之忠

王稽中起居舍人制

左右史分主柱下班列甚清直造榻前谋猷可告言动资其良笔选用在於端人尔古训积于中而正论发于外不憚大吏风采凜然自台察而陟望郎繇郎闈而掇记注再盈旬耳即真之命金曰允哉益思尽瘁以报知獎

杨似循从事郎制

边鄙有衅勇者当奋其力富者当输其财而熾嗇成俗体国之风无闻焉尔心不恤纬倾貲助军增秩出纶夸彼邻曲

王宣防御使制

朕志在劝功不爽出纶之信醴於用赏每惩刊印之非具官某趨猛知名朴忠着节出奇设伏夙蘊深谋掩空击虚屡彰黠绩兹分王旅远戍边垂扞襄阳之冲荐闻吉语严樊城之备咸奋鬪心用陟兵防式光戎幙益思吞敌以荅恩章

任天锡左武大夫遥郡防御使制

西师出塞咸有战多莫府上功式稽信赏具官某衆推劲勇自奋忠纯执銳披坚久居行阵斩首克敌能立勲庸用陟遥防仍陞崇品力图报効嗣有恩光

陈伟节直秘阁制

朕聘召元老尊强朝廷优礼殊恩寔循旧典尔大丞相之冢子也一经之训不坠家声寓直瀛

洲用作过庭之宠

盘洲文集卷二十一

<集部,别集类,南宋建炎至德佑,盘洲文集>

卷二十二

钦定四库全书

盘洲文集卷二十二

宋 洪适 撰

外制四

皇后封赠三代

曾祖吉水簿夏令吉太保制

士有戴仁而行抱义而处其道可以致君其材可以兴事而官不过八品职不过黄绶储休衍庆在其後人三叶之孙遂母天下则宠綏先庙不一褒而已也具官某行修於身名播于外恬於荣进漫仕下僚积盛德而流光致柔仪之鼎贵愍书甚宠已跻亚保之班郊霈先行庸正三公之册营魂不昧勿替引之

曾祖母张氏卫国夫人制

国家广显亲之孝崇告第之泽外庭之宰辅内掖之妃嫔皆得追荣其三世矧敌体紫宸齐明義曜者哉某氏懋徽柔之则秉幽静之仪德配芳图克恭苹涧福流来裔爰正椒涂兹推泰畀之恩大开淇澳之壤燧以象服叠于幽局

祖谷太傅制

朕登建坤仪助宣王化内有进贤之志歌周南卷耳之章外无出阊之言矫汉代长秋之敝推庆源之所自酌愍册而可行具官某令德蔼乎州闾远识该乎今古有拨烦理剧之材而不得其位有爱人利物之志而独善其身集之慈孙俪乎皇极式衍曾沙之祉孰为幽窆之光出帝傅之恤章宠庙祧之时享尚其歆服益右後昆

祖母孙氏蔡国夫人制

朕稽二祖之圣谟变一阳之元祀盖乾德尝避於近晦淳化始行於上辛兹边鄙之有兴谋著龟而改卜虽神厘之未受岂邦涣之可留某氏性婉而明教贤以肃四德章於女宪六嫔讲其壺彝妇道显融罔专鍾郝之美孙枝盛大遂成陰马之家申刻蜜之新封表含饴之积庆其以蔡仲之国用光夏氏之阡

父協太師制

和熹鍾鄧氏之慶不及護羌之存竇后登漢掖之尊已結觀津之恨茲值邊疆之事未行郊時之儀預出恩章敢遺戚畹具官某躬履五常之行氣備四時之和抱材不享於修年委祉遂綿於後嗣爰有息女以升中宮咏任姒興周之詩監於彤史法春秋褒紀之義禔以師垣精爽如存寵光無斁

母趙氏福國夫人制

孔子叙詩以後妃居三百五篇之首涂山娥姜原任姒所以助三代之興也今朕得淑哲以隆內治則母氏之訓可忘乎某氏莊靚凝姿徽柔縉性出自公族分玉之輝嫔於德人協鳳鳴之吉兆篤生良女遂履純坤永懷□下之慈孰慰宮中之念講陽陔之慶典開長樂之脂田尚其重泉歆此褒禔

張綬潘景珪賈選大理評事制

廷尉平斷天下之獄而員少事叢慮請獻之稽逗也益者三人庶無曠職爾等明習律令秋卿以為言往充其官思踵平廷之美

唐仲友秘書省正字制

劉晏言天下之文惟朋字未正朕既擢爾父於風霜之地破黨與之私矣爾兄弟鼎立白眉最良發策玉堂奏篇甚善宜居中秘雖校羣書歸休從容必無異同之論

王時升權兵部侍郎制

朕招延俊乂列布禁途庶几獻納論思得厭難折衝之略咨諏謀度聞安民和衆之言顧武部之闕人稽僉諧而出命具官某秉中庸之德着朴茂之稱版部斡旋合研桑之心計輔藩撫字踵糞召之遺風節費用而府有余財勤簿領而庭無逋事未奏會稽之最已勞宣室之思聚天下之兵朕方修于戎政率夏官之屬爾其治於軍防式疇良圖用裨上策無使立朝之譽減於作郡之時

翟貴妃封贈三代

曾祖世俊太子少保制

國家廣追遠之孝崇告第之恩外則三公上及其曾門內則四妃可覃於初室寵光之渥存沒俱榮其翟方進之孫班婕妤之祖雍容孝弟之行佩服詩書之言既抱器之甚良乃埋光而不耀慶鍾來叶儀次中閨茲逢郊禋之期先漏泉扃之澤惟春宮之亞保蓋朝路之巍班尚其營

魂知此愍册

曾祖母孙氏齐安郡夫人制

朕郊柴已具边祲是虞稽皇祖之旧章卜长嬴之首月预行庆典敢後外姻某氏温靚呈姿柔明宅志佩帨奉茵兰之献錡筥絜苹藻之羞盛德所延後人鼎贵繇八月良家之选冠四星天极之躔兹以显亲之恩得推饰壤之泽褻之象服锡以脂封乃其有知尚克嘉此

祖思成太子少傅制

朕敷求邦媛光赞坤仪夙有淑声继樊卫二姬之行内无私谒非许史三王之家推厥庆源賁之恤册某评高月旦节挺岁寒以利物而存心不逢辰而诺仕宜笃孙枝之佑遂登妃掖之尊兹有蜜章用光先庙亚于储傅褻彼泉途想其如存服之无斁

祖母张氏和义郡夫人制

朕初郊类已戒先庚之期会有塞氛遂移建巳之月虽神厘之未逆顾邦涣之难稽某氏毓粹名门俪德君子柔则齐於鍾郝美声軼於姬姜庆绵再叶之英位冠四妃之上于沼于沚生能絜於苹蘩如山如河没遂荣於翬翟光灵不昧永庇後人

父益太子少师制

天官书中宫天极其间四星大者为正妃余则後宫之属也王者求河雎之德卷耳之志者使之宣嫔则而应乾象於是有漏泉之泽及其三世之庙顾於显考不厚可乎某秉青萍之器挺梗枏之材袖手林泉不得其位笃生淑女遂亚柔坤以孝敬而事慈闈以谦约而谐椒屋六寝之间靡人不称其以官师之册褻於幽陇以展其报亲之心呜呼休哉

母刘氏咸宁郡夫人制

圣善之爱其女以图史之戒丝枲箴紃之事谆谆焉诲之於□下既亂又笄矣迺见其入禁掖登元妃光大门闥艳於戚畹今也服澣濯之衣以六珈副笄归而壽其亲不亦荣乎某氏其仪庄靚其德懿柔祀其先尽执笏之敬事其夫得举案之恭有女甚贤藹然内范报厥母训洵出恩章兹裂宜川之疆式开汤沐之邑门楣之语验於是矣

吴盖妻赵氏越国夫人制

朕将燔郊燎偶警边烽祖武可遵尝讲上辛之卜神心斯荅宜改长嬴之初虽未逆於彤褕爰预行於庆典某氏仪容庄靚德履肃雍母训少成循八篇列女之戒壺彝交播为四姓小侯之师苹蘩絜絜尝之羞滫?谨尊章之礼如宾有敬偕老则荣兹崇鸾诰之封益示鱼轩之宠越为

大国宜尔室家

王逖直秘阁宫观制

册府上应东壁之躔吾七略羣书充牣栋宇寓其直则与挟卷拂蟬之士等非繁岁月巧宦游者可得也尔明经博古?於文辞一再超迁駸駸显列寘之郎位弗安厥居予之郡符勾闲愈力以其尝入谏坡故贴以美职遂其归心盖吾於言事之臣常委曲其恩意如此李若川权刑部侍郎都督府参赞军事制

朕慕孝宣综核之政推帝舜好生之心念画地为牢每虞其轻入故吞舟之网宁失於不经眷求时论之英俾作秋官之贰某性资闇敏谈辩纵横沛然理剧之材辅以传家之学久徊翔於外服甫轩翥於近班治赋版曹弗笼天下之货赞筹督府能寝淮南之谋身虽在於戎亭位不虛於禁橐解严可冀践职有期五刑之属三千在成康而能厝一岁之狱数万惟于张而不冤致吾空囹之隆赖汝立朝之效

张运知广州制

二广之区五羊最大药洲蒲涧民有嬉遨之风龙户马人政以抚柔为上得此良翰起之丛祠具官某蘊盘错之材去表襮之饰法家谡狱解密网之秋茶禁路理财腐太仓之红粟把麾而去歌袴可嘉念南服甚远於朝廷故连率每艰其印绶傥风移俗易令孚黄木之湾则水宿山行害去緑林之盗往副朕指益殫厥心

陈正同赠四官制

朕礼优法从恩笃臣邻晚节挂冠已徇归田之请一朝易簪采兴移壑之嗟爰有恤章告其居第具官某风槩方整机猷硕肤蚤腾誉於峻岐遂致身於荣路贰秋卿之禁橐知胜残去杀之仁承天旨於筹帷有排难解纷之助把麾而去歌袴甚休忽惊垂尽之言空軫云亡之悼增之四秩饰彼九京没而有知歆此无斁

潘景直秘阁致仕制

大夫七十而请老古之制也近人耽禄廼钟鸣漏尽而不知止吁可叹哉具官某学道洗心中其实蚤入京都垂上华轍晟府典乐禄臣司光皆当时之遴选退休林壑亦既有年遗荣抽簪无玷终始中秘之直非贤弗居光尔桑榆用迎壽嘏

李?常仲循资制

尔沦胥异域久厌腥羶挺然来归亦着功效进秩有命夸组和门益思尽忠用答天渙

金书枢密院钱端礼封赠三代

曾祖暄秦国公制

钱氏有德於吴越之民上天佑之宋兴二百年间枝胄蕃衍重龟袭紫为搢绅望族运筹帷幄祖孙相继发祥锡美厥有自来具官某得传家之学蕴迈俗之材入联禁途分司会之剧职出颢方面畅柔远之英规搢绅高其令名史策纪其遗懿惟厥显考光辅两朝迨今三叶复登宥地天之报施可验不诬大师维垣已崇愍典四塞之国载锡蜜章是为有後之光益笃无穷之祉

祖驸马都尉景臻大宁郡王制

宋有天下凡将相之子勲贵之家以选而为副车者无虑数十百人虽公主将钺生极其荣而甲第绮襦代袭豪侈求其来裔卓尔不羣秉枢翊政光於三阶者未之有也具官某永昭陵之禁裔异姓王之闻孙谦畏慈仁白圭无玷享沁园之奉而有声于戚畹传金籙之学而善训其後人宜有孙枝致身两地世德之懿瞻前无邻爵秩既尊叠祿泉壤焘以新社隰为乐郊尚其如存服我休命

父忱庆国公制

昂霄之木不生於培塿之丘纵壑之鱼不出於蹄涔之水公侯之子孙踵前人之盛烈受高门之美?奋然有立为国光輝者所凭厚也具官某天姬之嗣休有德名乐善履谦白首不变教忠之训咸仰义方陟我机廷实尔贤息延登之始饰祿有常表其流光胙国于庆式增庙佑之宠且慰烝尝之思

妻高氏和政郡夫人制

刘向采取诗书所载贤妃烈妇兴国显家可法则者为烈女传後之秉直笔者莫不絀彤管之书序鹄巢之德以足一代之史盖妇人不出房闥美闻於姻党则名达於州闾至於垂之竹帛自微以至着非一朝一夕之力也某氏桃姿兰行华閼之英虽有姬姜孰佐君子至于掌枢翬翟之封以荣鸾诰岷峨之壤载啓脂田享其偕老之荣益修内助之德

左仆射陈康伯祖居仁越国公制

朕霖雨之思贤佐复正台衡舟楫之济巨川遂强国势彊帟变发蒙之语边氓谐咽哺之欢式衍庆源用覃先庙具官某仁义根於心术孝友得之天姿怀利器而不施彰华纓而漫仕惟邦之杰实尔之孙祿以维垣厥封康叔之国賁之新册大开勾践之疆音徽不遐尚克嘉此

范成大秘书省正字制

瀛洲英俊之躔也中兴以来未有父子踵相蹶者尔学赡而文缛并美于前人益观异书以正鱼鲁之谬

吴总右朝奉大夫制

西师出塞日辟故疆中禁疏恩用酬茂绩尔顷居莫府办治文书靡盬夙宵军行有赖第劳增秩少示宠光益思竭忠以济勲阃

邵及之福建运判制

分道置使民之休戚系焉自昔用人或私其党朕比下令必对於文陛然後命之盖敷奏以言明试以功之意以尔吏能可取治郡有声予节闽川廷无异论故使汝便道奏事而丝纶不憚於先出也戢吏惠民转输不絶俾七郡无不革之弊乃称澄清之职

巩衍大理正制

朕虑法吏吹毛不循三尺棘寺之属详於用人尔决讞之久以文母害其听狱成思继平反之美

户部侍郎朱夏卿父胜非鲁国公制

鲁人类帝用駢刚於上辛汉代祀天歌朱明之雅乐朕稽前王之成宪遵烈祖之旧章偶四鄙之多虞变一阳之大礼先斂中坛之福广为幽窆之光具官某名闻华夷功在社稷再安国步扶日轂於天衢具赫民瞻应星符於台路有嗣贤之分鼎贰禁密而箠鞭慰其陟岵之思出此漏泉之泽不改师垣之襜大开阙里之封尚其英灵歆此愍饰

兵部尚书沈介故母莫氏赠硕人制

人子有吹棘之难创钜痛深顷步不忘哀戚惟金革之事起之于服舍则先王许其变礼盖移孝作忠不以家事辞王事也某氏四德兼全六嫔所则相其夫犹乐羊之室仁其子得鳴鳩之风兹因边鄙之虞夺尔执丧之嗣郊丘有霈少塞沉忧音徽不遐知有恤册

又所生母阮氏赠硕人制

汉文帝以黄龙见成纪始下诏议郊祀礼官曰古者天子夏亲祀上帝於郊迺以四月幸雍祠五畤今朕以边事展期盖亦有合于古也某氏其性婉淑其仪庄靓迺生令子为时显人入从出藩已尽立身之美冬温夏清莫酬养志之诚式慰孝思用推愍典母慈如在尚克享之

盘洲文集卷二十二

卷二十三

钦定四库全书

盘洲文集卷二十三

宋 洪适 撰

外制五

王之望端明殿学士提举江州太平兴国宫制

朕图回治道招显时髦纵壑相须聚精神於左右坠渊为戒全进退於始终锡此明纶责於近辅具官某降材足用抱器不羣茹古涵今明于先王之术本仁祖义列於君子之林蚤列通阶屡分剧职召节远来於巴蜀戎旃持摠於江淮言兵体之三章自许兴邦之策坚帝意以十事载嘉尊主之忠迺繇谏坡遂躡政地冀素怀之底绩能剏任而有为命其复往视师濶焉久不闻问国人皆曰可去谓尚出於私心台评以汝为倾殆勿容於公议念股肱之旧弼推体貌之优恩畀以真祠班之秘殿俾遂燕闲之志当无喜愠之容噫孔子失之宰予盖知人之不易成汤至于帝乙何谋国之皆贤其服宠光尚思报塞

敷文阁待制朱翌左朝议大夫制

三年而计羣史若稽陟典之文彙日不离小官独减从臣之考兹协铨曹之格寔彰名器之公具官某学问淹该词章典贍右坳书事马迁有良史之材而掖出纶苏頌为代言之最论思皆本仁义吐茹不以刚柔厄彼谗波久於炎峽晚逢更化连命承流抚字不讳其劳循良无媿於古虽奉祠而养气盖迁秩之应条其服明纶以畅荣问

韩彦古太府寺丞制

吾以北鄙有衅命尔祖先世之部曲以图上其方略尔奋然愿行无避难之色归奏便殿雍容可观顾虽摄事郎闈而雉监犹须汝也司府之属俾复其旧往践厥官则朝有着矣

江淮都督杨存中父震秦国公制

古语云三代之将道家所忌傥世济忠义则福禄鼎来远而有耀矣道家之忌岂其然乎具官某弢略传家尽力边圉父子死敌名藏金匱天之报施乃在嗣贤久典戟卫受知两朝以槐衮斋旄而赐真王之履以碧幢黄钺而颺督府之威兹遇郊厘益光祚庙咸秦之国载彻旧疆英爽不亡尚克嘉此

王天觉循资制

兵出西方人百其勇第功行赏小大不遗尔名在辕门战功有绩进秩一等用示恩荣

王师心知湖州制

朕巡守三吴以苕霅为藩辅畴咨九牧欲召杜之人材得此良翰谐於金属具官某望实高巍材猷硕肤再登献纳之班独抗忠嘉之论孟容还制多士想闻其风山涛执铨人物各为之目郡章再脩师节五移拔薤本以抑强严霜可畏憩棠阴而听讼白日显行凡牧人御衆之方无撓植索涂之患兹选吴兴之守孰踰禁密之英赖善政有以抚绥则斯民不复愁叹往振其职永孚于休

虞允文父祺太子太师制

蜀道文儒之林也在西汉时严马渊云禀灵江汉擅声四海後來仰之如庆云景星曾未闻父子继美及致身鼎辅者我宋勃兴异材间出高视前古世载其英具官某包括羣书洋溢嘉闻登名月窟仕不隆振储休子舍大其门间光践鸿枢兼握政柄聚精会神景行夔高宫师褰襜制墨未乾兹讲神厘复申恤册以彰教忠之训以慰显亲之心没有知也尚荣享之

周时夔路运判制

蜀道去朝廷几万里更有譬邮御史风闻所不及民有冤枉不能践理匭及台省之庭与我仁民而戢吏者其唯贤部刺史乎尔文史足用称有吏能蜀人也又尝治蜀之郡习於蜀之故也握此漕节是必振其职矣

张子盖妻封国夫人制

朕考功伐而思虎臣既褒其褻又擢其孤犹以为未也顾其平生忠义不以家为者皆伉俪之贤有以相貳之某氏端肃之行柔明之性称於宗党宜其闺门子盖扞马边城婴疾不壽使尔有未亡之叹而感伊威之诗也兹广脂封胙以成国庶几乎石窀之意

薛良朋知临安府制

尹京之任亦难矣赵张三王擅名於汉後世犹议其明者伤於太察严者伤于太猛鲜克有终殆以是乎国家之都上京也尹正者皆辅弼之储其望崇其权重可以不憚大吏可以不避强御怀私者不得而挠之依势者不得而摇之故其威易立其政易成今暂躋吴中名同而实异责重而势轻故居之者为尤难尔整烦拨剧裕而不迫接物处事和而有立使节州麾名震中外靡人不以尔为材也畴咨四岳擢尔天府当官而行思善其後

赵涣江东运副制

都城之外其权重者无出於部刺史百史之升黜一道之戚休系焉寬则人无所惮蔽则万事不理猛则泽不下流傲则情不上达传不云乎过犹不及二者之失等耳尔材而甚健人谓素刚屡乘使轺亦既白首今予命汝持江左之节平其心守其局则汝之职举矣

吴芾吏部侍郎制

朕畴咨舆诵品核实能与其弹压都城劳以谍诉倥偬之事岂若澄清选部振其铨总公平之休弊必务於尽除任弗嫌於数易具官某识遂以敏材周而通再入中台乃率秋官之属暨居东省尝分夕拜之权择良牧以尹京辍贰卿於司列甫踰月律已播治声虽称职可嘉在前孰出其右然审官既阙至今未得其人妙简周行俾寻故步夫镜明则尘垢不止衡举则轻重罔遗惟吏奸有钤制之方则仕进免滯淹之叹益行已试之效用广无穷之称

黄鈞国子正关耆孙国子録制

朕惩省官之非广翹材之路博士员咸复其旧辅臣谓尔通经术善属文西州之英也召对可采列之学职勉帅以正无负推择

周用之循资制

朕以慈闈有天地之德顾无以执之日者奉宝册尊徽称办治之吏序劳进秩尔其一也只此恩涣思称所蒙

鍾世明复直徽猷阁知庐州制

合肥重镇也新遭兵革之难民失其居朕诵鸿鴈之诗谋方伯之寄命从臣御史之公选可胜任者尔翔历中外久有能名荐牍鼎来佥言无间兹甫起尔譴域畀尔帅节还尔美职尔其以诚报国以仁抚民以智守边以材集事使归者辐辏闾里熙熙田畴日辟则诸大夫无失举之责矣

汪澈端明殿学士知建康府制

十国为连莫重高牙之寄两都相望实兼留钥之雄爰出华章式崇旧弼具官某量包山藪识并蓍龟有贯穿今古之学而尊其所闻有酬酢事物之材而见於历试忠臣谓之骨鯁独振台纲执政其犹股肱尝参国论制荆襄之专阃息疆场之外虞久憩丛祠甚淹远业兹听輿人之诵俾还秘殿之班护我日畿镇夫天塹惟虎踞龙盘之壤莫府既尊则鸡鸣狗盗之奸非谋自寝往图绥抚用副倚毗

姜诜两浙运判制

王畿千里外台耳目之选非它道比也以尔久于宦路绰有能名揭节闽川及瓜而代畿漕阙员肆以命汝惟明则能察吏奸惟公则能革衆枉惟勤则能办王事母徇私以干誉母媚上以害民十目所视可不勉哉

倪偁太常寺主簿制

簿领虽卑奉常盖礼乐所自出有列其间则与闻稽古制作之事他寺不可同年而语也尔强学好修久率多士俾造稷嗣益观所长

钱端礼参知政事兼权知枢密院事制

朕居域中之大以天下为公念立政之维艰孰称前疑之任傥量材而可倚难拘左戚之嫌书赞稽乎人情典故存於国史具官某学该古训名著清臚忧时极饥渴之思致主出忠嘉之緼下王恢之议终始未尝异同成魏绌之功南北以之休息自登右府兼赞中台见施置之无私喜规橰之可久都俞契合犹伯牙之操递锤典领雍容盖庖丁则有余刃其参国秉共立邦基仍尊帷幄之筹匪专俎豆之事家声不坠臣节甚休噫二百载而中天欲显祖宗之烈三十辐而共轂所资辅弼之良勉奋尔庸以济于治

虞允文同知枢密院事兼权参知政事制

朕仰承慈训光绍庆基经武整军莫重本兵之寄移风易俗常怀修政之难时有异材助吾上治具官某学周贯变识緼经纶运堂上之奇兵方显兼资之略扫舟中之敌国遂成无竞之功兹陟宥庭仍裨政路已见赞襄之効庸知密勿之长离娄烛千里之隅物情难隐柳下畜百世之上时望浸高宜副斗枢并参天縉所赖股肱之助无复毫厘之差噫衆贤和於朝当法臯夔之迹一相处乎内非专周召之权益展英规用隆华问

王刚中端明殿学士金书枢密院事制

国家以得贤为重人臣以逢时为荣况登四近之班实应三阶之象惟邦之彦非朕可私具官某诚悃无华特操不倚学有根柢而抗以高明之识言无枝叶而发为典则之文附翼攀鳞蚤从容於宫邸扞参历井独振耀於藩垣趋节召而复来听履声而可识虞夏之书浑浑尔方推禁苑之长伊望之业凛凛乎宜陟筹帷之列所资忠力同起治功噫尊俎可以折冲盍茂明於上策股肱其惟执政无专美於前英往体至怀奚俟多训

魏昂魏昌承信郎制

尔父尽忠报国死於行阵恩及存没不一而足咸畀命秩勿隳家声

胡昉直秘阁知盱眙军制

边城新遭戎马之难劳来凋瘵必惟其人尔少长淮壖习知风俗寓直中秘超分郡符无轻一障之乘遂媿鸿鴈之雅

鲁豈太常丞周舜元太府丞鲁可封将作丞制

九寺三监之属尝合丞簿为一今还其旧所以开搜材之路也豈决科之久达於礼文舜元名卿之子习於财赋可封学古而仕干用有称为官择人分佐其长各思尽忠无或负丞

唐谿大理司直制

狱人之司命也吏或巧心析律高下其手使无辜者遭刑罰豈为民父母之意哉故选儒臣为司直所以申其枉也常思名官之旨则人无冤矣

龚滂国子正制

褒衣博带之儒露其顙者咸集於胶庠表正之官未易居也尔博古知今乡曲有誉力行所学用副选抡祝闵利路运判徐人杰江西提举常平制

部刺史握澄清之柄动摇山岳震懾州县用匪其人下则受弊尔闵夙有吏材再任蜀道就持漕节以饷王师所以省送往迎来之费也尔人杰儒林之老久列郎闳俾陟仓台以临江右所以徇更迭补外之请也绳奸摘伏思振六条寬我远怀时尔之职

陈辉知广州制

番禺为一都会象犀珠香之凑见者惑之贪泉之诗所为作也遐萌隔於朝廷连率系其休戚必得文武威风知大体者廼称其选以尔老于宦途饰以儒术苏枯鋤强勇於去弊旌旗盖海南伯甚尊畀尔重权用俟报政思济斯民以称朕仁不异远之意

竹友直循资制

日者宿卫置使大开莫府尔名在籍中厥有赏典进秩之荣国不失信

韩慤胄循资制

国家除戎器以藏武库尝下诸郡作甲尔能勤其官先期趣办爰进一秩示信赏也

左廸功郎龚总父绂封右承事郎制

朕以孝治天下推紫坛之泽于有官君子凡鲐背鲸齿之老有子列于仕籍者咸得而宠光之尔修身齐家耄期称道义方之训着于乡?载增命秩以为尔桑榆之荣

马希言太府寺主簿制

有列于朝者搢绅之选况九寺之属乎尔揔领工巧劳於办职司府勾稽肆以命汝往欻而长益勤其官

胡坚常直秘阁知盱眙军制

盱台新刳於兵数月之间郡将三易遴择其人将以徠流亡而通互市尔赞贰京邑咸谓有材召对便朝占对可喜寓直藏室畀以虎符能振其职则吾无北顾之忧矣

洪葳大理司直制

法家者流或用刑定罪安忍深刻失先王仁恕之意司其直非儒者安归乎尔名父之子颀门擅业往践其官必能以古义决疑狱也

袁震循资制

日者北鄙有衅慈宫视师江上凡扈从之吏无小大毕进其秩尔名在籍中宜受兹赏

李晖降官制

尔掌征商之事课损於常宜在大讎之域又讼其僚验之无实并按尔罪欲不惩可乎夺官一等省我寛科

朱华孙降官制

尔为县大夫更有乞取之奸而懵不知觉缙钱会计差舛岂无雀鼠之可疑也宁失不经姑用贬秩服我寛典思盖前愆

知贑州赵公称复直秘阁制

朕慕西汉良吏之盛故信赏必罚循名责实祖述孝宣之政尔顷坐小过失中秘之直既更大眚而治声达于朕听还尔旧物思所报焉

盘洲文集卷二十三

卷二十四

钦定四库全书

盘洲文集卷二十四

宋 洪适 撰

外制六

张孝祥复集英殿修撰知静江府制

炎峽分疆八桂独为善地有唐重外九牧多用词人我得良翰可寬远慮以尔性识超詣学问纷纭抱昂霄耸壑之材利斂锷淬锋之器广廷对策诸老生莫敢抗衡两禁代言他学士至於阁笔典股肱之剧郡掌管钥於留都治有能名庭无逋事睠遐萌之未艾咨南伯而匪轻稍还论譔之班往重蕃宣之寄椎埋或奸法令当去渠魁溜橐之在州闾盍新轨辙国须贤立吾不汝忘

李珂改官制

仕者满六考有荐者五人然後脱身小选亦可谓难也已矣尔好学能文尝见推择便坐赐对详整可采跻之王官非常典也思我恩渥有以称之

刘芮湖北提点刑狱郑丙湖南提举常平制

部使者分耳目之寄职有剧易而澄清之权等耳尔芮恬於势利论议不阿尔丙材资敏明知民疾苦持节重湖盖未久也易地而处金曰允哉或摠岸狱之柄或行敛散之政使人无冤事无弊则惟尔之休

张训通复官制

失律丧师罰难苟免眚灾肆赦泽所不遗尔久逮戎行尝剿敌垒治弃甲曳兵之罪已有严诛推息黥补劓之恩稍还旧秩勉图後效用盖前愆

魏彦转官制

山越弄兵骚我岭表尔控弦擐甲力挫妖锋解围擒敌厥功茂焉爰陟荣阶书之勇爵益图忠报嗣有恩光

刘淑赠官制

尔气吞羣盗履刃登锋拳勇无前没身流矢爰加褫典并録遗孤三泉有知荣此恩渥

孙谅转遥郡刺史制

羣盗蚁聚五岭麇惊远闻献馘之音可後踰时之赏尔精忠自奋沉勇无前独提虓虎之师遂清狡兔之窟畧之州绂夸尔戎?当令黄木之湾不见绿林之迹益思功效嗣有恩褒

吴掞转五官太府寺丞制

太府掌贡赋之贰而颁货贿于受藏之府盖周之旧官也尔材器庄粹佩服义方万里侍行西平有子俾丞九寺仍陟五阶用增济美之休且示褒忠之眷往涉其笔以对恩光

吴柄转五官直秘阁赐紫章服制

朕注意元戎远驰召节晋昼三接未尽褒赏之恩尔教忠有训称其家儿躡进文阶俾直中秘仍锡金章之宠式增彩服之光

周梦若母许氏封孺人制

朕竣祀紫宫推泽遐迩影纓仕路者其亲九帙则有圭组之荣与夫汤沐之邑所以教天下之孝也尔壺范之贤择邻有训龐然华发逢此恩荣用增三釜之欢以彰四德之报

莫延廕承信郎制

尔弃其故土慕义来归载嘉忠忱宜有褒异俾躋仕版用示恩荣

彭昇贵州刺史制

右列以遥郡为荣非异恩不能到也尔尝扈慈殿积有勤劳宠之州旗宜思忠报

王瀹浙西提点刑狱寔敷潼川运副制

坤维吾西土也距朝廷且万里吴中吾驻蹕之所也外台去天才尺五朕视其地如户庭视其人之休戚如一身未尝有远迩之间分道置使厥选匪轻尔瀹尝持闽节有澄清之誉兹用命尔察刑于近畿尔敷尝典蜀郡有平易之政兹用命尔转漕於旧壤能使民不冤用不乏官不媮吏不蠹则尔之职举也

薛凤国子正季翔太学録制

士不远千里而来使其渐摩道义循服规矩则表仪之列可非其人乎尔凤尔翔儒之秀杰其推正心诚意之学以助我长育之教

魏吉甫大理评事制

孔门高弟片言可以折狱周书有训两造然後听辞尔详练法令宜列理官钦哉钦哉母宁上下其手

凌景夏复敷文阁直学士制

朕礼神颂只已用上辛之吉涤瑕荡垢率循令甲之常惟时从臣未获旧贯爰推茂渥实采金辞具官某识邃经郭量函德宇出入久乎中外声名著乎迺遐重镇撞牙遏边冲於樽俎清蹕听履振公道於铨衡顷出多言退休闲馆兹广奉坛之泽俾还内阁之班往服纶恩以需节召

资政殿学士湖南安抚使黄祖舜转一官致仕制

轻裘制阃远驰茸纛之声方幅叩闾遂露抽簪之请勉从雅志用出褒书具官某识洞眇绵量苞广博糟粕不胶於纸上经纶自得於胷中有嘉忧国之诚屡纳庇民之说荣跻枢极陈泰阶六符之经任重藩垣修方伯连率之职正仰折冲之效遽高知止之风眷此老成闵劳以事增之品秩式宠其归往佚乡粉益迎壽祉

李如冈磨勘制

三年而计羣吏若稽陟典之文彙日不离小官独减从臣之考兹协铨曹之法实彰名器之公具官某识探道原智优治具司刑禁路鞠茂草於圜扉敷惠藩方美甘棠於南国奉丛祠而通志增华秩而应条往服恩纶益休广誉

梁俊彦转遥郡刺史制

朕患陟典之滥或【缺】其法自贵近始所以奉三无私也尔蚤齿【缺】文史典司官维能勤其官环列序进训齐【缺】绂之荣与【缺】类等益思忠恪以对光宠

周葵封宜兴县子制

朕嗣守洪基肇禋紫時当路寝斋居之日霏雪甚繁暨闕宫朝献之辰陰云尽解克竣熙事爰布庆条若时旧德之臣宜出明纶之命具官某深忠许国遗直事君非尧舜之道不陈同熙庶绩殆管晏之佐弗及咸仰贵名属三岁之亲祠值四郊之多垒建改卜之议能稽皇祀之成规

迺涓成之休遂展泰元之大报会有燕间之请莫陪显相之仪兹举典章用开爵邑噫致齐侯之胙有考旧闻受宣室之厘敢怀专乡益绥善履用对恩褒

王之望封襄阳县子制

朕遵旧规於【缺】变熙事於一阳啓蛰而郊協鲁国駢牺之祀获兽以馈若汉代白麟之章既歲上仪用推庆泽具官某忠规致主壮志絶人闢紫闥而攀台阶荣登六太穆天綽而经国体密赞万几緬惟?选之辰实参改卜之议偶休閒馆莫相明禋兹疏谷璧之封乃荒菜食之邑噫百神咸秩已格嘉虞之休万福来同敢怀专乡之意更绥吉履用对恩輝

黄祖舜赠五官制

禄贤褒德稽载【阙】崇终存有邦之典令若时峻望尝列【阙】方览挂冠之章忍闻易箠之语告其居第出此恤书具官某器局沉深风规直谅传孔孟圣贤之学入渊骞德行之科卿佐是谓股肱久运中枢之画俎豆尝闻军旅爰分方面之权羽渊忽梦夫黄能长沙果集乎子鵬命之不淑识者咸嗟用增幽壤之荣?进文阶之品尚其不泯歆此犹生

刘立等转官制

尔等顷以军兴奔走邮置宜推赏泽用獎劳勤

高邮军立功人转官制

淮濱之役氛祲盘结尔等或被甲战野或銜枚攻营第赏褒功咸进阶秩益思忠力以对恩荣

权洮州赵令结妻包氏封令人制

尔夫身留异壤而王师薄於城下尔能率军民望风归义忠壮如是女史所无宜锡令名以开脂泽使妄男子知所媿焉

杨贵等转官制

西陲受敌百将同功尔贾勇奋忠斩首捕敌幕府差次宜陟荣阶往服恩光益图报塞

吴益转右朝奉郎制

朕惕奉慈谋光临宝祚尝覃中外之庆靡分大小之臣具官某接物惠和宅心端栗披?竹帛知师友之渊源怡养丘樊玩烟云之舒卷顷阶戚党蚤缀从班获逢嗣服之恩寔应迁官之典益思谦畏用保宠荣

薛良朋进职制

人主以八柄驭羣臣予夺废置犹雨露雪霜不可以偏废也二浙岁恶不登民多菜色朕隐悯流徙食不甘味故坐视不恤如嘉如康祖如宥之者则绌之奉使称职如豈如 者则陟之尔奉行不懈赈拯有劳顾不赏可乎进直河南尚勉之哉

姜诜进职制

朕哀凶岁之民軫殍野之虑拯菑之策靡不施行王城之外流亡四集今既数月矣幸而生存则可以返其田庐有司劳於赈恤者以次取赏宁过於厚所以劝勤事之吏庶几乎广我仁民之心也尔閱视调委不懈厥职道山之署时谓优恩益思其终以称羣论

韩彦古转官制

日者聚饥民於四郊分官吏稟 鬻致医药尔摄承民曹实参其事今生者可归第劳班赏增秩一等以劝後之济斯民者

吴掞驾部郎官制

郎位上应乾文为朝廷华辙尔有列卿寺训墨未乾跻之司輿时谓异渥所以彰乃父教忠之训也惟尔行安而节和必能恪居厥官以称朕意

阎安中中书舍人制

朕考三代以来在两京最盛文章涣焉可述莫非尔雅之辞号令罔有不臧初无替否之迹追还古始有待髦英具官某学阐丘坟声谐韶濩决科文陛切直冠夫诸儒掌礼仪曹光焰辉乎侪辈介然有守卓尔不羣自入贤关一新学法挟策负素者争亲乎模范躡纓影组者咸仰乎规绳惟禁路之择材辍师资而为诰虽出纶出綬欲求润色之工为纪为纲尤赖论思之助往践厥次时惟休哉

赵伯强承信郎制

尔父蒙盾援旌殁於行阵録孤之泽所不可遗往即官聯式思所报

叶顒磨勘制

八柄诏王厥分爵禄之等三载考绩率循法令之常虽列从班必遵彝矩具官某赋材硕大迪德忱恂蚤环轍於宦岐晚垂绅於要路秋官断狱议者谓过于张文部曲铨衡时论号後于卢李兹因会课实应迁阶庸出丝纶之褒庶增笔橐之重往只恩渥益广休声

刘仪凤磨勘制

设六卿之官是为迹列考三载之绩盖踵前规若时禁密之臣亦限吏铨之制具官某渊源种学典雅摘词自挥翰於南宫即主盟於北苑司马掌九伐之法厥有弛张太史成一家之言正资笔削兹因会课实应迁阶初非不次之恩庸示无私之典往只茂命益畅美声

吴璘判兴元府制

汉中巨屏实蔽极边关外重权母踰元老出兹言綍新

彼辕门具官某名【缺】武立凜凜中坚之望番

番上将之元建方【缺】谷以西寛远顾【缺】雄心於狼望之北独蘊【缺】怀兹载戢於师干庸近移於幕府九命作伯孰先倚爱之亲十国为连益赖扞城之助副吾注意知汝匪躬往究英猷奚烦多训

王大宝礼部尚书制

朕远覧周书尚猷询兹黄髮若稽虞典畴咨汝作秩宗复起老臣甚谐輿诵具官某抗高明之识驰魁垒之名紫橐峥嵘孰并驱于禁路皂囊剴切殆独步於谏垣雅操不移高风易退方奉祠而均逸忽上牒以遗荣缅怀骨鯁之英浸劳梦寐之想远移一节既无俟驾之淹载锡兼金宁有挂冠之执爰蔽朕志俾长春官盖进德以尊朝期用儒而益国讨论礼乐岂止玉帛鍾皷之云猷纳箴规庶几几杖盘盂之戒往祇厥位惟尔之休

方滋权刑部侍郎制

朕俯酌人情若稽禁罔前之所是着为律具存画一之章尔曰勿宥惟厥中斯济登三之政比申细札用戒祥刑畴咨明恕之才俾揔平廷之柄具官某緼沈深之识擅盘错之能使节川麾殆艰难之历试民风吏蠹无纖介之可欺輿议皆称其贤三纪久劳于外宜持紫橐遂贰私官夫法令譬犹江河盖易避难犯之义若文书盈於几阁有奇请它比之奸已扁鐻乎两端唯科条於三尺其推朕意毋忽狱疑竚而称职之休成我知人之哲

王承祖等转官制

尔远随戎莫来造帝庭用陟官聯以示还归之宠

唐 国子司业制

古之君子经为人师行为人表故居一乡则一乡化在一国则一国治今朕罗天下秀异于成

均侈袂方履闾闾秩秩不但取其庠声序音之盛为美观盖欲养材器备官使也以尔擅颍门之学高月旦之评入朝十年恬於执利弥邵之德称为醇儒比因使指之还尝赐清间之款占奏详整简在朕心往海诸生思称其职

王弗权户部侍郎制

朕若稽仁祖尝用许元虽增秩迁阶至列贤科之籍而历年玩岁不离财计之官盖久其任而得人则尽其才而兴利今朕此选将庶几焉具官某智虑从横材资超诣历宦岐而甚久惟心筭之最优通知食货之源灼见公私之弊对之听陞嘉富国之谋猷试以版曹有裕民之方略其颍治赋之柄勿分约法之劳要当解瑟而变更毋或守株而苟且从班足可施設非锥处囊中之时国用赖以赢余竚钱流地上之效往追前哲嗣有褒章

郑立改官临安府知县差遣制

赐对于昕朝易阶于小选虽典章所有而恩不常出也尔粹于学问称有吏材敷奏可嘉不误举者畿内壮县用试尔能政绩有成嗣将饰擢

韩彦古直徽猷阁知严州制

尔摄承省户以语言之失罹于清议自诡治民吾以乃父勲藏盟府不汝疵瑕延阁汝旧物也严陵吾辅郡也夫美锦尚不可使人学制况千里之寄乎尔其矫揉修饬允蹈中庸使实惠洽于编氓则爵位可以长守敬之哉毋荒弃朕命

盘洲文集卷二十四

<集部,别集类,南宋建炎至德佑,盘洲文集>

卷二十五

钦定四库全书

盘洲文集卷二十五

宋 洪适 撰

词科习藁一

戒谕诸将抚循士卒诏

勅朕嗣有令绪躬履多虞披榛莽而立朝廷未济艰难之业听鼓鼙而思将帅有怀屯戍之劳比虽通两国之和讎敢忘五兵之备边城密迕政击柝以相闻戎幕崎岖亦暴衣而浸久慨此执戈之衆未知税驾之期惟山林未息於马牛致介冑尚生其虬蝨风洒露沐日削月朘左亲戚以相从举室家而靡托兴言至是軫念於中虽进元戎与参密议每虞裨将未体朕怀或徂故常罔加存抚庠舍弗矜其燥湿糗粮或失於时宜有乖挟纊之恩靡徇投醪之义繇今以往毋蹈厥初其同甘苦之情仰副绥怀之意未能按轡亲巡细柳之营傥遂囊弓即议【缺】之赏勉图报効共享升平

令监司举廉吏诏

朕闻上古之治百僚师师尽瘁竭节罔不清修淳白以振乃职励乃事是以教化兴行衆庶乐业咸以康宁朕承洪业托士民之上于今十有六年数诏有司务行廉白抚绥吾民将以配三王之隆明先帝之德也今吏率以贪渔为常牟贼其民慢视厥职弗以经意而方絜之士饰躬自将挺然不徇流俗者又沉滞下僚壅於闻达薰莸不同反罹訛毁部使者罔克闻知奉诏宣化如此岂不谬哉方今国家少事繇役不兴兵革不作而民多贫困失职厥咎安在是廉吏不兴而贪吏未去也部使者不以为意朕将何任哉夫部使者位尊贵重所使为朕外台之耳目也其各公乃心广及视听岁举所部廉吏一人上其功状朕将识擢以风在位而律贪夫焉

令宗司举贤宗子诏

勅朕猥以眇躬嗣承大业观轸辂之象伤同姓之孤睽诵角弓之诗鉴前王而亲睦思强王室广用宗盟冀枝胄之繁兴为本根之庇?挺挺有祖风烈何独旧闻显显为世豪英岂无佳士爰举先亲之典每防踰戚之非或剖竹分麾出畀朱轡之寄或垂纓戴纵进参紫囊之联尚虞或抑於下僚未克尽跻於显仕昔周家致治毛原迭位於公卿唐室多材程石继登於鼎铉曷於今日有媿前朝夫?远鰕生尚能谋国岂神明贵胄不可亢宗凡我懿亲宜遵明诏虽行有九德惟知人之固难其岁贡二人则进贤而必赏益思汲引以副招求

御史中丞除吏部尚书诏

勅分职以倡九牧周寔重於列卿掌选而主三铨唐尤高於文部乃朝廷之贵职须识量之名臣朕得其人使率其属具官某刚方【缺】任公正无私谦谦有君子之风蹇蹇励王臣之操学通坟素酌道德之渊源才冠等夷游文章之林府久蹇禁密【缺】首宪司嫉恶如讎触邪罔避白黑分於穀下中外畏其笔端豺当道而不问狐狸王纲大振兽在原而莫采藜藿国势愈尊爰升常伯之联俾典天官之务其考核於流品无殽混於贤愚尽革颓纲一清选部山岳动而州县皆震威已并於思谦筦库擢而门阀不遗美无专於辛术往服朕命是惟汝能

代宰臣以下谢进徽宗实录赐宴表

史述信书昭揭先猷之盛恩沾迹列式均嘉宴之私仰佩宠荣深深感涕【中谢】共以徽宗皇帝文周经纬道合希夷礼乐粲然复兴刑罚措而不用垂裳平治迈三代之英风脱屣崇高躋二皇之遐武於铄岩廊之美有光竹帛之传中偶兵戈荡然埃烬爰极网罗之力遂臻纂缉之成事不一书诛奸谀於既死言非虚美质鬼神而无疑岂期法酒之陈乃及素餐之列抚存若此报称谓何兹盖伏遇皇帝陛下情笃孝思德先仁政克济中兴之业能昭下武之功揭大训以丽天方切羹墙之感贲殊恩如湛露遂加柱石之微臣等获际昌期浸登显仕有颁其首既膺鱼藻之欢惟既厥心少竭盐梅之报

代宰臣贺收复河南州县表

善师不陈初无攘敌之劳文德诞敷坐受归疆之请一人有庆四海交懽【中贺】窃以炎正中微适际阽危之运北兵南下尽罹锋镝之菑荼毒中原荐食上国惟昊穹之悔祸致勅敌之乞盟通使乞盟盖自舞干之格神州赤县遂无血刃之伤王纲所加车书同道宣王复文武之土永固洪基齐人归郛鄩之田不失旧物旄倪鼓舞宇宙廓清恭惟皇帝陛下圣敬日跻勇智天锡怀禁暴安民之志捐穷兵黩武之心【缺】单于【缺】朝本圣人以天下为度干戈戢戢大凝复古之勋师徒不勤自获和戎之福事载竹帛功光祖宗臣等猥以庸材叨居近弼一心尽节获闻五利之谋再拜奉觴愿上万年之壽

代宰臣贺正旦雪表

三微更始正王道之大端六出飞花兆年丰之嘉庆自近及远式舞且歌【中贺】窃以葭律移灰方陬月棣通之际椒花献颂正洪禧萃聚之时盖圣人之德无加则天瑞应诚而至葵心向日方瞻凤历之颁柳絮因风已发兔园之咏杂轩墀之玉砌成宫阙之瑶台寔一人有庆之符示百谷用成之应良史直笔已书尺地之珍太师陈诗行播千仓之什兹盖恭遇皇帝陛下履端於始与物为春惟盛德上合於天故圆穹不爱其道既颂声之并作致協气以横流七政齐於璿玑有合璧连珠之瑞四时和为玉烛无鸣条破块之灾故兹五谷之精降此一岁之始臣滥司台柄获覩休祥變理陰阳大惧丝毫之亡补勤劳稼穡行观廩廩以皆盈仰望龙顏徒深鰲拚【庾肩吾谢历啓拂琯移灰识权衡之有度】

代皇子谢明堂加恩表

展采合宫克达明禋之荐均厘宣室遽叨惠术之颁逊避莫从震惊罔措【中谢】窃以圣人飡帝式?报本之诚孝子事亲必极宁神之奉亶哲王之稽古严烈考以配天吉既卜於秋辛礼遂行於阳馆用荐一人之馨德聿来四表之欢心咸造在庭获覩弥文之讲并受其福诞沾大泽之流臣袞庆星潢骈晖宝萼勉飭温良之行愧无岐嶷之资建旒设旒节拥双城之贵剖符锡壤爵超五等之崇逮兹熙事之成复冒宠章之及轅田加厚圭赋增腴拜赐甚荣抚躬知感此盖伏遇皇帝陛下广运帝德克享天心比及三年属有宗祧之事锡厥五福故使子孙无忘致此明纶被於弱植臣敢不祇承徽数益迪令猷学礼学诗恪谨过庭之训惟忠惟孝誓坚卫社之心

代普安郡王谢赐第表

奉藩王室将从外邸之安筑第神京遽拜大君之赐俯惟虚受内积愧怀【中谢】切以世祖推恩长安列六子之舍明皇广爱华清建百孙之居未闻弱植之微臣独庇中都之大厦是惟隆典有掩前修臣德陋中和器慚奇穎出从外傅粗读河间之书入侍严宸曾乏东平之善荷龙光之俯逮顾鲁钝以难任渠门赤旗已峻将坛之拜玄冕朱紱更兼王爵之封岂期十札之颁遽奉一区之赐敞高閤於吉壤分清禁之余光乃寝乃兴遂偃仰栖迟之乐既怡既悵无罍尘湫隘之虞岂惟拜命之帡幪固且隆基於久大兹盖伏遇皇帝陛下治先睦族义重隆亲胡不攸焉鉴独行於扶杜式相好矣歌攸芋於斯干故兹宫室之成特壮根本之辅臣敢不仰铭睿德益励臣衷夏屋渠渠每念满盈之戒小心翼翼誓坚忠孝之诚

代边将谢赐春衣表

圣主畴劳载锡春成之服戎亭拜命咸叨天赐之恩稽首欢呼省躬感厉【中谢】切以楚人挟纊彰拊循士卒之能汉祖解衣得驾馭英雄之术盖君之视臣尚思於足体则下之报上当务於捐躯洪惟清朝高视前古既九月举授衣之典复三春施赐帛之仁驻辇闻诗常有及时之喜与袍同泽深惩偕作之非遂致无庸亦沾大赉兹盖伏遇皇帝陛下握乾立极乘震当阳服光武之大冠久兹得衆爱韩昭之弊袴必以旌功方阳律之始回念征夫之在远爰出有司之帑以为公子之裘万里乘边未着七擒之绩十行颁札遂膺一袭之恩拜赐甚优论畴何有臣敢不书绅佩德歛衽思忠揭竿为旗誓奋犀渠之勇何戈与殳庶逃鹬翼之讥

代状元以下谢赐中庸篇表

礼经贻训载先儒明道之言宸翰摛华贲新进服膺之宠仰拜枫庭之赐蔚为桂籍之光展诵兢惶珍藏荣耀【中谢】切以道沦雕丧学昧中庸知者过之望门庭而莫造小人反是纳陷阱以奚知或卑污仍甚陋之途而矫激肆至高之行惟顔氏择乎而弗失得穷夫子之言至荀卿守焉而不详遂堕孟轲之学虽道之不行已久幸天之未丧於斯洪惟熙朝特兴絶学盖百世俟圣人之作致诸儒识君子之归恭惟皇帝陛下广大精微聪明圣智得执中之一贯是传

之汤用好问之两端斯以为舜达治国九经之义知修身三德之原乃睠鰥生未明奥旨述天圣甚盛之举采子思不刊之经徒载空言炳若日星之着特形妙墨粲然云汉之垂俾之勉强而行庶或从容而中臣等幸逢治世滥擢儒科可以终身行之永佩一篇之戒不能朞月守也益惩前辙之非

汉灵旗铭

汉元鼎五年四月南越相吕嘉贼其王及汉使者其秋天子遣伏波将军博德出桂阳楼船将军仆出豫章戈船将军严下濑将军甲出零陵驰义侯遗出牂柯合其衆十万会番禺以讨之仍以兵事祷于泰一以牡荆画幡日月北斗登龙以象太一命曰灵旗太史奉之以指所伐明年春遂灭南越披其地为九郡始用乐舞塞于祠上观其师行若破竹一举凯旋虽庙堂制胜将士奋力所致然非得陰相安能成功若此其速宜有铭章纪神之休敢为之言曰

武有七德 禁暴为先 兵以义出

获眷皇乾 招摇在上 闻之先古

我武维扬 当假陰助 赫赫汉室

六叶维武 越夷不宾 敢肆螳斧

皇命伏波 耀我天戈 皇祷泰坛

牡荆揭幡 是为灵旗 绘斗登龙

两曜旁列 三星为锋 太史奉之

以指所伐 九夷宾将 远殄於越

蠢尔小丑 衆叛亲离 烈烈王师

上天佑之 寻陜失险 石门陷阵

一举覆亡 地析九郡 惟泰元尊

助兹有道 惟圣天子 荡彼凶暴

洪颐所指 莫我敢当 题芳千古

宜有铭章

莲花漏铭

仁宗皇帝御宇之八载龙图阁待制臣肃上莲花漏法琢石为壶剡木为箭以测十二辰二十四气四隅十干暨百刻分布昼夜成四十八箭为壶以贮其水有乌以注之有秤以平之有荷以承之水至刻盈则箭与莲心适平司辰者拱而谨视以揆景测辰虽风雨晦明靡有差忒时司天官以其法虽符古漏而日纒进退颇与黄道不合至景佑元年测验无爽始作而用之夫日往月来寒暑推移以之成岁而考测盈缩辨察昏旦非假器物则无以仰窥神道此挈壶氏之所以作也而季世失官诗人兴刺兹有国之先务今肃以创物之智作为新漏世服其精臣操笔在庭不敢拊默谨摭其事而铭之曰

莫神於天 灵机渊奥 扶光动华

望舒登曜 昼夜推移 时积岁成

圣人揆测 挈壶迨兴 季嗣不纲

法制沦亡 聚?失次 击?乖常

於皇昌代 连珠合璧 畴人庀官

凤氏司历 圣主当阳 业业諏治

昧旦丕显 夜分乃寐 有臣曰肃

创法来献 琢石成壶 剡木为箭

高卑殊级 洪杀次陈 灵乌挹注

芳荷吐吞 微若紫蠃 捷於激电

忽往倏来 鬼没神变 登刻盈时

水浮矢飞 司辰凝目 鸡人告期

晷景长短 风雨晦明 罔逃揆度

靡失亏赢 制符造化 贻则垂宪

亿万斯年 铸芳金篆

晋白虎尊铭

晋孝武皇帝蒙三世之遗烈爰革魏正肇建丕业正月之吉大朝会乃能端本谨始思有以来忠谏而兴治道遂设白虎尊於庭文武百辟有能献直言者则发尊饮之诚得君子居正之义而合先王思治之意矣故当斯时有若刘毅裴楷之徒率皆仇然献替无有忌讳传曰国之将兴必赏谏臣晋武得之其英风佳躅宜有铭诗而史逸其传敢为之铭曰

摄提革岁 万物更始 哲王履端

体元思治 於皇晋武 八尧啓祚

弊剗当涂 基荒典午 经纶肇造

政具交修 朝图夕惟 惧其瑕尤

济济春朝 骏奔羣辟 拖紫纁青

编星拱极 皇軫宸虑 谨始端本

厉节导言 使之思奋 乃设厥尊

乃酌厥酒 其形伊何 坤维摯兽

其兽伊何 藜藿之守 乃饮厥直

乃醺厥忠 其饮伊何 沃心匪躬

其沃伊何 格非廸聪 天子居正

虚襟来谏 卒岁图终 德胡不盛

文武在列 肃然改容 褒一劝百

节胡不终 有愆必绳 有过必除

无舌之甘 无言之谏 汉觴上壽

第讲朝仪 杜举存名 徒戒前非

懿范佳躅 自我作古 於万斯年

铭诗可觀

皇宋玉牒序

绍兴十一年十月宗正臣大受言宋受天命圣圣相承亲宗戚族远肩尧舜三代之隆兴仁厚之行享维城之安绵二百年宗寺旧书所掌有四顷厄兵戎鞠为炎埃陛下比命蒐访虽总图籙属籍为一书而玉牒实与时政纪起居注相为表里独阙不存非所以笃叙纠合垂宪万世者也臣愚欲望裒掇逸遗讨论旧制以正昭穆以壮本支备中兴之盛典臣不胜狗马心惟陛下裁择制曰可仍令相臣董其事书成有旨命臣序之臣闻传曰欲治其国先齐其家故亲睦九族圣人以为盛帝之极治周人亲亲则有宗伯掌三族之别以辨亲疎小史掌邦国之志以奠系世汉兴首仍秦制宗正官而岁上其籍於朝至唐而建寺设官玉牒属籍各有司存其事愈详矣宋有天下传世相授於今十帝枝胄扶疎瓜瓞绵衍自至道中始修玉牒掌帝籍皇族昭穆之序仍命刑部郎洎编属籍书至咸平中臣安易修成属籍三十卷祥符中臣世长言唐季衢以玉牒与史册并驱因名皇唐玉牒遂诏以皇宋玉牒为名且建堂於寺而仙源积庆图宗藩庆绪録则每岁元日献而纳诸龙图天章宝文阁建炎之役举不复有皇帝中兴益严家法以化天下凝旒岩廊慨然以天枝玉叶荡无纪録乃博求而总缉之俯从议臣之请而四书复备甚盛德也臣切惟我宋之治惇崇宗明亲贤并建所以尉荐教勅之莫不备至而戚属感奋咸能自厉若駒駉之俊材辟疆之清静歆向之学间平之贤岷勉回石之材德为宗室标的者驱汉驾唐而七国八王骄奢湛佚之患寂未之有璇源蕃衍既有图籙而雍睦之政嘉言懿范与夫宗英事业可以鸣徽无穷尚阙而未着是书之成可谓备矣彼诵葛藟之诗形斗粟之謡者得无愧哉臣材学荒陋幸以文字待罪朝着既被命敢书其说以冠於篇臣谨序盘洲文集卷二十五

卷二十六

钦定四库全书

盘洲文集卷二十六

宋 洪适 撰

词科习橐二

唐定襄道行军大总管破突厥露布

臣靖等言臣闻王旅徂征远问弗宾之罪天戈所指果收罔敌之功威震百蛮欢倾率土恭惟皇帝陛下兆基开业经武纬文致治庶乎成康课功贤於汤武风纚露沐扫奸慝以扩清天盖地容跻生灵於仁壽蠢尔突厥警然朔方倚父兄之余资轻国家之新造黄金载道莫充谿壑之求鸣镝扬尘屡肆蜚蜂之毒由宸衷之布德冀边垒之销兵姑迟票骑之师用进奉春之策而边人忘义敌国怀贪方走聘车已负【缺】之【缺】未乾口血复寒渭水之盟援我贼臣涉乎王略肆其侵軼欲事窥觊覆载不容神明所殛臣仰承睿筭远致天诛十万之师六道并进蹈垒屠城而莫我敢遏艾旗斩将而所向无前马邑潜行定襄夜入酋豪鸟散部落麕惊疑精兵倾国而来谓智将从天而降盖戎人轻而无整怒螳不及当车而兵机速则为神震霆不使掩耳尚守妖穴退逃铁山诈摇尾以乞怜欲磨牙而恣螫狐疑犹豫方谋三窟以庇身蜚毒蜂贪不可一日而纵敌复将万骑进逼陰山俘其帐千余以随去其牙七里乃觉叠罗施贼之孽子旋即生禽义成主贼之逆徒亦遂死获其余聚落尽投戈请命衿甲迎降而颡利不为牵羊衔璧之思尚作走雉窜蒿之计已令貔虎必取鲸鲵旄头失明既一清於氛祲朔风不竞方大布於阳和威烈所加书契亡有此盖上穹助顺列圣储休成兹不世之功允谓非常之庆坐明堂而献壽行持万岁之觴作彝器以铭功永纪一人之烈

唐京畿渭北鄜坊商华兵马副元帅复京师露布

臣晟等言名位不同既君臣之素定神器有命岂智力之可求故棗梔不任於栋梁而燕雀焉知於鸿鹄苟闇奸於天位实自速於邦刑简策所书古今共贯恭惟皇帝陛下聪明英武笃实辉光化民以躬为政以德优繇亮直贤哲萃於朝廷总揽权纲威令伸於藩屏乐岁享金穰之庆康时臻玉烛之和蠢尔逆臣忘夫大德六旄导节五分重镇之权四履疏封两峻真王之册所以轻捐於名器欲其图报於朝廷奈鸱梟之悖逆相承而豺虎之贪残难革罔竭惓惓之节居怀觖觖之心世济厥凶其父已臣於安史家传不轨乃昆复乱於卢龙偶涇人变起於京都致源休诡称於符命遂凭叛党辄起厉阶褫绅笏而袭冕旒固已沐猴而冠逼乘輿而惊輶轂敢磨窳窳之牙盗环之恶则所不可言裂冕之情而至於此极忍肆滔天之罪轻为填海之谋毒贯堪輿怒貽宗庙万方愤发莫不疾首而痛心九服器腾尽欲寝皮而食肉臣自闻国难祇奉诏音即投袂以兴师遂属鞬而就道虽阖门之遭紮何以家为念灭贼以报恩维其时矣百

舍一息王事宁劳三令五申兵威已振共抵臧宫之掌欲然董卓之脐始以孤军而屯渭桥虽能断其首尾彼之重兵方聚苑内要当披其腹心遂会奉天行营副元帅浑瑊镇国军节度使骆元光商州节度使尚可孤等商秘计於幄中【缺】麾下愤一夫之射月致万乘之蒙尘使之乘此时以建功勲戒以诛元凶而取富贵皆闻言而雪泣思贾勇以风飞即日啓行克期同集移军於光泰门外筑垒於米仓村前螳臂既张遣廷芬而出战狼心甚炽攻华壁之方坚遂命吴玠整衆以当锋复令李潢督兵而救急蒙虎皮而直犯被鹤膝以争驰两军相鏖终日大获辙乱旗靡方蔽野以横尸兵尽矢穷遂弃门而夜哭羣帅宣威而气倍衆师席胜以鼓行彼虽延命於须臾我必乘机而扑殄遂使王佖将骑兵而前进复令万顷率步卒以偕行中夜以开苑墙先登而拔贼栅朱旗绛日高锋彗云杀人之易若刈菅近刃而势如破竹擒段诚於伏莽心膂既亡败令言若摧枯爪牙已挫尚思拒辙未悟倾巢谓宫城万雉之可居以武库五兵之足恃欲为帝耳阵方布於蕲西其如予何兵已临於新室伏羸师而见击收余烬以复来百骑自驰十战皆北生灵既已鼓舞乾坤於是清夷尽扫妖氛径趋中禁逆酋漏网轻骑窜蒿防堑师奔但听有声之马陰陵路失漫嗟不逝之骓已驰追蹶之兵行有俘囚之日王家再造覩父老之来迎锤簏不移幸寝园之如故臣滥陪台鼎获总戎旃不令剧盗之乞平致使属车之再狩免冠伏地敢逃失职之辜负斧狗朝请正辱君之罪限拘军事未副愚诚谨先布於捷书庶仰寬於圣虑

唐淮西行营宣慰处置使克蔡州露布

臣度等言雪霜雷电皇天申震耀之威斧钺甲兵盛世赫诛锄之怒盖禁暴除乱有不得已者故陈师鞠旅由是而生焉恭惟皇帝陛下齐圣广渊聪明神武内有拨乱之志奸宄继平再获受命之符纪纲大振九夷通道三务成功强藩旋踵以就诛悍将革心而効顺风行夏蜀清数路之妖氛霆击李卢澡积年之凶德田洪正举宗而向阙张茂昭扫地以归朝独是蔡人素为戎首偶三朝之含贷致四纪之逋诛养稂莠以不薊豢虎狼而弗拂未暇膏之鼎鑊尚冀少悛然其带我金犀罔思所报自视由如羌狄不复知有朝廷包藏祸心谓一隅之足恃参会凶德已二【缺】之【缺】托唇齿於平卢倚腹心

於董质刃交宰辅【缺】奋臂以一呼遂放兵而四劫反形已具我伐用张世济其凶固罪盈而恶稔天降之咎盖运彗而祚殛八紘俟其然脐万夫为之切齿臣恭承宸命出劳戎行誓灭贼以还朝乃奋身而督战三军既附咸如挟纊之温羣旅争先莫不投袂而起命文通道古捣其腹背委重裔公武鯁其喉牙既谋主之悉擒致坚城之继陷尚哀余烬辄拒大邦赖光顔角迴曲之师而李愬席吴房之胜乃出秘计潜蹈贼区率九千人自文城而疾驰行六十里至张柴而少息即偃师而治吾鞍铠复遣卒以断彼桥梁冒风雪以宵行出其不意击鹅鹚而声乱晏然无知遂坎庸以先登得发关而直入凶俦散溃弃兵仗以星奔狡敌震惊讶官军之天降猛兽将擒而尚凭空穴孤雏欲死而徒护危巢犹鞠衆以登陴敢婴锋而接刃势无繇而窜雉计方出於牵羊将执而归於京师使大者陈诸原野念胁从之罔治不戮一人喜灾害之不生永清四海兹盖陛下法天立道与神为谋破万口之雷同命六师而电扫皆由宸断成此伟功臣滥预良图获戡大憝受俘而献太庙于

以慰在天之灵【缺】庶几示为臣之戒唐伊丽道行军大总管擒西突厥沙鉢罗可汗露布

臣定方等言蠢兹丑虏背我殊恩嘉壽称觴尝拜解衣之赐瑶池刻印更叨立戟之荣辄啸逋逃欲盟侵軼会圣主广含容之德遣使人驰尉抚之词地接旂常文漫劳於谕蜀性同盘瓠声肯变於吠尧取咄陆以建牙寇廷州而犯塞【失二句】六师初道於金山一战即梟於处木降独祿而先声已振薄曳咥而锐气方张意其胆落以来归尚敢尸居而作固哀十姓蜂屯之衆当万人虎怒之威辄舒翼以旁张冀磨牙而恣蠹遂令步卒遽高而列阵亲率劲骑直北以布营妖锋三遇而皆殲神旅七擒而莫遏乘其蹈籍肆厥剪除都搭大酋既搥喉而漂卤俟斤五弩旋泥首以投戈乃遣嗣业趋邪川以追奔独与雅相提降兵而踵後赖风雪蔽天之助相云祲兼日而行既破竹以无前尚寢薪而不悟遂连弥射直抵金牙彼方猎野以偷生我乃麾军而纵击渠魁震讐度伊丽以潜逃凶丑分犁举达干而大溃方兹逋窜遽就系累臣已申画疆圻修严亭障释余萌以示不杀之武收露鬣以昭无外之仁镂灵山而梁孙原列壤已穷於西海崑温禺而染尸逐献俘行告於昭陵臣无任

唐京城东北西行营都统复京师露布

臣克用等言逆贼黄巢者緑林戾气白挺饿夫斩木揭竿啸仙芝而首祸蒙盾负羽涉河南以弄兵蹈籍我江淮?刘我闽越所过靡不残灭其锋莫敢谁何毒贯苍旻凶焰几周於诸夏乱纏紫极妖氛遂鞠於上京致銮辂之蒙尘举衣冠而扫地恶逆之极古今所无虽身具五刑未足偿生灵之愤况畿方千里岂久容凶孽之蟠道岚州以行师营沙苑而布垒挥刃即戡於黄揆扬旌进逼於乾阨既合许蒲易定之兵奋其武怒敢率赵向王林之衆逆我顔行俄大获於梁田即分屯於渭北师既勇而素坚鬪志贼屡挫而陰有遁谋因乘携貳之时共竭分犁之策继麤零口复拔华城乃遣杨守宗提劲卒以前驱仍率白志迁董利兵而先进幸三战俱殲於逆党故诸军争贾於英威震呼动天罔遏灵旗之锐僵仆蔽野尚余踦屨之逃遂披光泰之门直造昇阳之殿游魂既远怪终夜之有声噍类犹存恨余风之未殄

唐天下兵马元帅复东京露布

臣某等言【云云】合蕃汉十余万之衆驰关陕数百里而来分兵既拔於怀州整衆即临於横水王师严静既威棱凜若雷风凶徒震惊始忧惧形诸顔色尚作护巢之计方凭坚壁之强遂遣仆固陈西原以扼其前因命回纥并南山以缭其左表里由是夹击杀伤亦几相当谓其束手以来归乃敢埋根而决战赖朝恩攢矢以注射俄马磷夺盾以先驰势若枯摧正交锋而麤战视其辙乱遂乘锐以鼓行方折馘大克於老子祠而积骸已平於尚书谷渠魁雾散淮壖之鹤唳堪惊逆垒风清楚幕之乌声甚乐

汉五属国记

汉自白登之役匈奴凭其强忸其胜猖然有吞噬中国心历五世无岁不有狄师汉之为邦亦且弱矣孝武奋然遣将遐征旌旆之所为及淶地无类单于始慄息不敢南望且怒昆邪王居

西方不能御王师欲召诛之昆邪於是始有来降谋大将息得其使以闻天子遣将军去病将兵迎之以其衆四万余人度河来归既至长安以漯陰万户封其王而尽侯其裨王呼毒尼等四人乃於张掖灯煌武威金城酒泉郡地置五属国分处其衆郡置一都尉治之复择明习外国事者一人为典属国时元狩之二年也夫圣人所以制四夷悯其顽蠢桀骜叛命不为之震怒而兴师六月之伐亦有不得已者至慕义而顿颡则接之以礼羈縻不絶未尝欲正朔加其国而礼乐政教被具人也其肯内而戚之耶武帝於昆邪之降乃能因其故俗存其国号虽属朝廷而处之塞外内使降夷忘亡而得其驩心外可以扞御冠侮可谓策之善者也宜有文字纪其始末乃摭前事而为之书

汉武功赏官记

汉受天命一海内四方次第平独匈奴桀骜於北垂五尺之童不轻得息而烽火侯骑间至於京师世宗即位乃大遣卫霍诸将军出定襄云中鴈门高阙数年之间遂浮西河絶大幕走楼烦沙漠以北震讐而不敢惕息元朔六年天子以军士之大克获受爵赏而欲移卖者无所流徙乃置赏官名曰武功爵自造士而上级十七万凡直三十余万金所以显军功而宠战士诚良策也夫用兵上矣自昔观睽画以制弧矢而阪鹿之战已兴於【缺】之时虽戴天履地皆其赤子莫不荷戈効死犹子弟之卫其父兄然而不有刑赏以为之劝沮亦曷能尽蹈水火而无避哉夏有甘扈之役商周以征伐取天下而赏祖戮社始丁宁於誓命之间矣迨七雄争强淬刃相屠而赏罚之科亦益密汉乘秦制斩首赐爵累一二级以至於封侯而兵法後期若亡师者行失道者逗挠不前者必诛无赦虽列侯将军之尊【缺】法旋跬已下廷尉而削为士伍赎为庶人其罚可谓严矣至于丰勲伟绩乌可吝靳恩宠而常科之赏亦不足为之劝此世宗所以制武功之官而复俾军士之流徙也是宜士卒奋厉穷讨殊鬪争捐躯以死其敌至于排连单于域灭区单封胥山以临瀚海而汉南至无王庭【缺】

盘洲文集卷二十六

卷二十七

钦定四库全书

盘洲文集卷二十七

宋 洪适 撰

进卷一

观文殿大学士醴泉观使兼侍读除保平军节度使开府仪同三司江南东路安抚大使知建康府兼【缺】行宫留守制

门下奉琼阙以均休久赖谋猷之助佩麟符而居守有严节制之权睠中外之无殊宜宠光之特异乃峻斋坛之拜仍参宰轴之华协以刚辰孚於羣听具官某行高而德钜材全而器周尊所闻而高明养其气以刚大负博极羣书之学而抗之以识縕度越诸子之才而持之以谦蚤践禁涂越登揆路尽瘁事国苟公家之利无不为正色立朝以天下之重而自任备尝险阻蔚有名声恳辞笏相之劳勉循燕闲之请通班书殿嘉素志之甚高进读经筵顾远图之未究惟秣陵之沃壤乃今日之陪京襟带江淮控扼吴楚龙蟠虎踞列山川形势之雄箕张翼舒摠师旅屯营之衆付兹重寄得我宗臣荡节琯戈开茅津之钜镇袞衣绣黼视槐位之多仪用昭柱石之隆式畀藩维之重於戏赐旗鸾而刻命载加栒邑之章守管龠而擅名其企鄴侯之迹往凝报効奚俟训词

雄武军节度使利州路安抚使兼知兴元府除检校少保护国军节度使加食邑实封制

门下十国为连懋着价藩之绩九命作伯载陞帅阃之雄视亚保以参华肃元戎而增重肆加褒律庸谕治朝具官某谋蘊沉深资函刚果自策名而委贄惟竭节以忘家叩楫誓江志欲清於边陲援枹临敌勇常冠於戎行顷授钺於秦川俾总戎於蜀道屡腾捷奏夙振军容国土无双隐若长城之扞战功第一毅然锐将之风朝廷倚重以无虞夷狄畏威而遐遁宜加徽数用答鸿勲夏篆介圭联新粧於左棘琯戈鍼秘易要地於中条加衍爰田倍崇真食於戏授西讨之远略朕方有法於汉光奏北伐之肤公汝其聿追於南仲无使六月之雅独歌三代之时往究乃心以若子训

御史中丞除礼部尚书诰

勅中执法任耳目之寄所以弹纠士大夫使蹈忠信廉直之域大宗伯掌邦国之礼所以辨上下定名分而严堂陛之势分职虽殊而尊君肃臣其揆一也以尔具官某践履公正节操刚方久居宪台中立不倚绳击奸邪罔不震讐望实之茂隐然在人今春官阙长畴咨迹服无以易汝昔李勉劾悍将而唐室知朝廷之尊叔孙通制绵蕞而汉祖知皇帝之贵朕之所以命汝者

盖将创仪立制以隆主威而励臣节岂特钟鼓玉帛云乎哉往哉汝谐嗣有褒擢

给事中除翰林学士诏

勅禁罔持荷夙重从臣之选銮坡视草尤艰内相之求非直谅多闻不足以备咨詢非温厚尔雅不足以当论譔久虚此位今得伟方具官某智识通明器资宏博考其师友渐游夏之【缺】文章丽卿云之黼黻蚤徊

翔於迓列【缺】比擢夕郎浸更岁龠黄扉论事继批勅之高风青琐宣猷罄沃心之谏议朕当国步纷纭而多故欲王言鼓动於羣情扶杖老民思见汉文之德化流涕武卒感奋奉天之制书冀得若人以宣朕意金云汝可其代子言当使明纶耸四海九州之听庶几奥义追三盘五诰之文汝其勉之以永终誉

戒守令劝农诏

勅朕以寡昧获保宗庙遭时屯棘戎事未宁江浙荆淮之间疮痍犹未瘳也宿兵百万调度资粮非农无以给之重困吾民莫斯为甚而州县之吏劝劬不力末技游食背本趋末者尚衆惕然以思靡遑朝夕冀得良吏以宣德意故尝明诏大臣举任县令者亲擢郡守临轩劳遣道民之诏无岁无之比年以来吏偷弗慢视民事岁小不康则下有饥色道殣相望参其脂膏而莫之省忧岂朕之不德训之有未至耶抑吏狃故习不可遽革耶夫为人师帅而田野不辟桑麻不殖户口滋耗狱讼浸繁是师帅不贤而主德不宣也朕将何所赖为继自今其洗心涤虑恭尔有官乱尔有政毋以朕言为墙壁虚文则汝之职时亦有无穷之闻尚或勿念勿庸惟汝大弗克祗厥辟惟予汝辜朕言不再汝其听之

仲夏赐诸路恤刑诏

勅朕猥以眇躬嗣有丕业永念愚民之衆轻干文法之中虽画地为牢必使之无讼故吞舟之网宁失於不经情每轸於乡隅志欲期於按堵尽除苛禁已破觚而斲珣尚恐有司或吹毛而次骨适临中夏爰举旧章惟炎日之如焚在圜扉而良苦撻答火烈逮系株连或罹瘐死之悲殊损好生之德肆颁明诏申告庶邦惟唐虞之画衣冠民无犯者成康之空囹圄朕甚慕之尔其钦哉惟刑谨乃出令仰副哀矜之旨奉行寬大之书夫五刑之属三千非先王之得已而一岁之狱数万稽前训而可惩咨尔有僚咸体朕意

代宰臣以下谢进徽宗皇帝实録赐獎谕诏表

事録先朝甫逮一篇之奏宠形温诏蔚为三馆之光拜赐兢慚抚躬感幸【中谢】窃以徽宗皇帝席荣华之旦乘富有之基发政施仁必先鰥寡制礼作乐用文治平隆儒术以大兴省刑章而几措规恢宏远绵九闰以忧勤号令坦明垂百王之模范方竚苍梧之返俄成谷口之游将欲铺张日新之隼功形容天纵之盛德必得蹇蹇谔谔之士与迂董而比良庶几浑浑灏灏

之书追夏商而并驾中偶兵戈之厄荡然图策之亡采摭旧闻惟网罗之匪易搜裒遗籍极煨烬以兼收爰命有司共成大典臣等识乖五例用乏三长正次王而王次春未达发端之旨事系日而日系月粗殫纪日之劳方兹首帙之告成遽沐十行而称善荣冠翠綬之列恩踰华袞之褒自揆庸虚曷图称塞兹盖伏遇皇帝陛下昭思来孝邇骏有声诵尧之言深切羹墙之慕纂禹之绪欲光竹帛之传俾汗简以图终乃出纶而示劝臣等敢不佩服睿训紬寻帝谟絶笔可期敢自延於白首垂绅罔报誓将尽於赤心

代嗣大理国王修贡表

锡壤南交获嗣承於家绪拜章北阙敢?奉於国珍退惭不腆之仪仰瀆盖高之听【中谢】伏念臣九隆後裔六诏支流踰岭海以来宾绵汉唐而不絶永平怀远始开龙尾之疆天质疏恩爰锡马头之器会圣明之在御肇道德以遭容弗以遐遗许之内属幸藩方之世袭惟忠节以家传久习华风屡沾睿泽适际首祧之始谨修任土之诚恭惟皇帝陛下日月照临乾坤覆焘布深仁而旁暨耀神武以外扬风雨顺时知中国之有圣夷蛮効职闻盛德以皆臣仰睇前旒之蔽明愿削左袵而蒙化臣国小而偏道阻且长虽陪九译之重莫遂五原之款长安在望誓坚葵藿之倾楛矢虽微少致苹蘩之献晋征虜将军征讨大都督破苻坚露布

尚书兵部臣石等言臣闻师克在和故宣威而罔敌戎轻不整虽用衆以奚为徒夸涿野之强自取昆阳之败以寡致胜在昔罕闻恭惟皇帝陛下纘渡江一马之宏基宅御天六龙之宝位登庸贤德总揽威权乾符坤珍寢底金行之盛星珠月璧已臻玉烛之调蠹彼氏酋污吾帝阙嘯良家之恶少惑白虜之甘言狃代凉燕蜀之能扫巴汉幽并之聚独决乱华之断罔虞犯岁之殃固败是求不亡何待臣谨与冠军将军元辅国将军琰等祇承圣略躬履戎行暴衣露冠思狗国家之急锻甲摩劒誓清凶孽之尘三令而军法已明一鼓而人心共奋谓其束身而自遁乃敢怒臂以相持方虎踞於项城即蜂屯於洛涧遂遣【缺】以精卒前迈既馘梁成而逆俦始惊士卒莫不争先水陆由是继进君臣落胆皆疑草木於公山将帅协心已挫虎狼於肥水因设谋而遣使俾移阵以济师天诱其衷敌堕吾计俄主帅夷伤而大岫故部落殲没以无遗鹤唳风声讶王师之已至草行露宿瞻弃甲之相望虽已收尸而筑京尚阻漆头而为器臣等谬膺阃寄偶殄寇锋属强氏百六之秋遽为戎首致劲卒八千之衆有此武功折冲实本於庙谋助顺亦资於陰相奉觴汉殿愿歌明主之休挂旆天山行豁神州之境臣等无任庆快激切屏营之至谨差某官奉露布以闻

唐关内兵马副元帅复京师露布

尚书兵部臣子仪等言臣闻戎丑凭陵敢长驱而犯顺天威震耀果不阵以成功盖帝王羽卫之所临岂奸宄甲兵之可据未遑接刃皆已曳兵宗社将安幅员共快恭惟皇帝陛下聪明寛厚徽柔懿恭拔贤哲以当朝振纪纲而御宇治兵讨贼隆勲业於两京继体承祧奉烝尝於九庙蠹兹羌种雄于西陲人有兽心初不知於信誓首垂狐尾惟独喜于战争盖由中朝方幸於内宁故释远方以为之外惧乍臣乍叛屡残馘于华人弗虑弗图久逋逃於天讨荐兴兵革尽取河隍初螳聚于神州即鸱张於帝阙倚泾州之叛将敢肆奸谋迫邠郕之皇孙致奸大位上

天既已震怒率土皆欲分犁臣投闲方事於枕戈闻难即思於齿劒人惟求旧既复建於鼓旗国尔忘家即广裒於车骑缘兵权之既解集部曲以惟艰孤锋方顿於咸阳凶焰已临於渭水得张知节合军而少振屯上洛郡简兵以大蒐而星孛紫垣颺回赤县候四望之陋虽知蚕尾之无能留七盘之军政恐豚膺之尚捭遂遣长孙绪出蓝田而观势仍令第五琦摄京兆以偕行击鼓譟山若雷霆之方震张旗给敌虽草木以皆惊赖仲卿渡滻水以扬先声而王甫噪苑中以为内应酋豪落胆意大军之已来种聚奉头尽中宵而潜溃臣既出师以追丑类即入城而抚遗氓惟府库萧然一空独宫阙俨然如其故室家相庆牛酒争持幸皇祚之既宁喜官仪之复见貔貅远逐长狄行覩於揜戈雉兔既逃尸逐少稽於染血兹盖高穹之所眷佑列圣之所凭依成兹却敌之勲不俟交兵之力刻忠而着金石惭无汗马之劳清道以迎乘輿实切回銮之望臣无任庆快激切屏营之至谨差某官奉露布以闻

唐户部侍郎平原太守河北招讨采访使移清河诸郡讨安禄山檄

天宝十五载二月某日户部侍郎平原郡太守河北招讨采访使真卿移清河博平诸郡太守盖闻食土之毛既已莫非臣子儋人之爵毋宁坐视寇讐敢布心腹之辞共竭股肱之力我国家受天明命卜世过于商周享国百年致治追於文景高祖肇基大业太宗剪薙羣凶我皇帝厚德格於上天深仁被於绵宇而贼臣安禄山者犬羊余嗜蝼蚁饿俘荷三道之重权积十龄之异志忘推食解衣之德奋裂冠毁冕之谋鸣镝扬尘蹂北土万里之地长戈指阙亭太微五帝之庭僭拟乘輿污秽宫禁罄南山之竹书罪无穷决东海之波涤瑕不足神人共怒天地靡容真卿世受皇恩身膺郡寄誓捐躯而効死不与贼以俱生增陴浚隍为日已久蒐乘补卒固敌是求励平原之兵已多多而益办仰清河之粟更陈陈而相因英雄皆投石之才骁锐有成林之衆以此制敌何敌不摧以此攻城何城不克公等王侯华胄师帅重权方当此摇蜂毒以长驱岂不能闻鷄鸣而起舞宜各陈其师旅以共济於国家或搃其吭或断其臂或趋汲邳以溃其胷腹或徇河洛以鯁其喉牙帅兹西向之锋制其北走之路同济非常之业式隆再造之勲义士忠臣各協乃力皇天后土实佑此行毋怀恤纬之心致失投机之会

唐中书侍郎同中书门下平章事兼河南节度

采访处置使都统淮南诸军事某告浙东浙西淮南青州濠州救睢阳檄

至德二载八月某日中书侍郎同中书门下平章事兼河南节度采访处置使都统淮南诸军事告浙东节度使李君浙西节度使司空君淮南节度使高君青州节度使邓君濠州刺史间丘君夫夷凶靖难事实在於人臣救患分灾职莫先於侯伯方孤垒外当於剧盗宜近藩各举於助兵是兴纠合之言式济艰难之急惟国家升平之既久故干戈朽钝而不支羯奴攘臂以长驱甲士奉头而皆北狐鸣帝里鸱峙神州皇图如累卵之危大驾有蒙尘之役独张金吾拔雍丘之衆同许中丞守睢阳之城志在本朝誓粉身而糜骨气吞逆贼常嚼齿以穿龈而尹子琦将同罗之逆俦合杨朝宗收宁陵之余烬交战未尝虚日合围迨且经年独沮妖锋遂厖溃於梁宋能婴危堞获遮蔽于江淮虽奋羸起病以相持奈鞠顽裒凶而孔炽援师既絶无蚍蜉蚂蚁子之一来军食已穷至雀鼠马羣之皆罄惟是孤危之极在乎顷刻之间傥坚壁之不能遂

橫行而莫遏繫此一邦之勝敗實為諸道之安危唇既亡則齒必寒皮不存則毛安傳當軫恤
鄰之念咸堅報國之忠幕府無樽俎之奇謀玷機衡之重任寵分駢節建大將之鼓旗遠奉虎
符發精兵於郡國公等十連分閫千騎長人或專淮浙之權或佩青濠之寄想枕戈之久矣聞
傳檄而欣然要當奮同心舉功名之思母或懷全軀保妻子之計正同虞虢猶輔車之相依母
若越秦視肥瘠而不恤

盤洲文集卷二十七

卷二十八

钦定四库全书

盘洲文集卷二十八

宋 洪适 撰

进卷二

汉云台功臣记

汉世祖皇帝荷天人之符龙飞白水诛剪奸雄不数年而得天下虽高祖文景之遗德余烈在人未远而帝之庙谥雄断足以再造王家然锄耨夷荒非得爪牙股肱之助亦谁与共成丰功也哉究观斯时有若邓禹寇恂吴汉耿弇之徒凡二十有八人皆感会风云奋其智勇以成中兴之业伟绩鸿勲光被简册至显宗绍述追念先烈乃以永平三年图其象於南宫之云台又以王常李通窦融卓茂继之惟马援以椒房懿戚抑而不与以此知其选矣夫昔者明王之所以御其臣也欲其蹈危履艰竭节赴功必有劝之之道而不在乎高爵厚禄盖爵禄所及第能荣其身温其家而不足以激劝後人故刻名钟鼎纪绩旗常书之司勲藏在盟府所以褒勲显德莫不备至而使来者悦夫有功见知歆艳企慕思奋功名之会庆赏不加而人自知劝云台之举不惟崇德报功使其声明暴白於亿万世以示先朝得人之盛而彰夫佐命兴王皆间世伟人盖将使忠臣义士瞻其容貌而想其风采景仰荣耀愿踵後尘所以激英风而动义槩真得先王之要道矣台在兰台阿阁之间西汉之所筑云

唐筹边楼记

唐以兵革治天下而四夷莫不臣妾中叶抢攘吐蕃南诏侵犯疆场自韦皋帅蜀始生厉阶至杜元颖时遂长驱深入蹂躪千里继以郭钊病失事事南失姚协西亡维松由清溪下沫水而左鞠为盗区斯民惕息日有左衽椎结之虞太和四年赞皇公自兵部侍郎郑滑节度使来镇兹土坐席未煖慨然怀忧国制敌之心思俾一方之人仰父俯子而遂有生之乐乃卜胜垵鳩工建楼而以筹边揭之凡南道山川险要与南诏相入者图之左西道与吐蕃接者图之右部落之衆寡馈运之远迩纖悉曲折皆在目中登临筹度朝夕於是嘻赞皇之设心如此哉夫天下之事成於思而败於不能思善料敌者方无事时坐於帷幄优游夷愉从容谈笑乃能长虑却顾无顷刻食息不凝思於胷次敌之强弱诡诈率皆判然先知一旦机会适来则临事应变若印券契钥皆出素料彼虽变伪百出恃吾有以应之未尝一堕其计苟惟当其闲暇乐宴安而忽远图忘敌人之可惧恬然未始軫虑及机至变生则仓猝遽无所措其手足其为成败利害岂不较然明甚若赞皇公可谓知此矣兹楼既成仍召老於军旅习於边事者与之指画商订虽走卒蛮隶遇之亡间访以山川城邑道路险易广狭远近未踰月间皆若身涉敌之情伪尽皆知之故能玩诸股掌之上使残膏余馥拊舌顿喙不能一肆其毒卒之二边震惧南诏还

俘吐蕃归疆呜呼使阉寄者皆如赞皇之设心则甲兵之问焉得至於庙堂间哉

御书六韬兵法赞

臣切惟皇天厌五季之乱乃命太祖皇帝拯生灵涂炭而太宗皇帝以天锡神武佐右圣兄锄暴芟荒一驾而平潞再矢而克扬三揖而纳荆潭四指而得川蜀五征而戡定江南既践帝位南致闽粤数十州之地北俘并汾二十九年之寇薄海内外悉臣悉妾万几之下独以翰墨文章自娱虽插矢弣弓而居安之备亦不少弛雍熙四年召北面诸将田重进潘美崔翰及殿前刘延翰对於便殿访以御戎备边之策因取六韬兵法将有五才十过之说笔以赐之使之昭然识为将之术知勇知仁信忠之可以法而轻敌好利怯懦急缓之可以戒朝诵夕惟起居造次必思而践行之其所以训敕臣下之道可谓善矣臣以儒名家幸以文字待罪于朝其敢自以芜陋为词谨拜手稽首而赞之曰

皇矣艺祖 混一四方 於铎太宗

翊赞龙骧 五季鼎沸 虎踞蛟凭

旦粟我马 暮犁其庭 稂莠既薅

薄海臣妾 威憺遐荒 水栗陆讐

居安虑危 罔弛厥备 精拣虎士

防边宿卫 皇帝曰咨 咨尔重进

尔翰尔美 实司分阃 咨尔延翰

实长六军 访之边策 悸惧莫陈

帝谓六韬 圣贤所作 十过五才

为将要略 爰御翰墨 宠加锡赉

诸将稽首 荣此恩霈 圣人驭臣

诲之有道 良将戴君 强勉允蹈

欲教孙吴 徒有斯语 赐之汉纪

复非亲御 惟是奎画 超踰古昔

小臣赞扬 以诧千亿

汉麒麟阁名臣图赞

汉中宗皇帝承孝昭之绪中兴帝室左右前後莫非忠良之臣委质奋庸共凝隩功当是时大则枢机周密品式备具小则技巧工匠各精其能内则朝廷清明民俗阜安外则疆圉酋豪屈膝殿陛甘露三年上思股肱之美乃选其臣有功德而知名当世者十有一人题其官爵法其形貌於未央宫之麒麟阁于以传之无穷施之罔极使瞻仰之者励忠孝之节而激功名之心甚盛举也宜有宿学钜儒赞扬厥美而史氏无传谨追书之曰炎正七叶 天啓英主 受命中兴

毕张治具 虎啸风冽 龙兴云腾

巩固洪业 实惟股肱 宗臣霍侯

元勲鲜俦 定万世策 比迹伊周

富平温良 宿卫着名 番番龙雒

功埶灌婴 营平善谋 遂克先零

高平提衡 声闻赫然 博阳同心

衆职修理 建平寛裕 明法练事

阳成谨厚 表仪宗室 少府醞藉

进繇儒术 太傅堂堂 社稷之杰

属国精忠 北使犹劣 猗与异人

辈出昌代 峩峩华阁 以次图绘

黄霸于张 仰企後尘 山甫方召

并扬清芬 义士瞻想 奋发感厉

奸臣顾盼 胆落心悸 圣主贤臣

千载一时 泚笔作赞 表而出之

汉赤伏符颂

汉高皇帝以赤帝之子提干将斩蛇泽中实啓受命之符推之五行协于火德历二百十有四年而贼臣扛鼎天未厌汉乃命世祖再造王室更始三年诸将请登尊位而帝固避弗从先是天凤中帝尝至长安受尚书於庐江许子威至是而同舍生颍川疆华奉赤伏符以献诸将以为符命昭然万里合应不可久旷遂以其年之六月践祚高邑改元建武超拜王梁为大司空用?文也汉业复炎卜年二百而赤伏诚中兴之符宜有歌颂刻之金石以传不朽而史阙焉谨追书之曰

汉受天命 承尧之运 断蛇着符

龙飞沛郡 赤帟禽歇 朱旗举秦

协于火德 为天下君 祚厄中叶

鼎移贼臣 皇乾眷佑 复开真人

诞生济阳 赤光照室 嘉禾得名

龟兆告吉 吉梦维何 乘龙上天

王迹维何 火光赫然 佳气郁葱

伯阿所望 袞是灵贶 皆炎德祥

披剪荆棘 整齐乾坤 虓将拜手

请登至尊 有臣曰华 奉符来谗

惟我真王 名应图? 四七之际

火实主之 系隆我汉 非君而谁

爰即高邑 践阼建元 王室再造

如障狂澜 氛荡八紘 烽销四鄙

黔首更生 仰父俯子 猗欤赤符

实啓中兴 敢绍吉甫 作为颂声

唐神功破阵乐颂

唐受天命一海内四方次第平武德二年刘武周用宋金刚之谋连锋突厥拔介州杀石州刺史败裴寂入太原浸摇关中高祖太宗御之柏壁天戈所指莫不摧折明年遂平河东武周奔于虜爰即军中作破阵乐以志武功之盛及魏徵褚亮辈更制歌辞曰七德舞後更名曰神功破阵乐凡岁旦冬至大朝会则与九功舞同奏於戏唐以兵定天下而兹实武乐传之子孙以示王业所由而颂声阙焉敢为之辞曰

古帝命唐 正域四方 扫旧布新

长彗流光 乱结隋杪 奸雄纷扰

如虎凭山 如蛇当道 赫赫太宗

圣武神功 干将莫邪 畴克婴锋

薛犁其荒 郑隕其强 夏氏累俘

魏人纳降 邇矣武周 藉助凶俦

怒其萌牙 大阳是仇 乃鞠王师

驱熊率黑 天戈一指 颠踣流离

爰制乐章 蹈厉发扬 以志武德

子孙无忘 辞摛魏褚 七德命舞

裘褐惊哈 民观如堵 龙墀大朝

星拱羣僚 乐奏其间 上下和调

闻诸古昨 功成作乐 韶夏英茎

於昭景铄 唐室之兴 定乱以兵

兹乐之成 王业惟明 被之管弦

其辞弗传 作此颂焉 何千万年

两朝宝训序

臣尝读书见三代之时庙堂之间君臣相与戒敕训告罔不以遵祖训监先宪为言考诸行事盖实未尝弗率前王之典则禹啓少康之法夏之子孙实守之成汤三宗文武成康之法商周子孙实守之故其享国或四百年或六百年或八百年唐有天下传世二十文宗宣宗皆尝读太宗政要而慕之故太和之政号为清明而大中有贞观之风是无他故焉能遵其祖之法而已恭惟仁宗皇帝天纵圣德励精为政登用真儒屏殛奸邪纳鯁直劾农桑赏信罚明宫室池台无所兴作所御帷帘衾裯多以缁纯为之左衽辮髮鑢鋸之君梯山栈谷屈膝陛庭【缺】不覲介冑菽粟丰穰行旅彻粮叶气嘉瑞兆为太平四十二年之治季仲三代视汉之文景唐之贞观开元皆不足称继以英宗皇帝遵业治道浸以光大俗易风移黎民醇厚圣谟洋洋焕焉可述名山所藏太史所掌山林汗青之所编辑灏灏噩噩抗衡典谟迨神宗皇帝践阼之十五年诏儒臣林希采实录日历年月政纪起居注诸书自乾兴尽治平法天圣故事裒粹事迹以类撰次越明年四月书成来上凡七十有六门成二十卷名之曰两朝宝训所载岩廊之上切摩治道商确坟索之精语【缺】谨威福之善制畏天事神之道勤政爱民之方恭俭仁孝之德规摹制度之略辨察贞邪笃叙姻族与夫劝农兴财治兵御戎之术炳若日星事简而明有条不紊施之朝廷则可以正纪纲厚风俗施之闺门则可以飭人伦兴孝弟施之夷狄则可使怀仁慕义稽首称藩信不易之宏规万世之通典也臣窃惟五闰之际干戈日寻鑑视四海煽以虐焰黎民灼烂呼号吁辜我皇宋拱揖指麾为壶浆百姓请命于天丕降霖雨澡荡滌清人用休息皇乾眷命佑于神孙规重矩叠开辟以来书传所纪未之有也其制度纪纲之法後世有以凭藉扶持宝训之作足以垂之不朽与天地并臣才学浅昧不足以仰叙圣德之万一谨战汗再拜而书之卷端臣谨序

汉四种兵事叙

古者圣王之王天下也因天讨而制五刑甲兵弧矢所以诛暴而禁乱爰有熊氏修德振兵阪泉涿鹿之战破炎帝禽蚩尤而兵法遂兴自周之东五侯九伯日寻干戈陵夷至于战国出奇设伏变诈权譎之兵并作汉高祖皇帝以英武雄才翦羣雄而得天下【缺】

盘洲文集卷二十八

卷二十九

钦定四库全书

盘洲文集卷二十九

宋 洪适 撰

赋 铭 赞

偈 杂文

银条鱼赋

兹银条之小鱼实羣游於深水闯双目之如漆体洁白其无比絶肺肠与鳞腮信清莹之堪美盈一掬之十百唯铢两而已矣昔季鹰乘秋波之月明浮扁舟以半醉簇银丝於金盘曾不闻於用尔子陵当春瀬之涛澄垂长竿以香饵伟巨鬣以登来尔不闻於一至既不足以上严公之鈎又不足以箴张子之味唯醢瓠之是宜乃漉鬻之所弃我闻北溟之鷗其身大乎千里又闻东海之鲸吞长舟於寸晷彼何为而若斯尔何为而至是信天赋之差殊知人才之亦尔

恶蝇赋

伊虫族之至微独飞蝇为可恶閼类至之恶声扇朋来之弱羽方炎昼以赫曦拥火轮而停馭汗浹体其浆流邈清风之遐【缺】就枕簟之冰霜庶少逃於烈暑汝於此时廼纵党类或扑面以缘髯或循肱而集股扇屡拂以复来睫欲交而忽寤徒困顿以神疲寧周公之可遇此庠狄伏连所以杖扣閤人使无得暂入於庭户者也又若疥疔始生疮痍见苦才流溃以未乾正痂癩之小愈汝於此时羣来莫御俱逐臭以腥争穿裳而入袴吮膏血以自肥丛肌肤而交互徒手倦於驱除终无由而得去此王思所以拔三尺之利锋发冲冠而震怒者也彼令节与佳期正鼎来於亲故穷水陆之珍奇列果肴兮修脯染指方尝张颐未哺汝於此时往来旁午或沉溺於壶觴或循环於匕箸致嘉客之恶嫌委杯盘而不顾咸失色以辟飡岂玉山之可仆此武元衡所以举扇而力挥訝其来之何遽者也至於器皿牲肴瓶罍醉酒倘防守之不严或盖藏之少露汝於此时引朋召侣悉投隙以寻香窃羶芬而为蠹才旋踵以踰时已孳生之无数既丑类之满盈致所藏之臭腐此欧阳公所以切齿而疾憎遂援毫而成赋者也以至变乱黑白恣为点污无异谗人蒙惑明主毁正誉邪肆其疾妬排根燕公镌诋裴度拔仙客於河湟寘延龄於省部有如汉室之恭显有如唐朝之林甫此戎子驹支所以辨晋国之责辞赋周诗而借谕者也悲矣夫汝躯虽小汝害实巨汝量易足汝多难拒胡为营营欲何之以取嫉貽憎於率普我闻周公翊赞文武驱猛兽入深山跻烝黎於安堵设官属以成书垂後王之仪矩射鸟张庭氏之弓除虫击壶涿之鼓或掌覆天或职熏蠹虽蛙鼃之聒人亦洒灰而不恕何於汝而独遗岂眇末而不数寧分职之有亏抑编传之脱误我思古人必不汝弃呜呼若凤鸟之仪庭

与麒麟之郊舞常旷古以不来亘千龄而莫睹惟汝物之可憎乃羣飞而类聚信端士之间生
嗟壬人之塞路惟屈指於秋来鼓西风於寰宇纵汝类之夥多终飘零於何处

书架铭

朝而出宾案栉退於室簿书桎不有緗帙孰起装怀之疾

书板铭

孰圆非规孰方非矩木从绳匠可斧羌先生兮会稽楮嫫然来兮累三五孰能使之鵷其行而
鸿布有典则兮我作古君子检身兮视兹度

王君所居三铭

愚轩

山乌可移我志不辍佛乌可为我禅不灭用智蠹心巧不如拙

痴室

自痴莫知人痴孰治【平声】名室以痴其痴则非

丈庵

痴者见之之谓痴愚者见之之谓愚不痴不愚入丈庵而趑趄

龙兴寺钟铭

大云龙兴古招提钟豐弗考岁屡移云门九世守日师怱懇檀越欢喜随鳧氏范金侈弇宜六
时警发声法槌大地震动人天知剑轮息苦刀山隳功德无边不思议绍兴作之发配支青牛
御辰帝乘离显允方叔护法时

徐彦立琴铭

嗑息者鹿鹿踵息者神之谷有人焉妙乎吐纳而托诸可弦之木籁远则韵林流长则源深幽
幽而悒悒是之谓不穷之音

李宜仲见见堂铭

见乎小而不见乎大见乎外而不见乎内彼以为明我以为晦孰升此堂不求甚解

潜玉亭铭

郟石山在荆门之右百步泉发其麓南北异派相传其南出玉其北出珠故李卫公诗云明玕难秘彩美玉诂潜珍介泉有茅亭风侵日漏胡牀不可设因为更张题以新榜荆山盖结緑所产卞氏抱玉岩又在畱内则山之有玉较然着明矣崇寧年巨蚌夜游於北泉光彩四烛独南衆能潜珍不露也铭曰

玩西麓之甘泉汇津津之寒碧纷触石以喷珠非纖微之点滴湛澄清而莫滓无龟鱼与虾蛭閔朝昏之罌缶神龙蟠而兴泽行百里以成川亩一鍾而宜稷翠青嶂於中天以英瑶为山骨寧了然以求洁不愿为环玦意抱璞而深潜惧献者之遭刖彼卞子其太愚不如葵之有智苟博识之背驰曷不怀宝而逝三自粥以见珍抑未偿其灭趾信哉兹山之灵请埋光而铲采长借润於泉源惠我民於亿载

写真自赞

智不智愚不愚自见其臞而不见其腴外之臞人可以

模中之腴果何如虽然【缺】而不失则非吾徒【缺】
龙兴寺【缺】师为方广州写真求为之赞

魁然其容充然其中不形喜愠惟桐庐方公青油客散牋去其按坐维摩牀念珠一串以善铸凶昔盗今农虽使千佛出世所以化人则同

报庵十六尊者偈

绍兴丙子闰十月癸亥孤洪某等为先公尚书作十六尊者相稽首说偈

我等痛贯心归命诸尊者愿以大利益作我罔极报

弃猫文

洪子适武林馆黄氏逆旅屏烛未顷羣鼠纵横厥声万状及旦乃止主人有猫而不能捕因为文以弃之天赋羣物兮介毛鳞翼人所字养兮资其有益若马可以驰驱若牛可以垦殖犬有弭盗之功鸡有鸣晨之德鹄之传书鹰之摯击凡若此者故所以居人居而食人食彼鳬彘无所施其劳是以供人之烹炙惟兹猫焉捕鼠为职热则肆乎温凉寒或登於寢席鱼肉膏粱沃充其臆念此逆旅曷其多鼠乘夜伺昏羣游类聚方切切以穿墉俄累累而循户腾践裊裊反覆器具或啮我衣或食我黍鬪暴喧呼纵横党与余欲投而忌器余欲射而鲜弩抚几之不能

畏挥杖之不能去【上声】将谓主人有某某氏之风故使恶物得以集其羣侶因熟寝以终宵恣微虫之旁午旦召主人历诹其故主人告余有猫四五饲养弥年孱不能捕余谓主人来吾语汝汝岂不见夫国家之设官乎宠以高位畀以厚禄相图治於朝端将折冲於边服外台澄案於列城守令抚柔於萌俗负辞藻者跻翰墨之选厉威槩者列弹劾之属善心计则司货财明枉直则尸刑狱凡厥庶僚各庀其局一有旷瘝旋跬屏逐人尚如然况於微畜胡为汝猫乃蒙含育彼既不能咋喉而使之迹絶人不能游堂而使之安穴犹乞食以求餐敢张颐而伸舌非罢懦之弗堪殆尸素而饕餮今汝施无全衣室无全器以穿屋为常以盗肉为易致陰类之公行宜汝猫之获戾曷不投远地而迎善捕者代之则将杀鼠如丘而庶几安枕卧矣主人曰唯

竹奴文

洪子以畏日虐昼几案如炉乃下竹榻寘庭之隅设蕲簟与筠枕将追暑於须臾卧既久以不寐汗如浆而浹肤挥圆箑以腕脱咀坚冰而口呿榻枕簟之三子俄趋进以来俱同辞而言曰走之鼻祖宅於渭墟有地千亩富埒侯租钓月北海者傒英主而赴风云之会龙跃葛陂者委功名富贵而高蹈天衢逮後来之孙稚遂枝分而????居走家寒而族冷无绍介之吹嘘顾以凉德而猥叨亲近誓将尽节以箴夫台輿今君流汗四洽气鬱不舒走等乌敢緘举类之口而不告君以良图走族有竹氏夫人者性不热中形状魁梧悦受君之亲倚可来爽气之虚徐君诚召而用之彰鄙言之非谀洪子曰俞吾方思之已遣长须三子方退而竹氏至于洪子曰来竹氏汝以斧斤成质遇热见须凭肱据股纵意所如非有鹄巢之德采苹之职曷为而受夫人之呼人之称汝既以重诬汝辄披襟於汝安乎夫金烱有清明之鉴而疏彻侯之爵毛穎以翰墨之勲而掇中书之除汝非有功有德可与二君子为徒今黜汝之僭称而谓汝以竹奴盍安名而谨分顺主人之所驱无沮忤以舐望遂衔冤归憾於吾竹奴惶恐稽首而进曰抑何言与妾久惧弩下而负乘将乞骸以裁书辱开陈而是正庸廸陋以镌愚虽不敏而自忻得斯名之不虛敢矢言以怀怨甘受屏弃之诛

戒蛇文

丁巳漆月夜未一鼓水轮湛然遡青霄而上洪子步影户外闻有物丛草间其声渐逼少驻而视则蛇也余惊悸流汗趋避它径蛇知人之既远乃奋怒轩屈啗噬草木而去既归因以志之天产凶丑形軀不具蛇韬其足虎削其羽天胡然哉抑亦有故倘虎能飞使蛇善步其害於人乌可缕数惟尔毒蛇屈胁曲臂遂泽重山种滋品聚哀毒伺人巧噬迅取荐食善良甘饫胸府螫手断肱伤足去股苟或不然全体糜腐时及秋商其毒愈巨啗草咀柯涎流沫吐偶触死茎尚成疾痼門鬪倾郑台游衅鲁其见犹妖况或相遇不幸与逢必就死所吾虽【缺】罔思备豫月夕欣明披襟曳屨何期毒物潜窥暗覷包藏祸心乘我遵路褰鼻伸舌欲肆其怒天诱其衷吾觉而悟厥毒不行腾矫而去吾与汝蛇非有怨恶我不汝伤汝曷我妬惟汝凶孽不可开谕岂蜂蛰之能侔信豺狼之不如人闻汝名毛髮森举汝之害物诚出天付吾今芟吾之庭谨吾之户不处暗室不近积莽与汝殊途不见恐怖我母尔虞尔母我惧汝毒虽多又奚所措夫毛鳞害人侯鰐侯虎或遭斥於韩公或受诛於周处乌有鸩毒海南所赋虽衔毒以戕人终自

膏於斤斧豈造物之有私獨於蛇而容恕胡不聞叔敖殲汝而為一國相高帝斬汝而為萬乘主知天道之疾惡欲世人之去汝吾以空拳不能汝御後有挾刀樵青執柯老圃與汝相接謹無與忤彼肱一揮汝必僵仆汝能戒之人孰汝顧汝或不悛人必汝捕汝血沾襟汝身為脯嗚呼哀哉毋忽斯語

勸農文二首

今天子受命中興視民如子欲使躋富庶之域郡守勸農於春郊遵詔旨曰惟我南海之民或以商販而廢農或以盜掠而廢農其從事田疇者又苟且鹵莽故耕耘不以時荒蕪不加辟繼自今其子嚴父詔弟奉兄約各殫身力田以受西成之獲使風移強悍賣刀劍服畎畝則嶺表務本之俗與內郡齒不亦休哉古語云一夫不耕或受之飢豈有提封千里而可以滅裂穡事也嶺表之人厥性嫚墮而南海務末者尤衆故盈城負郭一皆仰食旁郡烏可恃以為常耶每歲仲春郡守奉行上令出郊勸氓延接父老犒以酒肉蓋欲丕變浮食興起農功以稱天子道民之意其更相告語勤四體以盡地力易荒瘠為膏沃則千箱之獲可以望也

記夢

丁酉七月二十四夜夢至一蕭寺羽人環坐其一高吟云六十方買妾七十猶生兒旁人掩口笑老子知不知予應聲答以一篇云桑榆景迫鬢毛蒼已過耆年去路忙不把精神陪綺席從他歌舞競鮮粧掃除萬事身如夢斷送一生心弗狂賴有清風與明月肯來相伴一爐香茗飲清話須臾而散

盤洲文集卷二十九

卷三十

钦定四库全书

盘洲文集卷三十

宋 洪适 撰

记一

分绣阁记

浙河以东曾冈峭岑盘深复陆出会稽道天姥百有余里财得夷旷之地十有五顷以为天台郡郡践山作郭而余麓及屹立崖石废不可庀者亦十一二故官寺民区鲜钜丽之所【缺】中【缺】州始有以员外置者侨宇城之巽隅距黄堂七百步而赢其职业之商谏僚类之谒请吏抱文书袂属器【缺】隘蹊间举不以为便迺徙幕曹之舍为今所居与二员相东西焉然规恢下窄荣【缺】埃墨无复高明显爽之观独东偏有地斗大丛榛委翳虺所潜前沿後仍指为弃壤则薳荆犖治培基建阁以夏四日课材阅月而斤斧论功其高四寻衡袤二十有七尺南北不及者九之一羣山萦环垂光献状故以分绣名推去冗牒登临领略则岩姿之西峙烟【缺】采之隐见每与意会举杯属客则琴歌奕思恢乎其有乐地阁之下对植美竹以清閤目其堂後穿小池可容萍藻则又为舞漪之亭或曰人在天渊间以百年为须臾况宦游弗常席甫煖而趣代今子来旬岁矣又如是而去何以兹阁为语之曰人能无以一生为寄则澡濯心胸期与前英联横能无以一官为不久则黽勉尽意必有以美其政予年少质下若乘鴈双鳬虽去来无重於邦人然吾身朝夕於斯抑欲自适其适耳

台州添差通判厅壁记

天台之为郡环山枕海壤僻民愿牒诉简少输调有常平时从容见谓无事故分曹授政絶赘冗者中兴以来

影纓之士【缺】率三四辈员外置者无郡邑不有绍兴二年是邦【缺】治中凡五易而某至被命迟期者後复【缺】则兹员之设将践武不废迺裒稗名氏官秩去来龔石壁间而系之言曰昔昌黎韩公尝谓邑丞贰令位偪而嫌文书视成一不敢省有公负复归尤焉曾主簿尉之不若丞於郡者亦然厥有不蹈其中菱【缺】事事慢民戚休贪残放手漫不孰何曰此太守职也吾何干夫是之谓负官否则铮铮表襮召权市威上下相高矛楯崖异吏不确其承民情不得直夫是之谓越位负其官越其位又不可然则奈何曰能使官不负位不越清其心以求其平视着令唯谨外是而议夫何知之有

耕获斋记

毘陵王德强宅於賈山有年矣一日扫其室拥书数千卷自娛其中命之曰耕获斋作书抵予为之记予曰有千金綺襦之子未胜衣而击钟鼎食旦歌夕饮目耽乎锦繡耳习乎丝竹擣菹棊博一瞬百万菽麦且未之辨况知稼穡艰难也哉则学耕文获之旨又何足以语之以儒名家而托庐饶旷之野火耘水耨鉏耰钱鏹之劳固饮【缺】之矣予尚奚言虽然百亩之田一夫荒之及计其积庾则或相倍蓰非腴确不同雨阳之私也繇其人力不力尔六经百氏之书五帝三王十有五代之史人得而诵之至於发为辞藻则浑雄遒丽飴馥芜近不翅天冠地履者亦问学之有浅深而已今子知所以名其居则知所以潜其心知潜其心则必有以美其身异时舒绅鸣佩而轩眉金门玉帀之上人目曰此王氏子德强也德强勉乎哉

?州重建教授厅记

国家立天下学校置教授即周师氏汉博士唐文学之职所以化民成俗传道受业者也然或以官冷吏责所不加嗜闲狃媮漫弗訾省官之设岂端使然哉今郡邑从事掾鸡三嚙率治冠理笏奔伺太守宾舍守出黄堂上谒者导之进乃倮而趋前屏气危坐以其职次起白请守借之色辞则舒舒自贺否则背芒股弁且受譙问惟郡教授泊然家居间一造詣坐上坐衆皆并庀罗出【缺】教授呼【缺】退各庀其局弄刀笔了钱谷狱讼之事林林综综终西未休教授乃对诸生泳周孔之道稽治忽商文章凡尘坌俗猥一不我浊礼之优职之清如此故咨择不归吏部归宰相?在江西为一都会旧有学泯於兵火阅数年始克像先圣先师而殿之斋房以列而校官侨处生师风马不接时胞人之共羞则连衽占位庠声序音不絶如綫永嘉薛君甫至疚然念之二千石其从兄也一日召匠虑材作崇阁以閤宸奎遂飭其余为廡於学之左门墙言言曰厅曰寝不诘不陋君乃啓便户日抵学庐合疑祛蔽不殆益奋朝廷嘉之再命使留其秋郡贡士二十有二人隶学者居什九邦人譁言薛先生诱掖成効如医起疾如卜断休咎各少长相励愿为薛门弟子君既久於官秀民长才益孚其教酌道廸德风变习俗遂之者义将辈出异时名章贡为多士之地者实基薛君

蛰寮记

子洪子囚故山累年葺一室地不丈阔自先秦古书壶史贝编稗官之丛说骚人之笔语匪然甲乙整籤繙帙味之有余乐间则擦几焚香手挥丝桐作文王宣父之操移轸易调声与心远蜷局螭屈而志翔云霞之上尝勸而假寐有羽人过我而问曰闻子久蛰一室良苦子知蛰之说乎鴈蛰於夏燕蛰於社蛇龟之属於冬狐鼠蛰於昼爵蛰於昏龙蛰於神麒麟凤凰蛰於王者之明圣合浦之珠蛰於吏之贪夏蛰者秋而宾冬蛰者春而灵乱而蛰者治则见贪而蛰者廉则出在天则月朝遇日而蛰雪遇暑而蛰雨以虹蛰露以霜蛰雷电与蛇龟之属同其蛰其不蛰也有光者愈赫有声者愈訇其於人也夏之衰伊尹以耕蛰周末兴吕望以渔蛰越已霸范蠡以扁舟蛰汉储定而四老蛰禄足而二疏蛰客星动而子陵蛰三径荒而渊明蛰使申商生成康之时其法蛰矣渊云生汉高之时其文蛰矣晁桑生於贞观其利蛰矣王魏生於天宝其諫蛰矣故六王毕而仪秦蛰其辩玉关闭而臧宫马武蛰其勇渔阳獬而太真蛰其色同光蚀而新磨蛰其技盖雷不蛰则灾龙不蛰则醢文士不蛰於西京之初则溺其冠利口不蛰於贞观諫舌不蛰於天宝则戮予曰僊之言蛰大矣仆冒宪拓落不能共亿其螟息啼号饥冻之

声闐如也同时朋侪耀华簪峨高轩滚滚於荣涂故姻连宗属亦姍笑相蔑仆於是退而潛焉
蛰吾耳则啼号之声不接蛰吾心则姍笑揶揄之事不竞蛰吾目则簪之华轩之高不覩也羽
人濫嘘子洪子遂寤绍兴庚申记

息庵记

蛰寮居士觀亲真阳州小而鄙无一略可人意闻浮屠氏有希赐者释其流竺贝所译南祖北
宗所传整整在胷抱尝鸣法於州之报恩今潜於洗口矣故道场之南有所构小庵门踵之洗
江来前汪洄迤折嘉山羣侍左盘右踞旁睨崇木清陰袭人为之踣蹐移时後一月丹下番禺

【缺】山椒有士人提一僧頽面敝衣方羊林下即之为谁曰希赐与之语始印所闻曰吾结
茅英山将老焉异日寂灭又将?焉名之曰息可乎居士曰师欲息其身如槁木者耶抑欲息其
心如死灰者耶将消摇放旷草衣木食以息其生耶抑端坐长往使门弟子鳩骸齏卵以息其
死耶如曰息身是身是幻如曰息心无心可息日月往来不能持久何以息其生风至叶脱水
静沕散虽以遗体饲飞走可也赐矍然起曰善哉庵後有石壁立吾将刻兹说居士曰庵可息
也石可刻也庵可毀也石可贺也

漱汀轩记

彭门郑茂老尉吉水得告逆妇见予於鄱阳夷谿有气概言绪绪可绎尝曰吉水之俗嗜争而
易杀人县郭束车航之湊凡四方近远行商逃征於公率遵捷岐觝夫摇心故穹林复谷獬为
盜藪乃敢横刃森挺与官军角抗而保比壤遂縣岁月除刑故朝家调尉参用武人恬於安未
以葺饰为怀吾嗣掌之十月渠吏受赇觉籍所居因徙而宇之开轩其旁贛江南下逢梗而声
风安浪夷洲沚献露鸥鳬鹭□潜泛相嬉方吏以牋退余霞弄川如潏锦纈吾涓杯独引不觉
径醉漱流啖甘则辅车湊然以醒诵东臯子之记哦少陵之诗不知微官之在捶楚中也轩受
名县大夫与其二三僚过之醖豆齿齿物约劝羸一辞言曰君饮多不乱无灌将军之骂阮步
兵之放张长史之狂谓轩如此岂欲实醉尉耶是夜去县百里贼举民财毀其庐斫主人之胫
或昵耳以告茂老起而入若将私焉着鞞佩刀?後闕上马从弓劒之士十辈抵刼处速炬得明
其一二未死者呻转烟 间犹能手其额曰官何来之速也遂口贼氏名尽得其根株窟穴伺
尉饮未逸且弗戒不意尉至悉仓忙就执主人既久不出客讯之家人用茂老计给以醉谢客
不疑相壽皆极醉翼日缚贼诣县具言状令惊且喜曰尉岂真醉也其後予自峽南归茂老觴
予轩中酒三行予勾彻主人命彻因索水饮研其余而书之以为漱汀轩记

知政桥记

聂都之山豫水出焉濫觴它山者又十余????皆北东入於章至贛城西偏两崖相束冲涛勇甚
兹为南北孔道熙寧间始造舟於河後五十有五年当建炎二年高阳公以图书遂直怀章作
藩方时用兵居位者逃乏兴之罪它不暇给航败板缺投步心惕公患之呼工师虑材竹灰钉
之属费直百三十万郡有舩官遂借木於场鬻朽贍用桥成令过者人输一钱持以二僧居半
岁尽偿所贷耀德颂美有童谣言更二十年水锯雨蚀桥益腐折公又来理于此城之东偏隔

贡水往来近远之人日以数千计橈舩待者鳞如也公曰是不籍无限而公擅津渡之入者乃筭其美积之名钱万者二百复撤桥而易之为舟三十有四布板甚良掖以朱栏治铁为鎖辮竹为缆极维繫之固其条修七寻有半广五之一为亭凡四桥之心曰卧虹其东岸曰利涉其西岸则临章左而双清右合而名之曰知政之桥役鹄踊鲸与波上下人畜重轻如由康庄年谷比登不识寇贼冠盖负贩愿出其涂攘攘乎憧憧乎未有稠於今者也是岁实绍兴二十年公猥授简予辞不获命乃直书颠末而缀以诗诗曰章水扬扬并山北注淫潦建瓴风赞其怒连舰为梁胚胎智虑视漏忽倾沦胥嵒窳能仁许公美必专之前功不弃今又改为泛泛文鷁随波高低戢翼俛啄虾鱼惊疑月影在川长虹对吸练霓霓裳水仙夜集惟昔盗起路为之棘俾贩不飭雍阒辙迹惟昔行人临流趑趄惧其一跌腹饱江鱼盗今以息桥今以固旁午如织一日几度俯首持筹手不能措来牛去马亦得安步繫公之政有利必兴心无川险砥道之平有如不信请视此桥用揭成绩附之童谣

通天岩记

自英州西南行十五里至石角头山自山麓二百步至山半有洞门冷风袭人虽半春晏温皆挟纊不数步即黑束緼?火始可入洞之左数石对峙曰菩萨曰金刚神晶彩荡目如沙中星振杖陟嶮奇诡迭露其平处可坐数十百人益深入石小破如盘盂见光却出直东又二百步始大明双窍穿豁垂蔓摇丝云在木叶间日影漏入乱石总总所谓通天岩也行前复持火过羣石外厥壤坦然循其石砢然有穴下之多龙田皆分脰眇如绾蛇盘蚪仰视如覆楼阁去人不远其平处复可坐数十百人撞之坎然如鼙鼓徙杖亦鸣意其下必更空洞其旁一穴类罅井不敢探地出碎乳槎牙散乱如?滓曰龙失践之棘趾穷高田有水一丘其下紫石壁有渠云春夏雍沮不可涉自水丘处窳甚隘仄以往列户如蜂房其顶结乳如珠纓如流苏如裂瓜如垂莲如肺肝四壁如旒上衣有纹摺凝於地者如神鬼形如幡幢如旌纛如帷帐如笋如枯木如禽兽如器物多不可名有冰柱短长小大不一有踊石博下锐上如壁遥视之如水即之饮不盈掬扞之如龙鳞旁曰输藏石皆棱然巧非追琢有罗汉小像可周以步有石燕逢火辄飞去其幽罅隐窳莫可穷测予书其石曰有天地即有此岩而生是州官是州与游子迁客曾无一言标榜之遂使名不挂人耳舌吁可叹哉同游者毘陵邵林宗新安董谋道予之叔光晦弟景徐报恩希赐师绍兴二十一年二月二十二日记

盘洲文集卷三十

<集部,别集类,南宋建炎至德佑,盘洲文集>

卷三十一

钦定四库全书

盘洲文集卷三十一

宋 洪适 撰

记二

碧落洞记

自通天岩南行六七里有洞曰碧落前後穹壁堵立剝中如虹桥有涧水从南来西折直贯而东广或倍寻或数丈深不及仞触石有声如鸣环如奏琴多石鱗鱼班班然白黑成文羣嬉若无人乳盖殊状垂光紺烂洗云茹日山含余滋水南一石高丈余其巔有蛻骨後人斲函以周之登其西崖可望两崖中断规往不克水北地平坦可陈几席咸植杖而休焉是日也气淑风柔长松老榕分影入怀心由境清埃壒自远茗退抵上流书杯浮之令曰得一字者酌一分衆皆离坐蟠石接杯第饮数多者则杂然以笑虽事未方古而欢亦自足洞口有蹲石具吻鼻曰蟾蜍惟肖外有穴名云华室烛而进可十许丈石中绽如户隙小窠在旁皆不可入昔有燔薪通天岩者烟自室中出唐周夔谓之到难予以省亲嗣岁再至则到殊不难也桑榆收照仆驾请回循涧东北行采甘菊香留舌本返顾猿鸟乐不汝如涉涧穿丛芦出松径不一舍到郡

城广州记

域民必以郭郭作室必以墙藩三尺童子且知之不足乎列也莒恃陋而城恶不治浹辰失其三都春秋书城二十有九或妨农或踰制谷梁子曰凡城之志皆讥也孙叔敖筑沂量功命曰不愆於素君子韪之盖天下之事宜为而不为则废未可为而为之则弊为可为於可为之时则利桐庐方公以奎文之直总戎南海明而恕威而不猛剗剔秕蠹日无逋事圉犴屡空枹鼓沈声郡有中城合东西而三其周十有九里自中兴洗兵典边者寝局弛柝弗以复隍游虑雉堞圯剥不縋而登灌木盘根上侵睥睨仍遭颶风闔閤顿仆重门夕不可闭越其闕若将压焉主钥吏无以谁何奸宄衆迭请公犹靳未议绍兴二十二年秋盗发章贡公既禡牙遣师曰城也时哉则增陴繕关躬行巡功铠甲弓刀廼敕廼砺盗果扫蚁穴南乡闯我五岭既攻大庾谍者知吾有备而官军且至遂解围宵遁公不以盗去彻警授规七邑属役赋丈料材访工官出奇羨纖介无斂斤斲墜涂弗扶自勉以明年正月克成闔以枚数者五十四井干烽櫓以楹计者二千四百三十有四木甃壮坚金革刚寿足以耐悠永藹石渠答以守之具靡阙山谷老穉始至近郊遥望辟易色然曰岂山移蜃吐耶徐而察之则丽譙曲敌一新於崇墉之颠也乃相与歌曰我有荆榛公薙翦之我有茅茨公安堵之輿梁既成如跣通逵提闕既作舟迁其危凡此巨防屋垣持持儵观厥成役不我知父我母我惧公之归抑又闻之熙宁年谏省程公初筑西郭外台闕然不息至内阁孙公葺三城於宣和中有旨漕臣同其画而时病其扰今是役也

毕而民惊之则材智方略瞻前岂不相万某既墨笔记其事窃谓李积镇并贤於长城惟公文武备足折遐冲於千里外虽不城可也然为可为於可为之时所以利後之人云

赋归亭记

南海伯方公抚封之二年因扞城余力葺亭於高墉之上叠巘前陈澄瀛旁立烟辟云舒境与心远旧目之曰【阙】居公以赋归易之或问朱买臣衣绣而夸归张季鹰以蓴鲈怀归陶元亮不能折腰而言归今公之名亭者何曰买臣憔悴长安徼幸郡绂大喜过望直欲骇邸吏骄故妻而已季鹰栖栖一王国掾事非其贤故寓物解印绶去我公自中都官三握使者节再秩二千石连牧二广幕府尊严僚佐将士走阶阼企光尘岂斗米而羈官者视朱子五十当贵才丘垤耳盖人方以笔橐期公而公谦不自满非逐逐然务禄者缘饰余闲登临徙倚北望中州有征夫前路之问想客星之钓台记诗翁之旧隐跃然动归欤於中公之心则然也唐郑权以秋官常伯抗节斯镇朝士赋诗祖之韵必以来字韩子序之曰欲其成政而来归疾也某之意云尔客曰然遂以书於石

师吴堂记

岭以南广为一都会大贾自占城真腊三佛齐閤婆涉海而至岁数十柁凡西南羣夷之珍犀象珠香流离之属禹不能名高不能计其俗逐锥刀顾利而背义其地去中州最远毁誉之实或不上闻弹冠者玩物夺志素丝之声损焉自饮泉石门丕变遐习表然与夷齐争光千载仰之如秋月冰壶闻其风靡不以四知自飭若宋广平卢奂李朝隐之伦咸有淳则皆尘其後矣先时广人鬻物於官率不得餽绍兴辛未桐庐方公以鹭序之旧自桂林移节来镇班录之初以尺板揭免行之令约官属授适市者於是敛手无犯公私不二价罢阅货之贿偿槁梅不以粤装遗子孙类皆方驾前躅政成多闲略旧址作新堂不取游观为名而以吴公为师可谓知所劝矣夫奕者必师秋射者必师羿治蒲必师子路治颍川必师韩延寿使治广而曰吾以子路延寿为师则迂矣虽吴无尊主兴邦之业见诸立朝然厉操律贪在广无出其右亦犹佩韦弦者各揅其失非若齐人知管晏而已前史载治广者必褒其清匪以循良明允之政为可略盖清於广为难也堂为屋五楹下临方池芙蓉藿薜间见竝蒂其西有亭曰缓带有斋曰舫其南有亭曰瑞莲其材得诸缮堞之余其役则黥其工则佣其费则官其经始以癸酉三月之丁未其成以五月之辛卯虽华不越制而雄爽靚深可以称连率之居而洗海滨之陋公敛惠浚岁百废具举令行於户庭之上而人乐其生於田野之间街谈巷语惟恐公一日舍之而去也今将回策帝城駸駸显列彰施蕴蓄兼善宇内後人思公而不可见来仰斯堂曰此方公之甘棠也皆当肃然汛扫必葺尚何翦拜之有

恕斋记

吾友桐庐方稚川端士也造其室左琴右书坐胡牀挥麈尾香鼎茶瓯相对所谈古今成败人物贤否文章高下而已终日达夜无禄利一语其於人非必辅君如臯伊传道如顔孟字民如黄韩行师如穰苴太公然後为至有一善则称不容口於文非必欲鼓吹五经黼黻河汉而为

工只字之妍无不击节故持甚高之论执春秋责备之法者闻稚川之言有惭德尝曰吾少也性褊且急凡应接指呼之际小不惬意则怫然於中如有物蒂芥不能茹也久之益不自乐因泮然悟曰天下事孰能尽如人意耶而吾一日间十不悦者八九为吾之方寸何约结如是遂法佩韦之戒名所居曰恕仰观俯思期於允蹈始时勉强矫揉徐而安行之以厚省躬以约待人诋娉相忤各以理遣昔者之愠今者之和为方寸者迺泰然以适有与吾道同志合者又推是而告语之子不可以无说予曰斯理明甚多辞则赘夫拔逐蝇之劔不如受污羹之衣览擗櫟之镜不如善遇溺灰之吏察渊中之鱼不如耗雀鼠之不问所谓一言可以终身行之者圣人岂欺我哉

痴拙堂记

上系统二十有五年悼诺仕者以了官事为痴履忠信为拙策士以问越明年恩平守清江傅公酌斯旨以目其堂属予为记予尝恨以子墨薄技由捷径躡取一第不得奉大对幸公之请一吐之盖作车欲其行陆剝舟欲其济川否则薪之可也梓人不知绳墨庖人不闲刀匕酒人不辨麴蘖则易之可也建官赋职岂使饫嫫息而谋田宅耶自典午世衰抱瓮捉麈煽浮虚之谈以偃蹇为高猖狂为达始有痴儿了官事之语夫亘地之广民编之夥使能者袖手不才者具员以饗禄事桻如丝矣十室必有忠信乃诋以为拙则挟私饰诈之风竞起散醇以浇夺慤以伪欲望艾安犹跛 而陟嵩岱也昔夫子尝为委吏矣尝为乘田矣亦必当其会计遂其牛羊不闻其有痴之说又曰言不忠信不可以行於州里不闻其有拙之说仕而不师夫子名教之罪人也公当中兴之初操汉节使不测之邻固已行其忠信不负乎官事矣今摄麾海濶能不鄙夷其远既自警又以激居位之士则仰公之堂怠者勉於力嚚者返於朴以副吾君忧治之意此春秋之法宜可褒也

爽堂记

真阳五峽之丑地也郡城不百许步才足周守居曾巨室垣墉之不若其民茨竹为屋人豕杂揉四壁不墁一室张灯则光浹比宇绍兴癸酉於是家君谪七年矣某再至亦四换卉衣初寓法林寺湿燠庳窄出门茅不见人四旁皆狐虺所穴瞿然惟盜之患今春始以四十万得冯氏故庐倚山作址繁木护其後家君枕疾既久足未良行居之即心开目明疾亦少间某絮剂之隙理策躋巘则放然有丘壑之趣失其身之在瘴雾中也面北有小堂昂首举踵眺天浹之来御亲輿以返遂谓之企归作亭於南倚牕寄意故以南寄标其顔其左有二离支高羸四?茂叶重重如盖南荒多暑休其下赫?不能迓西山横前烟除雨歇则遥岫密壁或立或奔怪奇绵延呈衙天巧於是立屋四楹曰爽堂有菊数本直篱之东诵悠然见山之句遐景若人轻去印组如脱屣则縲锁安能隄我治小轩以思陶为名登梁之日有文曰九夷欲居况在王略一日必葺少安老亲非虚语也

庆善桥记

中番城有湖曰澹浦大堤横絶属市西辅小堤湖判而三唐为放生池自刺史顔鲁公始我宋

景佑中文正范公名堤之桥曰庆善而屋之後百有七年尚书郎丹阳洪公揭使者节考故迹请於朝而俞居亡何桥与堤寢圯屋腐且偃又八年公佩州鱼既合左右契益严鱼盗之禁植以芙蓉幽?动物会浮图氏法照劝民财治堤照死惠才德满继之公忖恩以迄其成碯壁坚刚如履周道而桥而亭檐楹华好行人排肩知泳游乐沈竿续蔓交臂更心恩鰓盈物腾舞後先挈三牵两今昨祸去明珠双来絶意望报湖上有大兰若即晋王使君恢故庐旧祠其中公始等诸命祀凡禱赛必诣焉昔者渠以郑名城以光禄名里以高阳名亭以孟名皆因事有纪斯桥受名於百有七年之前而公之字已兆岂桥之葺廼待公而显耶公於书无所不读读必立训传资以饬吏决事并包四科洊临吾州岁满借一液枯耘弊谣匝於下今将更治广汉布颿而西不可再於是州民洪某抒輿人之情伐石笔事使具瞻扁榜召棠之思不替作诗曰湖纹缕缕相忘圉圉人见鱼乐兹桥之下车徒憧憧戾止融融鱼见人乐兹桥之中人不鱼贪鱼无人惊我公之政清淨艾寧帡幪芙蕖衣被菱藻彼河伯氏族衍以老击水涵云往从神龙变化甘霖长为年丰公多受祉鲐背儿齿匪柱匪梁孔甘斯棠

万卷堂记

同郡张伯寿学邃而根谈垒弥坚?古订今听者舌本为强下至黄老稗官丛琐之说滚滚不穷暇日踵其门升其堂则缙帙缥囊鳞贯栝比左右环列而以万卷名之使人如执热者之思濯清风弗造次忘乎心故粹於百余岁钜儒翼其道鸿笔鸣其文螭坳所纪金匱所书岚斋松牕之所纂削方杀青日纷月物好事者汲汲而求之终其身不能以尽致世之昧者侈金珠裘阡陌以为是润屋肥家之策闻韦贤语则曰若此其疎阔也间有垂籤骈架雅雅未触以市夸名钓虚誉亦百无一二伯寿简心端思他无嗜玩旁裒博访惟恐奥篇异牒之不我有手钞目校黄墨谨严漱其华而味其腴赜其要而骋其妍俗客鼎来未始尘滓斯堂也或曰张君兀兀兹久进未能取一第以施其志退无负郭之畴可以躬其耕书多奚为吾应之曰志於燕者不返旆於晋郊志於蜀者不弭楫於楚泽志於道者岂以世劳自荣为之言耶伯寿之心子何知伯寿名欲绍兴乙丑鄱阳洪某记

盘洲文集卷三十一

卷三十二

钦定四库全书

盘洲文集卷三十二

宋 洪适 撰

记三

荆门军守厅壁记

官守有壁记旧矣建旃者棠阴不翦去而闻达故瞻前而法则景慕之心生或咈民流毒则後之人指以为戒地无小不可阙也荆门领县二长林在唐尝为基州当阳亦为平州又为玉州无名人典城竹帛所弗载我宋开宝五年始立军壁凡百有二年而废废十五年而复复七十一年矣夫岂无贤否可为龟监访之光沈迹绝而残碑脱简与老吏所记仅得数十人名氏离离落落如晨星然不书又将湮灭若官称岁月不可得而悉也中兴初侨治四徙摄承者去来不常一切以便宜从事无律令之守暨再选武臣薶荆棘茨驱其狐狸虎狼然後人复见炊烟二十年间文吏踵相蹶者十一辈劳来休息户口岁岁增加解龟而往则一人持侍橐三人持节於蜀予弩下安敢望前数公盖所谓法则景慕之云尔

风月堂记

宣城子章子监新安郡之数月拔园葵作小堂竹以风鸣月在花下诵宋玉谢希逸之赋哦翰林公三千首之诗不捐一钱清景自致问名於鄱阳子洪子洪子方为痴儿了官事籍书横陈思虑不越凡格顾尝登高墉之堂临东偏之观左规黄山右迎紫阳峰峦层出应接不暇曾不办发一词以酬景物而尘埃迷人江山愁予介然亦莫吾答也今章子无一於是直欲挹浮丘许聂而友之清风佳月盖专飨独有可以骄穉子而千万非所能中鸿沟而东西之也持以名兹堂岂其不然若夫归云赴山丞掾且去凉飈徐来嫦娥顾影停栢揽结馐?长啸予将进胡牀於坐隅必有桓野王为公作三弄者

漪岚堂记

郡邑具员吏大小各名一职莫难县令其在郭内者又非支县比鸡初鸣入太守并刺史谒舍首下尻高次且啜嚅移晷乃得返编户民数十百辈堵墙戒石下盈纸撰牒以次俟判而去甲乙?於前伪辨蠹出黑白舛午佞胥壅遮铃左狙右笔与心谋如射隐覆地当孔道则宾客吏卒去来东西舟輿钱粟之请杂然寓公势人或掣吾肘百诺一否毁言即闻三四十年来又不得比曩时民曹计台符移如火县官之费伯什其政【阙】为乏兴骇而图之则民且伐鼓投匭而讼令之难如此痴儿尽日不能了簿领得俄顷退食气不暇吐无复对妻子理家事况有

山水清晖之乐乎浔阳为江湖一都会德化又州治所集县之难於是至南昌黄子余盖涪翁诸孙为之期年指顾成政提封百里无难之可图莞然笑曰吾亦有所休乎县故有堂曰漪岚在城西墉瓦缺楹腐旧令尹履声不至久子余始复与同伦逍遥其上吐吞湖山批风揖月以赋诗饮酒不足妨於事予昔为玉州遡江上寓目焉明年移歙东还乃邀我作记夫据胡牀弄麈尾剧谈清啸不知身之在壮哉县则子余优为之後之人乎有子余之才然後可以易其乐不然乐未遂而难已湊堂与人复胡越矣

徽州先达题名记

徽州先达题名二碑绍圣元年者太守岳阳黄公诰所立绍兴十一年者太守新安汪公藻所立前後刻画参差不齐因订正譌阙治他石旁行之始秩秩可观览学者堕蠹简中白首不暇释儒冠误之多矣名鴈塔者不百一又沈末班俱草木以腐不有标榜则後日何从知之碑之上或父子兄弟梯级相属璀璨如南箕北斗人望而仰後生有志之士摩挲石刻知名之不可以已退将益励其业则奋迅接踵端不终日以副贤父兄诱掖纵臾之心将於是乎在予十一世祖繇歙之黄村徙鄱之乐平两郡犬鸡相闻瓜芋桑柘之畛鱼鳞杂出昏姻来去巷南巷北如也然则徽人先达之志盖予所乐书者

资福院记

予少时归故乡朔日家塾得休则与羣从兄弟放步东阡北陌间抵洪源所谓资福院者了昇师实尸之方崇飭佛庙涂治像设它屋欹朽仅相支拄藩拔斲断榛莽未理後三十年予持使者节过家上冢复至兹山则向所经行蜕然大变檐楹前後丹雘相辉苍顏寿眉师之主山如故也师曰吾处此四十有二寒暑手植庭前之木可抱矣旁近皆儒家地境瘠耕之无所得居者伏腊或不足虽有事佛之心无多余之赢可以相沾勺我薰呬所获一钱不费缩衣节口寸增铢累视其腐者撤之阙者裨之漫漶者鲜之片瓦尺椽心营指画华殿高门以次改作吾徒食有厨寝有堂行有庑非一朝一夕之工也今老且死愿一言以垂後之人予叹息之曰自佛法入中土屡欲灭而复兴孰主张是而然耶国家禁僧不度二十有余载緇而锡者耗矣雄都壮邑钟鱼息响庐其居艺其地者比比有之斯宇在山林幽独之中游子屐齿所不及残僧一二辈不絕如綫老师不以教之将废勇猛精进顷刻必葺以迄於成既祝髮之门复开嗣之者得瞻仰栖息以化人趋善欲不记可乎院盖南唐保大二年蜀僧道真师所基云

得江楼记

江出岷山行万里至於宋方受浙引淮益大以肆冲激洄折过海门而东之潮生洲灭不见垠隄骇涛静练瞬息异状金焦二山屹然中立形势雄絶於是為最昔人謂長江當百萬之師而曰天隔南北得其險也至於轉漕得之則陳陳銜舳費減流馬浮家者得之則布帆千里朝發夕屆行商得之則輶載奇貨什一可逐騷人得之則可以導詞源助子墨漁者得而網罟耕者得而溉灌筭計見效隨其所得江固自若也予官寺占鐵瓮之西登墉以望巨浸橫前境與心遠有地數畝崑崙高下吏卒散處猶蜂房然會羽書不馳官事少閒徙茅茨去芑稂立屋其顛

以得江扁之右为供军之堂左为花信之亭堂言职亭言景也当沈迷钱谷之间神耗思滞揽镜自叹非复故吾伺隙一至如起宿痼如逃醉乡长川遥岑寄我清啸陰晴朝暮无时不胜岂直吞八九云梦而已顾瞻裴回以今监古考战争之陈迹愤侵陵之近事饮马之役春秋所必报予再书下考视?怀归天开风竞中流击楫後之人将於此乎观之

淮东总领石记序

绍兴初大参孟公开江淮荆浙都督府请用民部长貳居建康总领军需於是貳卿姚舜明以选行其後敌人来约和我师之在边城者皆敛而休於江之南分中都官置四总领京口建康武昌与蜀之利州其理所也京口盖山阳韩侯之师近岁又掌江陰所屯凡供军之物民部计其实下江浙数州水输陆送无虚旬督其稽逗劝其能明有刺举之权颇得淮盐所筭酒圻所榷以贍用月受诸军所作戎器藏之库岁收营田所获归之官招选士卒则甲乙呼辨涅之於庭下删汰老疾则集有秩者第功伐如铨注之法川蜀纲马至别其良弩则印之濒塞有互市则提其要凡关所隶者听其讼或边防军政不常之事则唯朝廷所命至於察虚伪谨出内抱公灭私则存乎其人其表牋谢庆之式大抵同外台以王人故序乎方伯部使者之上所谓报发军马文书或曰犹古之监军非也予短力弱材以毛锥子进金穀之事未之学也代匱於斯旬有八月当疆场未寧多垒增竈之际饟道所出远抵海泗而襁负东归解编北至者费益无艺乏兴满谪上印绶而去且有曰国家方整飭武备规恢再造之业他时廓清边尘归马偃革则是官可省矣吏无掌故文牒残阙前数人已不能纪惧後来之寢没没也乃撝次而志之石

盘洲记

出北郭左行一里所穿耕畴趋支径有弃地盈百亩延旷纡坦接西郭之衢厥形始銳如犁至其中浸广末则一弓不能及双溪掖岸泓渟湾洄风生文漪一眇无际芝泉之所通也岁极旱溉汲挠之不枯溪南则营山之麓去水十许丈限以芜城对之若高丘然山中寿松蛟奋龙举溪北有堤堤外田可二三顷芝岭耸其东牛首蹲其西林岫相续如步障两山之缺土湖所瀦余波薄堤下积潦骤涨混溪湖为一湖之外皆堆阜有深樾来车去甌以堤为岐我出吾山居见是中穹木披榛开道境与心契旬岁而後得之廼相嘉处创洗心之阁三川列岫争流层出啓牕卷帘景物至使人领略不暇两旁钜竹俨立斑者紫者方者人面者猫头者慈桂筍笛羣分派别厥轩以有竹名东偏堂曰双溪波间一壑於藏舟为宜作櫜斋於栏後泗滨怪石前後特起曰云叶曰啸风岩北践柳桥以蟠石为钓矶侧顿数椽下榻设胡牀为息偃寄傲之地假道可登舟曰西许絶水问农将营饭牛之亭於塋上导涧自古桑由兑桥济规山陰遗迹盘涧水剔九曲?以栟榈之屋垒石象山杯出岩下九突离坐杯来前而遇坎者浮罚爵方其左为鹅池圆其右为墨沼一咏亭临其中水由圆沼循除而西汇於方池两亭角立东既醉西可止改席再会则参用柳子序饮之法识其一寘籤於杯而反之随波并进人不可私迟顿却行後來者或居上殿者饮止而沈者亦饮当其时或并饮或累筹亲宾被酒童稚舞笑不知落霞飞鹭之相催也池水北流过薈卜涧又西注於北溪自一咏而东仓曰种秫之仓亭曰索笑之亭前有重门曰日涉背梅林夹曲水越竹阁甘橘三檠皆东嘉太末临汝武陵所徙又有营道庐陵之金甘上饶之绣橘赤城之脆橙厥亭橘友禁苑洛京安蕲歙之花广陵之芍药白有梅桐

玉茗素馨文官大笑末利水梔山矾聚仙安榴袞绣之球红有佛桑杜鹃頽桐丹桂木堇山茶
海棠月季葩重者石榴木堇色浅者海仙郁李黄有木犀棣棠蔷薇踟躕儿莺迎春蜀葵秋菊
紫有含笑玫瑰木兰凤薇瑞香为之魁两两相比芬馥鼎来卉则丽春翦金山丹水仙银灯玉
簪红蕉幽兰落地之锦麝香之萱既赤且白石竹鸡冠涌地幕天荼蘼金沙生意如鸞蝶影交
加厥亭花信林深雾暗花仙所集厥亭睡足栗得於宣黎得於松阳来禽得於顓於果品皆前
列厥亭林珍木瓜以为径桃李以为屏厥亭琼报西瓜有坡木鼈有棚葱薤姜芥土无旷者厥
亭灌园沃桑盈陌封植以补之厥亭茧瓮啓六枳关度碧鲜里傍柞林尽桃李蹊然後达於西
郊茭菴弥望充牣四泽烟树缘流帆檣下上类画手铺平远之景柳子所谓迤延野緑远混天
碧者故以野緑表其堂有轩居後曰隐雾九仞巍然嵐光排闥厥名豹岩陟其上则楚望之楼
厥轩巢云古梅鼎峙横枝却月厥台凌风右顾高柯昂霄蔽日下有竹亭曰驻屐蟪蛄洲接畛楼
观辉映无日不?棠棣之盟跨南溪有桥表之曰濠上游鱼千百人至不惊短【缺】

盘洲文集卷三十二

卷三十三

钦定四库全书

盘洲文集卷三十三

宋 洪适 撰

碑 小传

嘉济庙碑

州直东絶贡水再百举武翬然雷冈之上者曰嘉济庙入斋庐有古碑二其一唐宣宗八年进士杨知新所立题曰石固王碑其一吴杨溥九年节度使李德成所立题曰昭灵王之碑其传在汉初庙於崇福里灌婴过之神见於山至大中时民周谅被酒坠崖下贾符爽沿长汀舟覆咸得神以存相与立屋徙祠於此我宋嘉佑二年易故而新之图像宫庭革陋改作十万户乞灵尸其威休水旱致告应在漏刻异之尤者屡书於石於板於壁具在宣和年赐重封主上中兴诸神受纪诏以广泽崇惠显庆为今王庙得额则自大观始绍兴十九年鄱阳许公再为邦伯时江西荐饥人尽无依弄兵椎剽巢闽南两粤之界上村落居毗相聚保山泽赣江三百里櫂不昼鸣行陆者北達庐陵南踰岭方盱衡相贺其夏大旱公斋洗罄折祷祠下者三神私於公北魃赐雨高印浹洽槁稼苏醒岁以稔闻噪呼之羣乃自毁锋刃弃窟而室洗犷为和其明年复大穰方地千余里夕扉罢局米斗钱不满百治安之风如王始封嘉佑时公济明以勤郡无留事召大姓二十立庭下曰来邦人曰夏闵雨上下惴惴神不我答则民流於盜安得高枕而卧庙老矣不除风雨是饮其德也皆曰诺不然某何以生此心乎神欲壹有所出久矣时衆推心计闔敏者二人曰张銳曰郭文振命以纠帅辞不能乃分一番纸如其人之数书其二为正副字杂封之令曰得墨者职如书各取其一开之则得书者此二人也公喜曰神与心通岂由人哉衆皆喜即其日官助钱十万公又捐其私以倡出削牒为疏人人争施无一分纖嗇心二人具记木石瓦甃下至髹罽之物先以家财二百万分付十八人者皆奔走市买不踰月合凡所得又贏其半工佣有程不役以公不掊於私起八月癸丑阅二百有一旬有六日而毕墻屋密密画绘光明山增昔容林祉无【缺】城内外小大击鲜酺酒再拜庆成歌以迎神曰贡之水兮会章而下东有栩兮山凿罍企新宫兮夥颐神之为王沈沈者有酒如江兮在笋有牲如山兮乐侑以雅溪神之来兮肱欢亘野妥且娯兮沛风马已事又再拜为送神之歌曰醊神兮叩神捐口臚兮父母我民水不湔湔兮旱不憺焚我穡之好兮我粒之陈枹鼓卧兮蠡无屯馨赛具兮子又孙归福我公兮无垠予过而闻之窃谓?为盗渊非一日积怯吏视鱼肉喟呻犹越人瘠一不以寘怀猛者日寻干戈而乍伏乍啸莫得踪绪譬之毒草妖鸟不可胜去孰知吾许公弭盜自有神助乃尔耶案神能效异於灌将军则当先秦血食自古诸布诸严之属缀祝官者甚衆至汉或存或毁後人已不能名其神独神庇於远歆於远更数千百年介然有祠所凭久而灵其理宜也故申之以铭曰

石疑其氏以固为讳逢灌而传涉唐则迁新庙莫莫许公所作始佗臣汉有使无战灌定豫章至贛之乡规欲取粤恐坐专伐屑然有闻沥酒还军旧载南征失诬相仍继歌以诗用破羣疑

休宁县校官碑

学之名自帝有虞始涉夏子至周而选造棘寄之法大备稽之经传独鲁泮水郑乡校廛传犹未能免子衿之刺三代尚尔况後世乎汉兴诏令长择其民上属所二千石遣诣太常受业博士弟子员多至千人而名存实亡诸儒但黝门教授士之讲肄於学官者舍文翁之蜀亡称焉郡尚尔县可知也本朝大振文治更三四世而天下县始皆得立学盖党庠遂序之遗意然千室之邑间者阙然不谁何败屋数椽立先师像仅能行春秋祭菜事庠声序音泯如也新安领百里者六休宁最大宜有学而亦无以应令为见大夫者并肩立莫肯垂意肯垂意者又病力不足绍兴六年南兰陵陈公尉县实能以经术文章起人慕心凡邑秀民争北面讲席户内人满率坐户外後至或以无地莫能听则相与言曰师如是吾等不於学可乎乃度地於县南以差出钱为夏屋五十楹殿居中问答有堂退息有舍门庑庖湏榘井井口体百须无器不具基於次年春正月成於秋八月又斥其赢买书千余卷陈公日日来与诸生讲说自尧舜至孔子不脱口一经指画辄得翰墨畦径邑故应乡书士不半百自是常过八百人拔第於廷者踵相蹑休宁之人益以乡学为先务蚤夜弦诵洋洋啾啾有洙泗之风後二十有二年予为其州邑中彦鄞尉吴称道校官始末求书其事於石越数日贡士陈篆与其辈行九十有八人纷袍历阶请益坚予学无本原不足以增所闻提笔纪实殆不可固拒呜乎士之学者非以絺绘章句为梯禄利也修其身有以及诸人齐其家有以化於乡诸君以孝弟之道行於闺门读圣贤之书達则措之事业必有大过人者然後为一国之善士夫呻其占毕而行如市人吾党之耻也今编列民不知逊畔折券之说争锥刀之末以投鬴为能至不幸有沸鼎之谤诸君当以所闻於师者为其乡一洗之

盘洲老人小传

盘洲老人洪景伯名某初名造字温伯亦字景温饶州人高祖行第八妣章氏夫人曾祖考少保妣何氏纪国夫人祖考太师秦国公妣董氏秦国夫人考徽猷阁直学士兼直学士院赠太师魏国公諡忠宣妣沈氏魏国夫人洪族本居徽州唐末避乱徙乐平之东七十里曰岩前曰洪源凡百余家世世业耕桑高祖志操不羣力教二孙欲振起门户自岩前常以干至郡去郡四十里曰潞港舟过之爱其水朝山远可卜宅兆於是每归必以鱼盐遗主人雷氏岁久寢熟秋成则买谷百许斛分寄诸家尝置酒聚其族曰诚慙岁以谷相溷欲谋数丈地自作仓以贮可乎皆曰诺独一叟持不可或言叟性木强不可回惟妇言是畏因饵姬双缣姬譙其夫曰洪八翁往来吾里如骨肉求一片地奈何不与翁即呼人书券相授高祖疾革命家人曰葬我必於潞港仓下後世青紫当不絶後十六年当元丰乙丑伯祖给事中始以进士起家又三十年政和乙未忠宣公继之又二十七年绍兴壬戌某同元弟遵中博学宏词科後三年乙丑仲弟迈继之给事之後官者七今一人存忠宣之弟侄官者九今两人存子孙曾孙官者二十六今二十二人存皆高门泽也忠宣在南荒常叹曰秦氏置我死地曾祖潜德焘後褻章无因齎恨泉下矣某既点西府纳所当转官勾高祖恤典且奏臣下延恩虽极三世稽之故事亦有特貽

之伯叔父表兄弟者上惻然赐可诸公议以大夫告第会同列衔曩隙讽中书阎舍人安中为缴章谓人臣赠四世僭也某闻之即上疏乞寝前请且俟罪阎亦坐他事即谴斥差之毫厘不获伸先志而彰祖德初忠宣连仕浙部因寓秀州及持节使北某时年十三奉秦国归乡以俸入在秀州侍魏国以往凡九年魏国弃诸孤仲舅博士公使奉丧来无锡依外氏以葬时河南复为王土尝拟宰臣贺表以齐人归郛讙之田对宣王复文武之土舅氏爱其语谓某曰甥若加鞭不休词科不难取乃同二弟闭门习为之夜不安枕者余岁既试偶中选宰臣进读制词太上皇曰父在远其子能自立可与陞擢遂得敕令所删定官次年为正字忠宣南归即去国某以奉亲自列得通判台州甫终更英州之祸起台守撰弹文迎秦意秦喉言官上之坐免官又九年忠宣薨服阕知荆门军徽州提举浙西江东常平以户部郎总淮东军马钱粮符离甲申之役缘淮列戍襁负来归者袂相属供亿之费数倍左支右吾仅逃乏兴就迁司农少卿还朝以太常兼权直学士院又权礼部侍郎元弟罢同枢时相为某赭去天语令安职後三日与右正言尹穡宿直同赐对选德殿上谓穡曰洪某为人温粹文词有用论事皆可行褒獎至再三穡出惊叹曰圣眷乃如此言者知旨意於是无相撼心阅月迁中书舍人兼直学士院如故汤岐公策免闻侍御史晁公武喷有语相擊因奏乞身上曰前日公武云汤思退有罪而卿称之为大臣制词中无譴责一语乃其死党朕曰朕令作平词非其罪公武执弹章在手乞留榻後已却之且徙置户部矣敌骑嵌淮不退王师未解严某独当内外制兵事反覆书诏填委或一日屡易既寻盟首为贺生辰使上谓副介龙大渊曰前日洪某侍玉辂上见其容貌甚悴岂有声色之奉邪方欲大用之可往谕朕意令其自爱某答之曰家素无侍妾近以法服执绥车辂撼顿失其常度只尺天威有战栗之色所以顔状如是使还为翰林学士仍兼中书舍人辅臣奏自来无翰苑下兼西掖者上曰洪某在後省甚振职且要其整顿纲纪故事给舍缴駁施行者皆封付三省秦垞提举太平宫某奏秦桧欺天盗权戕害忠直当锢其子孙若一人奉祠则其党皆有弹冠之兴源不可开即时御笔依奏乃封付某明日召对上曰所论秦垞甚当异日有缴奏只批敕以来不须聯章虽朕意所向而不可行者但论之盈旬日乞免兼职上曰执政有阙朕今用卿遂金书枢密院上语二参政曰三省事与洪某商量早朝遂不先退东西府同班奏事自此始阅两月除参知政事中旨朱彦宗知婺州某执奏彦宗虽故翊善子娶长公主女家居婺州此命若出将骇物听遂改泰州四阅月拜尚书右仆射兼枢密使术士薛言中出入御史刘贡门下同贡子为人求官於枢密使汪明远事泄汪送之临安会奏事上誉贡能治钱塘寄囚事云适已擢为殿中侍御史某因白其过且言除书未启当封还上曰卿如此无隐向来宰执所无贡遂罢道人皇甫坦以方技进尝与右史陈天与同坐客舍典谒者导陈先入坦怒不同升厉声咄骂奋而来前探怀出一饼相遗某掷之地曰君诚有道者何不学吕洞宾韬光尘外而仆仆朝市正虽仙食非所须麾使出翼日某奏通国以神仙待皇甫坦不识圣意以为何如人上笑曰颇能布气治病尔昨日中宫赐以酒陛辞时已大醉言不伦所以如此某在位才百许日春多雨上迎天竺佛请霁天厨进素食某以调燮无状独章乞罢出上慰諭使安职諫议大夫林安宅侍御史王伯庠已乘间见攻上随事诋之安宅至居家待罪遂以观文殿学士提举外祠明日上谓参政叶子昂曰宰臣奉公守法纯诚不欺近年无如洪某者台諫搽索细故不存公道安得如此人而用之某尝指陈殿中御史张之纲之失上以谓敢理会台諫事独立无私终夕为之喜既而刘贡又去故言者相撼不遗力不数月除浙东安抚使林时在政地语人曰洪某若来奏事即避之俄而殁於筠某到越岁有半复奉祠时仲弟在西掖上曰观文在朝肯宣力林安宅怀奸不能容今以三请去姑从之有大藩阙即复用矣既归得

负郭荆棘之地百亩双溪夹岸列岫如屏障寻花问柳移徙封植风亭月观以次兴作杖屨逍
遥心忘其归天光委照察其浸润谤伤使得终老丘壑幸矣哉因葬莱妇效汉人立双阙缀小
传刻其上

盘洲文集卷三十三

卷三十四

钦定四库全书

盘洲文集卷三十四

宋 洪适 撰

序

天台山石桥诗集序

天台标登陆之胜而石桥又八百里中佳处世传荐茗有肖花之应异爵振其羽宝炬舒其光或遥望楼观夜出林杪隐然犹飞锡来往而闻锺磬声者浮图氏目之曰方广寺流俗洋谄以是为兹山之灵然而危磴凭虚狭不盈咫莓苔济以滑足不可并两涧相会下奔邃渊牛童马走以为过之者受祉其行险苟免则盱衡有矜色不幸一跌遂沦絶冥死且莫救侪伍汗芒赳赳不敢继乔木千章蔚前阜轶霄翳景不风而籁桥端限以立石樵苏无所从入其幽奥神秀异乎人间世者非开士道场而何至於奇怪有亡盖不足为石桥重轻也予通守是郡命车一来向所未信者固弗之见而环山十余里间茂林縹结无复鵙俦鸣匹则固有神物司护之者苍梧郡守桑君潜山旧矣间余治屐以遂宏览之适念夫词伯才子削方留壁差然如鳞杂然如蝟阅时绵永黜陟漫漶读者有轩首伸目之病而奇藻逸韵弗遑研谛也乃鸠剡聯次自李谪仙以下得若干篇披为三卷且将镌刻腾布使它壤名流辙迹所未暇者曲肱几席遂得石桥胜槩不亦便乎呜呼山川与天地等久而游观之辞无穷更数十百年复将充牣栋宇後之视今庶几有感而作

壺卹序

诗本二南以不妬忌为媿德史直笔以婉淑为良范易曰男女正天地之大义也呜呼士无贤不肖入朝见嫉女无美恶入宫见妬国有邪媚之臣则衰家有孽蛊之妇则替近世一二甲族以妬名家妇彝其姑母传其子诵言夸说以钳制其夫为能施施不自耻宗党先後一有驯柔则羣起以蚩之巧计以誑之日陶月移薰莸同臭昔虞通之作妬记二卷王绩补之事或踈逸由唐至於今未能彙见也间因学余掎挾羣编旁罗耳目所接得若干事披【上声】为十五卷以闺中之过莫先於此目之曰壺卹不直云妬记者微其文所以深贬之也或曰刘子政着列女传班孟坚而下咸踵焉今子不表其长而惟短之揭无乃非德者之言乎曰子政远摭三代迄於汉可赞者百十有六人两都四百年不刊者十有七人信乎有德而可范者鲜矣夫至贤不待书而然至恶不待书而变抑使中人之性知恶之不可蹈也惧後有汗青者不吾置则洗然知所新所谓挾凶魂於腐壤启懿行於将来士君子鉴之徒以资其颊舌而不能自儆又壺卹之罪人也孟子曰晋之乘楚之檇机鲁之春秋说者曰乘为君子之器所载皆美蹟檇机则惩恶之词兼之者为春秋是书其檇机之流坎客不能难

送王秀才序

天地山川英淑之气鍾而在人则为有德为有才为有功名其乖盪不平之气则奸险邪僻者得之至輿隶厮扈其去犬豕马牛一间尔而死生吉凶莫不前定於赋形之始彼漠漠而在上者初无私也易曰君子居易以俟命孔子曰不知命无以为君子古之所谓命者修己以期於天而已然顏子之夭盜跖之壽则天固有不可得而度者至唐李虛中始以人之初生岁月日時推其十母十二子相生相尅以逆知人之耆折贵贱休咎若脉之诊疾监之烛形了然洞见无毫厘差驾其说者日益滋而後之言命者始叛於古竟於进者耳大官显职则潏潏於顏间駑於利者则乐进藏繻多田之语学者得其术而不精守其说而不确肤引臆决以文其夸诞足佞之辞否是且不售於公卿大夫之门至使巧岐以干宦曲计以规财而尤悔踵之皆谈夫誅之之罪同郡王生玩心虛中之书於其行也序以箴之

郭子先字序

汝陰郭子先侍亲險领相过於真阳复相遇於番禺貌壮而气和即之粹然甚志於学曰吾父以知彰名我而以子先授曹輩相谓盍请其说予曰天下之事发於眇末而藏於不测明者洞於未然昧者已然而不悟夏者人知其为热冬者人知其为寒风雨日星人知其为风雨日星也夫能未风而知雨方炎而知凉则其於周身谋国之道可以无悔子先勉乎哉事之未彰子有以察之事之既彰子有以应之母宁使人谓乃翁为不知子

陈氏四子字序

揭阳陈修卿作吏广之清远相遇如雅识见其二子大儿八岁秀目大耳必能亢其家小儿七岁亦庄重不羣其二在孩乳曰陈水属也求以水名乃名之曰洙洙渭洄夫洙泗圣人之域弦歌之风莫盛焉高山仰止後学所企则字洙曰伯企射穿杨叶天下之絕艺也不知止则有弓拨矢钩之失黄鹄一飞冲天不知止则有垂翅之患遇坎能止其谁先之则字洙曰仲止液金於铜百鍊固在松栢混枫櫨之林岁寒而後判然君子守正特立不与小人俱化渭之清泾不能浊也则字渭曰叔正顺流而下一日千里习其易而厄其难一舟溯洄十夫努力少怠忽则咫尺不可上能践其难易将至焉则字洄曰季上

荆門集序

郡邑必有山水之胜词人登临垂着风什乃能发闻於时荆門之西泉出山下播为双窰南泉方五尺许膏渟乳积来不见状复行地中去亦叵测石崖有唐人留墨北泉即山剏洞混混清泚字以夏屋神龙所潜累巒如桥导之东出贮为修塘石底沸白散乱金莲碧草生焉双泉之阳别为方沼其源涌甚又股为曲水东穿潜玉亭入於塘塘西南有堤阨过石桥与曲水会地益下始淙琤有声复为南沼二沼皆有莲惊流溅沫束为曲涧然後吐为长溪旧曰蒙泉今曰惠泉其莲四时有花长簪而五出黄中而綠表其心紫其须黄其叶不凌水光可以监老柳百围有癭如蚝腾矫波上隤望犹龙然一壑之景於是胜前题後咏碑板相照絕阻水历当阳

抵玉泉则关氏血食之地有唐人诗钁木於崇宁刻石於政和辞未滿百兵革踰藉木石俱焚冥搜残编僅有存者因摩拂断裂芟翦補益地无藏书家裒粹不能备具图泉石之状於卷端使屐齿未及者可以想见梗槩铭记数十篇得诸煨烬之末弃之固可惜至於故将官讳寢以埃灭并贅左方以备荆門故事若舒公把麾於咸平年方伯氏在三馆故鹭序有宠行之句其间十数公为时闻人舒盖藉以不没绍兴戊辰王公来自贤关贈言祖道光焰頽然其首章则今丞相所作也一字之褒荣今陋古百有余年坚珉并峙公卿名氏星斗彪列使地有九鼎大吕之重足以张大斯文编之所宜先癸亥之秋予自道山归耕栖迟半世与田夫樵子为羣一旦起徒中佩印组所得同宗一逢掖之诗尔辄复青蝇附驥知我者当为解颐自郤盖无讥焉

大宋登科记序

国朝登科记自建隆庚申至绍兴之庚辰姓名登载者母慮二万三千六百人有畸为二十一卷後乎此者盖将亿万数而未止唐人所谓千佛名经良不足道先是吴兴学官有镂板混然不分卷第所纪但进士而已制举辞科颇泯没不传贡士又传着牋尾其他鱼鲁脱逸不可缕析或一榜至误百有余字览者不以为善某始放唐姚康所作科第錄凡以是进者毕书之采摭功令粗存因革其名冠礼部籍及仕至两地悉为表出大魁若异科则又识其乡於下进士自庆历後得其小錄始可考建炎以来蜀人以道梗且远不能造庭故中州漫不知其名氏今皆并列明经诸科国初取人甚衆史略其名莫能尽载武举非文事童子或偕计吏或賜帛罢故弗着既成刻於新安郡舍盖堂

重编唐登科记序

进士在唐最重公卿达官不以是仕者常愀然不满其外有宏辞明经诸科而制举之名多至八十有六於是有登科记等书艺文志着錄姚康崔氏李奕三家二十三卷会要载郑氏上宣宗者十三卷崇文总目有乐史修定者四十卷今多亡矣予家藏崔氏书正元中校书郎赵俔为之序大氏顓载进士续之者自元和方列制科讫周显德乃止又从毘陵钱绅氏得一编起武德尽大和颇兼制科而十遗五六予尝考会要续通典诸书补正之据唐人集增入策问及校中秘书亦得一编冠以赵序殆与旧所藏略同而序次又不相类盖後人损益俱非崔氏本书世所传雁塔题名进士存者鲜焉独长庆一年不阙以证诸本皆异唐去今不三百年以最重之事传数家之书而矛盾如此书果可尽信乎先忠宣公还自朔庭得昭文馆姚康书前五卷最为详尽而亡其十有一卷所载高祖太宗两朝进秀甲乙总二百六十三人证此本乃九人而已故今所辑一以姚氏为正天宝以後则以三本合为一至其後先乖次不可悉辨为十有五卷云

隶韵序

六艺去古浸远殆废矣冠昏丧祭家自为式宾主酬酢无可观之仪大宾客大祭祀亦屑屑唯掌故是听鞀磬祝敌闻者欲寐士之彻琴瑟匪曰有故桑弧蓬矢不设儒家以射为武事弃弗习輿轿以当车而执绥之容不复见持筹而计尚不知纵横之为什伯何二首六身之有礼乐

射御与数五者盖如此曰书之学虽存然好之不专业之不精未见卓然名世可与羲献欧阳虞顔柳齐驱者隶字传於今有光武中元年石刻元初以後法度渐整至熹平光和间亦极妙矣魏初稍变蚕头燕尾之体自能成一家历十数年气格日益卑下至晋而真行草竞起隶习遂絶唐韩择木蔡有邻以八分擅场而结体妩媚仅得孙根夏承之绪余尔篆古鍾鼎欵识皆已有韵独隶刻世所艰得後学提笔辄书增点减画变易偏旁漫不求是予家藏汉代庙中之碑幽室之铭墓门之阙与遗经断石凡百有九十二种惧难聚而易失也因辑以为韵与我同志者必有取焉

隶释序

秦燔书废古训而官狱多事乃令下杜人程邈作小篆而邈复献隶书所以施之徒隶趋简易也亦曰佐书汉魏之际蔡邕鍾繇梁鹄邯鄲淳俱有书名後魏郗道元注水经汉碑之并用者始见其书盖数十百年陵迁谷变火焚风剥至宣和政和间已亡其什八本朝欧阳公赵明诚好藏金石刻汉隶之着録者欧阳氏七十五卷赵氏多欧阳九十三卷而阙其六自中原厄於兵南北壤断遗刻耗矣予三十年访求尚阙赵録四之一而近岁新出者亦三十余赵盖未见也既法其字为之韵复辨其文为之释使学隶者藉书以读碑则历历在目而咀味菁华亦翰墨之一助唯老子张公神道费凤三数碑有撰人名氏若华山亭为卫觐之文见於它说者财一二尔其文或险而难解澁而太凿者譬之纪甗郛鼎皆三代厯存之器其剥缺不成章与魏初之文数篇附於後如断圭残璧亦可宝自刘熹贾逵已下字画不足取者皆不着

盘洲文集卷三十四

卷三十五

钦定四库全书

盘洲文集卷三十五

宋 洪适 撰

表一

谢赐先臣謚忠宣表

伏蒙圣恩以臣弟左朝散郎守起居舍人臣遵有请特赐先父徽猷阁直学士左朝散大夫臣某謚忠宣者先臣衔使不忘徇国之忠同产抗章仰拜易名之宠哀荣终始感涕纵横臣【中谢】窃以六家所以成书断自周公而下三品然後节惠详夫唐世以来褒贬咸决於君前善恶不诬於身後非有杰出之迹安得殊常之荣伏念先臣当鸣镝之败盟以单车而修好闻诸夫子不辱命於四方执我行人甘茹毛於穷海艰难备矣操守确然数其乱华之讐折彼取蜀之问及上介污边庭之禄之死靡他至同伦易汉节之官没身不屈屡临白刃弗变南冠至於间道以奏佑陵冒禁而朝太后秘计屡通於系帛危机尝困於画牢流涕冷山七八月而见雪操持秃节十五载而入罍蒙神圣之简知值权邪之毁隔远投裔土莫驻颓龄幸逢琴瑟之更张遂致丝纶之洊出赐之嘉謚卓尔异恩着甲令以显褒達丁年之善闻诸孤不肖益殫戴舜之诚幽壤有知必效亢回之报兹盖伏遇皇帝陛下躬行仁政心念功臣谓匡衡之排妒陈汤皆其私怒而忠州之谴逐陆贄恨不生还隆曲泽以饰终示清朝之彰善事光存没风劝迓遐使忠贯日月之称在德蘊丘园之上臣谬居冢嫡获奉烝尝扫地焚黄丕变松楸之色瞻天上牒不胜狗马之心臣无任

代程枢贺南郊礼成表

清跸就阳得卜郊之刚日泰坛拜祝竣类帝之明禋凡在式围率同击壤【中谢】恭惟皇帝陛下补天兴业貳地宅尊偃武修文不?马上之治制礼作乐有考鹿中之祠炳膺萧以揭?涤蚩栗而备物云门存古先之舞芝房奏新作之歌駢驹鸾路之弗为风马羽旄而来下欢该四表厘逆三神云非雾以祥开月从星而光烛降年有永等皇佑明堂之诗迎日之长推有熊宝鼎之筴乃漏泉而丰泽俾画地之?刑简策特书国家缙典臣退居故里阻望属车侍祠者数百人遐想汉仪之盛上壽曰千万岁空驰虎拜之诚

代程枢密贺车驾幸秘书省表

虎观鼎新复仰木天之壮蛻旌顺动有光金匱之藏事藏崇朝礼超前代【中谢】臣闻编珠拱极宪东璧之经星羣玉名山峙西崑之策府惟兴国再临於大驾逮佑陵愈贲於上仪元元

本本而宏達為羣巍巍煌煌乎卓絕之迹於赫右文之旦聿恢下武之聲定員雖酌於瀛州它直尚僑於蘭若乃更爽塏肇建洪規揭寶墨於璇題帝中第一鴻瓊材於芸閣天下無雙親屈至尊武昭丕訓瞻八世宸毫之秘玩三王彝器之存褚得肉歐得骨虞得筋克兼衆妙夏之璉商之瑚周之簋仍獲余珍坐使清流頓增榮觀恭惟皇帝陛下道隆息馬功濟興龍煥乎其有文章皇風載翹舉而措之事業治具畢張闡葱蒨於一時暢醇醲於四表先聖後聖大書特書臣辱在奉祠莫遑陪乘傳置郵之命幸此道之益高觀泰階之平與斯民而胥慶

代人起居太母回銮表

聖主樂天復交懽於北境皇輿旋軫爰就養於東朝遠涉修途言歸華闕極一人之喜豫罄萬宇以懽呼【中謝】恭惟皇太后殿下道配坤元教形壺則邁徽音於任姒追淑范於城?彤史揚休久娛京而贊治赤光協吉遂毓聖以開祥自玉輅之時巡奉褱衣而遐適荐縣歲龠越在鄰邦蓋聖人之德能通於神明而天子之孝克安於社稷皇乾眷命副九重長樂之思敵國行成修萬世甘泉之好戒皇華而驂乘備法駕以回銮正位慈寧遂即含飴之樂賦詩城?敢辭舍肉之言臣等獲際昌期叨居輔郡傾心鳳闕幸修清道之儀矯首龍庭恨阻奉觴之列

代宰臣進六曹寺監軍務通用法表

六官分職綜甲令以惟繁三尺裁書幸終篇而甫奏仰塵聽覽采積兢惶【中謝】竊以帝奠九纏必有規摹之遠法垂一代寧無前後之殊歲時既閱於推移可否滋多於因革惟是文昌之要尤為政事之原上系朝廷倡紀綱於九牧俯聯監寺列筦庫之羣司儻無一定之文孰究兩端之弊中罹兵革浸紊簡書舉其宏綱未免口傳之異視諸故府莫稽臆決之非懋建丕彝允歸華旦恭惟皇帝陛下循堯治道廣文伐功上下相安品式已臻於備具國家閑暇政刑宜底於修明綏大觀之遺編作中興之寶訓蓋琴瑟不調之甚必解而張俾江河所犯之難不胶者卓部居有要凡目咸陳臣等獲預編摩久綿夙夜因時立制媿無山甫將明之材合古便今庶几蕭何畫一之法

代張建康謝賜御制孔子七十二賢像贊表

細旃儲思述闕里之聖賢鴻筆垂光賁琅函於郡國濯冠拜祝紆袂增榮竊以隆穎修肱仰素王之奇表攀鱗附翼萃儲國之异能播高躅於誦弦存寃言於竹帛孰謂千齡之後獲逢萬乘之知云漢為章像圖孔肖蜀都繪壁初無當寧之褒唐帝摘辭不及升堂之列在古未見惟聖乃能【中賀】恭惟皇帝陛下舞羽修文解弦更化想象環於往日崇木鐸之芳風玉振金聲發揮洙泗之美銀鈎鐵畫度越羲獻之前加寵校官匪頒寶軸臣猥司留钥恭觀宸奎七十子之肖仲尼悉經題品二千石不如逢掖共慶瞻儀

代賀冬至表六

北宮擊磬庸知樂律之諧南至書云益見豐年之象五緯相叶萬物昭蘇【中賀】恭惟皇帝

陛下受命中兴济身大业圣人以天下为度同此疆彼界之仁斯民觀泰阶之平享右粥左餐之乐当以舒之化景迎滋至之天休臣叨廩祠官养痾里社振纓綏而接武莫陪上壽之班贡履袜而献诗愿纳践长之庆

畴人课密当五年再闰之期秘殿迎长上万岁三呼之壽【中贺】恭惟皇帝陛下得天之纪与时偕行无徧覆包涵之殊以生育长养为事迹遐安集美宣王之中兴廊庙荣华贤周公而大治臣衰迟多病叨窃丛祠莫陪鹄鹭之班徒深犬马之恋

闔门候景兹审律於听工登台望云遂紬书於往史【中贺】恭惟皇帝陛下聪明稽古慈俭保民能用真儒开八荒之壽域备成熙事变六乐於圆丘式践升辰函蒙丕祉臣夙叨华缀久退私闕空怀颂履之诚莫预奉觴之庆闔门以候景至式符巧历之占御殿以听乐均爰始黄鍾之奏迎玉琯一阳之复合嵩山万岁之呼【中贺】恭惟皇帝陛下业济化龙勋优息马时则有若伊尹克咸同德之休王者莫高周文更广好生之治升辰甫及景福来臻臣假守海邦遥瞻天阙践长有庆愿赓履袜之诗上壽多仪莫缀簪绅之列

气和玉烛当芸荔之应期日永金铺仰槐枫之留景斯名亚岁共祝万年【中贺】恭惟皇帝陛下光启宏图力行柔道寂尔干戈之偃粲然俎豆之陈上猎三灵之流嘉祥屡获外连四海为带比屋可封逢圣世之荣怀觉皇初之趣起咸弛善颂式赞升辰臣叨领州麾遥瞻帝阙倾心葵藿已迎化国之舒矫首鹄銮莫覩壽觴之举击鼓撞鍾庆君臣之道得献履贡袜迎天地之气和斯为衍万之元仰庆呼三之颂【中贺】恭惟皇帝陛下兆谋一旅式命九围极兵寝刑错之功洽喙息跂行之德效珍未尝虚月垂穎屡以逢年惜大禹之寸陰践长则喜受有熊之神策介福无疆臣叨畀左符莫参上笏荔芸协序共知玉烛之调葵藿倾心遐想金觴之举

代贺正旦表四

夏正三朝举晋氏虎尊之礼春王一统布周人象魏之章玉烛惟和炎精有焕【中贺】恭惟皇帝陛下勲兼在昔治致升平七十曰耄六十曰耆击壤见斯民之乐四百里粟五百里米均田知我后之仁穀旦是临椒花可颂臣奉祠里社聯职殿庑重坐说经身远侍中之席九行上壽心倾御史之觴

正月之吉始和治布周官之象千岁可坐而致礼称汉殿之觴【中贺】恭惟皇帝陛下仁行如春德盛在木彪列上阶之色蠅蝓左个之居去杀胜残踰一星而治定植僵兴仆光九叶以基隆时也求端天其锡嘏臣滥官南海遥拱北辰目见耳闻益谨朝宗之训手舞足蹈莫陪上壽之班

汉殿陈仪乐正奏黄龙之戏晋庭制礼直臣开白虎之尊惟上圣之履端宜百神之胙德【中贺】恭惟皇帝陛下指麾戡乱目见迓衡恢复古之皇纲得用儒之治效握枢秉籙尊居螭黄之中越契踰?何取鸿荒之际受縣区之图籍来殊徼之梯航三之目以是临万斯年而有永臣滥分鱼契阻望鹄行上壽献觴莫赞移葭之庆驰心存阙第深倾藿之诚

青逵外震直逢岁纪之端翠幄熅香咸仰朝仪之黼散皇风而隤岭洽欢诵以呼嵩【中贺】恭惟皇帝陛下业类补天思勤贰地总神明之贶佑成道德之安强有并柯共穗以屡书闻狗吠鸡鸣之旁逵跻三皇而轶五帝懿铄宣昭烛六合而耀八紘辉光充塞凡式围而鼓腹俱击壤以驰心谷旦甫临椒花敢颂臣滥叨器使屡焕斗杓如北辰而拱星深存华阙倾东海以为酒阻献羽觞

代贺元会表

正上下之则讲元会以尊王见天地之情庆人正之协纪礼超绵蕞光载简书【中贺】恭惟皇帝陛下化广人文治臻儒效戴青旗於左个式对颐辰下雕辇於东朝荐行缙典萃诸道计偕之士肃殊邻使命之班法酒序陈瑞章前列百神森从疑风马之裴回九宾胪传伟云龙之璀璨君臣相悦皇帝知尊臣名缀丛祠身居旧里张钧天之九奏遐想祗容环嵩岳之三呼莫陪大庆

代天中节贺表二

日永以正夏气和薰律之中天命而生商业系蓂图之固极华夷而拚蹈洽草木以光荣【中贺】恭惟皇帝陛下身济中兴人逢上治以息兵之神武得享国之长年佳气葱葱已信伯阿之望卿云旦旦载赓帝舜之歌臣恨守鱼符莫瞻龙表以九为节想汉觞谒者之仪则百斯男申尧壤封人之祝

皇乾眷而炎德辉诞开兴运里社鸣而圣人出尽括珍符共坚戴舜之心遥贡祝尧之请【中贺】恭惟皇帝陛下艰难系统慈俭保邦迈三代之英风补百王之漏典竹宫展采仰华星皎月之祥金匱奏篇集甘露华光之事天锡无疆之祉人均有截之欢臣叨守边城获逢诞节觴称万寿知嵩岳之三呼花覆千官想钧天之九奏

代天申节贡银状

降年有永崇万寿以无疆物土之宜罄四方而来贺退惟不腆敢渎盖高前件物朱提之珍番禺所凑地不爱宝参厥包厥筐之输天其用休荐如阜如冈之祉

代谢赐历日表二

课清台之历双璧五珠赐方国之书十行一札凡居临照得以奉行【中谢】臣闻兼天大地大而作王考旦中昏中而布政惟统元妙一行之数斯具注示万年之符恭惟皇帝陛下圣克宪章效隆调一羲宅南而和宅朔法帝尧之授人时赵举春而倪举秋纳魏相之陈月令冒海隅之出日靡天下以向风臣敢不仰体爱民深思率职周旋以守弗坠凤司之颁析隩有经式安龙户之旧三统一元仰清台之课密五年再闰协左氏之窥余中出穗书远沾竹使【中谢】臣闻作雄鸣雌鸣之律历法遂萌建南正北正之官畴人有述亶惟昭代高出旧章恭惟皇

帝陛下侔德商周措时夏子居域中之大以天下为家三阶平而风雨时不爽玕衡之政五星
聯而日月合有开珠璧之祥臣敢不恭体授时深思奉职左旋右转既天道之可知东作西成
幸农祥之不爽

盘洲文集卷三十五

卷三十六

钦定四库全书

盘洲文集卷三十六

宋 洪适 撰

表二

代张提举谢立祖庙表【额曰旌忠】

真主念功必赐鼎铭之美大门?节遂膺庙食之褒风动迹遐感均存没【中谢】伏以辽东奉祭彤之祭匪出九重章武立田氏之碑但循甲令黜圣世旌忠之典酌礼家勤事之文国有条章人知砥砺伏念臣先祖具官臣某蚤因文翰服在周行尝荷橐於宣和继剖符於南邓朔边烽举分四道以勤王赤县飏回无寸兵之傅堞身独婴於白刃血屡染於左轮会廷臣请存赵而不谐故敌国俾秣燕而远去遽传长毕不见中兴藏黄石於异乡已多丘木嗣蓼莪之宗器未实沚毛方诸父之拜章自上天而降札建其闕宇锡以嘉名尸亡裹革之还石有丽牲之启仰瞻奕奕之作遂假言言之灵三禴宁侔九京有曜结草岂殊於今日倾葵相誓於私庭此盖伏遇皇帝陛下济业艰难纳民仁壽坐格明良之遇每先忠义之思恩过禁樵激卞彬而敢谢叹兴茂栢欲裴遽之更生有大烝之诏具存非诸布之名不显传之千载光此一门臣内省材弩仰惭祖武偶备员於使指得贡牒於宸严子孙不忘已笃传家之报笾豆有楚长坚许国之诚

代陈饶州谢到任表

引疾去朝甫遂漳滨之卧冒恩典郡复成番水之行班禄云初凌兢曷措【中谢】伏念臣略无他技久在常流当桂管之召还以刍言而入对温顔曲獎朽质殊荣俟罪长沙未奉三年之计牧民南海已成百舍之装会神圣之更张杂智愚而并用畀辅郡股肱之寄易计台耳目之除脱彼瘴烟近於天日而臣?嬰犬马之恙阙趋鹄鹭之行本草石之寒温但知救死问钱谷之出入积致瘵官不胜据瘥之忧洊沥负薪之恳拜鸿私之从欲进华阁以就间方视?於穷居忽承流於旧服官曹不改初无勿翦之棠筋力既憊非复能鸣之雁政兹求瘼难以养痾兹盖伏遇皇帝陛下奋发乾刚财成泰道励精理国每未明而求衣軫虑字人故尝夜不安枕乃知孱琐亦玷选抡臣敢不整顿前规鞭驱绵力僮子歌宣布之颂可谓逢时庶民无愁叹之心尚期校考

代魏吉州谢上表

冒恩起废敢辞蜀道之难改命承流顿觉长安之近厥初班録采切战兢【中谢】伏念臣学

不通方器非适用自离羣於棘寺久远迹於枫宸画戟两州效蔑闻於愷悌绣衣三组志尤慙於澄清偶刊训解鲁论之书中感叹周公之语言者谓其汕上理官坐以投荒窥白泽之图屡逢魑魅染黄茅之瘴幸免膏肓遇圣政之改弦致流人之出籍方作扪参之计又叨易地之除惟庐陵之古城乃江西之剧郡潢池卖劔偶逢刘歆之稀白粲连檣咸惧转输之阙顾惟譾薄恐误使令兹盖伏遇皇帝陛下发政瞻前泽人重外欲庶民之安田里如彼汉宣故丙夜之思姓名不殊唐帝岂容弩乘亦玷兽符臣敢不思补一毫恪遵三尺尽心听讼庶移珥笔之风竭力运粮会有积仓之日

代辰州守谢到任表

拜散人江湖之号方遂归耕分刺史菟鱼之符误膺出守遵瓜时而就道差谷旦以临人【中谢】伏念臣资不逮中况惟每下未足三冬之学偶聯千佛之名既备数於荐绅遂服劳於簿领幸清明之盛际杂巧拙以兼收猥以弩材厕於鸳缀可以折狱历廷尉之三官何自为郎点司刑於六属昨缘盈满旋即退休一去日畿三移星历上栋下宇获安故里之居右粥左餐仍窃丛祠之祿岂云出綍乃得把麾惟庐溪之偏城本黔中之古郡丹砂化药有地产之延年青箬裹盐无洞丁之奸命使之作镇宜择惟良恭惟皇帝陛下化尚中和治贵清静用真儒而无敌不复谈兵以佚道而使民率皆乐业滥令猥琐亦职藩宣臣敢不内竭技能仰酬器使法西都之循吏庶凝共理之功访酉阳之逸书少补右文之治

代福州守谢到任表

三载典城方軫黜幽之惧七条易地采深闻命之惊甫见兵民已颁诏令【中谢】伏念臣空能薄泛泛品卑蚤瞻咫尺之威屡怀方寸之印自飞刍於五筦斯视?以八年就戍西偏偶洞蜚守条而累化徙官东表媿仙羊感政以效祥虽弩马之十驾自鞭顾铅刀之一割已钝赖尧曦之暨远亘粤分以移风佩犊带牛丕变潢池之习羹鱼饭稻洵逢乐岁之丰致此孱疎安然靡窃揆罔功而夕惕恐大譴之日加敢料恩私复垂任使惟闽川之要屏迹岳狩之行都地大俗繁务丛物阜必谋忠信慈惠之长可歌宣布中和之诗深虑器盈有辜穀遣兹盖皇帝陛下宪章邃古光演宝图凿井耕田措舜世於安宁之域辞轩罢刃贤周公而荣华至今既大振於朝纲每广求於民瘼谓臣久居遐远而迁之以近知臣稍更繁剧而勉其所长自非竭一得之愚何以答十行之赐宠光若此弩蹇谓何臣敢不材罄夙宵忧分旰昃广上圣仁心之泽务在抚摩师前贤治道之言期於清静

代雷州守谢到任表

惕日旷官幸免痴龙之譴治雷调守洵叨铜虎之荣遵瓜戍以入疆见葭萌而宣化【中谢】伏念臣颛蒙琐质握龔常流储庆仙源顾郾霍出文昭之後策勋圣域慚向歆为汉隼之宗蚤缀迹於荐绅即抗容於簿领顷紆邦绂邈在海澗佩犊何为带牛盗踪偶少问羊然後及马政术莫知深惧罢归幸臻善了非上圣广亲亲之大赐则微臣考下下以何疑方俟投闲庶几补过敢意十行之宠复尸千里之权惟南合之小州盖徐闻之古郡波涵渤澥帆檣可達於羣蛮

利足鱼盐井邑已同於中县式尘共理乃鉴匪材此盖皇帝陛下功光祖宗德合天地济艱难之丕业题宴祭之昌期念大分八百国之封寔先同姓有唯良二千石之慮欲又远人致使卑凡窃司班禄臣敢不尽遵甲令以治仰寬丙夜之忧公族之应振振弗忘古训君子之风廩廩力企前修

代谢赦文

銓铨就乾已报功而飡帝鸡竿作解爰歛福以锡民凡在式围率同击壤【中谢】恭惟皇帝陛下秣糠巢燧冠冕农黄偃武兴文不胶马上之治制礼作乐式展【缺】中之祠岳只下而瀆鬼从地垠开而天阊决六甲既迎於黄气一蜚岂泄於青蝇合动龠之前言鄙封钱之小慮覃此蓼萧之泽脱然丛棘之囚率土昭苏羣情涤濯滥司郡寄获广上恩札布十行仰汤后解网之德罪寬三细体成王空圉之隆

荆門谢到任表

旧乡学稼久号龙具之中昭代振淹忽玷虎符之末遵期上道涓日备员【中谢】伏念臣生也无庸少而自苦弩材侥幸同介弟中词学之科天语褒嘉称先臣获忠孝之报骤跻儒馆始接英躔暨秃节之来归蹈骇机於不测而臣屡缘父命前诣相门達危疑欲去之情掇猜忌不回之怒既佐郡甫终於两考偶投荒正值於斯时守臣观望以中伤御史凭依而论列狱辞既上乃飢法而卻回吏议不公即舞文而求合錮废已縣於一纪清明斯覩於三光惟当阳君之故区在云梦泽之西鄙虽承平之风未复而醇厚之俗不移苟无贪吏之诛求便有乐郊之气象深虞瘵旷直抵譴诃兹盖皇帝陛下覆物如天视民犹子遴侯邦之左契録治行於御屏下诏百官欲迭居於内外承流六服宁有间於还遐凡此博求未尝轻授载惟异渥猥及私门追叹九原出明纶而赐諡召还二季躡清贯以登朝当宰辅之进除书顾姓名而勤圣问念无是似之质莫称非常之恩铭骨自期粉身何补臣敢不仰思旰食力效秋毫宣布恩隆常佩七条之训抚柔凋瘵敢轻一障之乘

贺郊祀表

苍駟六虬歟颂祇而拜觐圜坛八陛庆扫地之揭?熙事崇成衆心交忭【中贺】窃以七政以齐而辑瑞称类帝之弥文四卜不从乃免牲纪就郊之过举於皇昭代何算陈编恭惟皇帝陛下上圣凝姿中天立极藏干戈於既定其兴也淳焉解琴瑟而更张不胶者卓矣自政机之独揽兹燿燎之载扬玉梢璆磬以谐音兰酒柘浆之备物灵旂来下瑞牒光前坐宣室以受厘御端门而肆赦臣耳闻错事身阻侍祠举相如数十人作歌无庸马走若儿寬千万岁上寿有美鵷行

谢赦表

八音之调作歌礼成蚩栗五刑之疑有赦泽动鸡竿凡在尧封率同虎拜【中谢】恭惟皇帝

陛下恩周地轴治叶天玑总揽权纲振孝宣之治道周章黼绣讲元鼎之祲容坛奉玉以肱驩府封钱而肆眚凿井而饮已腾宁壹之歌画地为牢共迓空虚之庆臣甫承人乏获布上恩戒此遐萌啓良心而远罪奉兹轻典副盛德之好生

贺皇帝庆皇太后八十表

进壽东朝宣恩北阙殿上皆称万岁瑞应非常海内之凡九州歌呼同庆【中贺】臣闻喜黄髮而颂壽母鲁国有诗摘紫房以和慈顏晋人自赋若长乐备常珍之奉在前王无故事之传恭惟皇帝陛下道大兴商功光系汉日致其孝有曾闵事亲之风帝降之祥得黄老养性之福虽蚤朝而晏罢必夏清而冬温逢八十春秋之尊出五三经籍之右吹律式迎於首祚举觴遂介於长年欢连宫闈泽洽黎庶比屋起南陔之养瑶池呈西老之符兴庆之率百官曾非旷典建元之复三算何数陈编臣远守小邦侧闻盛礼回銮纪事微踪常録於汗青赐札锡民异渥获推於戴白

贺皇太后庆八十牋

庆归慈壺礼讲壽觴链石以来孰争年於彤史呼嵩所暨咸播泽於黔黎【中贺】恭惟皇太后殿下德范光前仁心及物比任姒迹助文谟武烈之兴好黄老言得天长地久之应方圣主极怡怡愉愉之养宜皇乾锡穰穰简简之祥式对三微仰称万壽黼黻斑衣之乐秣糠黄髮之歌宝殿腾欢龟台献瑞七十曰老已夸古昔之希八千为春永受迓遐之祝臣博观载籍未睹异闻恩在私门记卷帘之殊渥仪分广陛想贡牋之清班

代贺皇帝表

喬云结幄烂南极於紫霄元日称觴介东朝之黄髮邮音所寄嘉颂载腾【中贺】窃以有三足乌说西崑之戴胜链五色石闻上古之断鳌已标仙籍之长生或播皇风於不朽庆縣长乐事始昌辰恭惟皇帝陛下圣稟姜任行齐曾闵问安视膳蕃厘专鄉於媼神据德依仁介福鼎来於王母礼行膝下欢匝宫中八千岁春方百分之及一十七代史比万壽以无双臣远使重湖与闻旷典仰泰阶而肃序厥路无繇祝坤极之增年後天而老

贺天申节表

日永星火以正夏玉烛咸和电绕斗枢而照郊金铺有庆浮迓遐之喜气集高厚之彪褭【中贺】恭惟皇帝陛下濬哲题期勤劳济业天连珠而合璧民击壤以登台日躬揽於政机更力行於治道按六经而校德方驾羲农称万壽以献觴齐踪彭老臣叨居小垒阻造广庭心慕尧封不胜多男之祝手披鲁颂乃賡台背之章

天申节贡银状

九夏乘离千秋迎节虽下陈之封略有上壽之章程前件物涌地效灵瞻天贊庆介荊州之三品不腆方输匪朱提之一流难参庭实

谢赐绍兴二十九年历日表

远推竹律据易道以归奇中出穗书亘坤舆而班朔虽为常宪时谓新恩【中谢】窃以命南正北正之官历翁逌始积大余小余之数历法可求惟昌辰革乖次之非故大纪得厚生之善足诋孟陬之殄岂差大火之流恭惟皇帝陛下钦象衡旋齐尊曜魄张登三之治具受衍万之休符好雨好风转破块鸣条之沴若烟若雾睹连珠合璧之祥既成岁以定四时盖次春而大一统遂令共贯咸得开编臣名缀典城职当宣化奉行政典敢干木铎之刑劝劭农功庶获火耕之效

盘洲文集卷三十六

<集部,别集类,南宋建炎至德佑,盘洲文集>

卷三十七

钦定四库全书

盘洲文集卷三十七

宋 洪适 撰

表三

谢赐御制损斋记表

渊衷好易玩山泽之立辞睿藻名斋揭日星而垂象乃刊琬琰溥及簪绅臣【中谢】窃以六位成书有数家之口授四方观化必当宁之躬行与其考梁丘朱鹿之异同何以益黄帝尧舜之平治仰九五圣神之学束三万训诂之言恭惟皇帝陛下道缵缉熙理潜易简据狼弧蹈参伐而神武不杀郤虚妃屏五女而清静无为钩探羲文室侈目荡心之欲品评唐汉监持盈守位之非爰标榜於宸居独践修於损德翠不裂而璫不簇尽革纷华墨之妙而笔之精它无嗜好着宝奎而集六合太极之函三风动还遐日趋淳朴臣恭铭座右已秘校官今禄利而学者不明共慚童习自奉养之君子有节上法圣谟

知徽州谢到任表

叨拜言纶复分符竹繇小垒而升辅郡去遐边而接故乡责重弗胜恩隆难述【中谢】伏念臣弱材无似末技易穷顷获戾于权臣即问耕于田父起废忽临于一阵备员甫历于三时体鸿雁劳来之章竭駑駘鞭策之力政无善状偶见取於疲民辞至外台遂共腾於需牒岂期茂渥有此超除尺五去天望觚棱而甚近夫三为屋指井邑以相隣惟富州择吏之不轻恐譴域诣曹之莫免兹盖伏遇皇帝陛下德游和气泽播黎苗方循名责实之朝寸长必录故宣化承流之选详试所行欲察字眊不嫌易地臣敢不究心簿领率俗农桑对以春秋愿奉典城之计着於甲令益图报国之忠

谢赦表

凝旒行孝方视絜於慈闈贯索韬光遂解除于密网恩波匝宇罪党虚囹【中谢】恭惟皇帝陛下德过舜文行高曾闵自远迎於醜驾常款戏於斑衣问安否之何如偶愆调护祷神只于上下必底康宁亟图勿药之功复沛蓼萧之泽仁心有过和气致祥臣连玷左符并逢旷典二算之复八十已敷惠于遐萌五刑之属三千今涤瑕于兹土愿裒吉语永介壽祺

大行皇太后上仙慰表

衅生慈壺痛贯宸衷奉讳之初提封同戚【中慰】伏以大行皇太后生全五福德洽六宫三母翼周播徽音而并驾一成祀夏诞圣质以中兴方期壽祉之增忽怆仙游之隔恭惟皇帝陛下得虞舜事亲之道极文王问疾之忧念駸馭之艰难养加於孝违棘风之变故情过乎哀愿寬罔极之悲式体系隆之重臣限以官守不获奔赴阙庭臣无任

显仁皇太后祔庙慰表

栢城襄事隔慈景於东朝压主宁神讲严禋于清庙凡居覆载靡不悲怀【中慰】恭惟皇帝陛下养夺母仪情深孺慕五表而临素□罔极哀惊九虞之奉真游弗纯吉服逮兹登配益感劬劳愿抑凯风寒泉之思以慰普天率土之望臣限以职守在远不获奔诣阙庭

谢赐绍兴三十年历日表

叙书则断尧典?授民时言天者以夏正茂明历法妙於推筭钦若统元【中谢】恭惟皇帝陛下受籍求端握符行健在璿玑以齐七政徇木铎以戒百官太史司日月之行不差宿离鸿范着天人之应时若燠寒臣敢不仰体深仁恪思共理教下民之农事复当火纪之朝考要说於术家有庆金穰之岁

贺立皇子建王表

选建宗英行真王之故事救宁邦本系率土之羣心凡属照临举同呼舞【中贺】恭惟皇帝陛下系隆汉统强固周宗陈王业之艰难永怀艺祖辨庙祧之昭穆不私本支蚤求绳武之贤久茂积身之德若古有训惟断乃成一索得男名協洊雷之象衆星共北光腾左辖之纏复塞嫌萌益高圣虑臣猥临近郡获拜细书歌螽羽之诗慕华封之善颂作燕禴之祝慚枚叟之逸才

谢赐御书手诏表

方底再封制官刑而出綽周行九命诵睿藻以书绅具瞻云汉之光交积渊冰之惧臣【中谢】伏以三风之戒狗货若稽汤后之谟八瀋之纠治邦详着周人之典盖骄骜不通古今则安能应变期会不报簿书则何以责成或舒缓以养名或拱默而尸禄乃居官无黔突之计故素餐有伐檀之讥皆軫虑於冕旒遂成章於笔墨流传所届废格有诛恭惟皇帝陛下弊革贿交务先政核六事谢苞苴之责百篇等训诰之文罢蠹淮之鱼德高禹贡去穉田之膾指合周诗风移当自於身修奎采复盼於心画臣久违朝籍猥守王畿絕密岭而断枫香愿攀任昉问马曹而招竹隐敢效徽之

谢赐绍兴三十一年日历表

璿玑齐以七政凤历奏篇摄提正于孟陬龙躔更始同文所暨承式惟?【中谢】恭惟皇帝陛下

下道妙范围仁周动植畴人杂候最密清台之书正月始和若观象魏之灋纪中兴而有永极广覆以相传臣职忝承流荣沾赐札永惟五纪欲歛福於编氓必使三时无辍耕之游食

提举浙西常平谢到任表

支郡理人已殿道州之考外台置使骤膺司部之除入境云初逾涯是惧【中谢】伏念臣品卑马走用渺鸡尸洊分符竹之荣蔑着涓尘之效在外十九年矣清班已隔于修门取禾三百?兮厚禄敢期於近甸忽叨出綬遂使登车【阙】万锺之藏久见欺於鼠雀开一卢以卖方并按於狐狸正积弊之剗除岂弱才之堪任兹盖皇帝陛下更张治具曲播人材朝令夕行智兼收於羣策叔出季处恩不替於一门乃若皇华付之弩品臣敢不驰驱郡国宣布诏条发粟以赈贫民何须矫制乘传而张空簿孰敢效尤

代朱丞相第三辞免表

秉钧虚受深怀覆餗之忧批诏洊盼尚阙循墙之请辄控再三之瀆庶几万一之从【中谢】伏念臣识不炤微器非重任浸执股肱之政略无根柢之容报上阙焉省躬惕若方大明更化已臻琴瑟之调而中旻传餐颇軫甲兵之问若时枚卜衆所具瞻岂容测海之蠡可备济川之楫月三日而成魄谊合辞盈阶六符以观天理难代匱伏望皇帝陛下俯垂公听亟讲可音不嫌涣命之还俾免师言之诮姚崇成天下之务别选能贤汲黯寝淮南之谋必期益国

江东常平谢到任表

影瀾部之纓励能信宿乘楚人之传复冒殊恩甫入疆封未知职守【中谢】伏念臣蚤缘薄技常缀清流逢凶德之擅朝踵亲闱而去国岁一章之在外频死而生车两轡而居前视今非昔忽出纶於中禁得揽辔于内畿革酤榷之奸詎能兴利理牢盆之策方欲求端偶同产之典城致孤根之易地四牡劳来于周道既荣文石之登六鷁退飞於宋都谁谓觚棱之远迹未陈于棠舍官复在於桑畴虽过家谐上冢之私岂奉诏有察州之效所忧短力必抵大河此盖皇帝陛下责实人羣留神国用栋梁枿拱随小大而度材金穀米盐均迺遐而置使有如臣者亦在遣中臣敢不靡盬夙宵徧行郡邑问几何於庾氏仰副玉音通什一於商人少裨金府

钦宗皇帝升遐慰表

万里蒙尘咸俟翠华之返一朝厌代已成碧落之游音讳远来哀摧罔极【中慰】恭以大行孝慈渊圣皇帝尧仁舜孝禹俭汤寬位登九五之尊时逢百六之会重美里之易久矣明夷迷襄野之途期于倾否遂传脱屣永断回銮恭惟皇帝陛下仰绍君临内怀友爱陟彼冈而瞻望恨隔终天抱其弓以乌号痛深叩地愿讲反兵之报少寬当宁之悲臣限以官守不获奔走阙庭

贺明堂礼成表

布政颁时粲梓模于汶上稽经诹律蒔祀典於宫中丰泽既行绵区同庆【中贺】恭惟皇帝陛下孝存严父礼谨事天三岁亲祠属有甲兵之问六飞俨处弗陈銮辂之容况当越紼之时亦损垂裳之饰笙磬设而不作粢盛絜而益?事有权宜灵斯悦豫臣身拘乘传心在执筴授五篇之诗媿汉儒之难及右四方之暇幸周颂之可歌

明堂贡银状

蒐越紼之仪九筵陟配谨执筴之职万?骏奔前件物货出朱提品非白撰稽旧图于公玉已颂我将省内府之酎金庶逃邦宪

谢赦表

明堂度九尺之筵应房心於穹汉天下无一人之狱流雨露之湛恩凡在式围率同击壤【中谢】恭惟皇帝陛下辉光周颂度越帝图涓吉日於杪秋讲多仪於路寝礼成奠璧已严父而配天泽播封钱何为牢而画地臣获闻熙事猥缀外台鼓舞龐鸿庆漏泉之大眚奉行寬恤惩挂壁之虚文

贺诛完顏亮表

明诏出车憺英威於毳幕元凶染鍔布吉语於橐街喜匝幅员事超简策【中贺】窃以阳九厄於百六会否终则倾运一变者三十年恶周必复国赘旆于昔者胡扛鼎以猖然若圣与仁不忍干戈之用以大事小屡捐玉帛之珍悔祸有期叛盟在彼一介到阙谓割地之请为必从两宫蒙尘岂戴天之讐而不报雷霆震怒日月耀兵虽边捷之交驰偶淮师之小衄致令对垒直欲涉江盖瓜步既应童謡那无天道恐棘门或如儿戏将屈帝尊孰知呼吸之间已得分膺之报祸胎殄绝杀气澄清讵容刳腹以实盐政可?头而为器示猾夏四夷之戒慰在天九庙之灵淝水之败苻坚尚犹亡国澶渊之灭挾览永断侵疆俟猛将之犁庭治旧京而迎蹕役无再举庆不一书恭惟皇帝陛下睿断有为庙谟必胜坐料目中之敌迄成机上之屠殲厥渠魁斯足摅高文之愤禪於姑衍何止归郅謹之田臣文既无以磨崖武义不能略地距跃三陌窃同折屐之欢肱句九宾愿上奉觴之壽

车驾视师起居表

百将争驰必摧锋而灭敌九旂顺动欲按辔以劳军喜气腾空祥光护野【中贺】恭惟皇帝陛下振威拨乱发愤罢和坐灭凶酋乃帝王以全而取胜仰符天意盖春秋尤大於复讐蒙犯祁寒勤劳清蹕兹周行於壁垒即光复於京都臣斗食无功咫尺在望负羈紲以巡天下敢齿执殳有壶簞以迎王师窃思冯轼

谢赐绍兴三十二年历日表

居卿底日以南正而思天治历明时非鲁人之失闰纪元有永暘札维荣【中谢】恭惟皇帝陛下德煥炎精气调玉烛校畴人之疎密得神策之本元正朔所加暨中元之旧郡銓輿斯动考古日于丛辰臣乘传备员开编谨始横行破虏年新数于中兴平余利民岁必观于上熟

提刑司谢赐历日表

归奇象闰大衍之数可推乖次失方孟陬之躔已正札书所赐縣宇争传【中谢】恭惟皇帝陛下政叶玕衡明齐曜魄羲宅南而和宅朔法帝尧之授人时赵举春而倪举秋纳魏相之陈月令冒海隅之出日靡天下以向风臣偶以摄空洊兹拜况好生恶杀体任德而省刑力耕数耘期馭民之乐业

车驾回临安起居表

鸣葢近甸俯临细柳之营回轸离宫何取长杨之猎百神迎蹕万?腾欢【中谢】恭惟皇帝陛下业济艰难志图清壹淮陰已缚非高祖伪云梦之游獵犹既平宜宣王复文武之士欲讲清庙升祔之礼不憚属车来往之劳天克相於吉行民不知夫顺动臣幸因使指入拜威顔从驾在豹尾中无阶扈圣快心於狼望北尚冀铭功

钦宗皇帝祔庙慰表

灵驾居夷缓七月因山之制礼官踵故讲九虞祔室之仪覆焘之间悲摧罔极【中慰】恭惟皇帝陛下念深鵠翼恨絶龙髯攘狄复讐啓周人之白旆从戎下诏同晋国之墨衰方缘江而视师为升庙而回蹕严禋之际宿愤已摅即闻卜洛之期斯慰陟冈之孝愿裁戚抱式狗輿情

钦宗皇帝小祥慰表

苍梧不返正瞻望於灵輶新谷既升已变更於缙龠凡居临照同尽攀号【中慰】恭惟皇帝陛下承纘丕图?伤远狩因心则友履霜露以纏悲折馘而还封鲸鲵而示报兹逢练祭愿抑哀情

显仁皇后大祥慰表

坤载云倾痛栢陵之永閼丧期有数惊駟隙之如驰【中慰】恭惟皇帝陛下孝德无加哀情罔极临朝而慕不忘问寝之时肆眚所行尚轸称觴之泽兹逢祥祭横集悲惊愿钦对越之灵式徇惇然之礼

盘洲文集卷三十七

卷三十八

钦定四库全书

盘洲文集卷三十八

宋 洪适 撰

表四

户部员外郎淮东总领供职谢表

乘传仓台久叨荣於卿部缀员郎外遂董饷於军门下拜顶恩疾驱莅职【中谢】伏念臣耳闻不广心计甚疎迹远朝班失登瀛之故步官惭使指窃?海之虚名频年获覲於清光仍世俱沾於异渥家声有忝处雁序而不能鸣天语屡褒谓弩材之皆可用故兹推择骤出等夷方高穹佑再造之机而英断讲万全之策增淮瀆之幕府下海道之楼船七萃云屯举张颐而代哺千金日费难拱手以蒙成欲宿饱之可期固空餐之是惧兹盖伏遇皇帝陛下规恢故境选擢羣材细柳屈帝尊惠已深於挟纊前茅戒军政人自乐於摧锋念足食乃能足兵已治内然後治外猥令藁品姑试事权臣敢不虑在乏兴勉旃代匱乘此氛销之运少佐武功竭其父教之忠不为文具

太上皇帝内禅贺表

睿断无前宝图有托庆縣宗祏瑞发乾坤【中贺】恭惟太上皇帝陛下临照四方忧勤三纪开储禁非恳切之请巽大位於闲暇之时杀单于而败单于摠高文之愤矣家天下如官天下法尧禹而兼之乐哉别官释此重负臣偶分外寄莫缀末班徒倾微藿之忱第祝大椿之壽

皇帝登宝位贺表

?遵中诏光御丕图四方归心千载接统【中贺】恭惟皇帝陛下聪明稽古仁孝承祧天之历数在躬重华协帝王有圣德受命下武继文规恢再造之功巩固无疆之祚臣名参郎位职闕轅门徒驰拱极之诚莫预呼嵩之列

登宝位贡银状

伏以龙飞御极既天德之有开虎拜奉珍岂王人而可阙前件物载诸禹贡掌在周官涌地效祥敢参三帛之贄旅庭率职深慚九牧之金

谢登极赦书表

日月合明仰大君之继照雷雨作解洽盛德之好生驩然有截之区覃此非常之霈【中谢】恭惟皇帝陛下诞膺天命光宅帝尊增重规叠矩之休行破觚斲珣之政问安视膳传治国之仁心施惠布恩薰空圉之协气臣幸因使事获拜札书狱亡一人颂已腾于广陌畿方千里覩兹快於速邮

太上皇帝上尊号贺表

发扬圣德膺受徽称诋日播传望云呼舞【中贺】恭惟太上皇帝陛下居域中之大以天下为公位既正於青宫心遂轻于黄屋郁郁葱葱之气久着休符巍巍荡荡之名永光显册乾坤合庆宗庙呈祥臣远采异闻难形钜美事高尧典六五帝以垂鸿诚凝华封八千春而介壽

贺皇帝上太上尊号表

考古先之阔典崇太上之尊称传命诏函腾欢坤轴【中贺】恭惟皇帝陛下纂尧之绪广文之声五日一朝未伸业业之孝千秋万岁欲显巍巍之名乃揆休辰式加明号祝壽龄之绵永彰圣德之辉光臣迹滞江滨心驰日下望丹墀之九级效乔岳之三呼

贺会庆节表

舒虹纪节日在析木之津翔凤腾章下献南山之壽【中贺】恭惟皇帝陛下继明叠矩受命迓衡传位非汉唐种二皇之遐武事亲若曾闵得万国之欢心初开长发之祥共上无疆之祝臣名尘省户身限都门鵷鹭分行莫筵班庭之列冈陵介祉第深存阙之诚

谢赐隆兴元年历日表

真主履端七政在玑衡之器畴人课密万民观象魏之章覆载无私奉行唯谨【中谢】恭惟皇帝陛下诞膺骏命光宅丕图元年者君之始年春秋乃承于天意九服其外曰蕃服正朔已加其国人式颁历象之文咸识旦昏之候臣猥司外计例拜新书虽有考於王正顾何知於帝力

贺天申节表

业龙化马喜脱屣于?机节纪流虹纳垂绅之嘉颂【中贺】恭惟太上皇帝陛下希夷合道昌炽锡符宫室妥安可笑新丰之筑神只拥右不劳方丈之求弥月斯临後天有祷臣猥司军饗莫缀朝班录金监而上十章具存彝训奉玉卮而称万壽胥庆缛仪

钦宗大祥慰太上表

瞻苍梧之野尚结愁云废棠棣之篇洊经旬岁哀纏情而无尽礼顺变而有终【中慰】恭惟

太上皇帝陛下望断龙颜爱敦鴈齿书谓之五典已分天下之忧丧不过三年遂毕圣人之孝愿宽悲怆以对荣怀

又慰皇帝表

朔方远狩怅未返於龙輶西汜疾驰惊再更於葭律悲纏当宁恨结羣编【中慰】恭惟皇帝陛下甫协帝华如绳祖武策士罢临轩之礼复讐兴出塞之师寒往暑来遂毕三年之祭乾旋坤转竚諏六綍之仪愿豁圣情以尊神器

贺会庆节表

月管就盈时既和於玉烛星枢纪瑞庆斯会於金铺凡在九围共祈万壽【中贺】恭惟皇帝陛下圣明继代勤俭宅尊披輿地之图欲规恢於禹迹历中天之载实符合於汉兴诞节再逢颂声四起名参郎选职典军须窃比华封共祝虹流之祉仰瞻魏阙莫陪虎拜之班

贺立皇后表

吉协著经仪成椒屋星轩绚彩地轴胪欢【中贺】窃以二南为王化之基六职修阴令之事必登建於邦媛斯照着於皇嬪彤史所书芳图可监恭惟皇帝陛下重华协帝先治齐家崇九庙之严禋竭两宫之孝养再岁已勤於内助中闈未奏於隆名遵太上之训词备有司之典册倪天所命邇日为明太姒嗣徽音益显太任之德长秋正坤极永承长乐之颜臣出掌军须侧闻国庆祝圣人之多子窃效尧封歌淑女之进贤何惭周什

贺皇后牋

发祥龟筮正位宫闈歌二南芣苢之诗备六服褱褕之礼【中谢】恭惟皇后殿下明章淑范肖以徽音大练厚缵法阴马中兴之后重侯累将鄙宣元外戚之家坤极既尊母仪可仰臣方司外计莫缀末班庆椒掖之礼成倾葵心而颂作

贺太上皇帝表

乾纲继代爰契圣心坤则正名更勤慈训礼成令日庆出陈编【中贺】恭惟太上皇帝陛下等邃泰元凝神道妙几年荐舜迈盛德於帝勋三母翼周示美音於太姒章宫中之妇顺作天下之母仪臣偶缚微官窃闻縟典班莫趋於九级化益咏於二南

贺壽圣皇后牋

祥开谷旦仪讲椒涂具嘉庆以无前仰徽音之有续【中贺】恭惟壽圣皇后殿下景鍾撰德沙麓垂光夏之兴也以涂山助成宝业葛之覃兮于中谷允蹈声诗兹选建於副褱益怡愉於

长乐臣职供外阍身隔上都敢哀击壤之謡用继倪天之雅

谢除司农少卿表

分职供军每惧乏兴之譴絳名司稼更叨因盛之荣力短无庸恩隆曷报【中谢】伏念臣萤光弗远鼠技易穷偶窃郎曹之称来专饷道之事逢时多垒尸禄再葺兴十万师则费千金况增禁旅率三十鍾而致一石远出淮瀆东迁齐附之遗黎北受匈奴之杂种市租输入幕府兹事蔑闻衣食仰给县官其人愈衆常虞不足之患徒辱非常之刑华袞自天忽得有劳之獎列卿惟月遂尘不次之除重拜纶言弥光使指深思激劝独誓糜捐兹盖伏遇皇帝陛下德盛协华政先核实整军经武内坚再造之诚任贤使能兼屈万全之策虽输平而款塞益严备以防边不弃斗筲之材庶终尺寸之效臣敢不撙节出内防闲弊欺峙三遂之刍茭瞻前敢阙问一岁之钱谷善後是图

谢赐隆兴二年历日表

泰阶陈六符之经若稽要说玉烛调二年之历诞布新书赐札为荣开编有考【中谢】窃以验之天道则有分至启闭之叙施之人事则有析因夷隲之宜明主求端南向谨中星之候畴人失闰西流差大火之躔课密奏篇统元貽宪恭惟皇帝陛下德参穹壤政法阴阳行夏之时不爽孟陬之纪绍尧之後复修阳谷之官荐居正以次春始归余而成岁臣例叨颁朔未获朝正名玷稽臣义实慚於九扈职专饗道积唯幸於千仓

谢中书舍人表

起草八埒惧摄承之大譴判花四户尘清切之近班自怜骨相之寒更冒身章之宠瞻天拜命局地衔恩【中谢】窃以典册之难古今所重欲发挥於圣意用鼓动於羣情必兼丽卿云无骖馱诋嫫之病则上规姚姒有聇牙幽眇之风如臣者学殖就荒词锋愈钝异时擢第窃入洛之虚声要路问程缀登瀛之显列中遭禁錮久事蛰藏幸琴瑟之更张齿搢绅而复用叠怀郡戟洊易使轺遥联郎外之名分总军储之寄束春秋於高阁已谢毛锥呼庚癸於首山但防羽檄浸跻卿寺重到帝城蛻凡质於洿涂骇英游於梦境议礼同於聚讼弗通因革之宜孚号以之扬廷莫拟旦明之训徒夸三组蔑补一毫叨睿主之亲除正词臣之高选顾掌制甚荣於内外岂备员能善於始终况朝政之所关虽款书而可议诂容握觚之品乃点论思之间获戾有期循涯非据此盖皇帝陛下刚健中正缉熙光明被六艺而佩礼文学惟稽古练羣臣而核名实官必泽材何取鰕生使陈簿技重念臣一门再世继入北扉同产三人迭居西省兹对紫薇之直实增棠棣之华蒙两朝雨露之私预盛时衣冠之数傥报恩之有路虽赴死而不辞

谢宣召入学士院表

叨翰苑之优迁循墙莫避拜纶函之严召瞻阙而趋仰面命之非常岂心期之敢望【中谢】窃以严乐司马之於汉中外相应以义理之文张陆九龄之於唐出入得参乎谋议之职礼秩

历时而逾重官曹从昔而极清不惟专掌於代言至乃与闻於论相莫堦视?有五塲学士之期
莲炬分光非半夜鬼神之间迨皇朝之稽古广贤路而得人或经年阙长而不除必接昼量才
而後用如臣者学才涉猎志不激印自重入於修门即浸阶於华序久尘视草咸刺伐檀偶逢
疆事之兴且改郊禋之卜铃绦潜动泥札交驰适以独员复司外制初乏涌泉之思常怀阁笔
之忧报单于之书何能遏边萌之祸下奉天之诏无以感悍卒之心顾五技之尽穷覬一麾而
可去忽盼凤尾之诏骤陟鳌头之班紫诰黄麻念史谈尝掌斯事前鸿後鴈至卢奕三居其官
宠厚益惊职亲曷称兹盖皇帝陛下详明政体精选人材赐宴清闲已命经筵之递宿命民疾
苦将修浴殿之旧仪既灼见於愚忠遂曲加於饰擢臣敢不益寻素业勉企前英虽惭华国之
辞敢负致君之学力行直道每惩朋比之私上报异恩傥效涓埃之补

谢赐衣带鞍马表

色丝盛服兼金赍於九环扣轡文韉上驷来於六厩折腰增焕问景知惭【中谢】伏念臣质
谢囊锥业荒裘冶试演纶之末伎玷持橐之清班带櫪具而冠进贤漫缀章逢之伍驾啮?而骖
乘旦敢萌驰骛之心惊此龙光被之弩猥此盖伏遇皇帝陛下恩隆文陛礼重禁林市骏而筑
燕台始於郭隗解衣而呼陆九如彼唐宗仰叨覆载之私曷称便蕃之锡着鞭而骐驎居後难
逃刘琨之讥束带而宾客与言窃起公西之慕

盘洲文集卷三十八

卷三十九

钦定四库全书

盘洲文集卷三十九

宋 洪适 撰

表五

辞免签书枢密院表

龐恩曲被实深非据之忧温诏下盼益重若惊之宠控忱词而屡瀆期聪听之可回惟敬俟於严诛或退寻於故步【中谢】伏念臣斗筭小器占毕陋儒遭逢特达之知度越輩流之上绘章絺句尚堪鞭策於弩才经武整军乌可参陪於筹幄躡先俊轨必速烦言伏望皇帝陛下施等乾坤明垂日月鉴此由衷之请略夫反汗之嫌改用英贤使分宥密之务庶几庸琐获免颠隲之虞臣无任

谢表

间两社而为辅超缀迓联筹千里以折冲曷胜重任仰承殊命内集危衷【中谢】伏念臣处世卻行入朝寡与出言如綍莫追温厚之风持论不根祗渎崇高之听每虞幽黜独忝误知方进陟於禁林勿躡居於宥地伋辞弗遂尸素惟忧念君臣遇合之难况之千载顾兄弟因循相继曾不一年宠既叠於私门望岂孚於公议兹盖伏遇皇帝陛下励精治具垂意人材求儒雅以参大猷术分邪正有常德以立武事道叶弛张虽当偃革之秋尤軫解弦之虑谓臣戇愚之见寸或有长知臣顽钝之姿详於已试欲其中立责以自强故奎画有明谅诚易之褒而玉音申可否毗赞之戒眷存至此报塞谓何惧无补於几庭终难逃於谴域臣敢不瞻前为鉴善後是图取人絕亲旧之私遇事去朋党之敝佩丁宁之训常恐雷同输悃悞之诚更期海纳臣无任

德壽宮謝表

致身紫橐浸高视草之班接武黄枢初乏徙薪之策仰只茂渥莫遂深辞【中谢】伏念臣性愚不移材薄无用咨四岳能典朕礼微讨论制作之长俾万姓咸大王言非明白温纯之比久忝俊轨屡触危机载寻匭革之盟首预乘轺之选念先臣有雪氈之厄虽秃节之尚存而同产遭霜简之弹亦覆车之可畏偶凭帝力获缔邻驩将沥请以休故山忽拜恩而长翰苑未安坐席又陟筹帷顾宥密之责匪轻惧遣诃之事难免兹盖伏遇太上皇帝陛下蹈尧舜圣神之迹记苏张忠义之家两世受知曷报隆天之施一门集宠洊叨政地之除内揆僬踰益增隕越臣敢不鞭笞弩驾景行英尘抱公灭私常无忘於三省整军经武庶有补於一毫臣无任

谢赐生日生饬表

温检成章軫门弧之初度贵貂传命拜台馈之多仪自顾冥顽甚惭锡予【中谢】伏念臣学不足以通治体材不足以赞沈机自登笔橐之班浸躐钧枢之任一尘无补百谪是忧禄弗泊亲方笃蓼莪之感恩斯逮下更叨华袞之褒此盖伏遇皇帝陛下仁等上天礼优近辅有腠汽牢之赐以荣犬马之生窃誓孤忠曷酬洪覆臣无任

辞免参知政事表

使璫狎至方战越於新班诏札鼎来未允俞於微悃危俸临谷辞迫循墙【中谢】伏念臣弱羽不可高飞弩驾焉能远适入朝见嫉方市虎之相侵忧国无闻笑井蛙之奚算自参宥画益负空餐忽叨制渥之私俾预政途之列傥贪荣而不惧必获戾以何逃伏望皇帝陛下责实循名量材授任怜孤踪之安用寢茂命於已行别选异能式隆上治臣无任

谢表

政涂备数莫参画一之规枢筦摄空奚堪共二之寄伋倭弗回於【阙】战兢徒集於微躬【中谢】窃以帝王以知人为难臣邻以得时为庆必緼熙朝之业始凝弼后之勲亶上圣之有为咨实材之可用权纲欲振治具未张士风奔竞而所患乏材军政纠纷而曷为立武丰财孰究其策去弊莫知其方既台纁之位尚虚故辅臣之责尤重如臣者荒疎之学不足以断国论区瞽之识不足以烛事机误简渊衷浸超华轍惟基命於夙夜甫玷近司傥责备於春秋已奸黜典敢谓九天之渥益跻两地之班在三卿之中方期学步於百寮之上尤惧代庖镂骨衔恩汗顔就列兹盖伏遇皇帝陛下大明独照洪覆兼容谓其久侍清光体励精图治之意思与共调元化成砥节首公之名臣敢不仰称选抡自加鞭策正纪纲而守法度诵圣语以力行筹帷幄而坐庙堂竭愚诚而思报臣无任

德壽宮謝表

只拜恩言进陪政路伋倭莫回於茂渥趑趄有腠於周行【中谢】窃以股肱之寄责之二三臣文武之柄系乎东西府非得爽邦之彦曷隆致主之名如臣者学不能考古而验今材不能任重而致远叨两朝之殊眷躋多士之清班岁月浸淹涓尘奚补报淮南之诏虽尝召於王褒草赞普之书终远惭於陆贄甫从鰲禁入赞鸿枢帷幄运筹无边冲之可折丝纶出命岂国论之能参集此侥踰若为称塞兹盖伏遇太上皇帝陛下如天覆焘犹日照临谓其世绍箕裘或佩教忠之训使之位联鼎轴傥收偃武之功臣敢不铭骨知荣糜躯思效仰辅协华之治常虞窃位之讥臣无任

辞免除右仆射兼枢密使第二表

大庭涣号仰惊茂渥之盼细札成文未徇愚衷之请敢干威咫尺仍沥忱辞【中谢】伏念臣复

近觚棱初无介绍受非常之知遇忝不次之迁除虽孤踪屡至於阽危独渊覆曲为之涵宥既超筹幄浸列政途一言可以兴邦曾靡筦闼之益四岳有能熙载遽叨柄用之私念大君总揽於权纲欲内治修明於法度行信赏必罚之政求举偏补弊之方杜邪枉之门去朋比之党冀公私之皆足事期小大之毕张非得真贤曷胜任重岂伊朴讷可备使令窃深据蒺之忧何止伐檀之刺伏望皇帝陛下乾坤委鉴曜魄垂光别求有用之材俾免疾颠之患臣无任

第三表

阶六符以观天象惭齐色月三日而成魄势合辞盈荐渎盖高自知不宥【中谢】伏念臣器非任重识不烛微自蹶政涂即尸宰枋枢机周密岂神爵五凤之年威福刚柔昧洪范九畴之叙况此相臣之阙历乎旬月之期予印惟难拂龟有待兹窃处中之位必貽歇後之机伏望皇帝陛下念不移之愚追已下之命曲全曩品用穆金言臣无任

谢表

洊朝尸禄已寛策免之科当轴秉钧更误庭扬之命渙音弗仄朽质自惊【中谢】窃以宰相遂万物之宜实求康济之效天下犹一堂之上可使咸欣之殊傥胶柱而无应变之长或括囊而乖尽瘁之义则不能仰崇后德下慰民瞻必有隆栋柱石之材始堪巨川舟楫之用岂伊匪据可以自强如臣者天予凡姿人知窘步幸千龄之独遇致一岁而屡迁尊俎折冲媿汲直寝谋之美玃衡齐政蔑舜官熙载之能虽区区欲塞於幸门亦惴惴恐行於危道只凭圣察敢罄愚诚不胜丹慊之忧辄请素餐之罪甫蒙恩宥乃玷褒除宰席践久虚之班筹幄高对掌之职疏封侯壤进秩文阶宠渥更蕃有此雨露之泽制词训敕出乎云汉之章窃愿罢弩若为补报恭惟皇帝陛下焦劳图治寤寐求贤视朝有禹汤之明当馈发萧曹之叹神圣其臣莫及尚采鄙言天地之德曰生曲全弱植矜其不逮勉以有为臣敢不期称所蒙力行不变佩患失徇私之戒久矣书绅守奉公履正之规庶其补衮臣无任

谢公词表

旬月赞襄终负和羹之美一朝颠沛自貽覆餗之殃仰戴仁天得赎死地惊魂未返涣命难胜【中谢】伏念臣材匪时须仕无人望指修门而重入偶被简知登要路以亟迁久遭冒嫉既参宥画驯陟台司不量弩钝之姿欲副丁宁之训然力小安可以任重惟本弱故易於根危兹因燮理之非愿请旷瘝之罪庶图上印获免伤弓眷注未衰尚褒辞之在耳诋訾不恕勿弹奏之吹毛独赖圣明特寛典宪彻侯就国已乖岩石之具瞻秘殿奉祠无异急流而勇退制音伋受感涕交挥兹盖伏遇皇帝陛下宠厚股肱礼存体貌方此烛幽达枉不尽信於多言怜其执法奉公致浸奸於衆怒末减投荒之谴保全出昼之行臣敢不镂骨衔恩洗心思咎乾坤莫报益坚存阙之忠畎亩可归或企灌园之迹臣无任

绍兴府谢到任表

上丞相之印甫获退藏怀会稽之章遽叨进用既自天而申命即便道以之官【中谢】伏念臣识闇物先品居人下幸际风云之会浸尘柱石之班佩圣训之丁宁靡辞任怨忘弩姿之譾薄强欲徇公曾未见於大中已见愠於羣小弹文杂袭虽投裔不快其私渊度矜容使归田以避其毒自违威咫尺半阅岁华仰沐知怜屡形獎録敢觊起家之宠遂膺维屏之除擦拭恩隆糜捐报浅惟兹禹会是谓价藩职连率则长於东方诸侯拱行阙则比之西都三辅就尧如日身既近於长安入越之疆心甚慚於范蠡所虞瘝旷复误使令兹盖伏遇皇帝陛下择共理之材振内修之政大明黜陟小人之道日消独总权纲五帝其臣莫及不弃盖帷之旧俾分戟纛之荣臣敢不思称所蒙自鞭其後布宣德泽惟民瘼之是求剗剔奸贪冀州箴之可举臣无任

朝永佑陵表

维乾道二年岁次丙戌十月辛未朔十二日壬午具位臣洪某恭诣徽宗皇帝永佑陵攢宫朝谒者臣某顿首顿首言曰垂衣裳於盛旦咸仰文谟藏弓剑於名山兹连禹穴臣牵丝自外洩篆惟新敢循守土之常获展拜陵之敬恭惟圣鉴俯谅微衷臣某顿首顿首谨言

诸后攢宫表

续有?之史永播徽音瞻於越之山实藏大练臣牵丝有命怀组是邦敢遵故事之常式展幽宫之敬恭惟灵鉴俯谅微衷

谢赐银合腊药表

速邮斯暨良剂来盼遥拜明庭敬藏温诏【中谢】伏念臣叨临近辅甫对杪冬年在终身同早衰之蒲柳药皆上品如远采於蓬萊辅以朱提之珍贲於宛委之域沉疴可免腆予惟荣此盖伏遇皇帝陛下仁德宅中恩波浹下使臣以礼兹存体貌之余视民如伤况乃股肱之旧故推赐式俾护生经倪賒沟壑之填必报乾坤之施臣无任

谢赐历日表二

重离南面初临再飭之年大火西流斯正余分之历新书诞布绵?前知【中谢】伏以业纂畴人数或讥於乖次事传邃古法尤重於归奇恭惟皇帝陛下以天聪明如日临照九畴攸叙斂五福以锡民七政以齐定四时而成岁同文所暨开卷遂行臣职忝十连壤均三辅火耕水耨俾不失於农期夜寐夙兴唯深思於王事

天仪默运兹临上戊之躔民用前知如揭先庚之信奏篇既出赐札惟均【中谢】恭惟皇帝陛下离治向明乾刚行健解弦更化奋木铎以令兆民截管考声在玉衡以齐七政清台所考繇?式同臣久玷竹符再开穗历司分司启已知来岁之宜或耔或耘益勉西畴之事

谢赐夏药表

时临三伏孰御炎威扎降十行鼎来珍剂伛躬登受盥手开尝【中谢】伏念臣猥典价藩密依魏阙比因哀病将辟谷以追赤松之游兹拜恩盼可入门而远黄熊之梦此盖伏遇皇帝陛下仁怀旧弼物重常仪御南风之琴普令解愠赐西山之药曲使卫生侥幸免於热中期永肩於报上

安恭皇后上僊慰表

祔起坤倪光沉轩曜凡居覆载靡不哀摧【中慰】伏以大行皇后着德椒涂传芳茧馆葛之覃兮于中谷允蹈雅言夏之兴也以涂山聿追前躅孰谓倪天之圣遽亏遡日之明恭惟皇帝陛下化格御邦情隆伉极怀哉淑范悼故剑而不忘布此黼筵覩副禕而有感愿遵经礼俯割悲惊臣限以职守不获奔赴阙庭称慰

盘洲文集卷三十九

卷四十

钦定四库全书

盘洲文集卷四十

宋 洪适 撰

表六

谢郊祀礼成加恩表

伏念臣待罪山陰依光日下遇圣主再郊之岁有阙包茅均泰元三献之厘遂沾细札既衍井畚之赋更叨公社之封【中谢】兹盖伏遇皇帝陛下泽欲下流福非专乡奉瑄玉而飨帝已贰辇仪坐酎金而夺侯悉除币法故兹陟典猥及微臣誓坚存阙之忠用侈传家之庆臣无任

谢赐银合腊药表

承流无补久怀视?之惭拜况有光斯免负薪之疾鸿私曲被弱质难胜【中谢】臣闻出玺赐金汉室用旌於良吏剪须和药唐宗以疗於元勲惟圣朝独异於藩垣故盼式并行於伏腊恭惟皇帝陛下仁如天覆恩与风翔帝尧立四时之官式谨司冬之令神农审百草之味盖存济衆之心軫此下臣锡之名剂使积疴之去体期後效以捐躯臣无任

谢提举临安府洞霄宫表

典股肱之郡旷职怀忧领香火之祠拜恩从欲谴诃获免铭镂难言【中谢】伏念臣姿稟凡庸智能局促独玷前旒之殊遇遂登右鼎之巍班数月尽心罔有一毫之补衆言销骨欲行四罪之诛仰赖简知第从策免未遑黔突即忝专城念牧人御衆之难体责实循名之政妄欲抑强而宣化未尝画诺以养高自恨斗筭之材讫无尺寸之效况以早衰之蒲柳居然远想於枌榆屡贡忱词始谐归志奉三年之计有媿前尘起千里之行复紆故步此盖伏遇皇帝陛下轸怜旧辅宣布异恩兹闻同产之对?复辱渊衷之称獎记臣立朝之宣力深咎怀奸之人察臣守土之寡尤曲徇养疴之请少休疲茶曷报生成衡宇可瞻虽幸眄柯之适长安浸远但驰倾藿之诚臣无任

贺天申节表

太阶平而玉衡正甫临九夏之中圣人出而里社鸣斯庆千秋之节【中贺】恭惟太上皇帝陛下道隆衆父德迈三皇博衍优游享尊亲之大养聪明光宅授翼子以燕谋兹逢流渚之辰共上呼嵩之祝臣获休乡閭莫预庭绅想万壽之称觴袞龙拜手望九陔而贡牋蝼蚁驰情臣

无任

贺郊祀礼成表

致慤竹宫简灵辰而允协流光珠幄庆毖祀之备成德动九垓驩倾六幕【中贺】窃谓圣人然後能飨上帝所以降康周室庀官奏黄钟大吕之乐汉京纪瑞作赤鴈白麟之歌於铄昌朝高迈前躅恭惟皇帝陛下应天尚实除地揭?格悦近来远之和崇交神塞明之报四圭有邸穆然祗栗之容八陛为坛絜尔静嘉之荐星辉云润乾清坤夷纳鸿祐以无疆薰嘉生於有截臣骏奔迹远率舞情深建太常之辰旒载欣跋事奉有司之瑄玉徒想侍祠臣无任

贺太上皇帝加尊号表

礼尊丕册庆溢慈宫凡厥式围率皆击壤【中贺】恭惟皇帝陛下垂衣三纪脱屣万几鼎来高厚之祥泰处希夷之乐惟天比大荡荡乎无能名以道自娱恢恢其有余地洵隆名号共睹缙仪臣退伏故乡逖闻盛典上玉卮之壽莫陪拜下之班紬金匱之书独仰光前之绩臣无任

贺壽圣明慈太上皇后加尊号牋

蒐举缙仪铺张宝册福归慈禁喜浹緜区【中贺】恭惟皇后殿下体德坤元俪尊乾极一成祀夏资内助以经邦三母翼周絶外言之入梱偕享壽康之乐洵加光大之称臣遥睇龙墀莫班鹭缀播传钜典益隆邇日之明歌咏徽音愿续倪天之雅臣无任

两宫加尊号贺皇帝表

瑞集慈闈册尊显号诏音所布驩颂载腾【中贺】恭惟皇帝陛下德迈羲农行高曾闵绳武有凿乾之志问安得治国之经尧以受命为忧正享倦勤之乐舜尽事亲之道益隆宾实之名臣久去云霄远藏田野拜表章於兴庆身隔班行蒐礼典於曲台心倾仪注臣无任

立皇太子贺太上表

英主守文协重华於盛旦元储绳武开洵震之休符慈禁益尊皇图有永【中贺】恭惟太上皇帝陛下德垂後裔道冠前王万方怀覆物之仁十载享倦勤之乐五帝足六揭巍巍荡荡之名一日见三衍继继承承之庆臣身居乡社心系宫庭莫参振鹭之班祗益拚螯之喜臣无任

贺皇帝表

吉日牒传前星彪列布宣细札鼓舞绵区【中贺】恭惟皇帝陛下圣德无前英规复古深惟国本之重默契天心之公龟筮既从袞龙独断故受以艮兆三索之珍符相见乎离着重明之上象臣退藏田野遐想阙庭徒存拱极之诚莫覩呼嵩之庆臣无任

贺皇太子牋

覆载凝符元良主鬯庆开宗社驩动幅员【中贺】恭惟皇太子殿下仁孝生知温文日就天开地辟已题再造之期海润星晖於赫重光之瑞两宫有喜万祀无疆某逖处故乡欣闻徽典驰心鹤禁莫窥镂牒之文矫首鸿仪徒想班庭之礼某无任

谢郊祀加恩表

熙事光前对泰坛之嘉况庆条逮下衍井邑之新腴仰望明庭敬秣茂渥【中谢】伏念臣退休故里远隔上都想进币於中宵莫瞻三献记执绥於曩日又见两郊何期商賚之行亦在周行之数兹盖伏遇皇帝陛下诚格穹壤孝宁庙祧礼既讲於逆厘意实颺於敛福惟漏泉之泽已浹迹遐故增户之恩靡分中外臣深知礼屈益媿名浮窃幸逸居得养漳滨之疾敢循文具辄辞殿之封

会庆节贺表

日临析木光凝北陆之躔星仰流虹瑞起南山之颂式围所暨拱极迨同【中贺】恭惟皇帝陛下德焕重华志图再造总纲振领尊居螭馭之中越契踰绳何限鸿荒之际皇风载赓协气横流卓哉弥月之祥申以後天之祝臣庇身尺地矫首咫顔百辟奉觴兹数十年之庆九垓衍筴已题万壽之期

天申节贺表

伏以十载倦勤享天极弥高之【缺】万方介壽增电枢有永之符声教所覃驩呼竞起【中贺】恭惟太上皇帝陛下化行禹贡德广尧仁乃武乃文济兴王之大业已安已治授圣子以貽谋诞开金殿之祥荐讲玉卮之庆臣退居故里阻望严宸徒倾葵藿之诚莫布松椿之颂

谢加恩表

圆丘展禋驩已接於灵旂中禁均厘恩遂加於上笏宠光所及震悸靡宁【中谢】伏念臣一去阙庭三逢郊类包茅何有职弗预於骏奔食采益增心甚惭於饗窃兹盖伏遇皇帝陛下福非专乡泽欲旁流其出如纶尚暨要荒之服多与之邑不遗小大之臣故此庆条逮於旧弼臣潜山已老报国无阶虽深伛偻之情实负陪敦之渥臣无任

贺太上皇帝加尊号表

礼崇宝册瑞奏慈宫凡在提封率皆距跃【中贺】恭惟太上皇帝陛下赤符受命黄屋非心兆民蒙偃武之恩三纪获崇文之效太上立德存诚践履於羲经天下归仁尽性兼同於尧帝鸿名宾实缙典流光臣退处丘樊遥瞻霄汉胪传金帛驩呼兴庆之班壽介玉卮趨赴未央之

举臣无任

贺太上皇后加尊号牋

瑞集慈庭册尊坤极照临所暨拚蹈则同【中贺】恭惟太上皇后殿下遡日合明歌风播德尧天齐壽增巍巍荡荡之名舜子承顏鄙泄泄融融之乐徽称三进钜典一新臣身息故乡耳闻熙事葵倾四海漫驰存阙之心花覆千官莫接呼嵩之武臣无任

贺皇帝表

慈闱受祉丕册垂鸿声教所覃耄倪同庆【中贺】恭惟皇帝陛下业隆再造德焕重华武能广文之声益扬黼黻舜尽事亲之道屡讲缛仪瑞溢堪輿事光竹帛臣久违轩陛远在丘园二圣重欢何取中兴之颂八音迭奏莫陪上壽之班臣无任

太上皇帝庆七十贺表

作之君作之师迈百王之高躅得其位得其壽问七秩之耆龄解泽流行龐眉呼舞【中贺】恭惟太上皇帝陛下垂裳二纪脱屣万几授舜子以无为并尧天而兼覆讲玉卮之礼自古所稀计铜狄之年於兹为盛臣迹侪野老心慕封人敢賡茂栢之诗仰介大椿之祉臣无任

太上庆七十贺皇帝表

慈闱得壽飡踰七望八之耆年縣?牕驩逢咸五登三之盛际厥今之庆振古所无【中贺】恭惟皇帝陛下协帝重华继文下武奉两宫之温清阅五闰以尊安尧荡荡无能名益介大椿之祉舜业业致其孝独光汗简之藏臣身在乡关心驰轩陛想云龙之缛礼花动春幡觀雷雨之渥恩茶开秋网臣无任

谢庆壽加恩表

慈极纵心讲後天之大庆周行拜手沾加地之新恩却伛僂之虚文垂登閼之故事【中谢】恭惟皇帝陛下以尧为父如舜事亲长发其祥应七百卜年之神筴多与之邑记二三执政之旧人特出明纶以彰盛典臣退藏故里阻相祿容既并赋之濫增顾涓埃之何报臣无任

贺会庆节表

地辟天开际就盈之良月星流电绕书衍庆之非烟凡在式围率同击壤【中贺】恭惟皇帝陛下聪明稽古慈俭宅尊息战鬪以邦宁劝农桑而家给称玉卮之万岁若舜事亲上金镜之十章与唐比迹烜赫诞弥之节歌呼难老之謠臣久去宫庭远藏岩壑首百寮而上壽梦想鵷行足五帙以增年驩均醵拚臣无任

贺立皇后表

云昬肱音星轩绚彩凡依乾覆共仰坤仪【中贺】窃以诗首关雎吟咏二南之化礼称翟辨明六服之容惟嫔虞以妨汭之贤故翼夏者涂山之懿倚欵盛典倬彼芳尘恭惟皇帝陛下景命中兴容光下济杜私谒以肃房闕茂内德而御家邦观法大任得嗣徽之太姒承颜长乐当正極於长秋喜动慈闈庆垂宝册臣身藏田里心系阙庭椒涂既进於鸿名蜚馆愿修於故事臣无任

贺皇后牋

庆溢枫宸礼成椒屋共赋倪天之雅仰瞻邇日之明恭惟皇后陛下播德鞠衣流光彤管繇良家八月之选冠天極四星之躔周之兴也以太任续前尘於昔日葛之覃兮於中谷助内治以历年兹正位於纯坤益尽懽於长乐臣退藏三径仰睇九垓想奉册以驰心敢贡牋而拜手

谢加恩表

八觚展采职弗预於奉璋四表均厪渥遂倖於赐胙华章所逮朽质为荣【中谢】恭惟皇帝陛下降札先庚燔柴报本六变陶匏之乐五修蜚栗之祠移慈極之孝心事天明而事地察受泰坛之灵祝如山壽而如川增泽欲广於下流福靡怀於专乡致兹多邑猥及微臣敢饰诈以循墙第铭恩而存阙臣无任

贺明堂表

大飨总章庆合祐於天地传肱象魏鼓丕号於雷风凡在式围率皆击壤【中贺】恭惟皇帝陛下化行禹贡德迈舜华五陟圆坛叠黄钟太簇之乐一新旷典续皇佑绍兴之秋膺位森罗簋实丰洁夙驾有霖淫之害斋宫开明概之祥圣格三灵欢来四表臣心休寻壑身阻陪祠记曩岁之执綏依乘玉辂想萧辰之鸣佩瞻仰金鸡臣无任

遗表【丁酉年病中所作後七年而公薨】

去天一纪每嗟遇合之难问路九原少驻斯须之景【中谢】伏念臣学虽是古材不逾人蚤从事於簪官敢摅情於好爵初无介绍独被简知立朝曾不二年辅政乃周十月不敢怀奸而罔上但欲奉公而灭私犬一吠形历数秉钧之罪言三成虎不无投杼之疑旋畀辅藩久安祠祿园林胜而钟鼓絕阡陌少而子孙多家无余财不留心於斯事人有百行顾没齿以何称伏望皇帝陛下信任忠良听从諫诤承颜尽孝以驩壽考之无疆尝胆复讐少俟烽烟之有衅臣受恩弗报齎恨奚言尚期结草之忠用展倾葵之素臣无任

盘洲文集卷四十

卷四十一

钦定四库全书

盘洲文集卷四十一

宋 洪适 撰

章奏一

论人户差役劄子【除江东提举上殿】

臣伏覩元佑中旨挥合役空闲人户不及三番处许令雇募苏轼上言谓圣恩欲使百姓空闲六年绍兴二十六年六月一日续降旨挥批朱者歇役止於六年便与白脚人比并再差行之数年民受其利近因宣州一乡上户絶少下户极多守臣奏请本欲不候歇役六年即再差上户有司看详误将歇役六年旨挥便行冲改遂致上户却称朝廷改法是以鼠尾流水差役必欲差遍白脚始肯再充当差之际纷纭争讼下户畏避多致流徙盖上下户税钱有与下户相去百十倍者必俟差遍下户则富家经隔数十年方再执役臣前守徽州且以婺源一县言之有差及一贯税钱者民间哀诉诚为可念臣愚欲望圣慈将绍兴二十六年旨挥依旧施行庶使细民鼓舞德泽取进止

贴黄 臣谓役法全在守令得人若付之胥吏则舞文生弊不可胜言今若施行歇役六年旨挥亦有合关防事件谓如一郡之内上等五户税钱五十贯中等五户税钱三十贯各曾应役下等户并税钱五贯以下系是白脚若以歇役六年再差税钱在上之人却恐中等五户侥幸再差不及如有似此去处乞令自第一户差至第十户然後再差第一户所贵役法均平上下称便

乞勿系大狱干证人劄子

臣仰惟陛下哀矜庶狱视民如伤丁宁钦恤前後曲尽而州县之吏未能尽体好生之德不无冤滞以干和气臣伏见诸县徒以上罪虽有结解期限而吏胥利於追逮求覈或一年或数月始以解州又数月或半年方能结案或囚徒番异则又未可预料其囚以身犯法禁系固宜独是事发之处或在邸店或在道路一时偶与相逢之人见其鬪殴死伤便为证左相随入狱虽供责已具而狱吏或以无保识或以别州县虑其再追不至例皆同拘牢户同解本州直候结案无番异方得释放盖证左之人多是他州商贾与村落农夫或有老亲弱子别无他丁必候其人营贩作业始可生活一遭禁系动绵岁月其家啼饥号寒遂挤沟壑其身或苦疾病因而瘐死无罪陨命深为可怜臣愚欲乞圣慈严下州郡应诸县所追证左若供责已具限一月先与召保知在或村落农夫在市无人保识即令押下本都知在或他州县人即传押付本土随其乡部召保施行皆不得别为苛留听令从便经营日食若罪囚到州辞情异同或移狱别州

鞠勘必须再追证左并委长吏取紧要人量行点追如或违戾常令提刑司觉察按劾重寘于罪提刑失察者诸司互举之庶使无辜之人不致久留縲紲其家不致穷饿就死以副陛下爱民止辟之意取进止

乞许逃业子孙赎产劄子【绍兴三十二年建康上殿】

臣伏见顷岁江乡之民多因荒旱迁徙淮甸比遭边骑之扰复还故乡而所弃祖产皆为官司估卖虽欲复业已不可得扶老携幼茫然无归所谓田园悉移於形势之家但用低价计会十不偿一至有指名投状请佃入已而量输税租者於官既无所得於民乃有深害徒以惠兼并力势请托州县之人揆之物情未见其可仰推陛下圣德仁恩光被四表憺怛忠厚之意拳拳为民盖已度越汉唐况於凋瘵流徙之余仅存躯命王政所施莫此为急臣愚欲乞睿慈下诸路揭榜断自绍兴二十八年以後凡州县所卖逃产如元业人及其子孙愿以元估官价就赎者仰即日寄库纳钱给据还产如系承佃者并行给还其牛种之类系买户续置者则还其主如或怙强恃势尚复非理执占州县徇情迁延不为理取许经朝廷越诉仍专委提举常平官觉察奏劾如有犯者必罚无赦庶几垂尽之民仰沾德泽不致转挤沟壑以副陛下视民如伤之意取进止

乞罢诸路抵当库劄子

臣窃谓戎车既动支费倍增赋入有限生财极难纳粟入官旨挥今已半年县邑至有计苗一石敛钱一千以资贴上户者酒坊预借亦将半月州县多有迫呼鞭治留之縲紲者而江东一路方得十一万缗生财之难如此臣伏见诸路常平抵当母虑百万贯始欲轻息利民而出纳者邀留需覓得之不时故民间不复与官为市率皆官吏作弊以麤恶之物抵质高緦久而不取遂成失所存见缗义掌之者那兑侵借今江东一路共有本钱十五万贯而所名息钱才二千余贯臣愚欲乞睿慈将诸路抵当库并行减罢所有见在钱物限日下尽数起发如有侵兑并勒填补庶几少贍军旅之费取进止

乞添總领江浙财赋字劄子【任淮东總领日】

臣闻名不正则言不顺言不顺则事不成臣所居官以淮东入衔而置司镇江府所拘催钱米并是江浙诸州向来只有镇江一军则元科拨钱米足可支遣自用兵以来淮上增添宿卫军马及李宝一军并是镇江总领所应副虽蒙朝廷科拨钱物而州郡顽慢官吏各以不相临统藉口视文移为故纸公然占愆不以军事为意虽朝廷屡有指挥许按发违慢去处及浙西官亦许通行荐举但官名未正终是号令不行且以李宝及宿卫司所屯淮上军马计之每月所费钱二十万贯米料四万石截日终已那兑支发过钱一百万贯文米料一十六万石而所科拨诸处钱物但有平江府发到钱一万贯文常州镇江府发到米六万石钱一万九千贯其江东诸郡月桩钱并不按月解发已拖下五十万贯臣切恐秋冬之间或边尘未息淮上必须增戍若不预行桩积则缓急之际无以措置如江浙州郡玩习弛慢无所忌憚必致失事臣已条具州郡少欠数目申尚书省乞取旨行下令如期起发外臣愚欲乞依鄂州总领官例於衔内

添总领江浙财赋四字所有违慢去处乞依前後已行得指挥将当职官奏劾取旨重行黜责人吏追呼断勒其他事件只乞依元来已得申请更不敢别有增添陈乞庶几官名既正可以督责应办不致有悞军期干犯宸严俯伏俟罪取进止

乞令漕臣备办馈运舟船劄子

臣伏见诸路总领官只以科拨为职其馈运之事则漕臣所掌自海州被围内外阙食所运钱粮淮南漕臣则以残破之後舟楫未办为辞随军转运又称官系浙漕不能於淮东办船为辞并要臣本所径行津运臣以弩钝之材误蒙使令不敢避事旷职到官数日间节次起发米四万石钱九万贯银二万两马料一万石并是臣措置舟船般运径到楚州塩城县交卸入海所发纲运有在运河阻浅者又亲到扬州寻雇客船盘减前去其泗州军马钱粮亦有臣本所纲运径行装运至军前者目今遇他州纲运到来未敢下卸逐急可以劝谕令渡江前去应副急阙当闲暇之时一方用兵津运已是费力窃恐秋冬之间兵革未息馈饷愈多如臣本所有纲船可以拨发及客舟可以用臣自当体国同共津发若他州别有纲运到来漕司仍前推避尽要臣本所津运必致有悞军期臣愚欲望圣慈严切行下淮东漕臣及随军转运令先期广办舟船以备将来馈运不管推托致令误事取进止

过江催发米纲劄子

臣被受今月二日圣旨处分海州军食事臣虽已科拨米斛过江窃虑入闸之後或舟大水浅无船盘减官司不着紧催赶依前留滞有悞军前指準臣遂於次日躬亲过江至瓜洲方见齐旆武琪纲相继入闸及到扬州根刷得朱实张受两纲米一万一千石各已於今月三日以前经过前去外有张球梁平两纲共米一万一千石内有一船装二千石者阻浅在城内撑驾不行臣遂面见向子固即时措置寻雇到客舡二十一只共五千料用一十三只盘减臣随行支与地理雇钱三百余贯仍更支钱一百贯文付两纲押人添助其他篙梢口食差使臣吴弼坐押已於初七日申时起离扬州讫尚有用不尽舡八只存留在岸已移牒强友谅候後纲有阻浅舡只即行盘减星夜赶发前去有转运司差干办公事周伯骏前去塩城县措置海舡臣访问前任知县龚尹曾有官造多桨舡二十余只及裕口羊家寨有海舡数十只臣已令周伯骏访存在诣实劝诱使臣缘本所见计置张子盖军马合用钱粮并据楚州申张玘人马亦已到涟水县合要科拨粮食臣若更行起发至前路却恐妨旷本职已於初八日巳时回归镇江府讫取进止

过江措置津运劄子

臣今月初五日戌时准今年五月二日尚书省劄子节文为海州被围诸军阙食等事五月二日三省同奉圣旨令洪适龚涛强友谅体认军期急阙火急科拨躬亲措置津运星夜前去如有违悞当重寘典宪人吏决配仍具已起数目日时闻奏臣昨於四月十九日被受省劄奉圣旨除淮东总领臣於二十日起离池州至当月二十六日到任交割职事闻海州被围虑恐军士乏食即时检索山东粮运案牒理会缘自海州被围以後未见随军运副龚涛移文措置

般运虽前总领官徐康拨下张受朱实两纲米一万一千石令往楚州?城县分付龚涛津运入海尚未离镇江府岸臣深虑粮食不继海道或阻风涛不可预期遂再於四月二十八日根刷得新到宣州广德军张球梁平两纲并四月三十日齐僦武琪续到两纲通前六纲共计米三万三千五百九十石节次前後差使臣丁用狱子王恩管押过江牒淮南运副强友谅再差使臣催赶至?城县交付龚涛津运入海如有纲舡重大运河浅?不能通行即令用小舡般博据强友谅五月初二日申已交割得张受朱实张球梁平四纲差使臣朱德催赶前去讫今所准圣旨指挥令火急科拨躬亲措置津运臣今再於镇江府发马料一万石及改拨宣州吕青押到米一万石前去应副李宝诸军食用外臣躬亲渡江催督漕臣同共赶发别具奏闻次

支解围军兵犒设劄子

臣恭准圣旨令倍支海州解围军兵犒设及节制军马行下支散宿卫前军回归人犒设一次臣取会到本军见管五千一百六十人其四千七百四十三人系同张子盖到海州解围其四百一十七人系在楚州不曾过淮之数臣将到海州人倍支在楚州人各支一次犒设臣昨闻今春所犒军士有统将隐没不沾实惠者致使介胄辛苦之人不无怨望又有增添冒滥之弊臣遂堆垛钱粮在镇江府丹阳馆谕统兵官分列队伍臣躬亲就馆逐一点名当面支散虽自来犒设例是折银臣窃见军士暴露之久当此隆暑班师道过镇江不能久留若得银子仓卒难卖见镗无以应急使用臣辄将军兵三贯以下犒设之人尽支见钱其使臣三贯以上者即以分数支折兼镇江府前军右军太平州武锋军先系遣发应援海州被围在城及张子盖到城下其前项军马并皆出城同共追袭立功今各同张子盖大军回归虽五月二十四日旨挥未曾该载臣辄行比附倍支讫欲望圣慈特赐指挥施行

盘洲文集卷四十一

卷四十二

钦定四库全书

盘洲文集卷四十二

宋 洪适 撰

章奏二

招安海贼劄子三

今月二十七日据海贼徒党丁十二潘成陈十二賫到头首人殿前司游奕寨効用王先等状称各有老小无所供给兼为请受不平逃走乡下作买卖为活为见官司收捉紧急难以存居因而往海同百姓一行人船只借过往船只米粮供给口食即不曾刼盗官司物件先为见今年四月内得蒙都督相公钧旨差出朱清训练张弼秀才沿海招安作过之人仍賫本府黄旗一面上书江淮都督相公招安在海作过人船并榜文沿海处贴挂是先於今年五月十八日在海洋行使舟船到地名洋山收取水浆吃食只见土豪陈立舍前贴挂榜文系是江淮都督相公钧旨招安榜上称说日前在海作过罪犯一切不问是先当时收榜上船说谕衆船首是江淮都督相公有榜招安船衆人伴即便依随先等有船一十只计八百余人当日行使舟船到大七洋内仍见诸处寨下官船不计其数隨後赶捉先等船只至晚日夜失?各自分散不知衆船下落先今賫押人船二只面濶一丈八尺计一百六十余人舡上有军器家事等投献都督相公府充水战军前使用先船内有老小单身难为看管乞差本府训练官前来沿路管押人船到府参候指挥臣以事非本职不敢辄受令径诣都督府投状其人云在明州时便有意招安但以路远难通来时船主令抱状投告总领恐前途艰阻身到行府不得乞总领所差人管押人船前来不愿官军同去臣怜其来归却恐军将贪功妄行擒捉遂受状差人押两名取船押一名往都督府方欲遣行之间忽云一人在路为水军所擒一人以此潜匿不敢出臣恐其猜畏舟复藏避遂请到水军统制冯湛询问事因冯湛云海道与贼船十只相值获其三只追五只至明州洋沉船而遁其两只不知下落今所投即此两舟是日冯湛管押捉到贼党入城在路逢见同伴一人遂行擒下冯湛既押所擒一人到臣官舍所藏人亦隨後前来臣遂唤三人到冯湛之前冯湛欲借船一只管押两名前去取船其人云只乞总领差人自行驾船限在来日到岸冯湛见其言如此遂称更不去臣所虑官军利其财物别致生事或贼党惊疑移舟他往遂更不令冯湛管押又虑其人反覆再三以美言陷之云汝辈多因商贩折本无路得食不得已求生国家爱惜人命本无杀意番人投降尚自各与官职多方存恤况汝皆是本朝人民都督府已有旗榜招安汝辈远来自投定作好官不须疑虑更生他心其人拜谢臣各已犒设即差本所使臣任庆同兵级三名管押潘成陈十二前去取船及差人管押丁十二前去都督府臣候船到即亲至江头拘收军器以钱物酒肉等第犒劳令镇江水军差人防逻听候都督府指挥臣候船到别得具奏外

第二劄子

今月二十九日酉时本所差去使臣承节郎任庆取押到招安人王先海船二只到岸船面濶一丈七尺在船首领以下一百四十七人内五人元系军身余人并系温州等百姓各是少壮虽王先称愿充水军使唤其间多有驱虏到人已申取都督府旨挥或行?放或候防秋事毕发遣臣逐一抚存犒设钱米酒肉差镇江水军防护不致生事其船欲到镇江府数十里外逢见都督府总辖福州海船使臣王城硬将旗榜令受本人招安拘栏占夺不肯放行臣亲至江头差拨水军步将范淳西津巡检刘宪文及弓兵等人六次催取方始发遣前来其船内有纸甲一百一十副枪刀弓弩旗鼓等军器共一千五百六十八件并系王城强夺前去见行追取所有逐人单名器甲细数已开具申三省枢密院

第三劄子

臣准都督府劄子令将海船王先虏到人放令遂便臣今月三日躬亲至江头唤【缺】在船上人逐一审问数内孙元等二十七人各乞归乡再令王先审辩称系是新近虏到之人即非元来徒伴并各供责文状臣已支散钱米出给公据放令遂便乞其见在人除首领三十三人外其余梢工水手八十五人虽亦有系虏之人缘在贼中日久各自欣然愿充水军并皆强壮臣见行差人管押前去枢密使行府听候指挥

会计军储劄子

臣契勘淮东分戍诸头项军兵及新到步军司人马除就镇江支请外月用钱十二万七千余贯米四万石马料六千石臣取会到诸州见管数目算计至九月十五日终泗州有桩积米七万石未系支遣之数海州有米四万六百石可给军食一年有钱银会子五万贯料七百石可支一月诸州共有米十四万四千石可支至十二月终有钱银会子二十七万贯可支至十一月中旬有马料七万七千石可支一年并系臣本所节次改拨前去缘镇江仓库目今储积及诸州未到钱米并皆不多难以预桩淮上七月之费今等待续到纲运及那减镇江钱米趁未闭闸起发过江准备岁前支费必无少阙所有来年军用如遇闭闸则依去年例候江东纲到就拨往瓜洲卸入新仓令淮南漕臣宋晓措置建运或纲运不到则令陈汉用浙西舟船将镇江钱米运在瓜洲津发所有漕运必不致有误军期但军前非泛支用并是就支大军钱物不可措约临期旋行措置科拨伏乞睿照

戍兵请给驱磨阻滞劄子

近准御前劄子戒敕帮勘戍兵借请因驱磨欠剩阻滞事臣已即时取到粮审院状奏报乞臣尚惧声说未至详尽仰勤圣虑臣契勘镇江诸军出戍自来不曾借请亦不分擘券历每遇差出即都统司量远近以人数移文总领所预勘两月或三月钱米每军逐将攢类姓名造成券旁发到粮审院即时批放或出戍日久则又接续再勘除月粮米折麦钱并新添钱米存留养赡老小外其预勘银子及公据系出军之日就镇江一顿支请转变钱物置办路费及分留赡

家其二分见钱及口食米即就军前逐旬支请至次月全军过勘大历本将即以出戍人预勘过钱米自行按月回落及军马还归逐月随衆勘请若回归在预勘月分之内则以熟旁改界就镇江支请更无合并驱磨及回纳不该欠剩等事与它处军马体例不同或遇起发急速本军造券不及臣尚有先次借支应副者不敢使之怨望失所伏望圣慈特赐睿照取进止

论招军之弊劄子【隆兴二年自淮东赴行在供职上殿】

臣窃谓自古大有为之君志先定则事必成然而事贵乎成不贵乎速高宗伐鬼方三年而克之越王至于二十载然後刷会稽之耻方策所书明验可考今日中兴之事非无机会然而未遂恢复之功者岂以兵未强而财不丰耶臣世受国恩无以补报幸获进望清光不识忌讳辄以本职而进狂瞽之言伏望陛下赦其罪而听之臣伏见今之士卒老疾几半今之钱穀枯竭可忧军兵日得百金分其半以出戍既不能给其家又不能餬其口邦用无余难以增益臣愚欲乞选从臣衔威命徧至诸军汰其老疾计所减之数量均百金之人庶其驩心踊跃銳气增倍或谓兵贵虚声何自苦而示寡此徒自欺尔又诸军之籍虚伪相仍今既未能一洗旧弊则新弊不可不革军效湮刺其来已久掌兵者尚犹盗赢余以为田宅之资苞苴之奉况荡然不加绳察乎效用日得之饷三倍於兵故近年应募为兵者甚少而为效用又不刺手虽有臣寮申靖而将帅不复遵行姑以扬州帅司言之所谓效用六百十四人岁费大农钱几七万缗米六千石但能挟弓负剑助帅臣驹从尔又镇江大军一日发营中子弟数百辈喝名于总领所便入武勇伍中若今日称甲明日称乙何以辨之臣愚欲乞先降诏旨赦其虚冒之罪命所遣官凡未刺者俱刺之淮郡所招今都统司择偏裨分掌每满百人则行拨隶而兼听所招帅守节制仍乞在内则承旨司在外则总领官季以新招之数申上有违新降三七分招军旨挥必罚无赦如是则兵可习而强财可省而丰此而不革则军籍益伪国费益屈无以善其後矣伏望圣断谋之大臣尽革积习之弊庶几千虑一得少副陛下中兴之志干犯宸严臣不胜万死

论东人来归事宜劄子

臣尝委曲询访东人来归之故或亡命山泽为彼指名者或仍年旱蝗不能求恤者或亲故南来牵连誑诱而至者其人盖以无兵刃衣甲不可□强敌之锋故欲效王师归雄其乡报复剽掠申其素志然扶老携幼流徙失业口累之衆者衣食不能自给间有所携皆轻价以售之贫者则三五为羣收拾弃菜於巷陌之间官虽计口给粟一家不踰五斗兵将又或折辱恐无以固结其心近者镇江有裒钱买舟欲逸而获者臣虑其日夜企而望归迫于饥寒计出无聊乘隙伺便反以为害欲望圣断思患豫防参酌汉五属国晋宋侨置郡县之宜专设官吏使之各有司牧怀我乐土不致蜂蛰作於怀?天下幸甚取进止

纳供军纲目劄子

臣弩钝无庸误被使令总军赋於江淮之上值师旅增益财用窘阨黽勉二年仅逃罪戾今蒙恩归班凡供军之事不敢枝蔓吏文以渎乙览敢删取纲目为要略一编纳之合门伏望圣慈俯赐宣索取进止

转对劄子

臣准御史台牒轮当今年五月一日视朝转对须至奏闻者右臣仰惟陛下踐阼以来务崇俭德始讲郊丘之礼专以诚意交神塞明车舆仪卫下至官吏赐予率从撙节臣职在太常不容箝嘿切谓古今不相沿乐金石八音不入时俗之耳故通国无有习其艺者而听之则倦且寐独以古乐用之郊庙尔昔者竽工鼓员不应经法者孔光何武盖尝奏罢於汉代前史是之今所用鼓吹警塲诸工凡一千一百五十有九人有司已乞三分减一独是肄习踵例尚存九十八日夫驱游手之人撝金击石不当律令顾亦安能使凤仪而兽舞而所用日给之镪为缗一万三千三百有奇诚为虚费臣愚欲望圣断只令肄习一月亦可以成声中节不致阙事殆督费之一端也谨録奏闻伏候勅旨

礼部论王振服色劄子

臣契勘本部见行右宣义郎致仕王振乞引用覃恩改转服色事朝廷送下指【缺】 本人元系靖康元年於客人处买到代州纳白米空名将仕郎补帖经开封府书填续因男修武郎王洙遇恩累封至宣义郎昨来吏部勘当检准绍兴十三年旨挥纳钱及六千贯之人许行注授无人愿就残零阙据本人齎到绍兴七年行宫吏部告示照得系纳钱及六千贯之人依前项旨挥合行出官某切详所缴行宫告示系本人自陈称有朱钞见得纳米价钱当时吏部为无元书填官司申状及公据令依去失法召知识官二员委保方许参选本人一向不曾召保到部若使可以注授残零窠阙出官必无缘陞改至承务郎以上可以该得服色恩例所乞难以施行取进止

盘洲文集卷四十二

<集部,别集类,南宋建炎至德佑,盘洲文集>

卷四十三

钦定四库全书

盘洲文集卷四十三

宋 洪适 撰

章奏三

同周操殿院乞对劄子

臣等今月二十一日蒙宣赴便殿面奉圣训令讨论环卫官制臣等今将祖宗典故及唐初十六卫参考条具粗备臣等二十九日系轮当学士院宿直欲望圣慈特赐宣召许令面奏开陈因革事宜伏候勅旨

讨论环卫官劄子

臣等面奉玉音讨论环卫事令将国史会要及唐制参酌画一在前窃许本朝踵前代设环卫官太祖太宗朝常以处将帅及降王之君臣自後则多以皇族为之故三朝国史以为官存而事废在熙宁中曾令边将充摄在天禧中亦曾令内职兼摄只是充补班列而已尝闻靖康初以外戚正任官俸禄太优令换环卫继以俸薄为言遂复仍旧虽兵火之後旨挥不存而朱孝庄制词可以考验仰惟陛下圣虑宏远修饬戎备欲择赳赳之臣置在左右叩其智谋观其技艺以备将帅之选甚盛举也臣等以谓国朝自有设官之名不必远取唐制太祖太宗故事盖可法则今若径行换授则恐有减俸之患欲乞只令如合职兼带若节度使至刺史则带上将军横行遥郡则带大将军正使则带将军副使则带中郎将又以下则带左右郎将各分等次【缺】 职钱如得允当所有官府吏属请给人从等事乞令吏户兵部同共相度以备采择

一唐制十六卫之将军各一人从二品大将军各一人正三品将军各二人从三品掌宫禁宿卫之事长史各一人从六品上掌判诸曹廩禄军团等事亲勲翊三卫凡五府中郎将各一人左右郎将各一人校尉各五人每校有旅帅二人每旅有队正二十人武德正观世重资?自二品至五品子孙分补三卫又有诸曹参军及司阶中候司戈执戟谓之四色官

一检照国朝官制有左右金吾卫左右卫左右骁卫左右武卫左右屯卫左右领军卫左右监门卫左右千牛卫凡十六卫各有上将军从三品大将军正四品将军从四品中郎将郎将长史等官按三朝国史云官存而事废北朝官旧有归德怀化大将军将军郎将司候司阶司戈後又增保定清远奉义归义广化之名将军以下又有武宁安化奉华保顺之名又有宁远安远保安保宁大将军怀德奉化将军怀忠武安郎将保忠司候保和保信司阶顺化安德司戈皆以蛮夷朝贡受官者充

一俸禄之制上将军六十贯【皇子则一百贯】金吾大将军三十五贯诸卫大将军二十五贯【皇亲则六十贯】将军二十贯【皇亲则三十贯】中郎将十三贯

一中书备对该载宗室诸卫将军换武者换诸司副使绍兴法该载环卫官换赠【缺】诸卫上将军换节度使【缺】郡团练使诸卫大将军换遥郡刺史至武义【缺】
诸卫将军换武翼大夫至武义郎

一建隆元年以登州团练使李万超为右武卫大将军前均州刺史潘文通为右骁卫将军前【缺】州刺史韩召为左领军卫将军其後石守信张凝石?焦继勲刘重进仇超白全绍翟美王晖陈守习等皆为诸卫将军除授者不絶亦有除环卫官致仕及外任者事具实録

一太平兴国二年四月安远军节度使向拱换左卫上将军制词略曰王者念宗社之重思将帅之贤内外迭居以均劳逸安远军节度使向拱等事我先帝时惟宝臣入则参帷幄之谋出则奉节旄之寄粤予冲人肇承丕业岂敢以藩镇之任重烦旧德也式罢藩宣之寄俾昇环列之荣拱承德并可左卫上将军美可左骁卫上将军廷逊可右骁卫上将军先时张永德帅邓张美帅沧刘廷逊帅澶至是皆罢节制归环卫其後祁廷训韦绦【缺】周勲苏海等除授亦不絶但比【缺】

太祖朝极少事具实録

一天禧元年御史台言常朝武臣止一二人或请告则絶班欲乞增补诏以【缺】宅使慕容德琛为右监门卫大将军西京【缺】藏库使孙正辞为右领军卫将军崇仪使刘守节为右屯卫将军染院使韩景佑为右监门卫将军供备库使宋可言郭仁浦为右千牛卫将军

一嘉佑二年以未有差遣诸司使摄大将军月支食钱七贯副使崇班摄将军月支五贯候有差遣别差不得过二十人

一熙宁三年诏今後南班有阙差陕西河东替回曾有战功路分都监至和城堡寨崇班已上充摄如不足即於见在枢密院知州军路分都监已上得替未有差遣人内差摄事并具会要

一中书备对该载元丰二年十六卫大将军二百九十四员将军一百六十二员并系宗室

一绍兴十一年右金吾卫大将军朱孝庄换观察使制词曰仰惟渊圣皇帝即位之初监于先王成宪进读之臣有言今之节度使古之诸侯也近时庸人孺子或以恩幸得之於是凡外戚之居正任者易畀环列侍卫之名虽号耆能率遵明训朕乘兴运事异前朝义有当然睠非骖典右金吾卫大将军提举洪州玉隆观朱孝庄乃钦成兄弟之子靖康中宫之属谦恭母怠忠信自持通练老成见推四姓恩厚於尔匪曰予私尔纵毋言朕志已定其复廉车之秩以为戚里之光可汝州观察使有撰述文字乞奏对劄子

检会本院见行一司条令内一项翰林承旨学士职当撰述代於王言事体繁重合有上稟睿训文字若循习旧例俟合门引班显见稽缓今後仍许先次挑班上殿今来臣系太常少卿兼权直学士院有撰述文字合行奏稟欲於今月四日上殿敷奏缘臣系卿监官难以径牒合门伏望圣慈特降睿旨令合门依本院故事引班上殿奏稟伏候进止

乞改定乐章劄子

臣据太常寺申乞修润将来郊祀大礼乐章各已修撰进呈徽宗皇帝酌献一曲系绍兴二十八年光尧寿圣太上皇帝亲制其间如烈考合改作烈祖及其他词句亦有当改定去处依故事系请御制改定今録连在前乞赐圣裁修改降付学士院施行取进止

乞进胙德寿宫劄子

臣窃考礼经古者大夫摄祭君不亲行则当归胙而诸臣祭其家庙及都家祀其山川亦皆致胙於君谓之致福载在周官则都宗人家宗人掌其事祭仆展而受之膳夫受而膳之後世礼文多有废者仰惟陛下以圣继圣盛德重華庆超古昔初讲郊禋之礼谓宜进胙慈闱并受帝祉臣妄进瞽言欲望特赐圣裁如或可采则乞旨挥有司草具仪注进呈取进止

论郊回用乐劄子

臣勘会今岁郊祀大礼依逐次典故用仪仗鼓吹已赴警场振作所有礼毕车驾回銮导引振作亦合用军乐端门肆赦所设宫架系合用雅乐并与燕乐不同难以一例不用伏乞圣裁特赐处分取进止

乞减乐员劄子

臣伏覩绍兴二十八年郊祀用仪仗一万五千三十人鼓吹警场一千一百五十九人八音二舞乐工四百五十九人近降旨挥仪仗减半臣前曾申请鼓吹警场人已三分减一旧例乐工及鼓吹警场人肄习九十八日臣又曾具奏减作一月所有乐工凡二百六十人太常有籍三十六人有月给钱粮所阙一百六十六人旋行招补至肄习之日日支会钱四百文尚有招未足人数缘窜名籍中可以规免临安府行铺名役不无计嘱之弊臣再行研考除登歌坛上乐四十八人二舞九十人不可减外坛下宫架二百七人今欲减省六十七人凡琴二十人十人可减瑟十二人六人可减笙二十人四人可减箫十人六人可减笛二十人八人可减篪十二人六人可减埙十人四人可减歌二十人四人可减钟磬四十八架十六架可减分诣九宫贵神太社太稷给祠一百十四人四十五人可减既减员得以省费而於事神之礼初无所阙更乞圣裁取进止

乞刺壮健乞勾人劄子

臣伏见临安府街市间乞丐人颇有壮健者恐是盗贼徒党托此为名以伺察人家之贫富门巷之曲折今犂馘之下时有剽刼之患不可不曲为之防臣愚欲乞睿断行下临安府选委官属因赈济之时鸠集乞丐之人尽皆拣择如非老弱疾病其人可用即与刺充厢军既免其啼饥号寒之苦若使有穿窬之志亦可使灭心铄谋矣轻瀆宸严臣不胜战惧取进止

乞措置海道劄子

臣伏见淮上斥堠不明将帅无申发文字边骑渡淮经涉七日朝廷方知今已据楚州若分兵取他道潜攻通泰朝廷亦无由得闻所虑自彼过渡便近平江兼恐海道不防贼船来往今平江别无重兵守臣又已被召李宝水军稀少缓急难以倚赖伏乞特留圣虑过为堤防干犯宸严臣不胜惧取进止

乞降亲征诏书劄子【十一月十三日】

臣十一日面对曾具奏陈乞降亲征诏书激励士卒至今未奉处分所虑敌人已入淮南两军相持以日为岁若非战胜无以使其革心所有诏草辄敢冒瀆天听若或施行乞许臣録呈三省别行进入其间叙述圣意未尽去处更乞处分取进止

进视师诏劄子

臣伏奉御笔改定视师诏臣再有愚见增减数字各已贴说欲候进入尽降窃虑稽缓辄已擅行书写大字诏本若蒙圣意赐允即乞径付三省枢密院如是未当即乞再赐御笔批抹付下臣不胜死罪

请祠劄子【中书舍人】

臣不避诛戮冒犯天威伏念臣与汤思退旧不相识思退以臣叨中词科在其前尝遭秦桧无事废锢连蹇在外二十余年所以召臣入朝供职臣既猥居卿列摄事翰苑叠因宣召误受眷知遂蒙亲擢寘之从班臣方念糜捐无以图报乃闻谈者指为思退之党臣既备数禁近不能尽忠奉公?于朋比乌可苟逃谴责欲望圣慈特赐恩造容臣以祠禄省愆於山林之下仰瀆圣听臣不胜战慄之至取进止

辞免兼直院劄子【闰十一月三日】

臣今月二日准尚书省劄子奉圣旨洪某兼直学士院日下供职臣闻命震惊罔知所措伏念臣摄事三时尽穷鼠技仰不能宣布圣意鼓动四方而今之世俗好恶各有偏私毁誉初无公道臣之代言又不能俯合衆论常致诋嫫兼内外两制文书填委日不暇给臣之宜去久矣特以独员无所辞避今者幸除翰长私以自庆臣已即时解印罢权申知三省岂图恩渥反有兼直之命臣若强顔贪冒则是宜去而留因退而进汨丧廉耻无以自恕欲望圣慈怜其才尽察

其由衷曲赐矜允使免讥议干犯天威臣罪当万死取进止

第二劄子【闰十一月六日】

臣今【缺】 辞免兼直学士院恩命准尚书省劄

子【缺】 涉猎之学文辞芜糲叨摄视草积有愆尤既已形之台评又【缺】 之疏非圣造保全特赐庇护则臣虽窜黜未足塞责已尝沥恳求去仰蒙天语曲留臣以军事方作而掌制独员不敢坚请谈者又谓臣来自淮东奏陈张浚妄费致浚因此罢相党枯骨者视臣如仇敌故投匭之章连渎渊听幸今翰苑已有长官书诏亦不壅并尚令厠迹实为冗赘兼臣屡有封缴浸招怨怒若不知退必致颠危欲望圣慈施天地之大恩全小臣之终始畀以一郡使之推行德泽少助涓埃如蒙别有使令臣死且不避冒犯威颜臣不胜战汗之至取进止

盘洲文集卷四十三

卷四十四

钦定四库全书

盘洲文集卷四十四

宋 洪适 撰

章奏四

乞罢中书舍人劄子

臣能薄材下靡有寸长过叨误恩备数两禁常惧无以图报天地之德惟知奉公守职不敢附下罔上以邀誉妄发近因缴駁莫汲差除与朝廷之意背驰臣有语言妄发之罪宜在谴何之域即具劄子乞赐黜责缘未得班次已实封投进未蒙施行伏望圣慈怜臣孤立察臣无用速赐罢遣庶使么微之踪不致异日颠沛冒犯天威臣不胜战惧之至取进止

论边事劄子【十二月十四日】

臣待罪从班获迓清闲之燕颇亦预闻陛下英武之略得以仰窥圣志之万一然人材兵力与夫帑庾之积俱不能上副宸衷致使陛下委曲以结和好臣又以见陛下矧方为圆抑刚为柔者凡以仰奉慈宫俯安黎庶为宗社计而然也臣区区爱君之心惟愿陛下垂意内治常若临敌日加一日则善後之策持久可成和战之事今姑置而未论然所以误边计而弱国势者岂不究其所自乎既备御略定若不推原误国之人奋发刚断大明诛赏则臣下无以惩戒国势无以振起臣敢昧死略言之窃观敌人犯淮终成和议如期敛兵初无过外邀求有以知其本无侵犯猖獗之意傥泗州不先撤戍彼必不能近淮既近矣而边城守将不望风遁逃则彼必不敢直渡既渡矣清口之战傥山阳大将出师以掇急则魏胜不死若又有功则是淝水之役也敌既留连淮上两月惟六合有坚守之名其他例循三舍之避略无尺寸之功傥能出奇小胜亦足以挫其锋而议和有气此之不能及王拚已回乃有饰词欺君者是数等之人欲望睿明间出奎画声其罪而治之则天下欣快矣又两淮逃徙之民散在江浙饥冻濒死虽闻故乡可归安能便有生业臣愚欲望陛下特捐内帑分遣中都官往缘江州县於其欲渡之际计口赈之以助其归则实惠沾洽人人知陛下爱之如赤子则驩欣鼓舞变愁叹而为讴歌矣冒犯天威臣不胜战惧取进止

改定德音贴黄

臣所撰进德音其中云正皇帝之尊称为叔侄之敌国今日付出三省所进诏本改尊称作兼称改敌国作与国虽云皇帝者兼三皇五帝之称若摘取两字则文意不显亦是语病又与国虽是党与之国亦有谓之所与之国者臣辄并将所换二字除去却意全而句健或未允当更

乞圣裁

论国书劄子【六月二日御笔依】

臣准尚书省劄子奉圣旨令学士院撰贺大金上尊号国书臣闻之魏杞尝见送伴使云相继又须有报谢使来今既遣贺使臣欲於国书之末带入一句云且谢使华之辱伏乞圣慈特赐处分

辞兼中书舍人劄子【即日御笔依】

伏念臣材智学问无分可采代言之久常惧不称任使之意今既叨居翰苑用之已踰其分尚兼西掖实妨进贤之路欲望圣慈特降俞音俾免兼职干犯宸严臣无任战汗之至

辞免签书枢密院劄子【六月九日】

臣伏蒙圣恩除臣端明殿学士签书枢密院事特降中使宣押臣赴院治事者臣闻命震惊罔知所措窃以赞帷幄之画列股肱之臣上则三阶以之齐光下则与人之所瞻景非有超卓兼资之美者莫宜居之如臣者学不足以达国体识不足以鬯远猷再入帝城独叨恩遇前後亲擢曾无先容镂骨扪心秋毫未报外日入奉清光伏蒙玉音使补政路之阙臣尝跪奏以臣之繇力薄材倘司翰墨之职尚犹可以勉强至於两地重任必当选用老成有才望之人之为之逊避再三私有回天之喜不谓信宿之後涣命竟出局躋战兢罔知自恕之计敢犯咫尺威輒披诚悃伏望皇帝陛下察其无用追寝误恩别求时髦以允公论臣无任祈天俟命激切屏营之至取进止

辞免赐衣带劄子

臣今月十九日正谢伏蒙圣慈例赐臣对衣金带鱼袋鞍马缘臣于今月初九日已蒙圣慈特降中使赐臣笏头金带鱼袋牙简鞍马今来傥或叠冒宠私在臣愚分不遑安处伏望睿慈将例赐金带鱼袋等特行寝罢庶遵彝典不胜幸愿取进止

乞赠高祖劄子

臣辄有私悃仰尘天听伏念臣上世以农桑为业至高祖臣某始奋金羸之志有子蚤世独携二孙远徙州城择贤师修儒业故伯祖臣某以进士起家繇南牀而陟琐闥至先父臣某实传遗训遂入翰林逮臣之不肖兄弟获承先?浸叨显仕盖相继三世矣今追荣之典再及曾祖至於东宫三师独念高祖未沾一命无以为九泉之宠臣该遇覃恩并应副军须皆有转一官公据不及收使欲望圣慈许将前件恩赏回授作高祖父母赠典庶得少伸报远之情干犯宸严臣不胜战汗之至取进止

贴黄 臣检照会要所载李昉赠所生父母王曾陆轸赠伯叔父邢昺赠兄张士逊赠表兄皆非常典系是一时特恩伏乞圣裁

乞寝赠典劄子

臣不避斧钺之诛荐瀆天听臣比以回授高祖赠典冒昧陈乞仰蒙睿慈曲从所请窃闻後省留黄不行臣以蝼蚁之微未有一毫报国而尊祖私情遂以妄发为清议不许连日战悸魂神去干虽亡者不能沾被荣章而已蒙渙许之褒赠则潜德亦以少显九原有知岂不图结草之报所有已降旨挥欲望圣慈特赐追寝干犯天威臣死有余罪取进止

乞罢第一劄子

臣比有狂妄之请为给舍所论即具劄子乞行追寝仰蒙宽恩未赐诛责不避再三之渎荐有愚衷彻之渊听伏念臣始以高祖笃教子孙变犁鋌而为簪笏先臣存日每以恩不可及为言臣幸备数近列有未转两官回授与子弟陞转则内愧于心下媿于泉壤故推述先志求为亡者之荣虽追赠高祖未有前例而国朝会要所载有赠其伯叔赠其兄赠其表兄者皆在常法之外故臣援此典故谋之朝廷始敢仰尘丹扆之前不料竟以妄发遂遭封缴臣身缀政地私请犯分虽陛下赦臣而臣若安然在位则人盖以臣为罪矣臣局蹐战栗家居待谴欲望圣慈俾臣罢免庶几不致复絀清议冒犯天威臣不胜皇惧之至

第二劄子

臣已纳劄子乞赐罢免屏息俟命未见施行伏念臣材无可可用陛下过听擢之机宥未有一言一事可以利国庇民而私心妄发遂奸物议连日恐惧无地自处盖缴章便同简劾事无大小等是为人诋诃岂有身在庙堂之间瑕疵已遭嗤点而犹欲贪荣固位臣虽自恕亦不可得况臣近居封駁之职盖尝以此责人以今视昔何施颜面更玷朝列方陛下大明黜陟申儆在位有臣如此顾亦何所用之伏望睿慈早赐处分许臣解印绶而去则臣未填沟壑之前皆报恩之日月也干紊威颜臣无任战汗之至

辞免参知政事劄子

臣伏蒙圣恩除臣参知政事特降中使宣押臣赴都堂治事者臣闻命震惊罔知所措窃以人君以二三执政图回天下之务非得当世之通儒则安能仰副眷倚之隆而任忧责之重如臣者挟章句缀缉之学仅能不旷翰墨之职而已虽怀尊主兴邦之心而材职不逮触事面墙徒抱微忱初无一得自叨机宥常恐窃位误国夙夜栗栗未有上印之计岂期涣命俾参大政是犹责跛鼃之一日千里则折骨绝筋其亡可立而待伏望睿慈曲赐哀怜改畀真贤不致虚授臣无任

论湖北军须劄子

臣伏见诸路总领所军储并系户部捐约科拨而所得州县之数尚有拘催不足者向来各有桩积钱物可以那融缘数年用兵侵耗已尽今或有以急阙为言者户部亦缘财用匱乏无以应副只是行下令将桩积钱物那融支遣谓如湖北路去朝廷甚远今王炎改除已数月代者犹未定湖广盗贼方梗道路必有阻隔故张宋元以将母为辞惧於之官臣谓今日外患虽少定正恐封疆之内有勤宵旰之忧者要当止於未萌则斯民无涂炭之苦诸处总领所少有急阙支遣失时一夫叫呼噬脐何及臣愚欲乞圣断行下令湖北淮东西总领所开具目今桩积并见管实数及每月合用数目上朝廷及户部核实如委有不足去处即将实有窠名钱物添拨俛使常有一两月储积则拘催按月未至者可以通那支遣仍乞自今以往月具收支所管的实数目申省部稽考无为虚文以图善後所有王炎及臣男槻劄子四纸同此进呈伏望睿览留中免赐降出取进止

进太子册文劄子

臣奉勅撰皇太子册文臣学问荒芜词意拙澁国有钜典无以铺叙缀缉仅能成文干犯宸严不胜战惧谨缮写进呈伏乞睿览更赐处分

纳密院窠阙劄子

臣等伏见吏部员多阙少守选者留滞日月缘右列小官皆非臣等所识不能知其为人密院虽有窠阙臣等不敢容易差注若俟其干乞一一为之取索考核则琐碎失体若徒留窠阙吝而不与则小官仰禄无以进身臣等相度欲将密院知州军总管钤辖路分都监将副等阙依旧存留外所有诸路帅司将领指使川广湖南北城寨主兵官共一百三阙乞发下吏部依格差注如将来密院或欲於其中使阙亦许通用庶几少塞干求之门而开公平之路取进止

辞免兼同知枢密院劄子

臣准尚书省劄子奉圣旨汪澈可除知枢密院事洪某兼同知枢密院事伏念臣材器智虑蔑有可称偶承人乏躡至近辅当陛下励精庶政循名责实之秋臣鞭策弩钝无以自强顾望轻不能服衆力小不可任大战战栗栗常有旷职之虞特以坐席未煖不敢乞身幸今边鄙乂宁少休甲兵之间枢臣已有两员不必更使素餐其间以重误国之罪伏望圣慈特寝兼职庶几可以捄过免蹈大谴臣无任祈天俟命激切屏营之至取进止

辞免撰太子册文赐银绢劄子

臣今月十四日承中使李綽公文奉圣旨以臣撰皇太子册文赐臣银一百两绢一百匹臣偶列近班际遭縟典初无文采可备使令尘玷宝册已积战惧遂叨锡予安敢虚受况当圣政节省之际而备数政途所宜体国窃伏以思尤难下拜伏望睿慈许令辞免庶使小臣可逃贪鄙之刺干犯宸严臣无任惶惧俟命之至

辞免太子册礼支赐银绢四百八十匹两第一劄子

臣等恭遇陛下诰日之吉发册建储幸叨近辅获相盛仪伏蒙圣恩例有支赐窃自惟念臣等不材备位已负素餐方国用不足所当裁损岂敢贪饕锡赉获戾清议所有已降旨挥内臣等支赐银绢欲望圣慈特许辞免干犯宸严臣等不胜战惧俟命之至

第二劄子

臣等伏蒙圣恩以皇太子受册礼成例赐银绢即具奏劄乞行寝免伏奉御笔已经裁减不须多辞臣等近以差充礼仪使及书撰册文尝沾银绢一百之赐辞免不从已遂下拜今又以宿卫行事之微劳复叨腆予实惟稠叠虽臣等材品弩下不足以表仪在列而伐檀贪鄙之刺不可不畏伏望圣慈特从恳请使免讥议仰冒天威臣等无任战汗之至

辞免提举玉牒劄子

臣伏蒙圣恩差臣兼提举编修玉牒臣闻命震惊罔知所措窃以国家受天明命圣圣接武祖功宗德写之琬琰所以纪重规叠矩之懿以昭示万世为不刊之书非台衮儒先未易典领顾如臣者识不足以罔罗异闻辞不足以扬励伟绩尸此笔削人其谓何伏望圣慈俯谅愚衷特寝成命干犯天威臣无任战惧陨越之至

盘洲文集卷四十四

卷四十五

钦定四库全书

?洲文集卷四十五

宋 洪适 撰

章奏五

乞出第一劄子【十一月十六日】

臣闻栋榑桷材之大小不齐者若梓人以栋为桷以桷为榑则覆压之患当在朝夕圣主用材顾岂梓人以比然此言虽小可以喻大臣蕞尔疲弩自幼以缀文为业志在尘窃一第而已不自意留落之後误叨眷知擢在华近若使之掌制代言自视犹可勉强今承人之乏遂超迹列而使之谋王体断国论天下之人皆谓不胜其任黽勉数月曾无?埃之补直情径行浸积仇怨内之既不能识拔实材使之穆穆列布以助成励精之治外之又不能消弭奸宄致令民弗奠居而无鉏治之策揆之汉法当在石庆切责之科倘或强顏患失则误国之罪诛之无益伏望陛下推天地之大恩怜斗筭之无用曲赐保全许臣上印绶而去庶几不妨贤者之路干冒威顏臣无任【奉御笔降诏不允不得 有陈请】

第二劄子【十七日】

臣昨早具劄子乞解机政局踳踰夕未闻天旨不避斧钺再输情愀伏念臣一介疵贱初无致君泽民之学仕於州县米盐靡密畏简书理狱讼尚犹少有所长今骤居高位掌枢独久而政路赞襄上无台揆军国重事岂非材尝试之地小智曲见乖繆浸彰加以心力凋耗事至辄忘若视?空餐不能知难而退则罪愆日积将不可赦伏望睿慈察其不逮赐之归田则未沦沟壑之前皆衔恩之日月游渎宸严臣无任战灼俟命之至取进止【奉御笔再降诏不允】

第三劄子【十八日面进】

臣比殚诚愀冒犯咫尺拜恩私再降温诏衔感之深沦胥骨髓伏念臣疎远冥顽孤立无援偶因清燕浸简宸衷擢之禁途驯至政地奏启之际每蒙嘉獎臣受陛下之知不为不厚常谓粉身糜骨不足图报夫犬马尚能恋主顾臣岂应轻为去就以忘陛下隆天厚地之恩但以臣材局褊浅智识蒙昧既无嘉猷远画可以振起治功而不量其力欲抑侥幸以奉陛下正纪纲守法度之训所虑积日累月寢招衆恶进无所补虚负使令此臣所以日夜恐惧不安其位倾沥肝膈冀回天听伏望圣慈曲赐矜允三渎严威死有余罪臣无任战灼悸汗之至

辞免除右仆射兼枢密使劄子

臣伏蒙圣恩除臣尚书右仆射同中书门下平章事兼枢密使特降中使宣押臣赴都堂治事臣闻命震惊罔知所措窃以人主居崇高之位一日万几独以论相为职盖用人贤否关国重轻系民休戚非百执事之比必有负王佐之材隆岩石之望者斯能副眷注之意古之人居畎亩之中乐尧舜之道其尊主庇民之业皆素定於胸次故达而在上发其蕴蓄可以使是君为尧舜之君使是民为尧舜之民功烈着於当世名誉垂於无穷若是则居其位食其禄仰无所愧俯无所忤如臣者翰墨腐儒断无它技智效一官犹惧不及乃使之代天理物其覆餗可日月冀制命既传羣听已骇伏望陛下曲回渊鉴洞察赤情图任人英勿嫌反汗庶几微臣得逃非据之大谴不至重为天下後世之所诋訾干犯天威臣无任

乞荐举监司郡守劄子【十二月十六日】

臣闻内治之急在乎官得其人今州县之间悦监司郡守皆贤则职事修举下无蠹弊属吏之能否如镜烛形无所逃隐自数年以来非不开荐举之路而风俗未变挟私胜公千请奔竞曲为题目剡章所誉非其亲旧则是蒙恩托契之家或甲乙宛转更相酬报名为公荐多是私心故荐牍虽交於公车有司亦视为文具置籍中书未尝举行臣以弩下偶补台辅之阙见识不明间听不广远近人材臣不能知其一二若贤者退而家食仕者不称其职臣则有罪欲乞令待从台谏两省官举风力堪为监司吏能堪为郡守者各一人三衙知合举材武可守边者一人举而不实甘坐其罪俟举牍既集臣与同列采其名实相称者一一除授或未有官阙则簿录以待有阙日先除各於除书内称列所举者官名它时若有治行着闻则乞推进贤之赏若所举之人或进对不称旨或为台谏论列或为监司案劾或为百姓诉讼验治有状随其罪之大小具举者姓名取旨必罚若宰执徇私隐而不奏者亦乞惩戒庶几实材辈出振起治功天下幸甚取进止

以霖雨乞罢政第一劄子【乾道二年三月】

臣伏见季春之月天多陰晦而盛寒如冬大雨仍降蚕麦秧苗俱有损坏仰轸圣虑致於玉食频去葷味燮理如此罪将安归而又仆仆祈求羞对輿阜傥或患失不去必致人言伏望睿慈特赐谴絀庶几可以调玉烛而格丰年干冒宸旒臣无任【御笔霖雨稍多未至有害於蚕麦降诏不允不得更有陈请】

第二劄子

臣以斗筭之资窃台辅之位夙夜危惧莫知逃责之计涉春以来常陰为沴祷竹宫以迎?像放房缙而蠲门税一月至再矣燮调无状靡所错躬上之则使太官屏常珍而进蔬饌下之则使农夫红女怀耕织之忧臣之罪多矣隆恩天覆不即策免臣上章自劾拱听威命而宸札矜容【阙】降诏之训异於常典衔感陨越【阙】

行汉法罢遣归田图任异材俾熙

帝载则和气感召咎证可消矣干触天听臣无任战汗待罪之至

再乞罢任劄子

臣材劣能下无足算录误叨眷知超居宰揆力小任重自料必致颠隮比以淫雨为害抗章请罪仰蒙圣恩拊以温诏今早再沥诚恳又勤天獎使之安职公议不贷遂玷霜简仰负陛下使令之意虽九死无以塞责伏望睿慈令臣解罢机政以听谴罚之命干犯咫尺威臣不胜震灼之至

辞免观文殿学士第一劄子

臣伏闻已降制命特授臣观文殿学士提举江州太平兴国宫任便居住臣惊传恩旨感涕横臆伏念臣不材无取误蒙简拔辅政旬月曾蔑补报孤负任使浸积过讐窜流遐远乃法之宜岂期优恩曲垂轸恤使之奉祠还乡已为大幸书殿隆名所以宠老臣硕德之去岂凡庸罪戾之人可以叨此非常之渥若或冒处益重疾颠伏望圣慈【阙】寝庶使危踪免抵大谴干犯宸严臣无任【阙】之至

第二劄子

臣伏准合门降制告【阙】臣仰窥制命感涕交流伏念臣窃位台衡【阙】台无补小器盈满福过灾生罪愆既彰难免清议倘非圣明怜悯则尸诸两观未足塞责臣自闻宠渥已沥恳辞局踣至今未蒙追寝夫书殿美名【阙】优禄皆非臣所当得若或贪居冒受则大谴大呵益重颠覆伏望圣慈特赐处分所有告命臣未敢祇受

辞免知绍兴府第一劄子

今月二日伏准递到尚书省劄子七月十八日奉圣旨除臣知绍兴府臣踧闻宠命不胜战兢伏念臣材力絀薄智术乖疎比自入朝独叨眷遇超居宰揆夔理无功百谪既盈罪当窜殛圣恩寬大委曲保全奉祠还乡才逾两月敢谓轸记不忘即加选用扞襟感泣何以论报念稽山密拱行阙实推雄藩岂伊罪戾之余可堪师帅之任伏望圣慈改授真材用协羣议免使孤踪重罹颠沛干冒宸严臣无任陨越俟命之至

第二劄子

臣近具奏劄辞免知绍兴府恩命今月二十二日准都进奏院逦到诏书一道伏蒙圣慈降诏不允者臣伏读圣训感涕交流伏念臣疎庸之资尝试无状狼狈去国方此省愆宸眷不遗屡垂简记亟加擦拭付以大藩仰惟天地之隆恩即当闻命引而道载念陪京之重夙称谋帅之难而臣闻望素轻谴呵未久深虞旷败复累生成辄沥愚衷浣干洪造伏望睿慈怜其无用许令依旧奉祠庶休田里之居获享治安之乐所有恩命臣未敢祇受干犯天威臣无任感戴战

惧俟命之至

除绍兴第一手劄子【八月四日】

臣入朝二年居辅弼之官十阅月以弩钝无用之资识不足以烛微才不可以任重独蒙陛下眷知异等宽其不逮之罪温颜殊礼常赐称奖臣殚智竭诚亦欲尽死以报奈何福过灾生招致人言上惑聪听圣恩宽大不忍窜逐使得以秘殿真祠优游里閤臣方惧叨縻廩稍无所云补岂意简记之隆付以近镇惊惧感泣不可具言已沥忱诚恳祈寝免臣犬马恋轩之情虽食息不敢忘隆天厚地之恩但以得罪去国不敢奏牍辄至冕旒之前今者既蒙睿慈再加收用故敢略披梗槩臣蝼蚁贱微衔戢恩渥何以图报干犯宸严臣无任战惧之至

第二劄子【八月二十二日】

臣近贡免牍仰扣九阍伏蒙天慈赐之温诏臣素叨眷遇之异仰惟选用大恩便当即日上道特以会稽近藩众所指目而臣罪谴之余去国未几若或贪荣疾趋必致重遭讥诋辄敢稽留诏命复布悃诚已别具奏劄乞赐施行伏望圣慈察臣愚衷赦其再瀆之罪臣干犯宸严不胜战惧之至

第三手劄子

臣比辱误恩俾守辅郡荐殚诚悃弗获俞旨不敢重干威听已祇拜告命取信州路自衢入婺迤邐到越谨具奏禀伏乞睿照

第四手劄子

臣今月二十一日准省劄奉圣旨令臣疾速前去之任臣自叨除命以言者方在要路实有所畏两具免牍尘紊渊听仰蒙诏旨不允臣方敢治行偶臣以感冷卧疾稽留数日遂至再勤圣训臣已即日就道伏望睿慈特赐原赦

到任手劄子

臣叨拜恩除去【阙】城不远天日在望犬马结恋之心非不愿一瞻清光少殚恳悃盖以人之多言必有讥议故不敢陈乞过阙今已到越视事唯知鞭策弩钝庶几少副任使之意瞻望阙庭臣无任感恩激切之至

盘洲文集卷四十五

卷四十六

钦定四库全书

盘洲文集卷四十六

宋 洪适 撰

章奏六

请祠劄子

臣蒙恩守越亦既半载不敢养高尸禄事无巨细必躬必亲将期寸效仰副器使而到官以来偶与风土不相宜无月不有寒疾气血顿衰髭鬓俱白近因冒冷每夕出汗饮食减少筋骸羸瘁自节假之後在告又踰半旬深惟辅藩重寄非卧痾之地若或因循旷弛必致不免大譴夙夜忧惧心如焚灼欲望圣慈察臣诚悃赐臣祠禄以归休里巷庶几访求药餌不致遂委沟壑干犯天威臣无任战栗俟命之至取进止

秀王夫人薨慰劄

臣恭闻秀王夫人奄忽薨逝仰惟圣情不胜哀痛臣忝居旧弼密迓宸居不获随班称慰臣瞻望阙庭无任屏营之至

慰庄文皇太子奏劄

臣恭闻皇太子奄忽薨谢惊传凶讣无不惨伤仰惟陛下笃天性之爱念国本之重圣情悲切何以胜处臣忝居旧辅尝迹班联追想慈仁笃厚之德金昭玉粹之姿含酸饮泣不能自己恨以身在外服不得奔走储宫哀临伏望陛下归之天数特抑哀悰臣瞻望阙庭无任屏营之至

请祠第一劄子【八月十日】

伏念臣待罪会稽行且满岁竭力奉职仅逃旷弛缘郡治凿山作室夜气与平壤迥殊臣孱劣之躯早衰易病秋风稍紧便已伏枕而比年以来目昏花而不明耳作声而重听视烛下之牒讯庭前之讼顿觉费力日以滋甚倘不【阙】

休息【阙】遂沦於鬼录加之妻息妇孙之衆呼医求药项【阙】今戒寒在辰惴惴然有故疾之忧苦又卧痾【阙】废事瘵官必致大譴是敢披沥胷臆仰投君父伏望圣慈赦臣罪戾许臣奉祠而归少賒殒踣之期实出乾知之造干犯宸严臣无任战栗俟命之至

第二劄子

臣比殚诚恳觐望丛祠【阙】大庭未闻俞允重念臣治越以来黽勉职守讼诉不曾淹留囚系亦复稀少而蠲削馈遗节省费用钱谷粗有储积支遣不致阙乏非是托故避难苟求安便特以蒲柳之姿望秋先衰深恐入冬又复多病兼拏累之衆率皆不伏水土药裹关心略无虚日尽室於此不宁厥居臣之事君靡容有隐辄犯再瀆之诛复披悃悞庶几得遂前请若或圣慈未听臣投闲置散则恐便乡去处别有使令乞赐选择尚期罄竭图报万一尘紊圣聪臣不胜惶惧待罪之至取进止

自劾劄子【十八日】

臣近者累章乞祠蒙恩降诏不允已具奏牍欲申前请忽见李大正罢章臣又不能自恕辄敢复干威听臣伏见今日仕宦莫难於作县臣所领郡独会稽李大正其吏材治绩为八邑之冠臣尝草荐章乞行旌擢未及投进缘其人赋性【阙】

肯任怨以革弊拒却请托摧抑豪右虽诸监【阙】亦奉法追治略不假借故人多怨之自柳大节到【阙】中怀私意轻信谗言多方捃拾皆无事实却【阙】

二月本县推排不合减退浮财及今年五月【阙】必有情弊令婺州追押录以下十余人鞫勘李大正既经朝省声冤乞移狱未见施行臣遂与之备申盖所惜实材能吏无辜冤抑即非容庇奸?与之之地今柳大节已遭论列将及两旬旋作日前按章罔上行罚以伸其私愤所谓和买即是转运司备坐都省批下未申状所乞依上虞三县例自物力十五贯均数臣为见此系叶顒知上虞县日所行百姓既以为是攀援有请朝廷既令施行州县岂敢违拒臣既已依禀行下亦曾榜示诸县候人户有词诉即类聚看详续行申明改正今来柳大节以此归过於李大正而劾之大正既已放罢臣亦不能无罪臣已先次发遣家属归乡将职事牒以次官主管见今家居待罪伏望圣察特赐罢黜施行干犯宸严臣不胜震惧之至取进止

奏水潦劄子【八月二十八日】

臣今月二十七日得转运司报奉闻圣旨累次询问浙东被水伤损禾稼仰见陛下忧民之诚意伏念臣所管新昌嵊县因闰月中旬大雨接连台明诸山相继发洪下流至曹娥江又值潮大内外水势相合故三县临溪皆遭水患臣已将公使激赏库储积到钱一万贯拨入常平案专充赈恤支用差司户何万同县官逐一相视量损坏屋宇支钱修盖计阙食人户给散钱米讫自此数旬之内连并淫雨虽三次祈祷得晴不三数日又复雨作遂致水潦前後盈溢有傍江乡分已即时差官开掘塘岸泄放缘会稽数邑少有高昂地段农民并力撩救收刈所积湿稻又复生芽在田者皆为水损目今祈祷再得晴霁已三日尽皆乘急摊晒打簸若自此无雨尚可收拾残零稻穗统计绍兴八县田亩除早稻中稻丰熟外晚稻居十分之四今来所损约已一半本旬军人打请正当霖雨未晴之际每石米价顿增一贯虽取会到逐县被水乡分明具回申投运司未有田亩子细数目依条八月三十日人户投状即行核实检放伏乞睿照

契勘诸县发洪水去处因暴雨冲拥【阙】石坍毁田亩复为溪坑非数十年逐旋锄【阙】不可复耕及有潮水冲打坵角入江者自来转运司只是枝蔓行遣不肯从实倚阁致使农民无【阙】税实为经久之害【阙】看踏到田段数目【阙】伏乞圣察

再奏被水人户劄子

臣近遣官往上海新昌嵯县振恤水灾逐一循行了当缘山水夜至冲去茅屋弱妇幼子死於非命共四十九人各已等降给钱使之修葺葬送自六贯至一贯共计六百三十六家已令诸县将被水下户见欠税租官物并各住催据所欠数臣将公使激赏库钱代为了纳其阙食人户已催促抄割实数即行支米赈济所有因雨水浸损禾稻之家各已受状分差官属检视讫伏乞睿照

试验拣汰人劄子【戊子正月二十二日上二月一日依】

臣近准枢密院行下史正志陈请令诸路将拣汰使臣铨量人材非老弱者具名申上本府共有一百五十余人臣将拣选到人躬亲看验亦有年未五十身无疾病可以从军者却称笔吏出身不习弓马乃是窜名冒赏分明臣窃谓近岁军赏【阙】

无以矫革此等人既已寄名得官随踵离军便与【阙】隶行伍人一等注授【阙】差遣俸禄相继更不待阙终身徼幸诚为太甚臣愚欲乞行下诸路向後拣汰使臣到任并令知通共职官逐一子细试验其年未五十非有废疾之人若或不习弓马即发回吏部令与在部人衮同理名次差注庶几履行阵塲矢石之人有以甄别伏望睿察更赐【阙】

如臣言可采乞赐施行取进止

再请祠劄子

臣待罪会稽於今一岁有半去秋累上奏牍祈旬丛祠仰蒙大恩叠赐诏札时方水潦四溢谷直顿增人情嗷嗷朝不及夕臣惧有避事之嫌黽勉就职所幸踰冬涉春米价如旧人不告病境内无流冗之患宿麦在野秋熟有期臣以衰瘁之躯不安风土疾疹相继愿欲少休伏望睿慈曲赐矜容俯从诚请倘他时别有使令不敢辞避干犯天威臣不胜局蹐战越之至取进止

谢宫观劄子

臣弩劣之质略无所长猥叨误知躋居宰路调鼎三月自誓竭诚奉公仰报恩纪而才疎智浅曾蔑?埃之补谗言不恕以为罪积丘山非陛下特垂昭鉴则投荒不足以塞责去国不久即忝辅藩之寄虽欲抑强去恶力图薄效而翫日积久复无尺寸之功圣恩寬大俯从恳请遂获奉祠以休衰瘁伏闻近者弟迈进对曲蒙齿录复【阙】

獎貸其罪戾未忍弃捐臣衔戢恩遇徒深感泣【阙】非才虽碎首捐躯安能图报天地之大德臣既【阙】敕命已即指涂益远觚棱不胜瞻天恋圣激切屏营之至

奏旱灾劄子【八月十二日】

臣仰惟陛下焦劳图治勤恤黎元讲求民瘼不啻饥渴一闻休戚即日罢行患在士大夫畏缩自爱不肯道其实故下情鬱而不达圣泽壅而不流古之人虽在畎亩而有封章之献至或嬰

逆鱗而不顾此风久不闻矣臣不材无取尝玷宰路非刍蕘庶人之比也居闲故里目之所覩耳之所接不忍斯民日趋无告流亡损瘠莫之拯拯若私有遐心茹而不吐尚冀祠官之禄以自活其妻孥是曾狗马之不若也故不避讥议不憚谴呵矫首九阍披写愚戇伏望陛下少垂意焉臣比读邸报伏见陛下以江西湖南旱暵侧身祷祈屏彻荤味又令帅臣监司汰择守令德至渥也臣谓江东两郡之旱亦江西湖南之旱也陛下必不虑远而忘近恤彼而缓此特未达于天庭尔及覩七月下旬施行洪潭两路賑恤指挥犹未及乎江东两郡岂有司奏牒或未详查不能感动天听耶臣於是不谋於人而谋於心不虑其身而虑其灾辄敢犯分言之臣之乡邦自去夏五月至于今春曾无终日好雨故陂塘所瀦之水甚鲜并水之田仅能车畎播种至于高仰之田种不土入者四境之内居三之一自春接夏或累日或盈旬间得小雨尚或不能破块壤地龟坼早稻焦枯其濒水低田有岁收千石米者今有百石之谷若是者盖无几也通六邑之中百分不获一二自夏接秋惟六月甲子得数刻之雨既不濺润亦不周徧节过白露骄阳转甚晚稻又复槁矣常岁八月民种荞麦可充一两月粮异时饥馑得萝卜杂菜和米作糜亦可度日皆以久乾土硬而不可种自此不雨则来年粳麦特未可望小民艰食或有携妻子赴井同死者或有聚衆强夺而相杀伤者或有逢县尉而持刃拒抗致宪司传以为贼而出兵掩捕者前月提举官史侯入饶州界亲见流民襁负系道侯恨无以留之今去者纷纷至于卒岁将十室九空何以为邦自来水旱未尝早【阙】絶粒所阙廩食不过开岁数月饶州去秋已小歉八年早禾不获自季夏而食阙若秋冬之交有雨泽有人力可以艺麦逆数成熟尚有七八月期土民上户鲜有隔年之储犹无以自贍其家故耕夫转徙所不遑恤率是交还牛犂泣辞而後去所留牛犂无水可饮无秆可积不保其存也田家营穀作种尚且艰难若人牛又阙则向去春耕益为可虑盖今岁之旱起于饶州若池之建德东流与饶境相接者亦薄旱饶之德兴浮梁安仁数村与徽信相接者则微有所收江东之旱惟饶与南康两郡出境则江洪以往亦旱也父老七十岁者云自历年以来所未尝见今州县若不免租则有田者无以输纳若放苗不收则州县何以给遣切闻饶州有前年桩留三万石米已借充官兵月粮所余止有万石朝廷捐以与之不过可支一月见在常平义仓二万余石并得去年储粟賑贍尚不能足盖六邑穷民有籍于官者二十万户且约一家三口家得石粟仅能饱其一月之腹尔倘官无余粟野有饿莩归之天灾无可奈何可也不得有秩者暂阁奉稍亦可也饥饿之民散而之四方不至聚而掠夺为盗幸也数千营卒一月无粮其肯俛首馁死乎臣区区过计非私于乡邦而然也恐他日重贍旰食之忧故具述凶歉之实以闻不敢妄及臆说伏望圣慈察其心而信其言拯其灾而弭其患臣不胜战汗待罪之至

贴黄 臣居乡田畴至少大熟之年所收不过千石四子因官置到共有数百石通一岁秋苗才百有余石非是营私饰说前件所奏尚犹不尽琐碎若朝廷密遣人察问有一欺诳甘伏罔上之罪伏乞圣察劾管璆奏劄【庚子八月六日进入九日管璆降两资其举状令吏部退还】

臣久去轩陛不胜犬马之恋伏见陛下留意荐举关防再三然法出奸生弊不可革臣窃谓朝廷行黜陟之政臣下寄刺举之权惟前宰执有举无刺眼见奸蠹吞声切齿今举吏有罪不容緘隐伏望圣慈少赐睿览臣今年二月二十日以前第四纸改官文字荐举饶州乐平丞管璆续次持书铺笔帖来云奏【缺】以五月十七日到阙限期甚迫遂楷改作二十六日投进既至考功为铨吏点检问难乞将奏检移易日子前来符合管璆委曲恳祷臣语之曰书铺为

蛇画足自干罪谴寻常州县换赤历移月日固或有之此乃荐章若旋易日辰便为罔上不敢相从不谓管璆自将元检辄行改换盗用官印行赂计会已得放散敢为如此他日进步何所忌憚岂可保任终身臣已具状申部乞追人根治臣【阙】发之罪伏乞渊覆曲赐原赦瞻望阙庭臣无任战惧之至取进止

盘洲文集卷四十六

卷四十七

钦定四库全书

盘洲文集卷四十七

宋 洪适 撰

章奏七

缴太史局转官劄子【十月初三日批旨杨觉民等转官恩例候试补直长了日收使】

臣准中书门下省送到录黄一道为太史局灵台郎杨觉民等四人依医官能说例该遇覃恩转官令臣书行者右臣取会到太史局迁转资格自局令至直长共九阶并系十年无过犯方许下磨勘诸灵台郎满二年遇直长有阙必须试历算科方许转行近者朝请至中奉大夫该遇覃恩亦曾引例得转行一官因臣【阙】论列并作减四年磨勘其伎术官於赦文中初无转官之文而灵台郎必须经试方可转直长纵使合转一官正与朝请大夫以上一同若辄攀医官例暗得转行则为灵台郎【阙】尽皆不试而迁诚为冒滥今来欲乞将杨觉民等依武臣转官法与减五年磨勘所有录黄臣未敢书行谨录奏闻伏候勅旨

缴侯进词头劄子【十月十二日御笔依奏三省进呈委方滋根究诣实具情犯闻奏】

臣准中书省送到武功大夫镇江水军统领侯进降官词头令臣撰词进入臣昨在镇江守官闻军中称说侯进带官钱五万贯往湖北买木数年无归意就峡州宜都县起造大第招聚倡乐宴会奢僭纵使兵卒陵虐居民夺其物产用竹缆马船横截江流声鼓鸣锣邀遮客旅决打号令强拘箠筏一方苦之甚於豺虎都统官累曾催督迁延不回今系荆南帅臣李道因民旅陈状告诉不法事件及校尉胡振甘反坐之罪诉其聚集亡命图画入川地形恐有不测李道备申朝廷送提刑司差官体究虽多从阔略而拦截客旅等事并是诣实户刑部看详恐迫人路远淹延刑禁遂降一官放罢臣窃见圣断方欲痛治奸赃之吏如侯进以官镪数万缗逗留不归肆其凶暴少有此比兼李道申侯进初到便经帅司陈状乞将民间夹江林木尽行批号倒伐不许占恠帅司不从至於出榜禁约可见无所忌惮只降一官太为轻典今若释其害民之罪则侵盗官钱所不可纵臣愚欲乞行下都统司抄籍家资令荆南帅司拘收屋业送就近镇江府取索干照根究钱物依新降指挥断罪施行所有制词臣未敢撰入取进止

缴王之望结局转官劄子【十一月四日当晚进入次早御笔依奏】

臣伏覩十月二十六日指挥淮西宣谕司结局其官吏军兵并依汪澈例等第推赏令开具申尚书省取旨臣伏见汪澈督师襄汉之时强敌对垒尝交锋刃一行官吏颇亦忧危及寇退师还以次行赏第一等转两官第二等转一官更减二年磨勘第三等转一官选人亦有改官者

当时清议尚以为过今岁淮西外无边警如一府官吏坐受恩赏窃恐屯戍之人不无怨望倘俟其开具姓名始行封缴不若寢之於未然庶几免开徼幸之端所有前降指挥臣虽已书行欲望圣断更赐详酌施行

缴李迥差遣劄子【十一月七日御笔将上】

臣准中书门下省送到録黄一道右宣教郎李迥差监行在左藏东库臣伏覩见行条制初改官人惟有出身许授学官其余必须注授知县亲民差遣盖虑仕进之人不历州县他时除用不能通晓民事此万世不易之良法也间或夤缘干请有得官观以脱亲民之官者公议犹或非之今李迥系用臣总领所荐举文字於今年八月改秩若便作京局厘务官则破法起例盖自此始虽系臣门生难以容私緘默所有録黄臣不敢书行取进止

缴?若钝用居广恩例劄子【十一月十一日次日御笔依奏】

臣准中书门下省送到録黄一道皇兄岳阳军节度使居广乞以初除开府仪同三司合得亲属占射差遣恩例与将仕郎?若钝收使十一月八日奉圣旨差监文思院上界臣仰惟陛下以任子之冗尚思更张之术今必令铨试入官乃所以使世禄之家颇知务学不敢徼幸门荫便萌弹冠之心检照隆兴元年四月指挥初出官选人不许用父祖亲戚应合得恩泽免试虽见任宰执亦不许陈乞回授若放行王若钝一人则继踵而来无以救官冗之弊矣欲望圣断特赐追寢已降指挥所有録黄臣不敢书行取进止

缴巫汲召命劄子【十一月十九日上即日御笔依奏封付洪某】

臣准中书门下省送到録黄一道十一月十八日奉圣旨巫汲陈俊卿吕广问王时升并召赴行在臣伏见春秋之时诸侯互相争战其觐国者不论其地之大小兵之强弱惟视其人材如何故朝多君子则敌不敢伐兹已然之明验也如巫汲者才学识见政事操履略无一长徒以谄事秦桧为之鹰犬故能躡取大官今废退十年议者不以为屈寄寓无锡县专以私酤为生哀聚无赖为害一邑方多事之际虽贩鬻屠狗之人果有所长亦不应弃若其无用何所取材虽云尝为执政有此虚称初无时望品其人物谁不过之召节一驰取笑中外秦桧残党如汪勃章俊宋朴之徒与汲初无优劣近因言者夺其三人复职若汲收召则勃俊之流人皆冀其复用矣伏望圣慈特赐鉴察所有録黄臣未敢书行取进止

缴汪汝嘉等差遣劄子【闰十一月六日当日御笔依奏】

臣准中书门下省送到闰十一月二日録黄一道数内汪汝嘉差知荆门军李琛差知永州宇文仔差知邛州臣伏见汪汝嘉昨因手刃表弟李穎停官编管数年之後交结秦桧亲党复还仕版干办诸军审计日常躬亲摔毆公吏遭台章放罢稟性凶麤不知惩戒李琛之守婺州专以刻剥为政苞苴秦桧之门恃势妄作减剋军兵请给几至生变郡人有宁与猛虎游莫遇李婺州之语劾罢已久自知潜伏今已七十有余耄昏戒得宇文仔新授果州通判意欲别营差

遣妄訴於都堂稱有女嫁知州丁訥之子合行回避省部送本路勘會諸實未到間有丁訥之弟丁顏亦訴於朝稱兄訥本京東人寄居湖州三子皆未娶本宗并无人與宇文氏連姻妄冒如此何以臨民臣愚欲乞令汪汝嘉李琛終滿今任宮觀宇文仔依舊果州新任差遣所有錄黃臣未敢書行取進止

繳趙密恩數劄子【閏月八日當日御筆依奏】

臣准中書門下省送到錄黃一道閏十一月六日奉聖旨趙密已除少保依前崇信軍節度使落致仕權殿前司職事所有合得恩數等并依楊存中昨除少保日已得指揮施行臣取會省部條格即無三少初除恩數向來楊存中系特降指揮依簽書樞密院事例今來趙密元因致仕得除少保近之再任議者謂當納還三少始【缺】者則謂其權掌禁兵若三衙休息諸帥回歸密必依舊請老雖不納少保可也今若无故而輒依前比後省【闕】緘默放行恐不免於清議所有錄黃臣未敢書行取進止

繳莫汲編修官劄子【閏月十二日次日御筆依奏】

臣准中書門下省送到錄黃一道閏十一月十二日三省同奉聖旨莫汲除樞密院編修官臣伏見秦桧專權之久至其末年欲禽取天下賢士大夫而誅戮之桧雖奮殺人之必心必有負屠宰之材蘊虎狼之性挾戈矛之刃者為其用而桧之志始可逞也張常先之謀張宗元莫汲汪召錫之圖趙令衿凡是數人適桧之死令衿輩始免於刑戮太上皇帝更化之初即日竄之嶺海天下之人以比四凶陛下踐阼覃曠蕩之澤此輩始得生還正當奉頭鼠伏杜門苟活不自齒於荐紳可也雖古有使過之文朝廷擦拭丹書何时无之至若此等凶人縱使有荀孟之學班馬之文亦不可以其才而复用蓋廢錮一人使世之嗜進喜禍者不敢萌吞噬忠良之計所以銷奸賊於未然之前也【闕】者雖以試藝登高第而

不自愛【闕】碌碌州縣塵埃之職猶

之可也【闕】入中都列屬西府而出入省掖從容宰輔之間耶除命一出衆論必駭臣不敢避怨為人禁害使後之士有以懲戒覆車之轍而修為君子之歸也辟猶虎豹豺狼當放之於深山廣谷之中若置之苑囿則騰擲圈檻不可复制矣所有錄黃臣不敢書行取進止

繳余堯弼職名劄子【閏月十四日當日御筆依奏】

臣准中書門下省送到錄黃一道信州奏左中大夫余堯弼為筋力衰憊不敢久竊祠祿乞守本官致仕閏十一月十三日奉聖旨復龍圖閣學士致仕令臣書行者臣伏見章俊因致仕復龍圖閣學士言者論列并与汪勃宋朴而奪之今才數月爾堯弼復托疾請老亦得此職夫老龍之去端明一間耳異時執政無瑕而退僅得端殿豈有積愆久廢之人一命遂居六閣學士之首者此除若行則同類者又將羣起而不可遏在秦桧時堯弼以台諫而為鷹犬坐政事堂而伴食其無用而易制蓋勃俊一流人也今勃俊失之於前而堯弼得之於後一予一奪有損

陛下总核之政是使齷齪之士知可以窃位於一时而不妨叨荣於末路则隳丧名节争巧宦以希进矣所有录黄臣不敢书行取进止

缴莫汲计议官劄子【闰月二十四日次日御笔改干办公事】

臣近於今月十二日以莫汲除枢密院编修官尝论其谋杀赵令衿之罪具劄子封駁即蒙御笔依奏继有沈介荐章称其智略纵横才力明敏乞授一光州差遣或制置司职任使之招谕皇甫倬余军及收复光州伏覩御笔莫汲可差充沈介属官至二十日执政批旨却作勘会湖北宣抚司合差参议官二员奉圣旨莫汲差充计议官候立功效日陞擢所有莫汲过愆臣不复缕数以瀆天听但汲元系左从事郎坐罪编管化州更大赦放令逐便臣取会吏刑部赦後即不曾叙复元官自用兵以来有都督府枢密督视府江淮宣抚司荆襄制置司川峡及两淮宣谕司若宰执开幕府则从官作参赞其他官属则有参议多系卿少郎官及曾历监司郡守者为之其次则有干办公事准备差遣应是选人只作准备差遣近岁莫汲在虞允文制置司亦是准备差遣今忽超躐常制新立官称闻者惊异其事闻来台谏弹击给舍缴駁之人未尝随踵收用或有他时澡濯而起者其初必与降等差遣盖示洗垢弃瑕之渐今汲因臣封駁反升等创置官名以宠之又许以他日陞擢则臣语言妄发实有不合封駁之罪虽蒙圣度优容臣实何颜尚居禁掖臣等侍朝殿乞对已三日居家自讼不敢入省欲望圣慈特赐黜责庶几後日居两省者不敢轻议朝廷用人得以惩戒冒犯天威臣不胜战汗之至取进止

盘洲文集卷四十七

卷四十八

钦定四库全书

盘洲文集卷四十八

宋 洪适 撰

章奏八

缴张训通复官劄子【乾道元年四月三十日】

臣准中书门下省送到词头一道刑部检举到张训通叙官元系张俊奏宿州之役初非战败而统制官等无故引归殿前司统制官张训通系军马入城之际先次一面引归欲望酌情定罪明赐贬降奉圣旨张训通降四官本部看详依条合自降断勅日每理再期一官本人期限未满足该遇赦恩合叙一官元系正侍大夫和州防御使因罪降授协忠大夫果州团练使奉圣旨依所申於阶官上与叙令臣命词给告臣伏见张训通弓矢鞍马漫无寸长怯懦不武又无与为比但能涉猎七书百将传藉此以为谈柄隶鄂州军籍之日与田师中典掌财物背公营私叨冒官秩至於横行遥郡符离之役首先遁逃原情定罪戮之市朝如孔福可也既从轻典镌官自効有司却与寻常罪犯之人会赦便与叙复窃惧无以惩戒将士臣愚欲乞将张训通同罪之人并候军前显立功效之日大将保明取特旨方许牵复庶使从军之人咸知复玷缺之艰难不敢爱身误国所有词头臣未敢撰述取进止

缴秦垞宫观劄子【五月一日即日依奏】

臣准中书门下省送到录黄一道敷文阁直学士右朝散郎秦垞状昨自春官得请奉祠满罢之後洊经忧患累重仰禄欲望特差宫观一次奉圣旨差提举江州太平兴国宫臣尝读唐明皇实录载李林甫身死之後朝廷治其积愆诸子俱配流岭南家口随之每房各与奴婢三两人并缘身衣服饮食自余资产一切官收臣窃谓秦桧藏奸稔恶天下之人户知之天网不容使之自毙厥妻厥子继踵沦亡不肖之孙官职如故华屋厚藏可谓幸矣为之计者政当恐惧屏迹不复自伍於缙绅之间今乃无所忌憚尚敢陈乞差遣虽宫观甚小在有罪者得之则人以为除用之渐臣惧秦桧党与牵连相庆自此皆有弹冠之心所谓一叶不去将寻斧柯者矣况当国用不足而秦氏之家金珠充牣国家既已贷而不籍凡前此教坊所汰之人垞皆养之於家以奉歌酒之欢乃称累重仰禄其公然欺世玩侮朝廷有如此者臣愚欲望圣慈将秦垞宫观指挥更不施行所有录黄臣未敢书行取进止

缴潘粹卿恩泽劄子【五月三日】

臣准中书门下省送到录黄一道潘粹卿乞放行改奏叶旁作恩泽事奉圣旨特令吏部放行

令臣书行者右臣取到前件公案拖照得潘粹卿将父遗表恩泽奏补胡備於绍兴二十六年十月内降勅据本人称胡備未受勅间於绍兴二十七年三月内身死本人於当年十二月内陈乞改奏与弟清卿於团练使上转行吏部检坐条法只合作减年收使本人至绍兴二十九年四月内却经临安府改奏异姓无服人叶旁作吏部节【缺】告示出违条限委是允当兼胡備当来勅命系身亡後旋行寄纳【阙】称未曾被受已是诈伪今来陈诉曾於限内陈乞系是乞与潘清卿转官即非限内曾行陈乞奏补今若特令吏部放行则是条法无用所有录黄臣未敢书行取进止

缴梁俊彦推赏劄子【五月六日次日御笔并依】

臣准中书门下省送到录黄一道五月四日奉圣旨梁俊彦合该军器所皇城司酬赏可依正月六日四月七日已降指挥施行令臣书行者右臣窃见正月内军器所推赏指挥官吏转一官资碍止法人特与转行不及全年人总计推赏继因臣寮论列至今年六月实及二年方合陈乞四月内皇城司推赏初降指挥梁俊彦特转右武大夫续降指挥令依例回授今来叠前两赏并依已降指挥有司未知所从若用正月六日指挥即岁月未滿有碍条例若用四月七日指挥即已令回授无可施行臣愚以谓爵赏天下之砥石所以厉世磨钝惟其明白而无偏私则侥幸之计不萌觖望之心不作自来正使碍止法之人有特旨方转行遥刺至防御使方转过横行所有皇城司被赏人宋钧宋直温皆是正使转行遥刺梁俊彦亦是正使与逐人一般前降指挥独与超转横行则为太优後降指挥却令回授又似未当臣欲乞将梁俊彦皇城司赏典依宋钧宋直温例与转行遥刺其军器所赏典即候【阙】月内合该陈乞之时照应在任年月依条别与施行庶几庆赏均一指挥明白无复偏私之弊與人不得而议所有录黄臣未敢书行取进止

缴沈介不允诏劄子【五月十三日当日御笔荆襄上流为重两帅颇多不协虽军务稍静尚须调护且依已降指挥流行】

臣准中书门下省送到录黄一道湖北京西制置使沈介奏为寒湿所中动作艰难心气发动临事繆忘乞解职终丧奉圣旨不允令学士院降诏不得再有陈请令臣书行者右臣闻父母之丧三年不从政礼法当然孔子答子夏之问曰君子不夺人之丧亦不可夺丧也金革之事无避亦圣门之所不与顷以军兴起沈介於苦庐付以方面之寄介入国门而边事渐已讲解继而信使交驰兵戎各已休息自都督府及招抚使之类皆已上印绶结局矣独荆襄制司幕府如故一司官吏徒耗俸廩其所辟置又屡为臣僚封还况介之事亲尝絰清议今举朝斷斷以介不终丧为非朝廷若欲成人之美不当以其称病为文具而遏其请若更留数月虽介有凯风寒泉之思无以伸其志使之重得罪於名教非所以爱惜人材也臣愚欲望圣慈许其解职终丧俾全人子之道则移孝为忠可以责其异日之报所有录黄臣未敢书行取进止

贴黄 臣前件所陈若蒙圣断施行所有制置司官吏即乞依都督府例结局罢散伏取圣裁

缴薛良朋等賑济赏劄子【五月二十四日与给事中王时外同缴当日批出辞免依所乞】

臣等准中书门下省送到录黄一道薛良朋姜洸韩彦古辞免赈济进职转官奉圣旨依指挥不允令臣等书读者右臣等闻仁宗朝富弼守青州河朔大水民流京东弼行赈济之策所活人至五十余万近世荒政之修无以加此继而遣使劳弼即拜礼部侍郎而弼辞曰救灾守臣职也卒不受今赈济之术比之於弼固相万万陛下圣心焦劳非不切至然城都之外死亡之人亦不为少流尸满川衆目所覩城中之人至於不食鱼鰕而三人者并皆迁官进职衆论以为未当夫建立百官所以为民不幸而有灾伤又因而冒赏则监司守令之职果安在耶今三人者自知不安力具辞免若与从其所请则朝廷不失为民行赏而良朋等亦得受辞之正况今所在灾伤不止一处若三人受赏不辞而浙西诸郡守令及被差官吏夤缘觊觎殆且数十百人而未止当此天灾而反行滥赏岂所谓修政事以答天变者哉臣等伏望圣慈特赐睿断将良朋等辞免进职转官并依所乞施行所有录黄臣等未敢书牋取进止

缴王彦宣借人劄子【五月二十五日次日御笔依奏】

臣准中书门下省送到录黄一道保平军节度使提举太平兴国宫王彦乞破行宣借人五十名及乞更破使臣五名奉圣旨依令臣书行者右臣窃闻王彦近罢建康管军有自来亲随西兵三百人朝廷从其所请许存留五十人余者发回原来去处及发回之日有其数而无其人者凡百辈则其久握兵权诡请虚券殆不知其几何人也今犹贪恡未已所乞宣借五十人及使臣五名已蒙圣慈依许臣取到吏兵部状节度使任官观合破宣借十五人因绍兴三十二年指挥已行减半及依例只许踏逐指使一名申朝廷差拨彦之专阬於江淮无尺寸功得以节钺奉祠幸矣尚此苟得【阙】难默默本人已有存留亲兵五十人自当理为宣借之数若圣恩从厚只合依条例占破难以过数陈乞所有录黄臣未敢书行取进止

再缴韩彦古劄子【五月二十五日上六月一日以彦古自请与外任】

臣等准中书门下省送到录黄一道韩彦古辞免转官依所乞者右臣等近为城外饥民死者盈川羣目所视而官吏以赈济有劳全活甚衆推赏尝辄具管见特蒙圣慈曲赐开纳朝廷已用逐人辞免依所乞臣等亦已置而不论其间有韩彦古申状乃云伏念彦古至愚极陋之资非不知朝廷机务之烦圣恩不可屡郁特以冒诗人胡顔之刺宁甘以黷而羣言之难犯有甚批鳞况何功苦之足言需此宠章之骤至与其他日险肤之见诋孰若从容力祈之为优且省也伏望朝廷蚤赐追寝庶几小人毋得而议臣等观其辞语险怪岂可陈於君父之前播之四方岂不传以为笑封缴之官乃辄指为小人而谓公论为险伪肤受之言若臣等以小人而妄议陛下不应听从既蒙施行而被缴之人乃无所忌憚公然见诋如此不惟桀骜不逊轻侮朝廷臣等不材备位後省实难以振职所有录黄并彦古申状随状缴奏伏望圣断特赐施行

贴黄 臣等伏闻彦古昨除提举官遭臣寮封缴自称当论诉於朝廷臣等窃谓郎曹清班岂容此辈冒居伏乞圣察

缴马监官转官劄子【六月七日】

臣准中书门下省送到录黄一道奉圣旨牧马皆可依累降指挥推恩崔良辅特於遥郡上转行一官李楷王贵刘彦赵昌苏信曹绎并转一官姜子兴陈邦俊并补进武校尉人吏转一官候出职日收使臣取到崔良辅脚色及绍兴二十一年以後马监推赏体例照得本人绍兴十七年初管马监之时只系武翼郎二十年间因管干有劳八次迁官一次用赏出給料钱历自副使转横行又转遥郡至於右武大夫观察使今又该转承宣使恩赏饶滥无甚於此臣近因奏对及军中赏典仰见圣虑宏远爱惜名器非有功者不与今不知马监每两年之内孳长若干而十余人迁转至有白身补官者如崔良辅数十年不徙职常法磨勘之外两年一迁虽横行遥郡唾手而得自以谓例当然也今隶籍军门若非出戍用兵寄命锋刃之下而有斩将搴旗之功者无缘有此醴赏况祖宗成法在京官司因职任推赏之人若或再任则不重赏今马监迁官虽是旧例盖有司失於建明不曾有所撙节因循不革流弊至此臣愚欲乞裁以中道应马监官如已三经推赏则後來赏典并与减半欲望睿断更赐处分如是允当即乞立为成法及其他官司赏典亦乞令大臣讨论裁损其取到绍兴二十一年以後指挥录连在前所有录黄臣未敢书行取进止

盘洲文集卷四十八

<集部,别集类,南宋建炎至德佑,盘洲文集>

卷四十九

钦定四库全书

盘洲文集卷四十九

宋 洪适 撰

章奏九

荆門軍奏便民五事狀

臣伏觀紹興三年二月二十八日手詔應諸路守臣到任及半年以上先具民間利病或边防五事聞奏臣恭惟陛下勤恤民隱出於天性臣以弩猥叨乘障之寄仰體陛下愛民之心不敢以不可施行之事徒塞詔旨臣自到任訪之於民云荆襄頃為盜區魚肉其民最甚凋殘之余實與淮南無異今田畝既已起稅而逐年又有均敷茶額錢所出甚於夏秋常賦致使茶商執害民之柄而托吏為奸不惟民力重困又緣此不敢歸業數十年間所以民未加益并官田以附種為名而不稼納租麴引失立法之意而重疊出鍰大禮代侖州之貢而多方取辦皆不便於民者臣雖到任未及半年緣茶事所不可緩臣謹條次下項

一臣所謂茶商執害民之柄而托吏為奸者蓋江浙他路俱有茶額而食焉者衆商人隨時賣價四民不以為病惟創痍之地戶口耗減而凋傷困乏蓋不能頓頓食茶如荆門軍又緣異時官吏不以疲民為念所圖溢額受賞歲增加至於數多若奉行前後朝廷指揮令客人從便交易則定額必致虧減官吏當有責罰本軍昨來遂以人戶為率計口均敷如家有一丁則歲受茶三斤其丁多及老小者以次增減至有一家買十三斤者行之將及十年豪商與猾吏通謀為奸其弊不一今荆門兩縣之民其客戶往來不常外主戶才及三千坊郭不滿五百家逐年趨茶四百六十引客人就官入納每茶一斤為錢一百八十一文足就旁近土產處買下等粗茶雜以木葉每斤不直百文却逐年定價令民戶每斤還五百三十文足會計本軍歲額官得客人入納錢一万七千貫有畸而民間償客乃費三万一千七百貫凡客人賣引到縣指定所欲賣茶鄉分乞留元引只以縣帖下乡稱某客販到若干引令耆保差大小保長門到戶至應主客戶并計口均敷或猾吏暗增引數或豪商均茶已足計托牙狙妄稱人丁逃徙差互發賣未足乞改別鄉吏既受賂更不核實又與分下別鄉或不即時批齣元引致容往來影帶私販或先以私茶凭牙狙欺民均賣續用縣帖再勒依數認買若爭拒不受客即委棄於地而去不惟疲民費錢重疊而逐年損折入納錢亦不為少皆緣歲額過多不敷則無由可辦商執其柄又以高价邀於官而求售在官者懼譴乃復黽勉曲從而滋蔓吏奸公私俱病臣比因草奏逐點檢倚郭縣二十八年内都保承受縣帖均分茶數已足而繳到客引尚多虧數縣吏却稱自均敷以來逐年遞以次年春夏季補充前一年之數蓋酒稅場務日生課利容有前後?補今既將丁口敷茶民間出錢已滿歲額而官引却有虧失者蓋是承襲作弊如前所陳臣已究治縣吏勒令填補榜示見行條法及續降寬恤指揮自今更不違法均敷但常額尚存則實惠難

行若不控告朝廷剗革此弊则疲民困穷未能休息臣愚欲望圣慈怜念远人许令荆门军绍兴二十九年只以客人从便实住卖到茶数立为新额或乞以见今岁额特赐蠲减一半庶几易於趲办则害民之柄不在茶商茶商不能确执高价自然从便交易是宽恤之泽实及千里一二年间必有增户之效

一臣所谓官田以附种为名而不稼纳租者其一曰营田其一曰学粮田所谓营田者前此邑官缘以营田结衔既上司督责即指荒闲田土称为官庄初不遵依元降指挥修盖屋宇置造农具召人耕作便行追集税户以物力多寡勒令认租谓之附种营田至两年一替供纠本乡未曾附种之户轮次认纳吏缘为奸转更教令纠挟善良每一户替免至於追逮五七户纷拏推托贿赂公行源源不绝举县咸被其扰遇新至之户或乍佃荒田或只请住基而见充附种之人已投状措令承代故有犁锄未到畎亩茅茨未庇风雨而营田官课已遭督责臣伏见前郊赦文放免都督府官庄盖是朝廷已知其弊今荆门军长林县高阳两庄当阳县山口庄所名营田系安抚司专差官兵耕作即是良田实收课利并长林县车桥两处亦有官兵营田当阳县只有四户开耕实田外其他两县营田共一千七十七户所纳秋课自五斗有至於四十二石者共一千八百余石又有夏料小麦在外并是无田认纳臣不住据人户诉称所认课子逐年并是尉司弓手揽纳每石有费钱三千者每户各有小麦七升亦有费钱一千者即是税工起税实为重叠臣愚欲望圣慈行下将实有官田耕种去处依旧存留外其虚名营田勒人户附种白纳课子之数并乞除免

一臣所谓学粮田者盖湖北兵戈之後沃壤弥望人力不给凡请佃逃绝荒田官司初不打量亩步若人力有余则逐岁四旁增垦其有没官田产即是酒户抵当或公吏等人犯罪没纳者田既籍没则所种之客随其地主又复他出顷年再兴学校郡县奉承括到没官田便名学粮初无耕夫遂勒本保人户分亩认米谓之附种学粮皆是与本户田土不相连接农人不便耕垦例皆荒闲不免依数填纳租课臣稽考县籍长林之安西乡纳学粮人一百二十三户其一户有田通计长林九乡纳学粮者共二百三十三户其有田者才三十五户臣今若受人户之诉除其无田之租则学粮遂空无以养士若循旧不恤勒令认租则细民苦之无时而已缘本军并无承平案牒即不见得旧管赡学钱粮之数兼并无寺观绝产可充赡学臣以愚见相度本军长林县岁催学粮没官田米麦二百石有畸而两县岁催常平户绝田米麦八百石有畸臣窃计本军目今之数除累年秋夏未接间出柴常平米接济小民桩到钱一万二千贯有畸余补未足外其见管米一万一千石有畸义仓所储又在外本军人户稀寡设有水旱所费赈济之数不多每年老疾乞丐之人亦甚少臣愚欲望圣慈许令本军於长林县户绝田租内岁拨米麦各一百石以充学粮其附种之数并赐除免自後没官田如人户愿耕即以其所佃隶之常平二者既行则圣泽匝於阡陌遂见颂声并作无田里愁叹之心矣

一臣所谓麴引失立法之意而重叠出镪者在法诸乡村去州县二十里外有吉凶聚会听人户纳钱买引於隣近酒户寄造上户纳钱三贯造三石以其钱作朝廷封桩臣窃详法意盖谓民间有聚会之事亲宾往来使之纳钱买引则多得酒醴公私有补而行法之久并缘为害凡逐县就州军请引至人户投买之时县吏视其物力多寡抑勒出钱致有十余千者既已得引酒户又复视其贫富勒令出钱亦有至十余千者初未尝得酒中下户缘无力出钱买引遂有

过期不成昏姻者其县邑解发之钱未必一一皆到州郡封桩上下相蒙剥割生弊臣虽已禁约属县不得违法过数收钱及不得酒户抑勒民户多出钱物外但卖引尚存则县邑作弊难以一一几察臣闻越勾践欲其民之繁息令女子年十七不嫁者罪其父母今凋郡正欲生齿日增乃因麤引而使失昏姻之时实害圣政臣愚欲望圣慈咨询大臣讲求所以革弊之策或可删除此法实天下幸甚

一臣所谓大礼代他州之贡而多方取办者臣闻周之臣工助祭汉之列侯酎金各以其邦大小任土作贡今湖外案牒不存遇大礼年分却令荆门军代靖州进贡大礼银二百两绢二百疋又代峡州贡绢三百疋每疋折钱五贯文只於峡州得绢本钱二百八十五贯而本军自有进贡银绢各二百疋两既小全财赋不足如大礼年分不免东移西兑非民何所从出官府既无前牒可考若谓自承平以来二州之贡并是荆门代纳则向来川广湖湘入京皆取道荆门军马项背相望实为富庶之地今则僻在一隅去水几二百里非商旅所集蕞尔遗黎强名城郭臣今不敢并乞减免若以靖州杂於溪獠赋入稀少之时则本军且乞为靖州依旧代纳如峡州则有四县已多於荆门一倍又川江舟楫之湊商税所入非荆门比臣愚欲望圣慈许令荆门免纳峡州贡物庶几不使一毫而供三州之赋

荆门应诏奏宽恤四事状

臣伏覩绍兴二十八年九月一日圣旨令郡守奉行宽恤指挥如有未尽事件条具闻奏臣到任未及三月民之弊害未能尽知仰体陛下焦劳仁民之心夙夜龟勉凡所以绥惠凋瘵琐细必行不敢逐一尘瀆天听其大者四事每岁公私取於民凡三四千缗臣虽各已蠲免若非朝廷禁止恐向後又复检寻前例兼恐他郡亦有此弊欲望圣慈特赐行下如有违戾许民户越诉庶几斯民永被德泽臣先次画一开具须至奏闻者

一臣本军每岁人户秋苗有正税米又有油麻豆粟杂色亦是折米近年受纳官吏生弊将正税米与杂折米令各作一钞官仓则利於两钞畸零多收合耗而专斗则利於逐钞各收糜费使用等钱上下侵渔比之旧年每岁多取人户一二千贯臣已将绍兴二十八年所纳米每户并併作一钞只是画件声说名色及裁减使用钱三分之二乞欲望圣慈特降指挥禁止以为永久之利

一臣本军酒务及公使库旧例遇正旦寒食冬至各印关子付居民令户户纳钱赴官沽酒自一百至一贯军城数百家每一节出钱二百贯只是略得些小恶酒虽一家百金疑若甚微盖凋郡难得钱物细民所居茅屋日出一间赁钱才十二文而遇节顿出百金比屋为病臣自绍兴二十八年冬至以来已行蠲免乞欲望圣慈特降指挥禁以为永久之利

一臣本军有独石潭在江汉之旁产鱼甚多旧以鱼利添助支费昨缘改作放生池而本军却将江潭下流强立地名谓之车湘滩上下堤杨子滩青术塌每户虽不施网罟至冬月令县尉追集沿江人户将已前鱼利之数均勒认纳每岁得钱二百余贯入公使库臣已将绍兴二十八年合收钱并行减免乞欲望圣慈特降指挥禁止以为永久之利

一臣管下当阳县每岁遇人户纳夏秋二税并令先纳尝酒钱以家业多少为率自五百至三千虽赁地侨寄之户亦令地主抱认凡一年两次出镪几及二千贯臣已榜示自绍兴二十九年革絶乞欲望圣慈特降指挥禁止以为永久之利

盘洲文集卷四十九

卷五十

钦定四库全书

盘洲文集卷五十

宋 洪适 撰

章奏十

谢宣示御书临帖状【为大人作】

伏蒙圣恩差中使宣示臣御书临帖者宸翰昭回俨龙蛇之飞动使輶临示惊奎壁之光辉拭目知荣抚躬有幸恭惟皇帝陛下体兼衆妙圣本多能天下无双信義之之北面帝中第一迈齐祖之前闻何取微臣获窥睿藻已陋登牀之举讵知肆笔之方忝蹈惟深铺张莫究

徽州除浙西提举赴阙奏方庚状

右臣前因陛对尝以帮源洞豪方庚奏陈猥蒙圣慈开纳面得天语令便与大臣理会臣即日至枢府纳劄子陈述曲折又以劄子荐其武勇可为土豪继闻宰执奏事圣训再三以臣管见为可采仰见圣虑深远又以前车为戒臣窃恐朝廷尚未施行臣踈远无识知恐愚者一得之虑或有小补不避犯分之罪敢复言之臣闻帮源四边俱山险其中坦夷有田可耕居者甚衆方庚实为之桀聚族皆惮服之所欠朝廷一真命为重绍兴二十四年李?知徽州日方庚以岁旱率其党五十余人至郡借粮本郡疑其为後患守臣接之厅事馆之僧寺置酒郡圃以兵官主席又於教场阅习禁军驰射令方庚观之守臣嘱其控制盗贼方庚欣然承命且云万一要使唤之时只得一白帖权摄巡尉便当诣前其人黑而长徽人谓之方庚三面称之为保义衆人能言非臣敢为虚语前年严州草窃闻守臣亦尝令摄威平寨官实欲羈縻之以此见得方庚志在官爵臣虽不得其聚兵实数传者谓已有银枪壹万而三衙逋卒颇亦亡命其间亦有弓矢转相教习若天时无水旱内外无甲兵则此岂足置虑万一疆场有惊其党近在畿甸之内恐小有跳梁便相牵制为肘腋之害貽宵旰之忧臣谓军兴之际右列一命固不深系名器之重若朝廷呼之观其人物语言果有可用处以密院一使臣名目小人易於感恩便可得其死力即是狙诈作使之术纵使万枪皆出虚传只得一方庚如土豪用之且令招集民兵使其果有徒党便可化为王师随其多少皆是得用於朝廷有利而无害臣已别具奏荐之乞赐行出伏望圣慈更留宸虑冒犯天威臣无任昧死

乞进贺诛敌将表奏状

右臣狂瞽妄发不避斧钺之诛上干天听臣伏读御制完顔亮面貌赞有皇天降罚屡迁必败之句於以见渊鉴垂光默契睿藻果腾吉语天下同庆臣窃见顔亮倾国入寇狂言指斥其志

不小宸断自天与天同符遣将出师动中机会社稷有灵元凶折首臣窃谓国家大庆莫此为比臣蝼蚁愚见宜陈百官之班受四方之贺使远迩播传匝地呼舞奏告天地宗庙则神灵悦豫益降祉福然後光复旧京以示回銮之期推校千古无以比擬臣才短思澁不能着为雅颂以继平淮磨崖之作谨撰表文一函拜手投进尚虑朝廷未有指挥无因仰尘乙夜之览伏望圣慈许赐进入干冒天威臣无任

条陈恢复事宜奏

正月四日准知枢密院行府劄子三省枢密院关枢密行府及杨存中等十二月一日黄旗奏报已杀金人完顏亮讫十二月四日三省枢密院同奉圣旨令枢密行府行下沿江诸大帅监司帅守各条陈目今进讨恢复事宜合如何施行具已见利害疾速闻奏送枢密行府劄付提刑司遵依所降圣旨指挥火急条陈闻奏臣窃谓完顏亮倾国入寇蹂躪两淮陆战未尝败北其锋初未易当天相社稷使之屠戮麇惊鸟散侵地复归簞食壶浆遗黎延颈恢复之期真一机会但我师疲劳淮甸疮痍粮食未丰民力凋瘵若乘时渡淮前逢坚敌恐无後援或彼贼清野则馈饷不接却致上勤宵旰之虑今逆亮既殒大定即位未必诸国服从若能仰顺天时遣使归疆则王师不血刃而得土宇实天下之幸万一彼衆尚强自淮以北别无争立之人则臣谓且宜多遣有胆力人密传诏檄使中原义士各取州县因以畀之王师但留屯淮泗募兵积粟以为声援不必轻涉其地以务力争俟蜀汉山东之兵数道俱归见可而进迟以岁月必有可乘则恢复故地何啻破竹庶几兵力不顿可以万全谨録奏闻缴进

太祖皇帝御书奏状

右臣仰惟陛下天纵圣德同符艺祖留意军政信赏必罚沉几独断与天为谋顷年先臣以使事久繫异域访求於?市之间换易於将帅之家前後所积凡得乾德开宝中御府编次太祖皇帝御笔数十卷其间有及军政者虽数百之鏹五斗之粟一疋之缣亦劳宸衷为之节减至於迁补军职招接降寨赐予衣袄下至油面柴炭之属区处涂窜委曲纖悉所以规模宏远成无疆之业传授至於圣神二百载而中天仰绳祖武重规再造臣昨日因宣召入对已尝奏陈面奉玉音许令进入但以表饰损旧臣不敢辄易亦欲见前此御府不为华饰务从简朴如此今奎画龙文复归天上以备乙览以助圣政盖先臣宝藏之志也所有太祖皇帝御笔六卷谨随状缴进伏候勅旨

水灾应诏奏状【八月一日】

臣今月一日准尚书省劄子七月三十日三省同奉圣旨政事不修灾异数见江浙水涝有害秋成朕自八月一日避殿减膳思所以应天之实可令侍从台諫卿监郎官馆职疏陈阙失及当今急务毋有所隐劄送臣者

右臣闻灾变之发率多缘类而起汉儒一一牵合则有附会不经之失然理之当者亦不可因噎废食而曲为之说臣谨按汉书五行传云陰气胜故其罚常雨水伤百谷奸轨并作鲁庄公

十一年秋大水董仲舒以为鲁宋比年为乘丘鄆之战百姓愁怨陰气盛故二国俱水厥後水灾皆归之兵兴民怨所至国家自数载以来兵民死於戎事肝脑涂地者不鲜父母妻子啼号之声未绝也陛下有兼爱南北之心而犷狡变诈干戈未可得而戢今水不润下江湖逆溢田畴沟浍与河渠连而为一已秀之禾不得而获下民嗷嗷未有生意官无积藏安得人人而饱之霖潦弥月势犹未已陰气可谓盛矣陛下畏天爱民至诚惻怛明诏廷臣使之尽言尧舜之用心也臣愚以为陰胜阳之沴远人闖于外奸宄蟄於内也今外之所以待敌人者朝廷有潜算小臣不敢轻议而区区愚虑窃恐季孙之忧不在顓臾臣入对之始及轮进故事皆以归正人为忧继因晚召亦尝奏陈仰勤天问矣数旬以来渐已萌芽臣幸因奉诏敢复详言向之为美谈者皆曰中原遗黎望王师之来则簞食壶浆愿削左衽所以縶负而至又其思慕圣德之切者臣在江淮之间二年所闻殊异於是盖山东仍年旱蝗耕者无所得食故扶老携幼南来偷生又闻赵王世隆之徒聚衆攻剽彼国指名踪捕亦以荒岁故牵连亲戚相率来归其意盖欲王师恢复因得乘势横行逞其所欲上可以得官爵次可以得金帛子女不失归其故乡既来之後大失素望更相叹恨而将帅所部又役使詈辱无以得其驩心去复贾和仲以督府之令驱其孥累数万口冒暑而来絶海遇风已葬鱼腹而妇人老穉数百同舟蒸郁相抐疾病枕籍死者不暇瘞埋既抵所屯虽计口给粟不能充饥愁怨之气上干陰阳之和实在於此初到京口则掘山中草根以代蔬茹数月之後三五成羣掇拾弃菜败芦於市?之间其计无聊何以久处此臣目击耳闻者如此其人之在山东皆有室庐南亩生生之具自若也今父子数口杂於方丈之舍上雨旁风无以蔽障甚者寢处於泥淖之内以他人视之不可一朝居也虽使禽鸟岂不思归欲归无计则奸軌之谋不得已而作今日诛甲明日诛乙必草芟兽猕然後已况迺来北方已有招纳之榜又有誑诱之人其党聚於江浙两城散於淮甸诸郡去帝城不远亦复有之一呼相应特未艾也或曰叛者已治是大不然譬之急湍奔流势必赴壑於其中筑土以拒之终於冲軼横溃而止耳臣之管见以谓其人赳赳可用大胜江浙所募若使人给家足无饥寒匱乏之患乐补军籍之缺诚为大利若其怀土不忘则宜优其归费送以舟楫使之踰淮而去则可以窒患於未萌施恩於不报怨气可弭天灾可消或曰纵之使去不若迁之别壤以离其党是又不然此辈捐生业弃坟墓远来归我亦招诱者误之今迁之别壤居上者谁有仁民之心官又无以贍之客居穷处速其死耳是无罪而杀之也可不念哉当今陰盛之患在外者犹可随机而应在内者莫急於此盖浙西非盜賊窟穴虽流徙困殍必无弄兵之事臣私忧过计伏望圣慈曲赐采择而区处之至於讥切时政毛举小事言而难行徒以沽名卖直则臣所不敢冒犯天威臣不胜战汗

辞免中书舍人奏状

今月二十五日准尚书省劄子三省同奉圣旨除臣中书舍人日下供职者臣闻命震惊罔知所措窃以班登禁密选贵西垣不独掌行制书盖亦与闻时政惟嫩才不至固陋庶继温纯之词必特操无所阿私乃振纠驳之职如臣者弩材何算鼠技易穷遇聪明睿智之君莫伸管见掇礼乐文章之事祇惧素餐屡叨称獎之荣常赐清间之燕坐文茵於帝所岂羡金莲来捷步於日边特盼珍茗比因宣召面谕恩除甫尔半旬有兹异渥遭逢若此报称谓何自知短绠之不能汲深或谓积薪而後來居上满盈不戒颠越可忧伏望皇帝陛下俯矜蝼蚁之诚曲寝丝纶之命俾安愚分得允僉言所有恩命臣未敢祇受谨録奏闻伏候勅旨

举自代奏状

准令节文诸侍从官授讫三日内举官一员自代者右臣伏覩左宣教郎太常博士兼权吏部郎官何称种学绩文蜚声俊域使之掌制必有可观臣实不如举以自代谨録奏闻伏候勅旨

辞免奉使转官奏状

右臣今月十五日准尚书省劄子三省枢密院同奉圣旨洪某与转行一官臣闻命震惧不知所措伏念臣备数从班常虞尸素方邻国修好初讲庆仪猥蒙选择予节以行万里往来曾无补报锡赐之物已慚虚受又叨进秩深所不安凡人臣事君东西南北唯命之从况兵锋既息道路无壅不应以奔走微劳便受赏典伏望圣慈追寢误恩使免讥议冒犯天威臣无任

辞免除翰林学士奏状

今月二十二日准尚书省劄子三省同奉圣旨洪某可除翰林学士兼中书舍人日下供职臣闻命震惊罔知所措窃以北门典诰所出西掖命令所行秩清地密必得其人然後可以处如臣者学问浅陋议论濶疎掌制踰年已试无取纠駁之职常恐旷瘵近者陞对伏蒙天语谕以翰长之除而又嘉其论事许令批勅臣误辱眷知方切悚惧敢期成命遂叨超拜内自循省代匱之久初乏才长仍兼故官则怨隙日增必致颠踣伏望皇帝陛下兴怜弩蹇曲赐保全特寢异恩俾逃呵谴

举自代奏状

今月一日准告授前件职准令节文诸侍从官授讫三日内举官一员自代者臣伏覩左文林郎主管尚书户部架阁文字施元之学问该洽文采清新使居英俊之躔可备翰墨之选举以自代实允公言

盘洲文集卷五十

卷五十一

钦定四库全书

盘洲文集卷五十一

宋 洪适 撰

申省状 书

荆门军论茶事状

某近已条奏敷茶之弊而私忧过计又恐勘当不许以今年从便住卖之数立为新额只申严法禁行下则使斯民不沾宽恤之实惠必不得已权时之宜不致亏失经费又不重困民力使官民兼济则某有愚见伏望钧慈赦其狂瞽之罪某本军见排造户籍再三与民户较量谓朝廷以宽恤为政若以利害申明必降指挥不许违法均敷但恐客人遽失高价故意遏绝不来致令本军亏折岁额欲行申请乞给降茶引本军自行劝诱上等税户依客人入纳官钱之数就军买引自往邻近土产处收买堪好真茶以实价分均食用咸谓若得如此施行民户自往买茶免得虚费高价亦为民利某之狂愚欲望钧慈特赐减损荆门军岁额以其数每年径就提举司请引至本军从长招诱客人或民户算请只依元引收头子钱外更不别收勘合等钱俟至岁终本军以其钱买银付提举司或鄂州总领司交纳则於两县之民买引得茶之外每岁实减钱一万五千余贯此其为利不鲜如蒙从某所请乞自绍兴二十九年为始俟指挥到日若春季已批发过客人钞引乞许理作今年之数仍乞下提举司於钞引上朱批系是荆门军算请之引只得前来本军住卖以免侵紊他州岁额兼乞下提举司告示产茶去处除本军朱批钞引之外却不许别用客人他引批指前来本军以免搀夺给降引数於法钞引许留民间九年今既本军人户自行买引却恐当年未必便能一一买茶欲乞本军每年只是趲纳给到引价钱其住卖倒引乞随逐年多少申缴庶使公私两便如是向去户口繁盛比及承平商旅通行见得从便可以趲额则乞许以後守臣申明朝廷自依常法更不逐年给降又缘荆门小垒难得银子寻常贡赋多是担钱至荆南府买银今每年至提举司请引及管押人纳银有沿路脚乘等费若不立下些小糜费恐官司别无所出巧作名目因缘多取於民某面问民户欲令每斤增收五文省作糜费使用皆称情愿出备若於外官吏别行增添收取并乞计赃坐罪

复解额申省状

本军据军学进士张礼等一百二十九人陈状称本军旧解额五人靖康元年范如圭任彦直高敷田幡然扈夔同年发解范如圭见任利路提刑任彦直见任恭州监税顷因剧盗以荆门为巢穴军治鞠为荆棘人民死徙殆尽至绍兴五年收复方以武臣作守驱除虎狼鳩合遗萌始有人烟至绍兴七年省部会问靖康元年终场人数组取立额其时本军土人逃散未归知

军胡修武不以儒生为意只就军城据流寓陈天将供称靖康年有二百二十人终场其年就江陵附试遂以四十四人解发一人续後本军士人渐归却见解额人数异同遂於绍兴二十一年经转运司及本军陈诉称在承平时本军初未曾及二百人终场之数蒙追问陈天将供称系是应天府流寓人当来实不曾就荆门取应靖康年科场盖是一时公吏且欲回报上司令天将妄乱供报所有本军士人除建炎绍兴之初两次无人取应外绍兴七年江陵府附试终场七人解发一名至绍兴二十六年终场四十六人亦只解发一名今来士子蒙朝廷养育作成垂三十年已及承平人数缘本军去江陵一百八十里贫者乏於裹粮而幼者父母不容远去遂使每次不能尽往赴试致见人数不增只以一人备数乞行申明复额某遂取责到本军绍兴二十六年乡饮酒除疾患不赴人外有八十八人成礼并见今系籍学生共一百六人并会问到邻近州府体例江陵府以省记到靖康元年数系十人七分取一人绍兴七年终场五十二人解发三人绍兴十七年终场一百六十六人解发十一人已复旧额峡州靖康元年系八人取一人绍兴七年终场二十人解发三人绍兴十四年终场七十三人解发五人已复旧额归州靖康元年系七人五分取一人绍兴四年终场二十人解发三人绍兴十年终场二十九人解发四人已复旧额复州靖康元年系十二人取一人绍兴十年终场五人发解一人绍兴二十六年终场三十人发解三人某检照本军公案有绍兴二十一年内取责到靖康元年发解人高敷主簿供称当年终场系是六十五人并见存乡贡进士丁庭瑞亦系靖康取应之人所供符同其陈天将供伏妄报文状具在可考某切闻胡文定父子俱在荆门寄居故朱内翰之类远来就学如朱内翰胡侍郎皆是荆门预荐登科所以荆门士人师授颇有渊源今既解额顿窄又附试他郡惮远不能尽行致令荐送数损无以激劝有阻远方士人进修之意某又伏覩绍兴重修荐举法备载绍兴四年指挥缘淮南两路无靖康元年终场之数只比附泰州之数权立诸州解额每十三人解一人今湖北诸郡并是十五人以下解发一名不应荆门独以四十余人解额是多寡不均如江陵府只是凭据人吏省记立额本军见存靖康发解取应之人可验不诬已将会到诸州府解发人数録白申纳礼部准备取索照会讫谨具申尚书省伏望钧慈怜念远方士人乞将绍兴二十九年科场比附本路邻近州军体例别赐详酌改立解额行下

代上宰相书

某鹿鹿么?至愚极陋踪迹草芥顾不足进陈於帝师大丞相之前侥觐观采之万一然伏自思念在熙丰时会门跻身纶闱劝讲帝幄在政和时大门笼宇内之财为天子侍臣不肖之孙隳其家声无可云者而天借之幸名絪官牒猥受化工之赐漕台鍾官游居部使者之属虽翹材大馆所以罗致英隽而蕞尔姓名得尘拔士之録亦十有七年某也佩山岳之施怀抄忽之报刻肌镂骨矢心自担亦不敢辄处衆人之後退帷阳春播物莠者莠者无不蒙被宠光吐葩扬荣动摇和风拱把之本根至於能?牛马柔条弱蔓亦能上凌青霄发生之功何能遽数士於斯时托身鑪锤朝泥涂而暮云汉造化之力与春等耳今欲軋滞思饰琐说抒憔悴可怜之情顾小已区区之私夫何足以仰渎威尊窃念穷而呼天理所必致舍恩门而不进一辞则鼠肝蛊臂何所自托耶重念某寅缘世及鬻窃禄仕虽裘冶之绪不敢废而材智弩下不能见穎濫巾王官庇身大邑罢精耗神日惧奉职掇过不给蓬徙尘走幸终瓜戍得追万坐之罪而孥累猥衆退无负郭上腴可以耘耔代禄仰首摇尾希笔端膏泽庶几复寻故步少逃州县之劳以免

沟壑之填仰惟某官天命隆栋为时宗臣畔甲归马泰山四维功业卓伟固已镂景锺书金匱非某趨起所能铺张梗概厥今太平无象物物遂性动植飞潜鼓舞覆焘之间遐迩耄穉共壤而击岂门墙贱士不能泽吻一鸣自求升斗之水是敢犯严肆言以累埏埴冒触等威某下情不胜战灼待命之至

代上前执政书

某仰惟圣天子奋乾刚旋太阿尺一招贤慨乎如不及并谋兼智以济登解弦上治自台鼎侍橐谏官御史台郎儒馆无有大小楹然一新鸿仪鹭序皆乙亥前幹弃沉沦之耆杰外而价藩近镇亦暂屈旧老敷和苏枯剗磔淄泚然後入都卿相之位恭惟某官以硕德垂典刑以昌謨翼帷幄简於细?畔於汗简旧矣蝇营丑正积年居东天日清明人人詹冀霖雨寄足方面寔储岩石之望宜告舍人趣治相国装行即召矣某才品凡下无尺寸逾人低徊尘 星终其二视王公大人如参辰丽天可望而不可亲又安有覲顔色之温侍警欬之重者乎窃谓阁下乡者西府遂持国秉则阳春膏泽可以穷垓匝宇而槐府潭潭某也虽欲下望尘之拜所不可得是阁下昔者之用乃天下之幸某之不幸也访苏耽之仙迹上义帝之故城而某乃得与遐萌小吏企末光而承余泽是阁下昔者之未用乃某之幸天下之不幸也今兹纶札鼎来使貂之袂相属归辅九五雍容槐枫之上退而谋国门墙尊严虽欲介郴阳之既见复还泰阶戛戛乎其难哉侥幸阁下抚封江右卓马少驻某餬口番城距高牙一衣带水幸之再来天也舍此时不干馆人望履幕非鄙则病是敢促櫓絶湖趵趵輿早下陈以觐钜公一眄之荣若夫穆天繹经国体措天下泰山之安则其规橰已素定阁下之胷府某一介愚瞽无以効渤海议曹之献至於白涸辙之状鸣负巫之贱又不敢墨笔 牋譊譊以溷棱威伏惟阁下贯其罪而与其进焉干犯钧严某下情不胜战惧之至

与朱舍人书

某比获撰屡辱赐南迁诗一编一百有四首自曲江过曹溪抵东衡州凡三日垂二百里右手执帙左手持簪目注心存哦诵乎齿吻不知林峦之所历嚶哢之度耳也昔屈大夫受谗於楚长吟泽畔离骚章句上追诗雅然桀纣羿浇等事反复致详云霓恶草之讽尤夥後之废放者其写悲寓怀之语必含怨刺虽韩退之为时宗师柳子厚文映古今犹有双鸟训狐之诗宥蝮螭之文中书丈人以贍学伟辞为甘泉望臣良笔媲迁董大册落常扬远徙曲江八变寒暑他人必忧怵亡聊日夜企而望归我公乃买园葺亭培薙自适一编之诗皆与诸郎快婿邦人之可语者投壶围碁登临所赋语工而意和格高而辞乐无郁郁不平之气芽於中而发於外也其贤於人如是夫岂久留此者耶某不肖不能窥见彷彿姑以所叹授圉人持归以献

三省与金帅书

王忬来归伏奉緘诲反复曲折备见勤诚玩味再三不胜欣荷伏惟元帅丞相为社稷之重臣兼将相之大任明良胥会言听计行生灵休戚系乎转眄皇帝仰奉两宫俯怜赤子感大德寻盟之意捐弃细故务在曲从誓书悉如来戒信使亦令启行岁输银绢见已计置起发商州旧

疆更不靳吝但以兹夏先归四郡继有渡淮之役今俟使命回程寢兵休士便行交割系虜之人即令有司刷会续当实告以遵严约无事繁辞岁律将周神明陰相跻民仁寿同享昇平垂誉无穷天下幸甚

三省与金帅书

比布讯緘遂勤海牒风埃匱薄审阃制之贤劳神明扶持喜天休之滋至念二仪以好生为德盖百战者不祥之兵修此齐盟出於初议中因曲见或为矛盾之言致此数年未讲衣裳之会兹聆嘉报不替旧欢仰卫社之大忠感睦邻之高谊已遵要束无复异同虽远方有双鲤之书岂殫情素使两国若一家之子永戢仁私瞻邇惟深敷云曷罄

盘洲文集卷五十一

卷五十二

钦定四库全书

盘洲文集卷五十二

宋 洪适 撰

启一

谢试中词学启

追攀逸驾驽骀方困於奔驰推择遗材瓦砾幸逃於沙汰既擢桂枝之秀更联棣萼之华人以为荣已独甚愧尝谓昔人之学实期大道之明远绍旁搜究圣哲行藏之蕴博闻强识达古今治乱之原未尝汲汲於功名宁复区区於文艺迨後世设章程而取士故诸儒追时好以谋身略奥义以榛芜既潢潦根源之失窥陈编而渔猎皆馥膏沾丐之余故穷经淹贯者或拙於文而摘藻適丽者又短於学举由一律畴克两全愚贾操金遂见讥於书簏轻缣窘幅终莫擅於词宗分轡并驱滥觞滋久惟昭代广搜贤之路有词科笼拔萃之才为异时翰墨之储极一旦搢绅之盛是必撑肠拄腹该九丘八索之遗言出脇穿心骋三都二京之殊轨夫能偶古作者兹可为时闻人如某者愚钝亡长迂踈甚陋材既同於樗散性实肖於枣昏自家君有去国之行故幼岁失趋庭之训瞻云在望思学治之相传历日弥长惧析薪之弗继杂绮襦而簪迹对缝掖以汗颜期自致於青霄遂力亲於黄卷然舌耕莫之有得而腹藁终亦无奇窥豹一斑可笑管中之浅见食鸡千跼漫寻纸上之空言虽非倚门墙而诵韩庄之书抑亦处畎亩而乐尧舜之道落花点缀聊以自娱雌霓连蜷伊谁见赏怅荣名而尚邈虑素志之终违既不能脱一行吏籍之劳将何以慰万里亲庭之望决科孔易徒枉事於雕虫作文不成殆何心於刻鹄遂捐旧业遽习殊科扬雄宁免於客嘲班固屡酬於宾戏甫临勅敌辙厠俊游戴縑垂纓于于焉而来矣抽毫进牍戛戛乎其难哉搜石室之旧文拟玉堂之丕律成功曰颂惭周什之清风作器能铭媿郢歌之白雪记序不工於述事表章复拙於陈情方虞鼠技之已穷岂意鴈行之并列获绍满羸之业遂逃饮墨之羞骤掇虚名敢自希於双璧尚遗季弟终有慙於三珠顾此叨逾由夫幸会兹盖伏遇相公中兴名相间出真儒国势既尊增大吕九鼎之重台躔有烂应泰阶六符之光虽伊吕之佐无以加彼萧曹之功不足进当君子长育之盛世推大臣教载之仁心遂至冥顽亦蒙甄采某敢不磨砢事业砥厉廉隅刻意读书愿入崔公之室铭肌报德敢荒陆氏之庄【阙】知举直院给事受天英气名世真儒追浑噩以还醇极内相代言之美竭忠嘉而论事振东台批勅之风怀推轂之仁心典扬衡之公选吞云梦者八九既已包荒取武城之二三未尝求备幸托粉榆之好漫成桃李之陰曾是冥顽亦蒙甄采【缺】参政明堂梁栋清庙鼎彝遭圣主而上下交欣沛巨鱼之纵壑有忠臣而奸邪不起凜猛虎之在山伟然百世之师卓尔万夫之望当长育之盛世推教载之仁心遂致冥顽亦蒙甄采某敢不磨砢事业砥厉廉隅倾液漱芳庶足三冬之用骋妍抽秘或推一日之长誓殚犬马之诚少効珠环之报【阙】枢密明堂梁栋清庙鼎彝伟然百世之师卓尔万夫之望发谋右府赖曲逆之腹心将命

遐方得月支之要领每极招求之道曲怀推挽之心下同前

谢勅局进书改官启

丁年诺仕瞻上相之後尘甲令奏篇玷中都之显秩脱选调七阶之冗缀朝班八品之华受赏非常归恩有自窃以策名委?期风穴之高翔蹶级限年觉天梯之难上反故纸而沉迷州县之职怀漫刺则超超公卿之门然而玩岁居闲吏课鲜周於六考起家寡援荐书莫望於五章録録亡奇滔滔皆是书局素称於捷径士林咸指为清蹊虽曰便今着为律而疏为令不妨稽古诵其诗而读其书至积久以成文复叨荣而更选欲重条章之出遂无资格之拘如某者袜线何长囊锥非穎假?始慚於高士立身期企於醇儒久勤陟岵之思常佩过庭之训斗南与对惟黄卷之圣贤江左相传有青箱之家世偶殫薄技辄中异科幸结绶而登王畿免抗容而走俗状备员公掾接武英游溢甫刑则除之初无鈎校之善取秦法之善者莫知攢摭之因逮三尺之克终诚万分之何补丝纶锡命既仰拜於枫庭绅笏生辉若重登於桂籍兹盖伏遇某官谋深挈国术妙取人王室中兴虽一木独成於大厦泰阶相比於衆星同共於北辰方参术芝桂以自资故菅蒯丝麻而无弃遂令弱植亦预优恩某敢不益厉远图更坚特操狗马自度莫知酬报之方桃李不言尽托生成之赐

谢除秘书省正字启

约法三章初乏刊修之善聚书四部遽叨是正之除仰拜恩私内深感惧切以乘槎问汉瞻东壁之文星结绶登畿列西崑之仙籍是称美职以待胜流盖将为选用之阶故聊试校讐之事惟图书之错乱从古以然而籤牘之散亡於今尤甚幸昌代求遗之既广致积年着録以寢全多鲁论之二篇类皆纷糅脱酒诰之一简詎免断残豕亥相传银根未定克称厥任亦难其人如某者识智卑凡材资么?伏周孔之轨躅虽欲自强慚游夏之渊源其如弗及每省鼠穷之技敢逃狗曲之嗤乃刻楮以偶成致吹竽而濫中脱州县一行之吏裁国家三尺之文奏篇方冒於殊恩出紵复跻於华贯才非七步已无子墨之可称学媿五车政恐雌黄之妄下遂窃登瀛之美更增入洛之荣接武英躔偶棣华之同列覃思艺圃庶藜杖之分光自揆僥逾率归推择兹盖伏遇某官经邦道备致主勋高巨舰济川独任维持之重大钧播物曲全造化之工若富家兼积於腴腴故匠氏不遗於椳闔致兹琐质得筵清途某敢不克己自修铭心图报朝廷既正固无刘晏之忧书策在前遂毕李邕之愿

台州通判回谢少卿启

庀职铅黄但索东方之米叨荣银艾来题仲举之輿敢借?於卿云庶免愆於宦海恭惟某官材高百鷖名擅一夔博物洽闻学周公仲尼之道同工异曲有相如扬雄之风蚤济美於相门旋蜚英於仕路进陟冰厅之直有嘉绵蕞之仪漱石枕流方丛祠之燕养鸣玉曳履伫华贯之横翔某久已仰高行将快覩未通名於记室已拜【缺】引领光尘譬草木君之味也服膺辞翰赠琼瑶我何报之

贺朱提刑到任启

伏审宠拜除书荣将使指方君行仁政务臻禁罔之寬欲下无冤民尤遴宪台之选金言有愜刺部相欢恭惟某官象载垂光龙渊擢穎厉枕流於清节览翔凤之德辉肃括洪深不言而备四时之气沈浸醲郁所着皆约六经之文礼初答於鸣驺望遂谐於侧席聊膺情於好爵即策足於要津开卷蓬丘下太一青藜之杖题輿芝甸貳刺史银菟之符中台已叹於郎潜闲馆乃求於吏隐惟今瀾部盖列帝畿总一道三尺之权问七州六条之事畴咨明允来职平反出紱占星有赫光华之遣埋轮撰日式先畏爱之传靖民无取於吕刑居位已奔於晋盗揽轡何久赐环可期某趣起小才倥侗晚出抗尘宦海初无一日之长借?卿云幸有二天之托未能撰履敢问典籤

回钱签判启

伏审光拜宸恩荣司郡画枉书邮之见及欣骑气之鼎来伏惟某官材智高奇机神警秀过庭有诗礼之学传家得忠孝之风久藉藉於芳猷盥駸駸於臚仕暂总六联之政俯参一幕之宾继踵相因固棠棣青蘊之旧信眉欲论称芙蓉緑水之游拔擢可期挽留宁久某顷求补外来筮治中聆德惟勤将亲仁於僚友効官有赖庶逃责於公家

贺钱运使到任启

伏审光奉制书宠将使指一言寤意载嘉前席之陈九式均财遴拣外台之寄金谐胥庆刺部知归恭惟某官养气至刚知言有要清明内照考之皆有宫庭恂幅无华浑然不见圭角惟家传於忠孝宜世济於功名方持?波燥茗之权已见揽轡登车之志厥今瀾部实谓帝畿故绣衣计使之除即紫橐从臣之选比虚兹位始得其人欣出紱之占星闻埋轮之撰日一曰食二曰货既知强国之源流千斯仓万斯箱更赖裕民之方略行将饰擢夫岂淹回某握 小才倥侗晚出抗尘宦海曾一日之无长借?卿云幸二天之有托

贺李枢密启

伏审显拜恩纶进持几柄当五百兴王之名世光启丰功惟二三执政以便民畴咨硕德除音既洽颂语允谐恭惟某官识邃而明气刚以大宅英华於道秘漱芳润於词源殫见洽闻已贯穿於今古独行特立不茹吐於刚柔掉鞅巍科振纓臚仕赞理官於听棘游省户而握兰久陟都公式寡法从对温顔於青琐屡罄嘉猷承密旨於黄枢益隆瓌望果奉丝纶之宠遂登帷幄之崇南北两朝方干戈之载戢东西二府宜文武以兼资更赖赞襄共跻晏粲某鴈塔缀年家之好麟台叨朝路之荣支郡庇身悦置邮之传命台阶矫首因笔墨以成文退惟赞喜之深采切渎尊之惧

贺吴运使除直秘阁启

伏审光拜渥恩进都显职埋轮道上威方肃於外台出綍廷中荣遂跻於内阁十连相庆万口谓宜恭惟某官志度渊英宫庭高嶷探坟丘之古训包川岳之灵晖絶後光前惟琢磨於道德彊中彪外不茹吐於刚柔蚤负远猷益腾硕闻播弦歌於鳧舄赞笔削於鸿枢论议喟然风流藉甚熬波燥茗见有司将明之材挽粟飞刍怀天下澄清之志既信眉於善类宜象足於奸朋计定心君知所取而知所予望高肤使得其禄而得其名浸结上知式騫中秘有焕皇华之宠更隆刺部之权将朽贯於邦储晋楚之富不可及也即翔纓於禁密管晏之功可复许乎某偶缚微官莫瞻崇仞速置邮而传命喜气惟深因笔墨以成文芜音是惧

贺何中丞启

伏审出綍枫庭振纓柏寺论諫皆本仁义夙着丹青吐茹不以刚柔聿分白黑除音四达金允一同恭惟某官实大声宏材全能鉅穷草木多闻之观蹈诗书百家之言绣口锦心後学者有所统瑰意琦行诸大夫皆曰贤蚤得隲於巍科旋跻荣於拱着是正尝来於藜杖校讐久对於云籤六察奉公振山岳动摇之职一言献可当国家闲暇之时即长諫垣有光从橐遇圣主和顔而纳海故争臣造膝以伸辞天下麒麟来表康朝之瑞人中屈軼益高指佞之名忠说侃然功效卓尔乃峻笼街之宠遂隆专席之威风厉霜凝良药少资於利病云从雾滂巨川行赖於作舟某稍濶光尘欣闻成命聊驰诚於削牍敢废礼於司函

贺执政正旦启

林钟上生太簇实函凤律之和摄提正於孟陬兹协龙躔之纪惟棣通於庶物宜萃聚於多样恭惟某官道贯孔门气吞楚泽侍言帝幙参二三执政之班发藻儒林当五百生贤之运履端於始降福孔皆某偶缚微官阻趋崇仞遥想颂花之列敢修行李之仪

贺两漕进职陞副使启

伏审深知自结异宠鼎来内阁联荣益邃云章之直中都改观更崇星节之称除目四驰欢心一律恭惟某官洪深置度茂粹凝姿学广闻多友古人於千载材全能鉅备和气於四时久将漕於王圻浸丰财於国帑振黜否陟能之任得取盈散滯之方刺史问以六条威声孔肃天下号曰八俊望实俱孚荐拜懋恩亟跻显职仰使名之既正知朝着之有光虽屈皇华尚赖木牛之助即持从橐共期金马之登某席庇偏州驰诚崇仞敢摭輿人之诵用尘执事之尊

贺汤运使到任启

伏审命传文陛宠陟计台第二千石之治平无臣出其右者总十五州之飞挽有人然後充之刺部知归金谐胥庆恭惟某官凤麟嘉瑞川岳灵晖学渐稽古之源才负康朝之略自摘髭於上第旋策足於亨衢职业粹然声华籍甚江淮草木知剖符持节之名云海蓬莱寓磨槩怀铅之直当近郡荐更於秕蠹故清朝遴柬於贤能既千室之鸣弦果十行而赐札厥今漕部实古王畿惟绣衣使者之除即紫橐从臣之选占星出綍争闻竹马之迎诩日登车有赖木牛之助

考夏疇於八政振漢制於六條善類信眉奸朋落胆連城帶邑問出入之錢谷幾何足國裕民
知取予則古今一也行將拔擢夫豈淹留某趨趄凡材倥傯晚出抗塵宦海初無一日之長借
卿云幸有二天之托禮未伸於撰屨誠敢布於典籤

盤洲文集卷五十二

卷五十三

钦定四库全书

盘洲文集卷五十三

宋 洪适 撰

啓二

贺何枢密啓

伏审宠传凤诏位陟鸿枢天子守在四夷方底修文之盛公辅间于两社允资同德之良帷幄有光绅綬相庆恭惟某官人伦仪表天下中庸尧醲舜薰絶翰墨之蹊迳周情孔思酌道德之渊源久历通津荐居言责丹匭掌授书之柄绦绉扬清路之威志在击邪如鹰鷃之逐鸟雀事先去甚当豺狼安问狐狸辍自南台洊登右省身享怀金之乐人歆执玉之荣简求兹得于真贤康济益隆于极治盖一国之慕巨室为政不难惟三公上应台阶斯拱而埃某窃观除目偶抗尘容削牍倾心敢赞典籤之喜捉衿接武莫勤倒屣之迎

与交代石监丞啓

伏审瞻天拜命暂违金马之班涓日治装来佐银菟之政摇心比屋企踵前驺恭惟某官量赋登阁识该贯变振鲁叔复兴之学读黄童未见之书六翮高飞三科连中酌渊源于道德异乎纁短而汲深焕星斗之文章所谓芒寒而色正纸见洛阳之贵马惊冀北之空既发穎于俊躔遂跻荣于华缀前主所是着为律爰笔削于金科三人同行必有师久范模于玉叶旋奉虎闱之宠共期鰲禁之游何挺特之英姿顾翱翔于半刺虽山登桐柏有仙迹之可寻而社接粉榆宜民情之素习政恐赐环之趣不成煖席之期某一别瑶林五迁缙龠词坛给札尝叨采菲之兼收郡垒题舆不意积薪而居上况甲族有亲葶之旧复周行依?樾之余逮兹糠粃之扬实赖瑾瑜之匿披承云迓欣慙惟多更嗇冲襟益丛嘉祉

答谢将仕投贄状

讲闻隼誉愿挹令仪辱谦牧以光临贲賤函而下问虽成蝇误墨昔尝被羽以先登而得鱼忘筌无复倾困而罗进益媿琼瑶之报第荣锦纈之藏

谢人投所业状

比辱光临宠谄雅制抽琴命操詎知山水之音下笔成章有辱琼瑶之报

谢人惠生日诗啓

特勤都骑宠赐佳篇牛斗不神媿名声之何有参辰相比覩光焰以非常退惟褒拂之私良积感藏之厚

谢人惠生日诗状

男子占熊罴之祥猥勤齿录美人赠锦绣之段益贲身荣方下拜于緘封将永藏于巾衍

贺胡提舶啓

伏审疏荣细札拜职輶轩传声五岭之南讲德百僚之上恭惟某官轶材兼美達识不羣抱圭璧之琼华探简编之奥府久居别驾深郁远图兹奋迅于星轺来典司于浪舶惟犀象珠玑之凑置使匪轻非山林川泽之饶输公有限必赖筭鞭之智自多航海之珍金曰得人可以利国第恐注思于宣室靡容留憩于外台某夙仰光尘未亲警咳岂期留落于此乃得帡幪之依敢寓意于书邮庶闻名于记室

回广州罗通判啓

伏审授命监州治装隃领咸骧眉于英矩已倾耳于先声伏惟某官学擅纷纶才夸典丽尝因野鵬而作赋复为仙羊而拜官荐屈题舆不辞叱驭来康南海少烦别驾之功入拱北辰高应列星之位某暂缘摄事将获承顔书记翩翩愧报章之不敏行迈靡靡愿旅食之益调

贺饶州洪郎中启

伏审眷深前席宠拜左符燕寝棠陰方画戟新临于风月螺州芝岭皆绣衣旧领之山川初布教条远聆讴颂恭惟某官书轻倚相识博胥臣超卓见闻束春秋之五传增多训故说离骚之一经网罗阙里之蟬嫣是正昌黎之鱼鲁沛然学问藉甚声名开天禄之陈编光分太一赐隃廩之佳墨文应列星廼持刺举之权常奏平反之策卖劔正传于淮甸梦刀复至于江城召王褒而作诗将闻宣室见盖公而问治欲避正堂即有褒纶入参禁橐某睽违之久慕仰益深顷讲宗盟不弃他杨之谍兹叨河润尚稽维梓之恭岁事向阑郡章多暇愿谨鼎裊之节益隆襟履之休

贺肇庆刘守启

伏审疏荣象阙作镇龙藩瓜戍指期允协东龟之吉棠陰留景已传今袴之謡恭惟某官至德中庸大雅宏達圭璧岂迷邦之宝梗枏推耸壑之材蚤驰问于朝端复承流于岭表扬仁风于赠扇来福遐萌沛甘雨以随车远追前躅即闻异政遂下褒纶某甫间芝眉密叨櫬?扬衡宾合莫瞻五马之尊寓意管城奚报双鱼之遗

回郑德庆启

伏审承荣凤阙宣化龙藩时望允归风謠立振恭惟某官襟灵磊落知略高明豫章呈耸壑之材大吕擅尊朝之器久潜宦海连把州麾砚台方选于一钱锦石又歌于五袴鹿効祥而夹穀不坠家声特务本以卖刀益崇治行即闻褒召遂陟通阶某顷际英躔获亲清海骧眉画戟何因乐雾之披寓意短絨莫报郇云之赐

回曾解元状

鏖锋笔阵彼乌敢当我哉造榜文場无能出其右者乡评允惬儒党有光先辈积思三都驰芬五岭充牣简编之读优游翰墨之林文最善鸣白也诗固无敌言多实用谊之策岂略行瞻鴈塔之峥嵘指鴈行而腾翥肯运逢掖见赍长牋某久矣讲闻欣然谐际摄空泮水获闻擲地之声远迹瀛洲莫快如墙之覩

回侯解元状

争锋笔阵日五色以齐驱造榜文闱心三星而着象声驰粉社喜动兰陔先辈韶濩谐音梗枿耸干学周公仲尼之道特立独行有相如扬雄之风同工异曲不辍夜分之习素高月旦之评果得隽于槐黄将策勲于芥紫章章鴈塔袞袞鴈行某旧矣知名趫然识面摄空未几初非一卷之师揆藻肯临深愧双金之报

回戴解元状

争锋笔阵少陆机作赋之年造榜文闱冠王勃齐名之杰声驰里社喜动亲庭先辈囊颖有闻席重是似平时妙童子之作既擅价于雕虫一日中有司之程果赏音于雌霓不负槐黄之举能收竹素之功唾手巍科致身荣路某久钦警悟幸际清扬暂尔摄空弗补撞钟之问惠然摘藻有惭报玖之章

回傅解元状

窃审席珍长圃副嘉诏之详延造榜外台占贤书而独步他乡改观吾党垂光先辈赋丽孔门气劘屈垒果见旧轡之得不负短檠之勤出月脇以蜚声一枝可折振风翰而借便万里为程某顷幸承顔欣闻中的遂远方履见诒金薤之辞不腆报章有愧木桃之什

代人谢郑漕举改官启

赞赤侧三官之事浸及终更受皇华四牡之知顿增倍价感藏心石喜动背芒窃以鸟有凤而兽有麟咸知为瑞木在山而马在肆孰辨其良惟真贤司藻监之公故後进得帡幪之托然锦心绣口者或有山川之险而蜡言梘貌者曷分珉玉之殊狐裘反衣而有之柏舟不遇亦多矣

取人失之子羽何以得才草奏不如陈汤艰哉知己谓予不信从古以然如某者马走质凡鸡尸用小自保岁寒之质未高月旦之评非韞椟以求沽何席珍而待聘徘徊九品几韩子之无归坎 十年真释之之不调偶铜山之设属致菽水以承亲刺史部州十三自惭黄绶城南去天尺五莫借丹梯初无鸞鹄雏之称安得蚍蜉蚊子之援岂期内举获厕下陈某官济美相门攀芳圣域专绣斧振威之任绍缙衣好贤之宜君子存心既埋轮安问当路执事过听乃推轂【缺】未【缺】何知桃李之陰近在瓜葛之末某敢不服膺吏道律已官箴巢寄一枝不作南飞之鹄印垂三组庶同反顾之龟

代承务郎谢梁侍郎举陞陟后

曳裾求见偶志目而中眉列牒受知遂鑽皮而出羽有识相庆无言可酬窃以国家崇紫橐之班三年使之延赏銓选厄綺襦之路五官然後陞朝已离竹马之游真作土牛之钝历仓氏庾氏之职至于再三合社郎庙郎之员动以千百抗尘竟走于俗状累日未离于小官惟寸进之艰难曷丈量其长短黑头年少谁称飮座之梨白脚门生宁望迎霜之兔傥非论荐孰得甄升如某者蟠木弃材猗苓下品学未知于习是文不造于紬奇良冶为裘莫继槐花之举尚书给札空慚棣萼之编猥以门资厕于仕版已分为国舍虞比之伍见讥于封胡羯末之间敢希敝帚之千金自嗟驾马之十驾才不才各言其子方景行于芝兰幼吾幼以及之人遂兼收于葑菲宠踰意表喜溢顏行某官江左兴王之臣山东相国之种龙返乡而蛇得路首佐命以负羈鱼纵壑而鸿遇风久论思而簪笔进人将加诸膝慕才而贵其身分浊泾清渭之源赏流水高山之志何期刻画亦及盘跚某敢不刳目囊箱游心刀篋有丝麻无弃菅蒯仰哉谬恩投桃李报之琼瑶誓坚後効

代徽州尉上太守后

仕而求禄腰黄绶以遵期我独有天目朱幡而结想将承顏于旦暮敢问讯于寒温伏念性不逮中技惟每下久焚膏而继晷非藏器以待时鲤退学诗恐坠过庭之训孔门用赋妄希入室之工屡踏槐花晚穿杨叶脱白丁而释躄齿黄甲以弹冠方尘九品之微复占百僚之底一行作吏未伸北部之威三釜及亲独喜南陔之养问津兹始勾庇甚优恭惟某官识冠伦魁学穷渊奥珠藏壁韞旷千载而流光鲲化鹏飞抟万里而直上未登金马聊佩铜鱼惟大贤无所不容故小人恃以不恐帡幪有赖捶楚可逃敢不律已官箴游心吏道牛刀而割鸡未用敢希顏籀之风鶚荐而累鹄不如尚冀孔融之鉴

又迎新守赵监丞后

紫禁疏恩荣佩左符之重朱幡戒道聿严前弩之迎老稚知归封圻改观凡叨属吏倍激懽惊恭惟某官川岳灵辉凤麟嘉瑞出神明之贵胄负标的之清规德备忱恂独乐东平之善学该贯变尽读河间之书蚤掇巍科浸跻膴仕自典尚方之职益宏大雅之休肆外闕中论议冠诸宗室光前絶後名声显于朝廷暂违金马之班荐荷银菟之寄治装伊始流化有期幸此大州得依慈父虽叔度之来何暮式伫袴襦胡陆君之去不留第光衣佩使幼女复兴于孝行岂小

人敢致于私情远绍昔贤政在今日恐棠陰之未久即芝检之鼎来某趨起凡姿倥侗晚出賦鼠穷之短技守狗曲之浅闻屡踏槐花偶穿柳叶初占百僚之底未闲三尺之从仰恃帡幪庶逃捶楚信眉自庆将逢流水之知引领方勤伫快青天之覩

代斋长见新教官启

仰如北斗夙装蹈景之怀志在高山将遇知音之听敢修尺楮庸布寸心伏念某胄本单平稟非奇卓夏弦春诵空坐对于短檠朝蠶暮盐几悲歌于长铗遡闽川而泛梗乐鄱水以采芹滥陪讲说之俦蔑有切磋之善中焉行役逖矣滞留复寻仲蔚之居已失邯郸之步处斋房之前列曷足长人直横舍之攸司猥令代匱方趁槐黄之举妄希芥紫之荣欣哲匠之鼎来冀顽姿之速肖大衍挂一庶穷牺画以东归宵雅肄三或俟鹿鸣而西笑夫何侥幸有此际遭恭惟某官学博五车文兼千彙燕之角荆之干独擅美材汤作濩舜作韶宜荐清庙屡鼓词闋之气益驰艺圃之名惊大器之晚成快景星之争覩广庭首唱诸老先生未能言便坐口谈当时弟子有所记三叹坐毡之冷久期朝席之重即有褒纶入躋华缀遂袞袞青云之上岂郁郁绛帟之间尚容负笈而前少遂撞钟之叩某自鞭十驾愿反三隅问铸金得铸人已获求师之益若食鸡必食跖终收善学之功

盘洲文集卷五十三

卷五十四

钦定四库全书

盘洲文集卷五十四

宋 洪适 撰

启三

代广东帅属谢帅启

问津黄木之湾甫窥官海窳籍红莲之府仰泛恩波即尸素以怀忧敢杀青而通谢伏念某稟生椎鲁探道艰难拜千佛之经莫能趾美聯五星之集有愧齐称学书既已不成为器遂同无用滥尘官簿空积岁躔因定省于亲闱遂徘徊于炎峤叹庸材之墙面筮膺仕以灰心临渊羡鱼初觐丛祠之末秩乞浆得酒乃叨戎幕之下陈徒诵过庭之诗未闲作吏之事惟片长可胜任使奈狭见不足激昂非赖包容难逃汰斥恭惟某官雕龙传学雌霓垂光蜚妙誉于簪绅补嘉谟于帷幄课先抚字聿高使竹之分志在澄清克受皇华之遣荐佩十连之寄历提五管之封里咏涂歌已洽袴襦之乐山行海宿寂无枹鼓之鸣宜锡诏纶入持从橐岂令贱子久托余辉某率尔弹冠欣然望履见父之执方自跃于鑪锤御衆以寬愿少私于轡策

代高要丞上郑太守启

觔口四方妄发弹冠之请庇身大邑叨居涉笔之官正结想于高牙辄露情于小牍伏念某学初茅塞识遂枣昏语宁反于三隅能不名于一艺白驹过隙虽抱子以何知黄金满贏在传家而有忝亦尝诺仕才得奉祠方九重天远念于泽南故万户县皆为之立貳首令摄事未通为政之经足以送穷不胜数公之媿超超欲进瘳旷是忧仰庇卿云岂无道地此盖某官鹏图击海鹤瑞鸣臯独鍾乔岳之晖共推清庙之器荐都显职大播休声瑞既协于梦刀仁即扬于赠扇葱葱王者之气夙重潜藩廩廩君子之风聿追显祖惟陂量兼容于弱吏庶鰥生得视于聳丞某整楫非遥执鞭可冀自思牛马之走无所取材甫亲鴈鹓之行敢不尽力

代封州签判谢帅启

觔口遐方妄发弹冠之请庇身近郡叨为入幕之宾仰戢厚恩敢通小牍伏念某学初茅塞识遂枣昏语宁反于三隅材不名于一艺白驹过隙虽抱子以何知黄金满贏在传家而有忝亦尝卜仕才得奉祠顷辱外台俾丞大邑偶黄茅之感瘴致行李以愆期仰惟元老之尊获遇丈人之行进瞻步武幸披雾于公庭曲赐齿牙遂回春于寒谷殆类塞翁之失马自惊龙伯之得鰲惟有感铭莫知论报此盖某官包罗间气贯综多闻闢紫闥之荣途贊黄枢之密议始居辅地无庶民愁恨之声暨拥使轺有天下澄清之志遂临八桂即咏两岐旋出綍于西垣廼建麾

于东广寬猛相济蔑怀市虎之疑剖决如流不事渊鱼之察俯怜穷蹇遂致饶逾某敢不?畏简书力鞭弩钝量长校短遂无尺寸之能抱公灭私或凯涓埃之报

代谢吏部李侍郎启

把麾五岭已消西道之声出綵九重复玷东偏之寄装怀增惧揣分知归伏念某业守青箱用惭赤箭卖刀买犊荐辜铜虎之分挽粟飞刍未達木牛之运牧人久矣奏课缺然恐获戾于备员忽拜恩而更治仍跻延阁并宠衰踪此日集衙无闻名之龙户他时报政空貽辱于羊仙饶幸如斯吹嘘有自此盖某官量侔山藪识蕴蓍龟蚤知藉稻之文独富粲花之论主刑仁恕议者谓过于张典选清平人曰後有卢李夙怀推挽共赖主盟惟曲赐于品题致连叨于任使某自閱星躔之覩屡惊斗柄之移歆水易心益厉吴公之操薄征疎目仰师韩子之言

宫使梁尚书启

某官生逢庆会誉满华涂有烛照龟卜之明兼地负海涵之量得刘晏之取子任萧公之转输足用地官斗筭之徒何算也伸威天府铢两之奸皆知之蚤聯职于宝储暂均休于珍馆独司推挽共赖主盟载惟鼠技之穷夙受鸛书之荐傳之羽翼賜以齿牙独私华袞之荣猥遇高山之听致叨任使尽出吹嘘某敢不拔薤抑强酌泉厉操可继宋璟卢奐伏仰前芳失之子羽宰予益慙厚遇

福州张侍郎启

某官量赋登闕识周贯变味道腴于七略包文体于百家曲台高稷嗣之除起部造郎潜之列益崇昼接叠庆岁迁内舞舜干仰仁天而簪笔出怀苏印洽惠露以随车积有功名著于中外撞牙桂管尝复借于寇君徙节闽川歌晚来之贾父自顾散樗之质夙游栖凤之林惟接武之好尤深故推轂之言益过致叨推择有辱品题某心系重阶诚殫小牍準程前哲欲厉操于贪泉寤寐清规庶免愆于宦海

回李惠州启

伏审怀章去国式临瓜戍之期森戟专城将快棠陰之颂遐萌相语慈父斯来伏惟某官德宇粹温风规高劭蚤擢奉常之第宜居着作之庭既荏苒于岁年尚栖迟于簿领以名字而典郡允得循良有方略以为民自然富庶治行聿追于召杜欢声将轶于罗浮某顷接班聯浸睽顏采方喜戒途之报已勤削牍之音书细十行即远颁于褒诏河润九里犹少借于余波

问李?州启

把麾五岭已消西道之声出綵九重复玷东偏之寄甫恭朝夕遥问寒温某官学富家传言推世则自奉专城之寄遂深当宁之知刺史省以六条夙称桂海天下号曰八俊益振荆湘来司

章贡之权兼用黄韩之化纪纲大举讴颂载腾为官乎为私乎变贪残于一问行山者行泽者
熄椎剽之羣惊治已疏于御屏宠将持于从橐某受材甚下任职无长方軫虑于谴呵忽冒荣
于推择退惟侥幸端出品题念平生云雾之披独彼此参辰之濶虽烹鱼狎至有踰从事之贤
而覩凤後期末降君子之见每遡洄而结想空蹈景以兴怀比获守于郡封廼密切于隣宝相
依唇齿愿投分于兰金敢布腹心幸摅诚于药石

谢温南劔后

把麾五岭已消西道之声出綈九重复玷东偏之寄顾薄材而知惧枉荣问以增惭此盖某官
学博书仓识穷理窟蚤擢奉常之第旋陪中秘之游武城之策二三尽讎譌谬犍为之磬十六
能考异同已垂上于云霄廼远分于符竹物华天宝龙神潜合劔之津里咏涂歌黄犢化佩刀
之俗夙保岁寒之契独私月旦之评遂致迂踈猥叨推择某睽离久矣瞻遡眷然书记翩翩若
高谈之对面故人恋恋冀清诲以倾心

回陆全州后

朽质叨荣已佩五羊之印高情赞善复贻双鲤之书谦谦仰君子之风恋恋深故人之意某官
机云家世召杜材猷燕寝清香寂棠陰之少事蛮溪豪族无薤本之可除当翱翔金马之间岂
留滞银菟之久某驰心英矩引脰崇墉远矣嗣音顾琼瑶之何报使之免戾幸药石之不忘

回蔡学士贺生日后

侵寻晚景知牛斗之不神灿烂雕章仰参辰之相比倍戢深仁之眷益增初度之光恭惟某官
瑞企清明气涵刚大表表出尘之逸韵英英秀世之芳规隐帙奥篇读黄香之未见鸿词丽藻
称王翰之可珍久肆志于林泉自怡情于风月夙蘊爱人之德独存介寿之心俯为初生欲其
难老一言假借或松柏之後雕十袭秘藏顾琼瑶之匪报

回湖南韩总管状

五岭作藩已销声于西道九重锡命遂更治于东偏惟记室之未通廼书邮之先及某官识探
李法名擅于卿国士无双有登坛之鼻祖一人当百多战野之肤公轻裘夕抚于龙州精甲暂
屯于鄂渚顾惟縣薄方媿叨逾操笔腴然莫报翩翩之问抒辞远甚空深耿耿之思

回知州惠生日诗状

定三百六旬之历会遇生朝知四十九年之非侵寻晚景曲荷松侨之祝光垂李杜之文伏惟
某官抚字知名中和兴咏听讼美甘棠之憩劝农传岐麦之歌性不违仁语皆扬善其诗孔碩
寿欲俾之炽昌何德以堪荣但深于藏弃

回赵新州状

窃审影纓西笑小迟象阙之行理橐东来暂掇鱼符之事先勤荣讯足见高情伏以某官名擅宗英才推国器九流索隐能读河间之书千佛聯芳同射平津之策蚤传诺仕已历专城置任棠之孟清哉若水贈袁宏之扇仁者宜风行将击柝之闻犹限盍簪之阻

回广西帳干状

半年怀旧常望岫以驰心千里寄声若飞谈而对面深铭永好采激私情某官韵秀朱霞才淹綠水传幕中之辨是谓能官流地上之钱共推善计念斯远别失我良朋枉兼牍之鳞鳞媿报章之草草

回潮州沈通判状

伏审拜恩中禁贊治偏城枉云翰以见诒传星屏之甫至某官聯横许郭方驾曹刘蚤擅价于俊躔久韬光于仕路居展骥之任寄实重于监州诵训鶚之文功正烦于康海念闻名之有素曾会面之未能不腆报章奚酬雅眷

回郁林知州状

睽濶清谈屡閱飞葭之变周旋雅好远承裁楮之临某官养气浑雄存心抚字此时褒诏赐黄霸以兼金他日归舟载陆君之一石念披瞻之未再徒结约以弥深

回周贵州谢到任状

窃审承流鐔水既拜鱼书掇事贵州已怀犀印某官风仪清整器局沉深歌麦两岐前乎既闻耳矣拔薤一本今者复尽心焉即有褒纶入登华綴曲枉翩翩之遗第慚草草之酬

回赵贺州谢任满状

窃审解龟古郡鞭凤亨衢曲垂问讯之勤益佩论交之厚某官材推标的学载本原比及三年已见与求之政統如五鼓不胜挽邓之情名已列于御屏荣即跻于省闕邈尔承顏之便怅然引脰之私

回范總干状

窃审承恩云阙列属星台已协吉于戌瓜遂寄声于行李某官风仪秀峙器宇渊深有家学之相传更吏材之是似足兵重镇吐计画于幕中退食私閤奉皇华之膝下增益过庭之训轩腾当路之知念昔桂林实望莲府睽离既久瞻邇靡忘情非鹿鹿之交礼重鳞鳞之祝

回汪经干谢举削状

征茅引类实采公言摘藻鸣谦难当私谢某官渊源赋学通敏呈材久赞外台又屈红莲之佐尚淹小选未高碧落之飞宝虽识于照车言婉轻于推轂曲承荣讯深戢勤情

回石县尉状

窃审青钱中选黄绶荣归喜动亲闱光生里閭某官识探理窟学富词源广陞臚传共仰鲲鹏之化遐方诺仕难淹骐驎之驰益载休声遂阶要路未皇赞喜已辱貽缄

回封州教授状

窃审瓜时涓吉芹泮恢文枉兼牒以见贻佩高情之良厚伏惟某官学能日益辞不雷同早聯千佛之名已得羣公之誉当圣主大崇儒术故远方皆置学官坐绦帐以谈经少烦模范登金門而奉诏即见羽仪怀雅论以奔驰愧报章之崖略

回郑德庆启

窃审治声夙着靡俟造朝吉语载驰复欣典郡方一麾之宣布宜千里以讴吟某官西都循吏之孙元佑名臣之世论议共推于魁垒典刑可见于老成未攄经国之材独纪牧人之効向来剖竹乃先帝之潜藩今日憩棠又吾君之旧邸惟两城之相接在五岭以称雄必有异能遂看褒渥某班荆未几紆軫已深声迹相闻斯不踰于数驿简书可畏尚有赖于余波

回陈英州状

比承谦诲欲得剡章实循三尺之文重屈双函之礼某官彰名鴈塔铲采蓝田麦秀两岐已藹闻于善政河润九里更密借于余波将满秩以趋朝遂正名于典郡难虚爵里之辱漫备銓曹之须岂题拂之敢云盖扶摇之可俟

回浔州知州状

远隰五岭荣把一麾得之流闻无不称颂某官包渊深之度负超卓之材既问政于盖公欲追踪于召父沛随车之甘雨惠爱无私扬赠扇之仁风芬芳大播行当简拔夫岂淹徊念久讲于英声曾未陪于雅论顷传得郡将期王事之同偶玷移藩遂有邻封之隔聊通柔削莫报珍题

盘洲文集卷五十四

卷五十五

钦定四库全书

盘洲文集卷五十五

宋 洪适 撰

启四

贺广西向运使启

伏审出纶内阙乘传外台腾八使之风声威行荆渚指二天之星次光烛桂林朝野僉谐江山改观某官韬臧远业充牣多闻才握随和擅当今之奇宝声谐韶濩传上古之雅音饱说吏师独优才具政尝喧于歌袴名屡振于埋轮尚迟金马之游复领木牛之寄用知取予维出入钱谷几何志在澄清岂奉行文书而已宁容煖席即见赐环某夙缀末交浸睽英范偶剖竹有善邻之赖更扬糠深前事之惭敷枉论心徒起仰高之恨裁緘写抱莫酌问托之勤

回刘肇庆启

伏审瓜时而往怀印绶以临州谷旦于差拥车輶而夹道厥初班录咸有讴吟伏惟某官学考圣贤望尊耆旧试吏见慈祥之政济时怀超卓之材出鱼契于九重镇龙藩之千里昔襦今袴已腾蜀郡之謡右粥左餐可遂蔡人之乐行将促召夫岂久留某近枉高轩遂承英范唯邻是卜幸借润于灵河无言不驩聊嗣音于芳牋

贺胡提舶交割启

伏审戴星叱驭涓日视章咸属耳于前驺独骧眉于英矩伏惟某官居今行古肆外宏中裂芟制于尘埃久跻撫仕分苕溪之风月屡赞名藩远将五岭之权尽斡万商之货允谓济时之彦斯多航海之珍即恐赐环岂容煖席某自聆显綬尝贡柔緘喜闻持节而来时乃把麾之幸万事不理待伯始而可知一坐尽倾传孟公之将至更期冲嗇式副瞻翘

贺余?州启

伏审疏恩中禁作镇雄藩城郭重来指绣衣之理所儿童相记骑竹马于道周初布教条侧聆讴颂恭惟某官圭璋宝器杞梓良材家学相传无歆向异同之论儒名夙就少甘奇显赫之年复掉鞅于巍科浸着鞭于要路台纲大振独高屈轶之名郎位有光尝拜隃麋之赐迺驻车于章贡革珥笔于筠袁已见澄清复将漕挽方筮鹄而奉计又分虎以牧人所至移风不事缝裾之策自公退食更多戏采之荣既久习于民情宜易臻于治效即颁纶綬归侍冕旒某偶玷郡

麾获依邻烛号五云体虽屡枉郇公之书封万户侯恨未识荆州之面

贺沈提点启

伏审荣锡天书宠持星节立九府之圜法久访能臣专三官于上林外兼数路邸音既洽时望攸归恭惟某官英伟赋才渊宏置度糟粕不胶于纸上宫商皆起于笔端鞅掌鱼符有淮人之孺慕规恢骊驾无汉土之色饥益懋简知果膺显擢广揽轡登车之寄总冶熔炊炭之司权子母之重轻少烦心计接夔龙之步武即听履声某自濶台躔屡移斗柄皇华甚远旅进退以未能?樾焉依大譴呵而或免

回陆提举启

荣拜明恩进膺褒擢一麾出守辍近郡之股肱四牡载驰寄外台之耳目邸音甫暨金诵相欢恭惟某官德粹珩璜学该竹帛云间烜赫追入洛之清芬岭表崎岖偃说佗之雄辨自结冕旒之眷见称簪绂之英久藉藉于仕途将駸駸于禁路朝廷深知治行连付虎符原隰远有光华暂烦龙节即仰北溟之击岂为南越之留某幸缀亲葶遂依?樾方扞襟而自喜将听履之有期牒诉喧嚣不敏寒温之问山川跋涉愿言裊鼎之调

回邓漳州启

拜恩丹宸宣化黄堂方增重于郡符已分辉于邻烛某官受材卓伟函器宏深蚤发策于儒科旋濯纓于朝路连得三刀之梦尚烦双戟之临雪白兰薰独廉清之名显风行草偃即岂弟以政成行遂陟明岂容敛惠某屡通声问未际色辞顷接凤毛斯见义方之训远勤鴈足益知谦德之光

回窦贺州启

显差谷旦荣憩棠陰凡千里之提封皆一词而咏德某官聯珠传业片玉呈材力睎青史之贤荐拜朱轮之宠马如羊而金如粟清节素传刀买犊而劒买牛遐萌丕变即看襃渥入箴要班某久濶高标每怀余论借宝邻之润幸击柝以相闻佩谦德之光媿濡毫之不腆

回徐通判状

承荣北阙受任南州笃雅眷以相先饰珍旃而见及某官轶材耀穎盛德照隣蚤驰黄绢之辞久载素丝之节钱清横浦谓尽展于鹏图贊治三城又少烦于骥足即闻改命岂复远来念平昔之摇心独差池于会面偶分使竹喜传半刺之贤尚隔戍瓜恨失同僚之便

回李惠州状

窃审抚柔名郡靡辞南峤之行差择良辰已协东龟之吉某官学充素蘊誉蔼清芬法任棠水薤之言略黄霸米盐之细丰湖足乐顾何美于谿堂法坐见思遂入翔于禁琐少看游刃以俟追锋某密迹门阑无繇谈欵亭瓜相接幸分余烛之光行李洊临有愧双金之报

回权梅州状

比以偏城阙守金议择人果得循良往苏凋瘵辱华緘之见及知善政之有为欲腴供亿之须既能身率不竞追科之考更在力行

回南安知军状

声闻击柝如唇齿之相依情重财緘见肺肝之相示弥戢能谦之德第增不敏之惭伏惟某官风规闡明德宇宏達夙着素丝之节遂居画戟之荣比屋争传有去蝗之异政干城自卫却聚蚁之妖氛即听褒嘉进班清切某摇心虽久识面未能方商律之告穷冀黄堂之善葆

回刘通判状

窃审拜恩象阙诺仕羊城共夸别驾之贤已作着鞭之计某官材猷奋发襟韞粹醇早炊画于外台即扬芬于华辙歌功康海烦骥足之一来得志摩空看凤翰之横絕虽平时濶半面之雅在难兄契同心之交何幸为邦遂将聯事远勤芳讯愧不腆于报章时迓薄寒冀白颐于旅食

贺田提刑启

伏审罢拜恩纶荣将使指上方任德务臻禁网之寬官必择贤尤重宪台之选英尘所暨金论相欣某官奎壁孕灵淄澠纳度蚤策勋于鴈塔即接武于鷺行六察去邪仁约张敢言之胆四知厉操阳城劳抚字之心爰奉真祠少休故里忽顛卒哀凶而豐作虽郡僚避难以宵奔独追凭轼之风高出投机之计聚?觥于孤垒不使横行庇簪笏之名家尽皆宁处旋致灵旗之集弗稽萧斧之诛迄能脱离于妖氛信有护持之神物偃先声于桂笏远应二星迎异数于枫宸行跻两禁某离羣之濶蹈景已深偶左契之托邻将渐余润幸绣衣之假道即际清标凭竿牒以摅情冀鼎裊之垂意

谢陈经略启

垂弧纪旦惭学易之无闻削牍铸辞辱过情之善祝雅怀借重陋质生辉恭惟某官耸壑呈材照隣蘊德贯鲁壁邺家之读播函京灞岸之工八俊乘轺应景星于高汉十连植纛洽惠露于遐萌少借银菟即班玉笋夙厚合符之好曲私踰袞之褒记軫生初礼踰望外俾尔黄髮欲三寿之作朋遗我綠琴顾双金之何报

回南恩权州状

窃审龟筮告犹鱼符摄事染华緇而见遗知初政之甚休某官心术疏通吏材英发盘错廼彰于利器委蛇见咏于素丝种韭一畦雅有泽民之志鸣弦千室共推典郡之能少借剸裁以看润饰顾分携之未几在翹翹以弥深愿宝生经遂跻荣次

回袁教授状

窃审拜恩帝宇分职教官枉汗竹以甚勤知往瓜之已及某官学称经笥誉振儒林绦帐垂堂将应撞钟之问褒衣匝序可无鸣鼓之攻即对言纶遂荣朝黻幸从容之有便冀跋履之自颐

回德庆通判状

受任题舆涓辰视篆提封千里讲德一词某官量赋沉深材推敏妙尝割鸡而小试聊展骥而远来风月平分已翱翔于半刺云霄濶步即腾跃于高衢方念语离遂勤遣讯尚濶从容之便第增翹伋之思

贺林尚书启

伏审宠拜耀章进都荣次天官其属六十久虚常伯之尊武王有臣三千孰出钜公之右丝纶所布簪绂谓宜恭惟某官学富盈科量深韬世追风枚贾能纬典以敷华发采随何蚤席珍而待聘历芹宫而假道陟柏寺以尊朝既接武于夔龙之间遂垂光于虹蜺之上台纲克正时高三院之威諫草必焚名重七人之长妙简已隆于螭濩祥辉廼烛于文昌望峻官仪上星辰而听履私无宾谒指风月以飞谈即践台槐共宁邦本某它官有守赞喜无因体号五云屡枉鸣谦之诲侯封万户未降快覩之心

贺张洪州启

出纶中禁换节大拜宾客鼎来屡下凝尘之榻山川改观一新卷雨之帘闻视篆以敷和辄褰牋而赞喜恭惟某官梗枏耸壑奎壁垂芒和璞随珠早席珍而待聘潘江陆海能授简以骋妍若时题品之公自奋功名之会行贰卿之紫橐承密旨于黄枢备殫猷纳之忠欲试藩宣之寄統如五鼓遂谊吴郡之謡愿借一年久敛桂林之惠幕府既移于闽峤正堂曾问于盖公眷益简于帝心任复隆于方面令行数月已慰八州之人色比三台即迎一札之召某自续貂于曩日不对塵者六秋承乏连疆廼借瓜畴之润指期就道庶披棠舍之陰商节凄其高牙乐只冀鼎裊之勿爽副簪绂之具瞻

贺吕桂州启

列职蓬丘摠戎桂笏远人相语潛消佩犊之风輿诵攸归共起驂鸾之咏吉谐刚日欢动隣封恭惟某官识妙伦魁材高肯綮种学远穷于丘索吐辞皆中于宫商惠露沾濡最讴吟于名郡华星輝赫耸风采于外台方清朝久戢于干戈故重镇分屯于介冑足食政劳于心计列城咸

肃于指撝远勤颇牧之谋难屈管萧之寄遂班内阁来镇南垂幕府雄开初笑谈而缓带居毗安作不愁叹于无襦即迓赐环未容煖席某情深引脰愿隔承颜扬粃居前既自惭于陈迹灌瓜甚美遂有赖于余波

贺张福州启

名简帝心任隆方面高牙大纛最九牧以横飞缓带轻裘挹三山而坐啸政新视篆喜浹提封恭惟某官嵩岱稟晖淄渑纳度材高盘错擅多多益办之称节贯险夷玩蹇蹇匪躬之象?騫华贯茂着黜功足用版曹妙幹货泉之柄耘强圭甸稀闻枹鼓之鸣既昼接之益章宜岁迁而咸允书殿极儒绅之贵斋坛分将钺之雄襄汉上流有赖长城之扞豫章大府久喧慈父之謠拜宠自天揔戎易地惟闽粤东瓠之俗本会稽南郊之疆迹今日之上都廼一时之重镇民其幸矣公实临之少烦统御之良即叶都俞之会某自睽岩电屡閱秋霜窃食海濒复借光于邻烛驰诚门仞敢赞喜于书邮愿言衹鼎之调式副绅綬之望

贺黄提刑启

渥对纶言荣将使指上方任德务臻禁网之寬官必择贤尤重宪台之选驰声旧部耸望遐萌恭惟某官学探九丘文长三变黄钟大吕参嶰律以含和北斗泰山偃儒绅而蹈景蚤接夔龙之武遂裁獬豸之冠自结深知式分远寄乘轺久任周五岭之东西宜岸屡空踰诸公于前後人共期于紫橐命复畀以青犢虽平反大慰于羣情岂献纳可遗于夙德宁容席煖即以节趋某获保岁寒欵依云?承流千里已逾请代之期借润二天尚有承颜之便愿言冲啬庸副瞻翹

贺?州李大尉启

窃审宠膺恩綍荣把州麾籍甚威名洋然讴颂恭惟某官追踪细柳经武前茅结髮从戎功屡先于勇爵执戈卫社忠益显于周卢提銳旅以鹰扬扫孤城之蚁聚智谋既运氛祲遂空缓带轻裘少借蕃宣之重高牙大纛即开庆赏之行某讲服有年披瞻无日幸托宝隣之润聊通书驿之诚

回董梧州状

宦海闻风恨差池于英矩州符接畛幸假借于余波方聆视篆之新已枉挥毫之贶伏惟某官幹时良具耀穎逸才克全白璧之名久厉素丝之节翔鸾集凤驾前籙之美谈佩犊带牛革遐萌之旧染少烦游刃遂迓追锋念引领之空勤曾论心之未便第坚邻好不腆报章

盘洲文集卷五十五

卷五十六

钦定四库全书

盘洲文集卷五十六

宋 洪适 撰

启五

贺施察院启

宠膺制綬进陟宪台最天下之两轡卓然独步迎日边之一节久矣不闻夙儒既升金论相快恭惟某官体局方整襟灵壮坚璧韞珠藏早埋光于川岳鸿轩凤举即荐瑞于朝廷方正笏于豸冠忽分麾于鱼契受厘宣室已深贾傅之思敛惠富州果下陆君之诏青氊复得白简益严少烦明目张胆于鵷鹭之间行见聚精会神于槐枫之上某自睽岩电屡换星霜旅进退以无繇虚寒温而敢问

贺陈帅生日启

候明星于南极聿临见丙之期赋峻岳之声诗允協生申之什祥开初度颂溢维祺恭惟某官天上谪仙人中间气河目乃公侯之相泥涂无甲子之疑江左建旃良吏于是为盛峤南揭节肤使其犹劣诸遂居方伯之尊式赖长城之扞宣室思果于贾傅吴人难挽于邓侯在厥初生必得其寿彼松柏四时之贯所谓经寒而知惟龟鹤千岁之殊斯可同日而语某情深贺厦礼隔登门有酒如澠敢介遐年之祉若金作砺即看晋昼之荣

贺吕总领启

荣拜制纶宠将使指聯华省户依乌瞻列宿之文足食屯营流马幹百城之运邮音所暨輿诵谓宜恭惟某官超卓赋材沈深置度殖学得传家之妙飞谈驰惊座之名既剖竹于雄藩遂埋轮于剧部以经润饰通儒称者三人有志澄清天下号曰八俊益隆瓌望密简眷知凡财用之在版图式付民曹之寄给馈饷不絕粮道重分军政之权即迓节趋岂容席煖某仰高有素快覩未降借?卿云方备员于岭表贡诚子墨敢赞喜于门阑

贺黄提刑交割启

兼程叱驭涓吉佩章善类得所依归远人无不忻颂某官咀华竹素擢干榱桷魁然见长者之风温其有君子之德蚤耸乌台之望洊烦龙节之行五岭澄清初祥刑于东表九重简注迺易地于西偏斯拜渥恩复临旧部夸乡上冢散金能洽于故人輿轿入疆持斧载瞻于肤使即闻

严召归簪近班某自读制纶即飞庆牋庀官席?喜既僂于眉端指日接辞情庶披于心曲

贺广帅陈侍郎启

伏审名简帝心任密方面轻裘合北久传岷首之碑輿轿宅南来酌贪泉之井先声所偃公望
迨归恭惟某官参轨前良垂模後进广庭高步仰三杰之扬芬要路横翔凌九臯而彻响海方
袍于槐市讎断简于蓬丘列星已应于天文四牡暂烦于风力惟臯吕体觚圜之意故闽浙有
囿空之隆秉笔赤墀记注为千古之法蕝绵外野礼仪成十月之朝繇甘泉近侍之班作襄汉
上流之镇自休间馆未塞輿言方谋帅临黄木之湾乃钜公开红莲之府羊仙荐祉必须执谷
而来龙户集衙当有憩棠之听上召则还人留实难某夙际光仪猥勤题拂鸣珂相踵深惭糠
粃之扬胶柱不调所幸瑾瑜之匿偶滥移于左契度难俟于高牙凭柔尺以摇情勾和襟之纳
佑

贺广漕郑郎中启

伏审光奉帝俞肃将使指车茵所问来休黄木之湾印笥重开自是青璫之物积十年之遗爱
踊列郡之先声恭惟某官德湛量陂名驰艺圃雅雅黄钟之在簏英英白璧之辉山八俊拔奇
特表弦歌之绩九重锡对遂荣铜竹之行入赞大农进符列宿赋皇华而隩领振漕事以裕民
自奉计而历他官忽拜恩而临旧部虽木牛流马之陈迹较然可寻岂云龙神虎之通闰阙而
不召人勿私喜公宁久留某夙景高纒未亲余论自聆诏綽谓依赖之可期偶易州麾复差池
而相失尚借光于仁里仍接眄于治台窃图行李之间或有班荆之便

移福州谢赵提刑启

辑粵空餐既大何之幸免掌闽出命顾繇力之弗胜惕拜丝言喜投檄?伏念某赋寻常之质阙
尺寸之长隤五岭者八年易九垓之三?心虽黽勉初无画饼之虚名志欲激昂终愧贪泉之高
躅恐黜幽而负殿方请代以图归岂料清朝游移要屏大惧铅刀之钝难求布鼓之声行阙中
天望日华而已近故乡接眄知风景之不殊自非麈尾品题之私安得羊角抁扶之便此盖某
官直方厉操淳白鸣徽有更生博极之书得东平为善之乐望密????玉节峻辅金屡司发軫之
权复佩平反之寄用恩及下为长者而折枝见恶在前如农夫之去草时谓外台之表人欢夏
屋之依每曲借于揄扬致叠叨于推择某自尊山斗浸换星霜听言未愜于鄙悰投分已同于
夙契遂殫五技敢忘前事之师少借六条庶追後期之责

谢邓建州启

辑粵空餐偶大何之获免掌闽出命顾繇力之弗胜惕拜诏纶幸分邻烛伏惟某官宅心端栗
接物惠和才备四科挹前良而参轨风舒六艺发妙语于抽毫尝钩校乎三尺之文迺翱翔乎
半刺之任铸龙班节原隰远有光华分虎作符朝廷深知治行籍籍袴襦之咏駸駸笔橐之除
惟平时曲借于衮褒致儒品叠更于器使某自亲风度已托岁寒槲?焉依尝略六条之问棠陰

密迹复渐九里之余

回知州贺生日状

伏承軫记生初骋妍意表月宿南斗无片善以着称体号西崑有英辞之轍古高情甚渥朽质增惭伏惟某官论议粹醇襟灵超诣材推时彦暂分皁盖之权清畏人知共说素丝之节夙締芝兰之好欲先蒲柳之衰貽之嘉音介以难老一字之踰华袞拭目难任双金之报緑琴牕顔何已

谢知州惠生日诗状

诵蓼莪之篇老将至而增感介黄髮之寿礼甚厚以难任深戢谦撝采增悚汗此盖某官德惟贵齿仁以根心决雀跃之讼于棠陰案无留牒摛锦纈之章于毫穎才有残膏斯因初度之辰曲借长年之颂确然殊倦下鳞使于长川责以好辞追马人之前藻剖珠私喜报玖知惭

回连大庾状

讲闻风问积有岁时独覩面之差池每驰情而悵结某官学充素蘊世述清埃远弹弁于梅山久鸣弦于花县服劳五斗已书集凤之能振响九臯即拜箴驾之宠曲承华讯徒激鄙悰顾藏篋之翩翩惭濡毫之草草

回州学正录状

窃审较评粉社立矩芹宫人皆曰然公岂自歎解元沉潜蠹简埋铲萤牕未逢流水之知尚屈青云之便朋友共惟于讲习深戒绣鞶老成端有于典刑遂仪逢掖某曲迂玉趾见责瓌词第铭四益之嗽有膺七襄之报

回何直阁状

分麾百粤已越戍期徙部七闽误膺诏札揆謏材而惕若倚余润以欣然某官氷壑照人骊渊瑞世谈必倾于一座书能读于五车下笔掀雷淡墨题乎鼎级吹藜夺月雌黄匝乎蠹篇猗欬隳声籍甚荣路已青冥之垂上却朱紱以退飞既聯职于道家蓬萊迺俛眉为诸侯宾客郁沈亦久蘊蓄未摅惟曲借于齿牙致屡叨于方面合盍簪于曩日数判袂以积年何幸衰踪复寻旧好驱车倍道庶瞻西庀之登扫榻听言敢後正堂之避

回参议贺郎中状

分麾百粤已越戍期徙部七闽误膺诏札揆繁剧而縈抱倚欤助以信眉某官学综九丘词倾三峡丹青骋步开天祿之陈编列宿垂芒赐險?之佳墨遂抽簪而飞遯旋侧席以旁招方退然

油幕之游廼昔者綉衣之治增重外閫实烦远谋顾是微踪遂将窃食介季父同年之好顷接英躔记池阳一夕之谈屡更缇律复有亲仁之便可知逃责之方

代饶州守迎交代苏尚书启

伏审出纶法坐剖竹名邦千里心驰共仰甘泉之老一襦顔汗冀新蜀郡之謡公望所归先声是偃恭惟某官稟灵江汉发彩随和读八索之遗书备四时之和气挺挺有祖风烈济美儒先堂堂为国光辉蜚英庭缀自粉闥之影组入芸阁以提纲成春朝薤野之仪批夕拜琐门之敕国有六职峻紫橐之貳卿汝作秩宗续青璫之旧物梦刀屡矣买犊纷然难休老氏之祠来治番君之国论德而论四子昔已作诗敛惠以施一州今当有诏恐届中道遂仪上京某夙企清躔未亲嘉海鸣珂相踵自慚糠粃之扬胶柱不调或幸瑾瑜之匿飞霜急节高盖出关冀衮鼎之嗇宦副簪绂之瞻瞩

贺知饶州李左司启

易地出纶显拜鱼符之宠过家夸组甫严熊轼之程輿诵迨归先声是偃恭惟某官星躔躋祉月脇铸辞卓尔昂霄壁千仞而独立渊乎韬世陂万顷以有容自高鹄鹭之行不藉蚍蜉之援台官张胆久震慑于朝端宰士尽心竭弥纶于省闕惟今剖竹所治盖昔灌瓜之隣斯民熟五袴之謡指日俟双旌之至恐不席煖遂将节趋某顷缀篷瀛尝披云雾维桑有礼知厦屋之焉依置薤可言冀宾阶之与进

代程湖州谢执政启

外史养痾方赋归之三月辅藩代匱复流焕于九天班祿云初衰迟自惧伏念某学不足以要终原本才不足以治剧剗繁鸣玉要津点北门之清近怀金拱着慝西府之贊襄久休香火之庭自适山林之性制纶横及留钥遣行力以疾辞曲蒙恩贷寻邯鄲之故步偶未失之求勾漏之秘篇他非望者岂期推轂仍使建旗惟兹苕霅之区今作股肱之郡起家甚宠卧治则难兹盖伏遇某官德简细旃望推隆栋方地辟天开之旦籍甚更张念涂歌里咏之民遴其共理当都俞之闲暇廼假借于拙疎虽鞭策其不能恐譴呵之弗免终期美?不累化钧

代贺万俟相启

涣号路朝升荣揆席家至户晓幸圣政之一新日晏天清见真贤之复用流传所暨鼓舞率同恭惟某官道緼经纶学该贯变挺松柏後凋之操抱蓍龟先见之明徧陟禁涂进参国秉间两社而为辅备竭贊襄有一言以兴邦益崇倚注忽遭谗口远落蛮溪孔子居中不胜麤裘之诵周公在外竞歌鱼豢之诗大君躬揽于万几温诏首驰于一节对扬便殿深契渊衷梦卜協求果作巨川之楫栋梁有托大开衆正之门方惩沸而吹藿必解弦而调瑟宗祊迨庆华裔具依某顷缀事枢密叨?樾念阶符之久隔际泰道之光亨代匱辅藩已窃贡公之喜驰神材馆莫瞻汉相之尊

代贺汤枢密启

疏荣纶綍冠位枢机朝登真贤人有嘉颂恭惟某官凤翔千仞乐奏九韶健笔振奇飘飘有凌云之气清埃擢穎赫赫乎逐日以新自首中于巍科即立登于荣路身为国史尝书笏以珥彤命作秩宗遂荷橐而持紫入明光而起草对宣室之问神浸积简知进居宥密渊谋入告非尧舜之道不陈远业所期岂管晏之功可许方朝政判东西之府而宰臣充左右之官惟是元枢久虚高位式应魁三之象聿求第一之流帷幄既尊何独遐冲之折摺绅相语益观上治之兴某旧矣仰高阒然快覩承流辅郡已叨推挽之私贡牒崇阶政窃帡幪之托

代张建康贺程参政启

显扬书赞参秉化钧惟旧德之立朝有颂声之载路恭惟某官学该治忽识判几微元圭彰间出之珍乔柏笋後凋之操凌云霄而彻响践台斗以结知文采陆离得大诰三盘之体枢机周密如神爵五凤之时不竞急流来休緑野方万几之躬揽宜一节之首驰畀陪都管龠之司易辅郡股肱之寄上既久不见贾欲纳嘉谟使无何果召参遂司大政螺洲有??合可期某猥备藩宣获依块圯驰神西序旅进退以无繇投分东阡大譴呵之或免

代谢魏越州启

种东陵之瓜久甘退屏掌北门之管忽拜误恩恳避莫能疾颠是惧伏念某性则寡与学无他长缀侍橐于荐绅毫毛何补奉真祠之香火齿髮浸衰政敛迹以养痾岂牧人之兴念遂叨晋秩采积震惊虎踞龙蟠兹作京于岳狩鸡鸣狗吠仍接壤于乡关侥幸如斯吹嘘有自此盖伏遇某官道包贯变识洞眇縣登要路以着鞭追前英而参轨方琴瑟更张之际有契符相合之知维石具瞻政切公槐之望急流勇退忽传使竹之分当一都一俞之初借三熏三沐之助致兹推择及此拙疎深虑居鉉之危有幸推轂之意讼棠攸阻旅进退以无因?樾焉依大譴呵之或免

代贺汤中丞启

命播芝函位尊柏寺邨封四達欢诵一词恭惟某官超卓赋材刚方厉操自得青云之路即膺丹宸之知方解弦躬揽于万几故出綍首驰于一节久不见贾非复鬼神之谈无以易尧即居御史之府鷹隼厉横秋之势豺狼空当路之羣凡此茹连有同草薶积三十章之奏牒振二十载之台纲威动垂绅宠跻专席近世斯焉独步益峻风霜泰阶所谓六符共期霖雨某庇身鱼钥引脰龙门敢修染髻之仪少赞典籤之喜萧辰始肃禁密多休惟宝护于夙兴用迎承于昼接

盘洲文集卷五十六

<集部,别集类,南宋建炎至德佑,盘洲文集>

卷五十七

钦定四库全书

盘洲文集卷五十七

宋 洪适 撰

启六

上宰相启

三千年而河清久矣人生之难俟七八月之苗槁幸哉天泽之可期敢输恳恳之私庶动岩岩之听伏念某所禀极陋其愚不移学虽苦於丘坟誉不扬於邻曲操数寸之管偕鴈序以齐飞受半通之铜点麟台而羣处陟岵幸迎於秃节入朝遽触於危机不胜私情遂求外服抗尘走俗已日往而去官洗垢索瘢致风闻之及嗣抵於深宪侪彼圻僚玷缺隤声虽生以何面目困穷纏已脱死仅如毛鷲再会赦而始复旧阶一终星而未刊黜典迫於立壁无以杜门登东臯而临清流自怜肮脏下乔木而入幽谷谁不揶揄未涓行李之良忽负茹荼之痛偶逃沟壑得累鑪锤恭惟相公軌躅孔顔錙铢燕许当圣主解弦而更化以真儒调鼎而赞元道大域中转洪钧之一气计安天下犹泰山而四维东合广翹材之方西曹无满谪之问某运将倾否筮亦遇干鷄失旦而一鸣靡忘振翼鹄绕枝而三匝所愿安巢倘回肉骨之恩可但漆身之报

贺新饶州唐舍人启

名简前旒任隆左契闻使君到大喧来暮之謡与老人期共快争先之覩欲伸贺厦敢问典籤恭惟某官声叶舜仪宝参郢握渊云惊代挺玉垒之灵晖駟瑗名家禪金籙之秘緼一时弦改多士节趋结当宁之深知拜司光之异擢广内雅雅世南则行秘书柱下昂昂董狐乃古良史正刷横翔之羽忽回勇退之舟不谓吾邦乃烦鉅德凝清香而森画戟安能久居此乎闚紫闥而攀台阶斯拱而埃之耳某未披云雾常叹参辰麦千亩荻千章遂托居山之庇水一盂薤一本愿容置屏之谈

荆门谢宰相启

观六符於穹汉心切呼天乘一障於重湖身难择地仰銜厚施敢寓微衷伏念某生以数奇缺然寡智顷疾颠於僻郡即却扫於荒閭贱子具陈谁恤弓伤之厄室人交谪略无装橐之储谋半菽以偷生泣编麻而濒死丰泽未逢於时雨高躔已匝於岁星公道初开擦拭非辜之士私忧遽集迺遭不孝之帑偶转壑之賒期遇济川之在上抽毫进牍妄干亨否之荣捩手覆羹危掇瀆尊之罪伤哉贫也止或尼之敢期播物之私亦预承流之数震雷霆而破蛰奋此幽蟠注渤澥以濯痕略其宿负大恩特达小器满盈兹盖伏遇相公任重推沟材收跃冶欲八荒莫不

击壤无一介而使抱关吐握既躬其劳爬罗有味其语前鸿後鴈或假借於云霄枯木朽株必薰蒸於芝菌特捐小垒渐进畸人某敢不履影惩愆刻肌报德挟泰山以超北海揆路非难呼中道而激西江恩波可冀

与交代赵知军启

与郡守为符忽焉分左蹶君子之躅有以指南聊先汗竹之私用结断金之契恭惟某官琮璫等润咸濩参和呈翔仞之灵辉抱昂霄之美干多文为富足更生博极之书大雅不羣得东平最乐之善僮佯膺仕烜赫华名清标共仰於素丝错节始彰於利器方英主揽权纲之柄欲诸姬壮磐石之宗凡朱轩皂盖之除多玉叶金枝之隼一麾敷惠最楚甸之列城五袴作歌挹西京之循吏闻今日耕桑之野皆向时荆棘之场有凝寝之清香无穿墉之健讼已成乐土为利後人诸公兴推轂之心阖郡阻留鞭之计即前帝席遂陟从班某夙景高标未亲余论水击三千里而上将幸瞻前刃游十九年而新愿言告旧倾翹之切敷染亡穷

为大儿江东漕属上使者启

家徒四壁甫从宦海之游我有二天遂席卿云之?方忧尸素敢後杀青伏念某马走品微鼠肝姿薄学六甲五方之事佩鞶无闻读九丘八索之书为裘?坠蚤因延赏获免请农正鼓箴以求师敢弹冠而入仕衅生私室祸及大门遗忠见軫於朝廷异数俾襄其窳窳猥令就禄非曰量能退惟一物之不知安得三年而善後乘财用之出入尺寸无长计班资之崇庠斗筲奚算仰祈覆露尚切超超恭惟某官学贯籤籥识伦蓍蔡自占月中之桂久腾日下之芬方圣君躬揽於万几故钜德首迎於一节奉常蒞礼进前席之嘉猷剧郡埋轮赖外台之华使擢象已跻於中秘疏屏深结於上知鏗鉤八俊之声震懼六条之察即归法从难借余光某将侍履絢获承鞭策小儿未知为吏尽托恩波若曹无益於官难逃譴域

荆門到任谢宰相启

贫切膏肓叹编蓬之左计恩深块圯点剖竹之下陈逾月泛舟蠲辰视印伏念某千虑无得一斑弗窺少年妄意於临民或能岂弟半世衔冤而夺禄不复激印敢画指以书空祇甘心於殍野帝揽权而真宰用士失职者泰道来补剿息黥育丰肌於朽骨撻鳍掉尾转穷辙之清波略其三尺之拘畀以一麾之末惟当阳君之故国在云梦泽之西偏二百里男三百里侯本密连於近甸六十日耆五十日艾皆熟记於旧闻虽创痍未复於承平然风俗弗移於醇厚赋輿既简狱讼不生僇鸣鷄吠狗无贪吏之须则去马来牛有乐郊之渐退惟么?恐负使令兹盖伏遇某官挈国大儒梦崑良弼叶璿玑玉衡之効光金匱石室之传以尧舜愧耻其心斯焉致主彼臯夔密勿之辅可以齐名方校短以量长俾承流而宣化兴怜困蹶初试凋残岂止捐奉稍以活其妻孥亦将观政事以品其人物某敢不自鞭蹇步庶効秋毫敢作伪声以八万流民而受赏尚期他日有五六老叟之送行不致瘵官是为报德

谢吏部贺尚书启

十六年之去国久蛰蜗庐三千里而溯江始开蛇笥深忧尸素敢後杀青伏念某生也多艰少而自苦操数寸之管偕同产以联荣受半通之铜鞮大雅而双入陟岵甫迎於秃节立朝遽触於危机既补外以终更又投荒之及难谁造哆箕之锦遂逢偃月之刀冤声不彻於九阍官簿退飞於一纪幸改弦之盛旦得夸组於小邦有社有民惟当阳君之故也乃疆乃理自云梦泽而左之傖鸣鷄吠狗无贪吏之须则去马来牛有乐郊之渐自惟么?恐负使令兹盖伏遇某官韬铎英躔铿鉤禁琐就日妙侍言之选回天高批敕之声怀文以裁帝坟书成金匱分职而掌邦治班俊玉除緼推轂之仁心怜伤弓之弱羽曲垂题拂致此叨逾某敢不思効秋毫自鞭蹇步台符在望旅进退以未能云?无私大譴呵之或免

上荆南刘两府启

十六年之去国久隔鴈行三千里而溯江远叨鱼契焉依夏屋敢後书邮伏念某生也多艰少而自苦顷中含沙之射遂伤偃月之刀冤声不彻於九阍官簿退飞於一纪幸改弦之盛旦得夸组於小邦穷猿投林见微柯而亦喜枯鱼涸辙得涓滴以更生兹盖伏遇某官勲巩邦基望崇人杰探金匱六弢之秘分狼弧参伐之威贯日月以输忠挫虎狼而夺气袴襦安堵洽惠露於羣黎樽俎折冲作长城於重镇某自怜肮脏获托帡幪异世荆州复有依刘之幸列侯万户何比识韩之荣

谢王总领启

船引蓬莱谁恤囚山之久符分铜竹自嗟乘障之微尸素云何杀青敢後伏念某千虑无得一斑莫窥自射影於含沙祇甘心於殍野会清明之上治点宣布之下陈有社有民盖当阳君之故也乃疆乃理自云梦泽而左之虽创痍未复於承平然风俗弗移於醇厚退惟么?恐负使令兹盖伏遇某官奥学盈科清规出类芒寒列宿言礼乐远有光华檄到百城问钱谷几何出入外足连营之食上寛法坐之忧即以节趋难乎席煥顾小吏漫加於鞭策恐外台不歛於帡幪某敢不瞻仰光仪奉行约束楚虽三户尚求瘼之未能我有二天兹包荒之可恃

谢宰相改正过名启

十日寒之拙宦可题於良史一星终矣明刑获改於秋官佩造化之更生顾么微而何报伏念某昨从外补已得代还偶亲庭婴祸於铄金故郡将乘机而下石指为奇货肆厥巧言酿白简以报私环赤城而涤垢法家舞智却回牒背之书狱吏趋时别上需头之奏议辟遂沦於胥靡免官自叹於秃翁跼跼墮水之鸢奋飞无计累累丧家之狗滨死谁怜已甘漂溺於风波何意清明之天日望大钧而辩数致密网之平反方商鞅作弃灰之刑难乎免者如曾参有投杼之事久则昭然兹盖伏遇某官德类离伦仁心济物佐域中之有大纳天下於无冤若伊尹之思匹夫恐失推沟之泽谓苏君当宥十世特施及嗣之恩出严棘之赭衣脱枯桐於黔突某敢不魂惊曲木迹鉴覆车复鴈门之跼益矜细行问翳桑之病长记穷途

贺王成都启

梦益三刀权尊九牧结装去国不辞蜀道之难传命塞途已觉雪山之重贡诚小牍赞喜高牙恭惟某官象箭谐声邓林擢干望倾後学仰北斗之垂芒名满广庭接魁星而齐色会光亨于泰道能寤合于渊衷紬金匱石室之书四提直笔鸣红药苍苔之佩久演明纶追还浑噩之风密吐忠嘉之论适坤维之谋帅辍鼎贵以筹边吾徒得君卧治之为淮阳而用黯有欲为王留行者愿孟子之在齐盖摠戎于岁月之间即穆繹于庙堂之上某退惟樗栌浪托粉榆流泽九京既踰袞得见褒之字冒恩一障繇推轂而有味其言顾谢悃之未緘已除音之先播卓然方伯财取道于隣疆缚以微官阻望尘于谒舍甫新岁律正酿春寒冀垂意于持生副凝旒之虑远

答张县尉状

鼓琴有山水意未易知音掷地作金石声自应击节某官沈酣七略钻厉三余异曲同工已有飘飘之气博闻强识必成灼灼之名徒烦问稼于老农盍请诲规于大匠欣然尝鼎媿彼报琼

回教授启

访当阳君之故既玷左符定管城子之交乃闻高谊骧眉则远敷衽可期某官学海穷源文河涌思青毡对客泰然一坐之寒绦帐称师发彼三隅之海以兹广誉必上清班顾以薄材遂攀逸驾庶几良药之海可追素餐之讥

谢张建康举十五年前陞陟启

治病七年那得三龄之艾成功一策克全九仞之山媿邹子之夜光点汝南之月旦伏念某声销邻曲识閤丘坟顷佐郡以终更值含沙之肆毒狱皆文致既剗迹于周行命与仇谋即灰心于荣进顾铨曹之不齿束伐閱以相忘久矣栖岩期于梦野会更张于治具有复起之痿人焚厥丹书假之皂盖寻鋤刀而再割积璇历以一终计班资之崇庠未离墨绶为题目而甄拔乌有旧章蒙泰阶仰而思之幸异时仅有存者遂飞一鶚之表用回六鵠之程兹盖伏遇某官天上景星人中霖雨帝以召公而分陕世期汲黯之在朝十国为连偕虎踞龙盘之重八元斯九积螭蛸蠖濩之思以留钥而折冲盖儒冠之司命兴怜社栎获托乡粉推轂有味其言猥参宝棨纳沟不被之泽倚埃洪钧某名玷阙员时增倍价取人失之子羽益务省躬草奏不如陈汤敢羞知己

谢魏潭州启

居狄山之一障代匱險冬陈方朔之六符依光垂象礼存事大罪恐瀆尊伏念某马走品卑鷄尸用小引舡而去渤海寢远蓬仙登陆则有天台亦终瓜戍孰料含沙之毒巧符偃月之谋衔冤莫叩于九閤夺爵遂绵于一纪循陔荒服几不免于恶氛负土故山抱亡厓之沈痛会蠲除于密网得抚字于疲氓考前召後杜于往图未能敷惠眄曲沮清漳之遗址何以销忧欲追讐邮实资庇恭惟某官材推隆栋名简细旃初躬揽于万几即首驰于一节谈曰犹望高子赖以

兴邦道盖自比孟轲去其塞路烜赫解弦之治超踰补袞之诗淄蠹靡留纪纲丕变我心匪石
必公道之大行衆口铄金以价藩而静镇薰重湖之叶气鬱四海之甘霖某辞呐抽毫神驰茸
纛仰帡幪于夏屋窃动欢顔期块圯之大钧倘收弃物

与交代梁判院启

闻买臣之引绶有客传呼先越石而着鞭与公汎扫重慙簸秕敢废裁臧恭惟某官结緑辉山
长离览仞家传赤舄鄙簪笏于怀绷志凌青云图翰墨之勲绩破古书之万卷谐雅奏于九
罏聳壑之超羣即监州而腾誉上念四蛇之辅尝问世卿人称雌霓之词可司帝制曷为頽首亦
欲乘边挟清漳而倚曲沮独有仲宣之赋祕明玕而潜美玉来续赞皇之诗某惠不苏枯罪难
逃责切喜契符之合乃逢笔砚之交必怀瑾以匿瑕不索瘢而洗垢情同兄弟非彼一时之面
朋好永子孙以吾两人为鼻祖

回富提刑启

天陞出纶坤维揭节方君行仁政务臻禁罔之寬欲下无冤民尤遴台諫之选邮音所播僉诵
曰然恭惟某官降祉云逵骋词月脇惟庆历之夔高有列传言视西汉之韦平不同日道宜有
家传之学益增世济之光自涉要津共腾广誉天下号曰八俊比迹东都刺史问以六条飞声
南服果闻简注进掌平反谅无席暖之淹即有圉空之効遂迎召渥归立从班某夙仰高标未
亲余论曲城僻壤幸逢四牡之驰除馆清泉遂借二星之重

盘洲文集卷五十七

卷五十八

钦定四库全书

盘洲文集卷五十八

宋 洪适 撰

启七

迎施运使启

传建节乘轺之命窃喜帡幪讲抽毫进牍之仪不虞蹉跌恃兼容之雅量寬再瀆之严诛恭惟某官学蘊渊深材猷超卓乔枚耸壑必应明堂之须英采辉山见称东序之秘自登文石益振芳埃着岭表之澄清寄湖陰之飞挽二星所次仰高汉而?然六轡载驰环列城而惕若仄闻驹哄密迺封某鼠技虽穷虎符无补解印绶而轻去未敢望风负弩矢以先驱由兹指日

答凌鼎州启

伏审解组极边拥麾名郡未还笔橐之旧列尚鬱縉绅之公言恭惟某官量赋登閤识该贯变对比魁星之色高谈开霖雨之期禁路光前思涌泉而错枉长城扞远名立岷以蜚英方清朝渴竚于仪刑岂穷塞久劳于筹画少移印篆以便节趋渔洞桃花宁作成蹊之计沙堤槐影想闻呵道之声某蹈景历年托隣旬月千里粮不賫行也有慙事郑之仪万户侯岂足道哉窃幸识韩之喜

回郢州侯教授启

农畴联属殆鷄狗之音相闻宦路差池乃马牛之风不及敢期四益先枉一行伏惟某官雅叶舜韶宝参和璧九变复贯执古道之权衡五色成文绚雕章之黼黻士久尊于讲席人常满于坐氊洋然庠声藉甚朝望过郢中而歌雪难措客词居稷下以谈天共传师说即汗青于石室遂持紫于金门某质稟庸常心慙抚字斗升涉远正思乡动游子之情只尺仰高如逃谷有足音之喜

回胡知县启

读太史之传仰伯始天下之宗官君子之乡讲士龙云间之誉何期四益先枉一行恭惟某官览仞呈祥颺门种学乔枚挺特材可备于明堂拱璧陆离宝盃陈于东序重以鵠原之望共期鹏海之程卓尔高标恬于荣进芙蓉泛水久挂颊于名山桃李成蹊将俛眉于壮县少试弦歌之绩即参绅佩之班某自顾凡姿漫无善状为孟玉而设榻乃幸肯临晓汉阳而置孟愿安承

教

回王潛江启

鸣鷄吠狗幸四境之相闻足鲤多鸿枉一行而见寄深佩谦谦之好有慙草草之酌某官辉颢时流丛芳世烈允蹈渊源之学交称盘错之材千室鸣弦有长謡之咏德余粮栖亩繇善政以产祥烂其桃李之华屈此梗枿之干竚聆公举入缀清班某猥玷郡章获分隣烛明珠绚彩知碣岸之不朽良药发言庶沈疴之可去

与周郢州启

鸣鷄吠狗夙通里巷之欢食瓜条桑重结邻疆之好可无一纸往白双旌恭惟某官包括多闻充盈雅量比美玉精金之称宝遇盘根错节而知材繇纶宠以专城有襦歌之塞路凝清香而谈笑最治行于等夷赐洛滨之诗正开元之重外奉会稽之计宜严子之留中某顾以凡姿飘然远宦河润九里?方赖于余波医折三肱言伫期于良药其为詹邇未易布宣

徽州到任谢宰相启

起徙中而护塞甫閱三时涉畿内以典城旁隣四壁仰德辉而咫尺超恩纪于寻常伏念某造命多奇忧贫甚久为十年之计者儋石无储取一障而乘之大钧未报远莅凋残之俗略无劳来之功正惧诣曹乃叨易地既斥堠免望烽之卧敢过乡效垂组之夸矧是富州咸谓溪山之胜兹同辅郡密依日月之光在古今选用之不轻独朝夕忧虞其弗称兹盖伏遇某官道高梦野望峻经邦右商实惟阿衡帝心平倚使赵重於大吕国势尊安以时栋而抡材盖儒冠之司命取上驷不遗于下驷由远郊遂寘于近郊凡此生成若何糜殒某敢不力图抚字用答使令问羊然後及牛敢专任数转蟲不可破蟲戒在容奸

贺汤左相启

伏审庭涣明缙朝登隆栋转洪钧之一气久矣赞元陈泰阶之六符谁其出右岩廊有庆华裔具瞻恭惟某官智过万人德尊一代金口木舌集圣贤之大成渊角山庭应乾坤之上瑞充积觉民之道踐行稽古之言以蓍龟先见之明致琴瑟更张之治成汤之于伊尹所谓千载相逢孔子传之孟軻共仰大儒之效属有甲兵之问不无疆场之疑边琐周知第沈烽于幽障庙谟素定迄奠枕于上京副袞衣虚左之求赖鼎铉光前之杰注意采重颡面益尊某身在方州心驰潭府望尘拥笏莫瞻望于乔槐赞喜抽毫聊整齐于尺楮

谢王枢密启

起家荒戍旁隣左袵之道易地辅州复接东阡之畛溢寸襟而怀德具片札以贡诚伏念某技则五穷虑无一得自祸?于偃月已望絶于干霄落南山之箕久营半菽决西江之水孰顾常鳞

忽叨乘障之除未着利毗之最饥者易食谓拙政之可称实不副名偶外台之并奏何期误渥骤畀还封夸三组以过乡敢循覆辙歌一濡之安堵请事旧闻兹盖伏遇某官任重经邦道高弼后枫宸纳说非尧舜而不陈松漠结成虽苏张而犹劣夙垂推挽致玷选抡某敢不愿补毫分恪遵甲令台星两两仰光焰以非遥夏屋渠渠喜岍嶢之有托

回通判启

伏审拜恩中禁赞治名城枉月楮以见诒知星屏之且至恭惟某官材猷挺特学蕴渊深英采辉山见称东序之秘乔枚耸壑宜应明堂之须吏久作于一行任尚居于半刺同流王化政须康海之功高蹈天衢难屈凌云之气某久聆雅誉未际英标将结好于金兰庶免愆于铜竹

回孔主簿启

登仲宣之楼正远怀于吾土曳任君之杖乃易守于邻邦非藉揄扬那能侥幸伏惟某官稟晖阙里驰誉儒林杞梓千章可谓昂霄之干凤鸾六翮共称览仞之祥即上要津遂摅素蕴某顷虽一面忽已数年沃若惠音顾琼瑶之何报使之免戾幸药石之不忘

与江州汪直阁启

易地分符遥指高阳之里问津弭楫将披乐广之天敢修好于柔緘以闻名于画戟恭惟某官览辉千仞擅价连城蕴弼中彪外之姿挺博古达今之识缥囊盈卷摘黼黻之黻辞白水飞荣列龙蛇之英辅自登文石之陞遂直道家之山长倩议论有余详试左冯之政次公治行第一首驰西汉之声某乡社相隣宾堵未步言如良药愿见枕中鸿宝之书禄必素餐免坐柱後惠文之法

与饶州唐舍人启

公堂悬榻记陈雷胶漆之情便郡把麾托虞虢辅车之势退循误渥端出游谈恭惟某官英气吐芒清襟迈往千仞覩仪庭之瑞九?扬间代之音紬金匱之图书粲然麟趾夹紫宸之香案卓尔螭?由宠纶以专城有濡歌之载路严助劳侍从之事对以春秋文翁修学校之官比于齐鲁某自揆德宇已閱岁华受一?而为氓夙依广厦润九里而蒙福复窃余波

贺张尚书启

伏审命传紫诰名得青藜复用张子房增西汉之气象有若南宫括作周室之典刑置邮流行海宇呼舞恭惟某官量包广博识判眇绵经纶自得于胸中糟粕不胶於纸上掌建国之六典多士弹冠有兴邦之一言宵人敛衽粤从去鲁谁不剧秦既摧偃月之堂即验反风之卜三接之际百神载驩我识履声庆细旃之图旧民瞻岩石期宝鼎之调元必有超卓不羣之谋以振光荣莫大之治公固自任非尧舜之道不陈人亦有云岂管晏之功可许共竚施設一新见闻

某贺厦情深扫门迹阻字踰华袞已叨荐祿之私物播大钧愿备铸顔之列

贺何大谏启

伏审制纶诞布从橐显持名者实之宾久积棱棱之望官以谏为职愈伸蹇蹇之忠邸状所传
金谐相庆恭惟某官玉辉千仞乐奏九?尧醴舜薰絶翰墨之畦迳周情孔思酌道德之渊源自
结眷知浸居言责幸圣主和顔而纳海故争臣造膝以陈词卓尔不羣知鹰鷂之逐鸟爵去其
太甚当豺狼不问狐狸欲崇丹甌之权乃峻青蒲之拜儒先益进善类焉依视越人之瘠肥孰
疑阳子见郑公之妩媚必相唐宗某迹远鸡翘喜同燕贺号五云体叠荣谦牒之藏封万户侯
未快宾阶之覩

贺朱中丞启

伏审命播枫宸位尊柏寺几年弄印上曰无以易尧一角峩冠仕者皆严惮黯幅员相语纲纪
毕张恭惟某官天壤蜚英山川稽瑞适尧舜帝王之道入渊骞德行之科茹古涵今後学者有
所统弼中彪外诸大夫皆曰贤若时题品之公自奋功名之会振争臣七人之职践御史三院
之班志在击邪如鹰鷂之逐鸟雀事先去甚当豺狼不问狐狸奉简以闻垂绅皆震积此立朝
之望隐然执法之除虚位揖第一人具瞻独坐笼街过三百步孰敢并行少倚风霜寔阶霖雨
某获观除目偶抗尘容因笔墨以贡词情均燕厦想簪裾之赞喜望隔龙门

贺杨尚书启

伏审命出法宫位高常伯夏官其属六十久虚司马之称武王有臣三千斯掌戎车之政邮籤
四达輿诵一同恭惟某官识邃经郛量函德宇雅音从律中金石于宫商阔步离伦去翰墨之
畦迳蚤扬声于全蜀已减价于他杨久矣韬光筮之遇泰青琐初批于诏敕黄麻久演于训词
兼丽卿云由汉未之有也上窥姚姒下周者其谁乎遂跻八座之尊仍领七兵之旧峻班联于
玉笋增光焰于金莲帝曰识公上星辰而听履人期柄国作舟楫以济川某获覩丝纶莫陪簪
笏宠踰华袞尝叨荐祿之私气转洪钧或有铸顔之幸

贺王枢密启

伏审法宫涣号右府居尊魁一星曰天枢有光乾象面三槐者公位益峻岩瞻人杰延登颂声
腾踊恭惟某官量吞陂顷识洞著丛健笔振奇飘飘有凌云之气清埃擢颢赫赫乎逐日以新
顷正色以入台不俛眉而媚竈上既知其直道人争仰于令名暨琴瑟之更张见栋梁之巨用
尊朝之始举国相驩置邮流行追大诰三盘之作枢机周密如神爵五凤之时偶生疆场之疑
颇有甲兵之问心在王室请使者之长纓口伐可汗戢武人之萧斧至自朔漠安若泰山王言
大哉立冠筹帷之上相尊等耳名参台鼎之间凡此寰瀛期于霖雨某情深跃冶迹阻班庭万
里折冲共庆精神之壮四子讲德愿赞股肱之良

贺沈舍人启

伏审命播朝听恩隆接昼凤合目舍人之様快覩黄麻史官重宰相之权兼提直笔时有得贤之庆士歆稽古之荣恭惟某官乐奏九韶玉辉千仞黜辞行远屈宋当得作衙官广誉离伦曹陆羞称于童子独当文阵连中儒科代言已妙于六题举世皆期于三字久徊翔而难进会总揽而彙征海中有蓬瀛作英躔之领袖李下无蹊迺振公道于铨衡方四禁之简材为九重而起草焕星斗文章之丽鼓雷风号令之传夫惟思若涌泉然後言如出綍虞夏之书浑浑尔可以齐驱伊望之业凛凛乎行将爰立某自睽符采屡变律箫三人同行有我师尝扳逸轨千里其外日甸服幸借末光愿崖略于贤书免沈迷于吏牒兹因赞喜庸敢投诚

回甄教授启

伏审主盟儒道领职校官枉汗竹以见贻知戍瓜之已及伏惟某官器非近用学总异闻蚤搢月窟之芳大振雷门之响未通闺籍来续序音六七子之咏暮春正虚品藻二千石不如逢掖乃得楷模已击节于鸿文更倾心于【缺】愿言强飮以速问津

回张信阳启

登仲宣之楼正远怀於吾土光陆君之佩乃更治于富州未讲一行之书徒铭四益之德伏惟某官飞谈巷雾逸气横秋学本本以洽闻才多多而益办为茧丝于保障已播欢声离鵙鹗之风尘倚看长翮某来游珂里尚隔瑶林愿闻拔薤之规庶追伐檀之刺

回严州樊察院启

寄耳目之台久留封外治股肱之郡密迩日边风采一新耄倪相庆恭惟某官道推先觉节挺後凋探圣域之奥篇声谐韶濩首英躔于淡墨名震京师惟卷舒不随乎时故否泰各反其类解弦之始冠豸甚休去义府双阙之前未伸直气居元礼八俊之上远振芳埃輿人俟调鼎之期钓濑非黔突之地某粤从志学固已仰高庭尚隔于贡綦壤幸连于鲁柝两岐秀麦浸闻邻富之謡七月食瓜有赖余波之润

盘洲文集卷五十八

卷五十九

钦定四库全书

盘洲文集卷五十九

宋 洪适 撰

启八

与太平州周侍郎启

北斗仰韩旧矣执鞭之慕余波及晋阔焉贡牒之仪辄干禁琐之尊少赎後时之罪恭惟某官材优王佐学冠儒流蚤登清切之班雅负经纶之志席前奉简与秋霜而争严柱下濡毫藏名山而不朽直躬独步縣宇具瞻不胜衆楚之咻自适一丘之乐迨更张于琴瑟方复拜于旗旒乃陟天官仍司东学真贤去位不税冕于当时多士叩阍有举幡之故事远袭阳公之迹具存柳子之书惟道大而不容必天定而能胜屡专名郡以利斯民凝燕寝之香少烦重外作巨川之楫行且处中某流落之余沈迷于此小侯事大国正勤乡往之私清渭分浊泾庶托品题之末

贺饶州周侍郎启

伏审秋浦政成受白发龐眉之饒螺洲颂作喜朱幡皂盖之来初令一新英声四達恭惟某官文穿月脇名埒斗魁闢豹管之一斑衆知退步读韦编而三絕久积多闻既挺拔于俊躔遂表仪于侍橐典选振山公之启披文彰刁姓之非自出帝城屡专民社兹鸣珂之密迹同衣绣而少留君薄淮阳耶方凝旒之重外谁踰仲卿者必补袞以处中某顷隔珠庭几周玉烛兼葭所倚尝分芸阁之光桑梓未恭又赖瓜畴之润

贺吏部沈侍郎启

伏审显膺帝制真贰天官黄麻似六经宝璐已高于纸价青氍曰旧物精金遂焕于带围邱状播传儒流歆艳恭惟某官人中间气天上谪仙以昂霄耸壑之材有斂锷淬锋之器渊源道德异乎纓短以汲深星斗文章所谓芒寒而色正兹重闕于紫闥因小憩于西垣兼丽卿云由汉未之有也上窥姚姒下周者其谁乎凜封诏之直声见改弦之公道欲革三铨之弊复思一代之英藻监既精甄陶可必某情深贺厦迹阻登门块圯之播大钧既闻輿诵吹嘘而起穷羽有待片言

贺汪侍御启

伏审正色左台御史聳殿中之职拜荣南榻惠文光柱後之仪风采益尊见闻皆震恭惟某官宝侔鼂采誉冠月评尧醴舜薰絶翰墨之畦迢周情孔思酌道德之渊源自秘府之校文以清埃而露穎一言寤意共高忧国之风六察分官即有事端之语如鷹鷂之必逐鸟爵当豺狼则不问狐狸白简凝霜方宵人之落胆巨川作楫期良弼以调元某贺厦情深扫门迹阻齿牙借誉每叨华袞之褒羽翮问程有待洪钧之播

贺陈察院启

伏审出綽法宫振纓宪府由太史而为御史四海聳闻迁元方而召季方一门鼎盛辄裁小牍以述金言恭惟某官乐奏九韶光分五纬休扬令问赫赫乎逐日以新刊落陈言飘飘有凌云之气远迩争传于师说卷舒岂自于人为逢解弦之清明果着鞭而踔厉既登文石之陛遂陟道家之山金马迭居丕变上车之谚皂鵬始击具瞻冠豸之威少烦明目张胆于岁月之间即见聚精会神于槐枫之上某摇心函丈洗耳速邮闻伯夷之风再三立懦效贡公之喜万一嘘枯

贺陈殿院启

伏审出言法坐进步宪台山岳动摇已振豸冠之职夔龙接簪益崇鹭羽之班朝尊端人士作嘉颂恭惟某官量涵德宇识邃经郭执古道之权衡谐正声于韶濩望倾後学仰北斗之垂光名满縣区軋魁星而齐色迟徊久矣问誉沛然自复入于帝城即高骧于朝路西崑影组居张率之清官东观紬书称董狐之良史暂褰粉省尝次黄枢俯从六察之游兹庆副端之拜人中屈軼惟直指于曲邪柱後惠文咸具瞻于刚介风霜是畏霖雨可期某获覩速邮正拘左契捉衿步武莫勤倒屣之迎贡牍摇心敢赞典籤之喜

贺礼部金侍郎启

伏审显膺明制进阶清班监二代以从周上方稽古典三礼而咨伯时可恤功远暨速邮略无异论恭惟某官逢原贯变挺操刚方白日青天扩高明于輿阜黄钟大吕备和粹于律同顷正色以入台不俛首而媚竈鷗鷖匪衆禽之偶豺狼空当路之羣惟道大而不容故天定而能胜尊朝之始通国相欢果闻前席之谈妙简细旃之听臯陶为理解禁网以破觚伯臣司宗告官箴于执玉共期调燮以庆荣怀兹逢荷橐之除尚谓出纶之晚某备员仁里借润荣河仰先达之姓名如瞻箕斗簞下陈之宾客正隔云泥

与交代沈正言启

伏审简在渊衷改临辅郡告旧尹之政媿此一麾采游童之謡期于五袴先声所暨公论咸归恭惟某官星斗吐芒随和稽瑞以习是胜非之学为閤中肆外之文卓尔昂霄壁千仞而独立渊然韬世陂万顷以有容自高羽翮之程无藉齿牙之誉宪台冠豸尝振职于风霜谏纸婴鳞岂窜名于雷电少迟簪笔不鄙建旃润九里而福京师虽倚贤能之力先一州而後天下恐非

君相之心宁俟突黔即迎环赐某已书下考无补秋毫久驰慕藺之诚尚阻识韩之愿积薪居上固扬秕之可轻解瑟更张盖匿瑕之有望

回张侍郎谢送登科记启

伏以钱万选而中品事播家声佛千名以作经望尊时杰会粹甫成于槩本发挥猥辱于赏音华袞可踰英瑶何报恭惟某官识穷万户语妙二京上轶汉周擅燕公之大手高出晋魏信籍也之善鸣蚤济美于八科叠扬芳于两穗盗环决狱蔑闻天下之冤簪笔立班有美省中之语某空疎不学编剗非才一卷之书必立师既阻得三之问尺牋所传以为法永夸俪六之藏

贺刑部张侍郎启

拜命严宸升华禁路方君行仁政已见朝令之更欲下无冤民尤重秋官之寄除音所洽善类相欣恭惟某官学洞丘坟文摛黼黻黄钟大吕函和粹于律同白日青天仰高明于輿阜蚤摘髭于上第宜策足于要津久矣徊翔沛然誉处暨清朝而解瑟先望士而握兰孝宣中兴工既精于技巧臯陶为理刑几措于累囚兹庆出纶遂荣持橐仁人既进解禁罔以破觚舆论所期济巨川而作楫某久违崇仞快覩速邮贡牋摇心敢赞典籤之喜捉衿布武莫勤倒屣之迎

回蒋通判启

几年聆德固望岫以摇心千里寄声若挥谈而对面深铭永好采激私情伏惟某官智术疏通吏材英发盘错素彰于利器委蛇无媿于素丝歌别驾之功尝翱翔于名郡下封轺之召即凌厉于荣涂某邈在山城阔然宾序凤毛独秀既欣王事之同鴈足远飞莫报书邮之况

贺吏部凌侍郎启

伏审中宸作命小宰得贤并九里之润以福京师効称异等掌六典之贰以治官府衆孰间言恭惟某官嫩德炤隣清规出类黄钟大吕参嶰律以含和北斗泰山偃儒绅而蹈景自解弦而更化即结绶以立班螭独擅于史才凤合共推于文様正朝夕论思之美卓尔得君以春秋褒贬之严翩然出昼连得三刀之益中提六纛之权岷首扬声说轻裘之叔子昭亭覓句接澄练于玄晖政成当五月之初环赐出九天之上少烦清鉴丕变弊源前马後卢寒素洽弹冠之喜左周右召迺遐指调鼎之期某涤耳速邮摇心贺厦小侯事大国两分东壁之光他日有殊恩倘涉西阶之级

贺吏部汪侍郎启

伏审大昕疏宠小宰立班李下无蹊赖典铨之清鉴遂上有径迓传命于速邮贤者尊朝人皆贺野恭惟某官中兴间气元精佐臣河目龟文应乾坤之上瑞金口木舌集圣贤之大成自首中于鼎科宜立登于要路不能媚竈遄即引舟易地而赞黄堂再斯可矣计年而得朱紱一何

钝耶会泰道之改弦入英躔而影组刚肠故在直气不回屡殚造膝之忠又复乞身而去坐看巧宦躐取美官老之藏道之蓬领袖久推于虞监周曰庠夏曰校范模孰出于阳公兹联笔橐之荣少愜簪绅之望掌六典之贰以治邦国固已逢辰遂万物之宜而理陰阳其谁舍我某情深仰斗迹阻披云块圯之播大钧必收弃物吹嘘而起穷羽敢幸衷言

江东提举谢宰执启

影组王畿突不黔而避舍乘轺乡部印已佩而入疆衔德泰阶贡诚小牍伏念某生而能薄仕则数奇自解瑟之更张两建旗而无补四牡怀归于周道已叨就日之荣六鷁退飞于宋都谁欬去天之远重来江介岂应星文陟彼景山笼厥枪旗之利亦有高廩察其雀鼠之欺所惧弱材难逃大谴此盖伏遇某官纯诚弼后善计安邦以公道而提衡为儒冠之司命大宋细桷罔非绳墨之分後鴈前鸿併受羽毛之赐乃如譏薄亦玷皇华某敢不自策疲弩靡忘夙夜茁牛羊而已矣当服官箴问钱谷之几何敢为文具

谢前平江朱舍人启

引车避道望浸远于日边夸组入乡迹不离于江表谦槩已尊于四益报章有腆于七襄伏念某极陋至愚数奇不偶稍整伤弓之羽再慙卖剑之风过凤阙以乘轺未能黔突遇鹄原之剖竹不暇褰帷官名幸得于旧轡宦路仍寻于故步虽云食禄之有地颇似贩浆而值凉鞅掌之初帡幪是赖恭惟某官堪輿嘉瑞笔橐前英兼丽卿云独扬声于艺圃上窥姚姒早出様于纶闱中遭偃月之谗久蛰冲星之气会法官之总揽起盘谷以腾振连把一麾咸歌五袴澄江练淨孰追逐于高吟燕寝香凝复芬芳于故事品藻每私于贱子皇华遂点于外台倘非良药之规宁免素餐之责某始叨误渥谓借末光未报双鱼同作去吴之客重瞻叠障但思事楚之时

贺中书虞舍人启

伏审逢辰得志接昼疏恩螭头记天子之言久藏金匱凤合目舍人之様真覩氷衔士歆稽古之荣朝享用贤之福恭惟某官瑞浮玉垒学禅金籀酌道德之渊源高眎千古絶翰墨之畦迥自成一家远陟王城即登册府身为国史浓薰班氏之香口伐可汗不屈汉庭之节既判花而试可宜鸣玉以跻华况边尘牙孽之秋赖禁琐论思之杰山东听诏使扶杖有感奋之心淮南寢谋无发蒙相姍笑之语得人之效从昔为然少烦袭六之辞共恢画一之治虞夏之书浑浑尔孰敢并驱伊望之业凜凜乎自然平步某契缘雁塔好重鹄原甫睽隔于趋隅窃瞻翹于贺厦宠踰华袞已叨一字之褒纶气转一钧必念八荒之弃物

贺刘制置启

伏审诞扬帝制宠建使名匈奴不灭无以家为壮怀旧矣诸将于是皆以兵属初令耸然对垒震惊提封呼僦恭惟某官名闻华裔忠贯羲蛾异表魁梧稟光辉于川岳羣书该洽讲治乱于古今功既立于颍滨威遂倾于松漠会奸臣之擅政主和议以销兵养气横湘久鬱輿人之望

建牙荆楚近分旬服之权高穹开悔祸之期强敌倡败盟之说九重赫怒诸道出师惟发纵指示之得人则磔裂分犁之有日畴咨金论无易元勲乃尽护于列营冀中兴于洪业戎车才动敌骑潜奔仰多算之乘机宜故都之迎蹕清中原而复济已誓长江絶大漠以暂劳即刊隆碣某自传成命窃激懦衷听纶巾羽扇之谈莫参檄笔抚簟食壶浆之俗愿甯辟书

贺刘右史启

伏审命播域中班高柱下东观为老氏之藏久振华纓右史书人主之言共尊直笔朝有得贤之庆士歆稽古之荣恭惟某官雅量测深清衿迈往龟千年而五总鹤九臯而一鸣博物洽闻学周公仲尼之道同工异曲有相如扬雄之风早模范于天枝已纵横于制草不能媚竈又复杜门既解瑟之更张始着鞭于严召赐隃麋之墨文已应星戕獬豸之冠势能摇岳作英游之领袖腾广誉于荐绅黄屋深知赤墀亲擢人瑞有郑仁表侍橐齐眉古事问高仲舒旧轡唾手某不瞻芝采屡变葭灰捉刺就阶近失拜尘之礼裁緘贺厦预欣跃冶之期

贺户部刘侍郎启

伏审宠趋召节归冠从班乃立地官以佐王卓然振职不有君子其能国金曰得人恭惟某官天壤知名山川稽瑞飞谈巷雾一坐尽倾游刃发硎千人皆废蚤乘槎而纵壑已簪笔而立朝何物含沙厄风波之汹涌几年茹蛊閱岚障之卷舒金百链而绕指不柔玉三献而刖足非罪会改弦之盛际即植纛于价藩长城方倚于壮猷緑野忽浓于归兴惟货财源流本末未易虚谈况金革沸渭汾沄有加常费既左支右吾之不给且上溢下漏之孔多言利而析秋毫詎堪俗吏思政而劳旰食孰慰渊衷倘非心计之英定有头会之患上能图旧公必光前盖举偏补弊而多寡得宜则散滞取盈而公私称足算鞭拟古岂管晏之功复许乎朽贯指期匪晋楚之富可及也更须硕画同却妖氛素闻倜傥之风必越拘挛之见使中原遂脱于左衽斯两地益美于旧轡采之公言敢为累句某诚深仰斗迹阻披云泰阶有六符之经具瞻调燮蟠木为万乘之器窃冀选抡

盘洲文集卷五十九

卷六十

钦定四库全书

盘洲文集卷六十

宋 洪适 撰

启九

贺建康张相公启

庭扬坦制节挽留都复用张子房人始知于良策今朝汉社稷年新数于中兴奔走邮籤震惊边帐恭惟某官材苞文武忠格神明荧惑守心尝生作噩之变咸池洗日能返大昕之朝初秉执于鸿枢即尊安于龟鼎扞参历井国功遂固于西垂踏晋批周相业岂谈于前代上应栋隆之吉外消户闔之虞出黄石谷城之绪余扫青草洞庭之蟠结威讐四方之长名知三尺之童何物吠声举天饮气怪已摧于偃月毒尚喷于含沙远登俟德之丘色无喜愠再翫反流之渴时有屈信惟用舍系国之安危而胜负视公之发纵居否既极旋乾匪难幸悔祸之昌期稔叛盟之强敌九重赫怒顾割地之请焉可从二帝陟方岂戴天之讐而不报庙谟潜定戎旆交驰偶遣将之疲弩致涉淮而猖獗我师弃甲不竞南风之歌有马饮江孰思多垒之辱人心正恐天意已回逢显册之布宣快輿情而呼舞必资英望始却妖氛安石将如苍生何自有折冲之画鲁人犹望高子也愿严叱馭之程乘机尽复于故疆当轴聿迎于旧物某寅缘先世踊跃大钧盥手发函屡拜一行之赐骧眉茸纛庶叨三握之私

贺吴殿院启

芝检疏荣柏台进步动摇山岳眷自结于紫宸接籓夔龙班益尊于黑豸端人益国嘉颂塞涂恭惟某官色正芒寒心精词绮高标耸壑仰乔木之千寻利器切泥别良金于百链邐迤几载舒卷有时自复入于帝城即高骧于朝路暂分六察遂陟副端柱後惠文咸具瞻于风采人中屈轶惟直指于奸邪大振纪纲即专机柄某夙叨一挹屡辱三熏斯远庇于卿云阻再披于岩电削萧氏之牋虽结恋于离羣濯贡禹之冠敢纓情而效善

贺留守汤相公启

肃驱駟传光佩麟符朝廷不知周大夫久歌袞绣关中既留萧丞相必洗甲兵九庙尊安二邮震叠恭惟某官材推帝赉望峻民瞻穷远测深驰古今之千载植僵兴仆踰前後之数公玉烛斯调炎精益焕庆泰阶之卓尔怀緑野而翩然居东既郁于輿人虚左至为之累月夕?浸起?食靡宁当瓜步已应童謡恐棘门或如儿戏劳军下诏择日戒严乃注想于栋梁以责成于管龠霖雨之思贤佐孰应骏图半夜而受神厘遂前龙席忠已殫于石画喜果动于咫尺冠规殿

以立班入经帷而借步睠兹行阙倚我上台虽宋璟留中不从东巡之驾而房乔居守可无西顾之忧行复疆封再还魁柄某方漂宦海难走沙堤精神折十里之冲式看伟业离奇为万乘之器终托洪钧

贺柳运使启

伏审戴星叱驭涓日视章咸属耳于前驺独骧眉于英矩恭惟某官韬藏远业充牣多闻璜玕呈韞椟之珍杞梓负昂霄之干措刑天狱解密网于秋荼足用地官腐太仓之红粟属控弦之犯塞遂增竈以防江六轡有光以穆宁主粮者敕也千金所费必孟子持筹而算之大恺策勲要津唾手某久聆广誉幸借余波敷衽论心将释仰高之恨裁缄写抱少伸赞喜之诚

谢两相还隔下年月启

日月逝矣失未收于东隅江河濯之笑不腾于北垄贡诚小牍拜况大钧伏念某智不周身蹇而知命昨含沙之巧中閱过隙以偷生长裾曳何王之门枉寻岂敢郤行求前人之影退尺自怜逢黄屋之改弦焚丹书而弹弁子又有子既齿髮之浸衰春非我春独铨曹之相厄念光陰之不再赖造化之可投遂获旧羶少增短羽石渠通籍固梦断于昔游朝散入衔将坐跻于正秩信眉窃喜镂骨有铭恭惟某官道德致君功勲辟国计安天下犹泰山而四维泽任沟中作霖雨于大旱尽扫輶人之弊蔑闻失职之嗟軫及孤踪还其故步某敢不堤防堕甑创艾伤弓思枯鱼涸辙之时鬼能相笑感黄雀衔环之事人岂不知

淮东总领谢宰相启

寄仓台之使指方点乡关督京口之军须遂联省户视章莅职贡牒酌恩伏念某学陋寡闻器拘小用两州抚俗媿任棠拔薤之规旬岁旷僚损倚顿鹽盐之利正虞显绌敢覬褒迁名籓依乌想天街于梦寐智殊流马懵江道之转输方朝廷易将而筑坛况淮海济师而增竈多多益办孰流地上之钱陈陈相因必积塞下之粟岂容謏薄乃冒使令兹盖伏遇某官致主德咸备边虑密璿玑以齐七政气应變调尺箠以答八紘功成谈笑问金谷甲兵之事用櫓櫓棹稅之材欲五将军不患乏兴恐一书生弗能塞责某敢不自鞭駑乘上答化钧援枹鼓而立军门使之宿饱给馈饷不絕粮道戒在空餐

贺汪参政启

显拜制麻进参国秉忠臣谓之骨鯁久赖谠言执政犹吾股肱具瞻良弼播传所暨欣咏则同恭惟某官道秘沈潛德辉发越友古人于千载备和气于四时玉润金声深造渊源之妙瑰意奇行外无表襮之华自得路于青云即受知于丹扆论諫皆本仁义卓尔囊封吐茹不以刚柔瞿然简劾方上流有攘敌之役以独坐为视师之行羽扇指麾耸逗遛之大将灵旗踊跃归侵軼之故疆远却妖氛上寬旻食当和战之事未定而攻守之议并兴必倚人英来司国是公辅间于两社式转洪钧天子守在四夷共观上策某材慙樗栌契托粉榆燕厦落成欲奋卑飞之

羽螺州前定兹符大拜之謠

贺表正言启

显膺制綬进陟谏坡速邮传弹击之词繇宇起變调之望恭惟某官儒林宿学艺圃轶材人杰地灵禀光辉于川岳仙风道骨挹沆瀣于蓬瀛初步武于金闺将范模于玉叶既登彤陛旋入宪台曾黔突之未能已昂霄而横絕振争臣七人之职致明主三代之隆削藁奉公欣衆正之开路伏蒲献可待一言以兴邦某职有官箴礼难宾谒听朝阳之鸣凤窃激懦衷寓远客之双鱼庶通鄙抱

贺张少傅启

伏审诞布制麻进班孤棘武丁得一傅说致商道之复兴江左自有夷吾知羌人之必灭庆干朝社声塞乾坤恭惟某官盛德格天诚心忧国扫清君侧纪虞渊取日之功鏖战关中得高屋建瓴之势起燕闲而制阊慰远迩之瞻岩筹边如卜于六龟增竈浸营于万弩志将誓楫利在投机赫英主之龙飞思宗臣而駟召介圭入覲绣黼来归信眉乘纵壑之秋造膝尽兴邦之策连朝或闻设醴中?几于传餐台鼎位虚有欲为王留者甲兵任上畴咨曰汝往哉乃陟贰公之尊以受八面之敌开莫府于撞牙之地护行都犹奠枕之年导桐柏而会泗沂聿新使范分觜参而界韩魏大启国名制五军千里之屯苞四履十连之寄犁庭可俟貔虎犹有鬪心偃革而旋貂蝉兹惟故物某诵丝纶而溢喜因笔墨以贡诚宪宗任裴度为难古皆如是郑人报东门之役今岂不能竚勒景钟永光汗简

回常州知郡启

伏审式差谷旦来憩棠陰凡千里之提封皆一词而咏德伏惟某官受材卓伟函器宏深杞梓千章见谓昂霄之干璆琳五?共推瑞世之珍自历华途共传美誉果拜丝纶之宠超分符竹之荣扬赠扇之仁风芬芳大播沛随车之甘雨惠爱无私顾以薄材远依余润曲柱一行之寄但铭四益之谦

贺宣抚陈舍人启

伏审光膺三接叠庆九迁纶出词闱方欲鼓雷风之号令节兼帅阃又将加草木以威名邸状始传輿人相质恭惟某官韬经济之业妙深湛之思誉早冠于英躔望独高于禁路国史咸称良笔宁阿意以特书人主亦有逆鳞敢犯顔而直谏辍从三院进表六官惟武部必讲于军防以王人周行于淮甸屯田具便宜之奏保障有险要之图借箸以筹凝旒有喜天庭揖逊仰帝舜之重华人杰延登先甘盘之旧学甫拜西垣之命即分北鄙之忧盖乾坤开拨乱之期使荒徼箝发蒙之语画疆置使贰泰阶六符之权掌钥殿邦行方伯连率之职仍冰衔于鸛合新油幕之麟符瞻前无邻自我作古竚清边而乞事即当国以调元某鞅掌无庸帡幪有托理财给饷惧不称于使令经武视师幸窃窥于方略

贺方镇江启

伏审课最乘边恩隆易地长江古为天堑密护行都千里方曰王畿斯名重镇欢呼比屋企望高牙恭惟某官量若海涵识犹龟卜盘根错节知利器之有余赤箭青芝见败皮之何用惟胸次足纷纶之学故人中推超卓之材自舟退于急流几辙环于诸道芳埃所播衆誉迫归再拥輶轩孟博有澄清之志六分符竹道州劳抚字之心当淮濱大蹂于轮蹄独淝水皆为之煨烬畴咨哲艾还定流逋犊可买而已徧于田畴蝗虽飞而不伤于稼穡共称慈父丕变乐郊为氓俱受于一?报政遂成于五月荣开天上官近日边汲直不薄淮阳折冲有赖叔度之来蜀郡敷惠何难即迎紫橐之除宁为黔突之计某自离宾幕屡换律笳岂期给饷于辕门复遇凝香于燕寝讼棠可欸曾无步武之遥?樾焉依更借齿牙之助

贺平江沈侍郎启

伏审移轮天末拥戟日边已滌篆而扬芬庸发函而赞喜恭惟某官卓然人瑞籍甚吏师学该治忽而耻作虚谈德稟雄刚而力行直道再分郡寄有龚遂之遗风三仕京华无子文之喜色词掖变斲窻之谄铨曹革盈几之私怀鲍宣饥渴之忧上贾谊治安之疏迺遐相语鯁亮有声繁今日之辅藩独长洲为佳地接近鸣珂之里传呼持橐之臣窃闻班禄之初已见恩威之并老奸削迹编户信眉凝燕寝之清香棠陰闲暇开高秋之红旆竹使尊荣方廷中历召于敢言况海内共期于与政即寻入覲之诏复结去思之情某密迩门阑焉依宇覆问一岁钱谷之入正仰残膏交四隣宾客之辞敢藏窘步

贺兵部周侍郎启

伏蕃入覲咫尺复蹇禁路征尘未靖择武部以非轻国势既尊庆故疆之可复邮音所暨輿诵载腾恭惟某官古学贯穿时名暴白怀孟子敬王之道抗霍光震主之威腕脱杷推閱憺人之驰骛烛照龟卜决邪党之消亡以砥柱而障颓波盖疾风而知劲草改弦之始荷橐于中益高难进之标不改後凋之操翩然出画久矣专城会上圣之龙飞先羣公而駟召造膝皆光前之说沃心未见晚之嗟方兴辟国之师遂摠司戎之柄匈奴直百年之运共畏轩台宰相遂万物之宜共期隆栋某情深仰斗迹阻披云给饷军门亦是夏官之属储材客馆敢追望士之踪

贺户部赵侍郎启

伏审拜命中宸为真左户播褒纶于六幕荣宝带之九纒恭惟某官充牣多闻纵横利器光前絶後名声显于朝廷肆外閤中议论冠诸宗室久蹇禁密妙简渊衷足用地官斗筭之徒何算也伸威天府铢两之奸皆知之以细札而摄空遂青藜之图旧盖万旅雷驱之役正千金日费之时自非鞭算之过人安得钱流而富国实材复用輿诵迨归助成再造之勲益对非常之渥某自怜肮脏获托帡幪率属分曹身隔江湖之上裁絨遣介心驰阶閤之间

贺陈运使启

伏审言出明纶任隆肤使已入疆而滌篆敢凭驿以裁緘恭惟某官峰距高明材能超詣咏羔羊而厉节参軌前英瞻黃鵠之凌空着鞭夷路皂盖溢昔襦之颂朱轩揽沃轡之威吹噓既彻于榻前飞挽孰踰于穀下二星所次应穹汉之编珠四牡载驱迹清班之鸣玉某夙聆广誉未际高标督饷辕门正惧西曹之谪摇情宾仞愿分东壁之光

贺张枢密启

伏审严宸图旧密地陟明运筹帷幄之中遐冲震叠敛衽庙堂之上神器尊安廉陛有光涂川相庆恭惟某官圣门观妙昭代蜚英识极高明质著龟而不惑气至刚大压嵩岱而莫摇共尊难进之风独保後凋之操龙飞有作駟召鼎来安石将如苍生何难从雅志鲁人犹望高子也拱埃近音方宿留于中途即延登于右府入朝之始通国相欢天子守在四夷式观上策公辅间于两社即转洪钧某跃冶情深班庭迹阻螺洲前定知爰立之有期燕厦落成何卑飞之足叹

盘洲文集卷六十

卷六十一

钦定四库全书

盘洲文集卷六十一

宋 洪适 撰

啓十

贺中书张舍人啓

伏审朝听出命接昼疏恩御史振乌台之威笔端可畏舍人示凤合之様纸价浸高士歆稽古之荣国受得贤之福恭惟某官弥渊瑞世冰壑照人掉鞅轩轰淡墨题乎鼎级吹藜晬煜雌黄匝乎蠹篇得召节而复来入着庭而横絶接武赤墀之下玉垒益光去邪双阙之前铜山俱破遂藏黑豸爰对紫薇一札成文雅思未尝淹晷五花判事英躔真若聚星名已冠於伦魁材共期於丞弼某情均燕贺望隔鸡翘问金谷以备员卿云迨托想簪绅之赞喜宿雾难披

回诸郡贺正啓

伏以太极函三气斯分於人统林鍾益一数可付於律箫对岁事之权舆萃侯藩之莠禄伏惟某官轶材耀颖盛德照邻缓带轻裘凝清香於画戟盘根错节发游刃於新硎令旦斯逢长年可颂企宾堦而矫首凭书驿以驰心

贺朱镇江啓

伏审鹭序借材宠河图之高合虎符拜命镇天塹之雄藩既过家展上冢之荣想泛宅作下车之计恭惟某官漱芳圣域绍美相门朱草嘉禾披瑞篇之珍物盘根错节发利刃之新硎顷督饷於淮濱实建台於京口清埃载道比屋知名入补穉臣腐太仓之红粟进兼棘寺解密网之秋荼会千里之难其人辍九卿以重兹选民情皆已素习郡政斯可速成文驷来迎谓五十年当贵亦褊矣褒衣欲改闻二千石之到而瞿然某稍阔英躔遂依德?伐柯取则正尊前事之师析札杼情恐获後时之谴

贺张都督啓

伏审肱音廉陛置使枢庭提江淮表里之封重开幕府注将相安危之意再造皇家荒裔息心泰阶齐色恭惟某官蓍龟先见松柏後凋当圣哲驰鹜之时洞文武弛张之道人忧多垒倚长城谢傅总军宴衍可清於羣寇晋公督战功名夙震於四方强弩争驱灵旗有待受降盈光被之障摅愤指冒顿之区入筹幄以同寅相尊等耳出言纶而诞布朝论翕然旗鼓一新营屯

如故宜星氛之退舍无絶塞之传烽兵事节度皆付公益隆剧委天下平治谁舍我庸慰具瞻某仍世蒙恩弥年稟命大钧播物诘迟造化之工千里馈粮敢後樵苏之

贺太平州虞尚书啓

伏审牵丝离阙涤篆专城千里迎新甫森兵卫之戟一麾借重非厌承明之庐仰风采之光前惧音邮之落後恭惟某官世推词伯天挺佐臣书笏珥彤立螭坳之要地荷橐着紫仪鸛合之清班会北国之兴师贰元枢而经武独高祕略迄扫兵氛运筹帷幄之中听履星辰之上任秣马厉兵之事为扞参历井之行揭节故乡相如谕蜀父老犒师新境三辅见汉官仪远趋尺一之程密迓魁三之象并塞复惊於多垒缘江莫急於价藩羽扇纶巾牛渚席往年之胜轻裘缓带虎符分中旻之忧少埃解严即期熙载某不披宿雾再变春灰兹给饷於南徐获分光於东壁使之代斲已为蟠木之先何以免愆更赖余波之及

回霍新恩啓

造榜棘闱标名鴈塔虽科甲第五同杜牧之叹而乡闾寡二有吾丘之夸伏惟某官声叶舜仪宝参郢握闻仁义道德之说讲习渊源识鸟兽草木之名贯穿训故既问津於官海即影组於荣途介弟得人窃幸一庄之获痴公责子徒劳累月之咎

贺王侍御啓

伏审命出前旒权尊横榻几年弄印上曰无以易尧一角峩冠仕者皆严憚黯幅员共语纲纪毕张恭惟某官天以刚方古之直谅广庭大对洗凡马而一空要路重来别良金於百链方招诸生而诲道德之说已立?陛而书起居之言凜朝望之无隣庆台端之独步惟雌黄夙判於胷次宜白黑大明於笔端去奸邪於双阙之前义方之声不坠语轩檻每数刻而罢仁约之眷益深孤忠不避於嬰鳞羣枉相惊而落胆风霜若是霖雨可期某引脰云逵庇身江介望风而解印绶未敢赋归馈粮而後樵苏所忧获谴

除司农少卿谢宰相啓

两载供军无补千金之费亚卿分职忽叨九扈之荣祓饰芜音铭藏大播伏念某续鳧则病处鴈不鸣天既赋之材弩人皆知其绠短失瀛洲之故步久隔朝班盗列宿之虚名外司戎赋增竈出日边之旅连樯严淮外之期呼庚癸於首山偶无羽檄束春秋於高阁焉用毛锥况襁负之东归复縲俘之北至析毫言利者鲜矣上策张颐须哺则倍於曩时问一岁之钱谷几何岂能贍用馈千里而樵苏在後所虑乏兴曾蔑微劳敢图明陟窃揆侥幸之故悉由造化之私兹盖伏遇某官任重济川权尊挈国和玉烛之四气开壽域於八荒政事内修有输平之强敌巧拙杂进无饰诈之宵人恐绌老之辱泥涂若周公之下白屋曲怜弃物良苦羸官借其惟月之称广此如云之覆某敢不思惟推择畏惧旷瘝财货未丰媿宏羊之心计箴规可献戒顔异之腹非

回郡守贺除少卿啓

给饗再葺惧军需之不足窜名九列慚使指之无功揆譎薄以奚堪知游扬之有故恭惟某官高标耸壑瑞物媚川梦既协於三刀歌已喧於五袴奉夜半之问将寤意以攀华擅月旦之评每过情而借誉致兹误渥迺及衰踪顾弱楮之未緘拜珍题之先辱宾堦何远尚乖宿雾之披遣域可逃更赖余汲之及

贺汤左相啓

伏审庭宣显册位峻元台黑头人曰三公岩瞻已久青氊我之旧物鼎任逾新庙社奠安华夷称颂恭惟某官闻多而约气大以刚一槩诸圣而譔重黎名超前哲五尺之童羞称曹陆文擅正声蚤符梦卜之求独尽都俞之美开通公道窒塞幸源帝达四聪选臯陶不仁者远矣天享一德若伊尹则见而知之中寻緑野之游甚鬱苍生之望会圣君之继代思旧弼之赞元复作栋梁兼筹帷幄定国是则自治为上策固邦本则若烹夫小鲜两宫资调燮之勋四海企升平之效材翹东阁无失职以书空谋寝北邻遂乞盟而欵塞方将丰财而图朽贯之积谁谓忘战而生藏械之疑盖後先进退必度於时宜而今古安危具存乎世监俟颙面有同於饥渴故信眉相庆以讴吟某窃伏江干莫披河目诵贱子於百寮之上屡玷袞褒器蟠木於万乘之前更资钧播

贺张右相啓

伏审诞敷涣册复正台司望赤舄於我公浸逾二纪还青氊之旧物请视六符宗祏蒙休玃衡献瑞恭惟某官学轻王霸忠贯羲娥乾坤资整顿之勲鼎鼐着调和之效重开督府大畅王灵自陕而西召公主之权均内外由斗以南一人而已望耸迹遐城池坚固於金汤师旅比方於熊虎传檄而遗民蚁附抗旌则士衆麇惊军容彰无敌之威边备窒可窥之隙察秋毫於万里寬旻食於两宫天欲兴邦将犁庭而制胜敌能覩国遂欵塞以输平美绣裳之来归思霖雨而爰立迺居宰席仍总筹帷方图事揆策而务出万全盖收功立名而可期再造登庸之始歌颂无前某久泛恩波获逃遣域增千金於敝帚屡玷袞褒转一气於洪钧敢奸器使

贺交代王少卿啓

伏审肃将王命来治军需聆鼓楫之非遥冀班荆之有便恭惟某官材能超诣峰距高明朱草嘉禾披瑞篇之珍物盘根错节发利刃之新硎蚤负时名已光郎选俛仰监湖之上驱驰蜀道之间刺史问以六条屡更使指天下号曰八俊远继芳尘兹陟农臣将持从橐乃以屯田之奏遂分给饷之权兴十万师则费千金自然优裕率三十鍾而致一石正赖幹旋助成清壹之勋益对便蕃之渥某二年无补百谪已盈窃欣故旧之来获托子孙之契积薪居上祗慚糠粃之扬胶柱不调尚幸瑾瑜之匿

回秀州姚知郡啓

叨荣禁路备数词垣拜刻画之好辞佩吹嘘之高谊伏惟某官长离览仞结緑辉山蚤驰骛於翰墨之場尚倥偬於米盐之事濡歌甚播玺召可期我輩登科久厚顔於李合吾徒掌制复缩手於柳州未寒萧寺之盟更赖残膏之助

回明州赵待制啓

北门摄事已积空餐西掖代言甚惭窘步误宠莫知所措游谈厥有自来恭惟某官川岳灵晖凤麟嘉瑞出神明之贵胄负标的之清规德备忱恂独乐东平之善学该贯变尽读河间之书屡誼五袴之謡叠应三刀之梦憩棠陰而听讼白日显行拔薤本以抑强严霜可畏每吹嘘於朽质有刻画之珍题某夙仰英猷密依余润摇情宾仞莫瞻五马之光寓意书邮奚报双鱼之遗

回宣州陈殿撰啓

伏审疏宠出【阙】佩左符之重涓刚涤篆争伸前弩之迎老稚蒙休封圻改观恭惟某官星躔隕祉月脇铸辞卓尔昂霄壁千仞而独立汪然韬世陂万顷以有容自高鵷鹭之行不藉虬螭之援蓬丘影组久领袖於英游柱史挥毫浸羽仪於禁路芳埃益邵公望所归方批敕於要津乃把麾於名郡清香画戟洽惠露於郡编叠嶂双溪踵诗声於前躅宁容黔突即迓赐环某叨缀近班仰依余润摇情宾仞莫瞻五马之光寓意书邮奚报双鱼之遗

回刘侍郎生日诗状

五十当贵偶同治越之年八千为秋难辱借秦之谕珠玑可玩琼玖是惭空积感怀莫知报礼

回工部胡侍郎啓

伏审契元后之虚怀寻贰卿之故步典刑所系表着有光恭惟某官昂霄耸壑之长材敛锷淬锋之利器乘桴浮海尝久厄於谗波束带立朝遂横翔於禁路蹈载籍致君之道积平生忧国之言掇一麾阜盖之行领两组青氊之旧备周王之器械盖赖远猷为汉室之栋梁竚观伟业兹勤翰墨来访丘园佩四益之谦斯惟盛德展七襄之报祗媿前闻

回饶州王侍郎啓

伏审急流易退暂违上笏之班荒政尽行俯屈左符之寄光前耸望来暮兴謡恭惟某官际美台衡腾芬俊轨演纶彰独步之誉持橐起横飞之程旱魃为灾咸虑晨炊之阙寓公作牧便同昼锦之荣亶为谋国之英必有揅民之策一?复受千里更生顾此居闲欣然借润将欸粲花之论先藏烹鲤之书

答镇江宋尚书啓

伏审异恩亨否还旧物之青璫重镇承流凝清香於画戟江山动色草木知名恭惟某官识略高明智能超诣早蹇禁路积三千牍之嘉谟久蛰故园藏十九年之利刃当宁渴仪刑之想起家膺方面之除惠露所沾骧谣竞起即迓玺书之宠复归簪笔之班念高阁於英躔屡变更於缙律得烹鱼之尺素深仰谦光想舞鹤之高楼无因谭欵

回贛州陈侍郎啓

高牙在望饱闻五马之声健步徕前遂辱双鱼之惠敬修短札曷报英瑶恭惟某官负昂霄耸壑之材利斂锷淬锋之器论思献纳居紫橐之上游抚字追科慕黄堂之下考报政已踰於五月赐环将出於九天顾此衰迟濶焉睽隔藏孟公之牍少慰驰心览汉圣之书不能释手

回钱枢密啓

丝纶出命走天下之置邮帷幄运筹得人中之英杰国势奠安於九鼎魁躔协比於六符伏惟某官瑞应舜仪宝参郢握片言自能寤意多士孰敢追踪凤掖摛词文声掷地琐牕批敕忠力回天岁已庆於九迁昼益隆於三接径跻宥密仰赞规恢齐人归郢讙之田大儒有效宣王复文武之土中兴可期记往日之从容惊流年之荏苒不图翰墨来贲丘园行四益之谦兹惟懿德修七襄之报深媿前闻

回刘侍郎啓

班聯玉笋蚤蹇从橐之荣符佩银菟曲借侯藩之重双旌密迓四境驩迎恭惟某官学縉高明材资超诣陟要津而阔步结当宁之深知贯朽粟陈过宏羊之心计裘轻带缓指叔子以肩齐精神已折於遐冲盘错少休於利器值仍岁秋收之损致九重旰食之忧思忠信慈惠之师行劳来安集之政迺烦旧德远揅疲甿穷阎免尘甑之嗟森戟非黔突之地念睽违之浸久喜会合之有期燕坐挥犀遂幸盍簪之欵邮籤倩鴈自惭削牍之迟

盘洲文集卷六十一

卷六十二

钦定四库全书

盘洲文集卷六十二

宋 洪适 撰

题跋一

跋欧书温彦博碑

按新唐列传云温大雅字彦弘彦博字大临大有字彦将如史所书则是彦博兄及弟皆名大字彦独彦博反此耳近世陈朝散正敏着遯斋闲览间证史传之讹谓古人盖有以字显者彦博当是以字行於时殆旧史之误而新书未之正竊萃作唐书音训亦云以兄弟名字推之似名大临而字彦博予考新唐世系表乃云彦将字大有又顔鲁公尝作顔勤礼碑内叙顔温二家之盛其略曰思鲁大雅俱仕东宫愍楚彦博同直内史游秦彦将皆典祕合如表之所书碑之所序则是彦博彦将皆以彦配名惟大雅异耳又欧阳文忠公在中书日有顔氏裔孙献其祖思鲁除仪同诰内云内史令臣瑀宣侍郎臣封德彝奉舍人臣彦将行公谓不应称臣而书字彦将固当为名惟三公名字不应伯仲异同後人率皆惑之予家有彦博墓志及神道碑皆云讳彦博字大临不云其以字行陈竊二公虽疑史策之误然碑碣不容失实其说无据当从碑志为正以鲁公之文思鲁之制新书之表为凭则是大雅独与二弟不同予复考大雅尝撰唐创业起居注内书炀帝遣使夜至太原温彦将宿於城西门楼上首先见之报兄彦弘驰以啓帝帝方卧闻而惊起执彦弘手而笑据此则温氏昆弟皆以彦为名明矣而此书首题乃云大雅奉勅撰又顔碑亦云大雅抑又何耶盖唐之孝敬皇帝讳弘如弘文馆改昭文弘农县改恒农姓弘者改洪徐有功本名弘敏亦缘避讳遂以字行大雅正类有功亦以孝敬故遂称其字耳鸡者曰有功盖避同时讳大雅生在孝敬之前不应亦避其讳是不知生虽不避後世追改之故称其字为名如晋书避高祖讳不云刘渊而云刘元海避太祖讳不云石虎而云石季龙李延寿亦以韩擒虎为韩禽司马迁作史避武帝讳改蒯彻为蒯通班固避宣帝讳改荀况为孙况为明帝讳改庄忌为严忌史策之例缘帝讳而更易姓名者多矣新书有韦弘机传而旧书止作韦机又可见其因孝敬而削也新书正之故复用本名而大雅犹名其字者盖当时国史所改新书因之不加研究失於复正故尔

跋欧书皇甫府君碑

皇甫诞当汉王谅挺祸之际能抗章力争至幽囚狴犴发局城之谋事偶不克遂殒其躯可谓忠节凜然捐生靡顾者也北史列传既不能发扬其英烈至叙其官秩又多阙略传云开皇中迁治书侍御史後为尚书左丞拜并州总管司马以抗节遇害碑历叙其仕周为毕王府长史隋初授广州长史为益州总管府司法传虽略而不书可也至除比刑二部侍郎及自御史

之後历大理少卿再为尚书左丞河北河南安抚大使其赞并州也加仪同三司其赠柱国也兼光禄大夫史皆无之盖其阙也又碑记其祖赠胶涇二州刺史而传止称涇州碑云诞字元宪而传作元虑是皆其失考此碑乃诞子无逸与欧子并肩於武德贞观之间故于制其文而欧笔之决无误者况皇甫终於隋仁寿间李延壽修史在唐正观末相距四十余年已脱略舛误如此况远者乎

跋欧书丹州刺史碑

率更之书名天下而为後世法世传絕笔於丹州之一碑笔力劲健他书无出其右者今视其书信然而碑文字剝灭尤甚世无复知丹州为何人详考其碑隐然犹有公讳崇字平高六字按唐史裴寂之左方有张平高一传史载其在隋为鹰扬府校尉事唐授左领军将军封萧国公贞观初守丹州刺史坐事以右光禄大夫还第所书与碑同则知崇之姓张氏无疑矣而传载历官次序甚略於碑疑崇无赫赫大功故为史氏所略而传云以坐事还第碑乃美其知止戒覆以就闲盖碑志溢美无足怪者传又书其追封罗国赠都督事而碑独不记则是勒碑之後复被宠褒作者不及记之然崇之本传及忠义传列凌烟功臣及裴寂传所书皆云张平高而不名岂唐人多以字显如殷开山之类史册皆以字称者乎但唐人虽以字显史必随着其名今平高本传则亡之岂其史氏之逸乎凡唐史纪人姓名尤多缪误如郑潛曜乃作郭潛曜程处亮或作程怀亮之类今平高之碑既不载其以字行盖史家删修误以平高为名余尝考殷开山名峤封德彝名伦高士廉名俭尉迟敬德名恭姚思廉名简高季辅名冯苏定方名烈唐休璟名璿郭元振名震王方庆名綝在唐无所讳避不知何为而行字遂至君臣之答问诏旨章牒之所称一切以字若李靖见於纪传皆书名而裴寂传後载武德九年差功之事则又书曰李药师是既以名称又以字行此尤为二三唐人名字余久惑之因平高之辨略志其梗概云

跋欧书唐瑾碑

唐初文章承五代之衰务以骈俪为工碑志之作多浮靡而无事实惟世系子孙官封名字可以考据唐瑾碑乃于志宁所撰欧率更所书今以其文考北史列传则史之失甚多碑云瑾字子玉而传作附璘新唐世系表又作子瑗盖玉瑗小有差衍传则误矣碑云瑾曾祖俨祖文轮而北史於瑗之父永传云父伦祖揣今以新唐世系推之则揣乃瑾之高祖俨则其曾祖正与碑合传既逸俨之名遂误以高为曾【阙】瑾祖名文轮而传作伦既失实矣新唐又作轮字文转此又唐书之失碑云文轮终东莱太守而传作青州刺史唐表又作青州太守且刺史之秩尊于太守使文轮历之则作碑者不应不载此北史之误又太守乃典郡之称唐表云青州太守非也碑以俨为守东安而表作东海亦非也碑云永终车骑将军唐表作仪同三司则楚碑记其武散官之崇者表书其文散官之崇者传置不书碑及唐史皆云永为平壽忠武公而传又不书其諡皆其阙也碑历叙瑾初以魏大统元年为员外散骑侍郎周文引为记室及河桥之胜而封平昌县子是年有陟岵之忧起为太子舍人迁膳部转右丞加持节抚军将军大都督通直散骑常侍转吏部郎中龙骧将军然後改伯临淄继除黄门侍郎拜车骑将军仪同三司散骑常侍迁吏部尚书然後赐姓宇文于谨南伐以为行军长史谨多其才求与通籍然

後更万纽于之姓江陵既平乃加骠骑大将军开府仪同侍中进公爵而本传云封姑臧县子累迁右丞吏部郎户部长进骠骑仪同赐宇文及万纽于姓进封伯转吏部长夺哀复位从于瑾平江陵以勲封公今据碑所载则始封乃平昌而传作姑臧碑云丧父在魏大统三年封子之时而传乃在作吏书封伯之後碑云夺哀为舍人而传云复吏部尚书碑云封伯在未赐姓之前而传则在後碑云赐二姓在吏书之後而传皆在前碑云从于谨南伐然後更姓万纽于而传则先已更姓凡历数年始同戎事碑云骠骑仪同之命在江陵已平之後而传乃在未赐姓以前其他历官传多阙之独传有户部之除而碑则无之碑又叙自入周之後尝为宗伯出判拓蔡授司宗御正转内史纳言又刺荆州迁大宗伯而亡本传乃云出判蔡州历拓硤荆州入为吏部御正纳言内史除司宗而亡如碑所载则是出典二城乃入迁四职复出治荆据传则是连尹四州然後入官中都以至盖棺不复补外碑则自蔡州入为司宗传则历迁数职而终於司宗惟传有硤州吏部二命而其碑不载碑云生为大宗伯而传云死赠小宗伯碑有刺史之赠而传无之碑云諡猷而传作方唐表又作文献若此之类皆以碑为正盖唐皎历任於武德贞观之间志宁亲受其事而作斯文必无误者予既辨二史与碑之抵牾因以北史之传校新唐之表传云永孙悟而表作怡传云瑾次子令则而表作则又二史之不同者然北史之误其可一二言哉

题松漠纪闻

右松漠纪闻一卷先君衔使十五年深阨穷漠耳目所接随笔纂闻孟公庚发篋汴都危变归计创艾而火其书握节来归因语言得罪柄臣诸子佩三缄之戒循陔侍膝不敢以北方事置齿牙间及南从炎荒视膳余日稍亦谈及远事凡不关今日强弱利害者因操牍记其一二未几复有私史之禁先君亦枕未疾遂废不录及柄臣盖棺弛语言之律而先君已賁恨泉下鳩拾残编仅得数十事反袂拭面不复彙次或可广史氏之异闻云尔

题輶轩唱和集

右輶轩唱和集三卷绍兴癸亥六月庚戌先君及张公邵朱公弁自燕还途中相唱酬者中兴以来出疆者几三十辈或留或亡得生渡卢沟而南者三人而已初朔庭因赦宥许使者归其乡诸公愆久繫幸稍南率占籍淮北惟先君及二公以实告既约和於是淮以南者迺得归八月戊戌先君至辛丑张公至乙巳朱公至九月乙卯先君以徽猷阁直学士入翰林是月甲子出为乡州後四年南迁八年薨又三年赐諡忠宣张公以修撰祕阁主佑神观是年出居明州後六年待制敷文阁六年为池州明年卒朱公以直祕阁亦主佑神观明年卒先君字光弼饶州人张公字才彦和州人朱公字少章徽州人

题金国文具錄

右金国文具錄一卷贾生五饵计亦匪疏尚父六韜愧未能习以今概古非人力之所能致宇文氏既为蕝其书力强先君同污新秩初有翰林直学士之命又有中京副留守之命最後有承德郎留司判官之命先君以死自誓文章衒袖至於再三卒拒不受王春二月家弟遵迈接

踵召对上谓先君与宇文虚中同时作使宇文受伪命先君独执节不屈且道秦桧毁隔之说所以不得大用呜呼渊衷不忘旧编具在揽涕涉笔存之左方

敬书先忠宣赐謚制书後

臣闻足再刖而玉显其美火百鍊而金知其精人臣忠邪至身後而是非始判发潜德之幽光诛奸谀于既死孔子作春秋之旨也先臣当戎马纷纭之际使不可测之絶国十有五年然後归陛下谓苏武不能过且许笔赐其传会先臣席不煖而逐弗获藏金璧之宝今又十有五年弟遵入对陛下褒叹忠节复道前语恩念再三宠之令謚生虽奇剥芳香多矣臣谓卫律李陵屡说而武不降先臣则为宇文虚中韩昉所逼三换官而不受张胜事泄武有拟劒幽窖之危先臣则不同龚搗仕齐寧蹈利刃冷山无以异於穷海之北餬口於悟室无异於軒王只影南翔所不及牧羝者四岁至若通永佑之表朝长乐于燕间道蜡书其至有九潜见王人几僨牢户问答往反皆有关庇民之语投其诗文篇篇以戢兵为意此则武之所无者陛下以为武不能过圣训明哉然燕王声霍光之罪以武久繫而归才得一典属国扬敞无功乃为搜粟都尉遂谓光颡权自恣疑有非常而秦桧排妒先臣不使一句寓乎玉堂之直致陛下有大用之意而不遂终之流放异地九年不返则得祸之酷特甚於武武之一子党叛人而诛汉廷怜之为之远赎敌出苏氏赖以不絶而臣以先臣故获戾亡桧至谓家传强暴曲法免官非遇天日清明则亦禁锢就死呜呼一言华袞万世不刊易名崇终匹休麒麟图画诸孤不肖咸叨録用恩徧存没又过苏氏臣砬石以识异渥泰龟逢吉镇之松区泄九京之冤鼓忠义之气於兹见之

题曹公显所书陈体仁梅清传後

香草以比君子固多见於骚人之辞至刚长岁寒之际能舒翹扬芳表表於风林雪岭间惟梅为然其奔轶絶尘之姿殆与庄士端人无异彼揭车杜若尚不敢与之齐驱而冶桃繁李瞠若乎其後诚未可同日而语陈君用太史公法为作佳传曹侯一见知赏泚笔特书而冠文其首抑可谓三絶也

跋杜氏墓志

夫利不十者不易业若良弓良冶之子必世其家可也杜君以和缓之术声於乡而以周公孔子之道命厥子使其後能揆藻决科翔纓华涂推父祖汤剂济人之心以施有政兹无负羸金之遗矣

跋米元晖画二

丘壑之士久寂寞则起朝市之念朝市之士久喧嚣则怀丘壑之放古今之理一也予赞治丹丘虽环郛皆山可以挂颊而霞城云屿亦得驾言穷览然尘纓冗牒之所羈束终不能莹心而醒目米西清所作潇湘图曲尽林臯烟波之胜遐想鸥鸟之乐良不可及予尝客毗陵一苇太湖旧矣去之六年风朝月夕则思怒涛裂山澄漪见云梦寐间时一往焉观此恍然所谓逃空

谷而喜闻足音者

跋孔门四科图

鲁论第孔门四科先言语而後政事太史公先政事而後言语此画有行行其容者似子路氏而次在八是以鲁论为序者也

跋十六尊者图

天台石桥世称尊者道场归心佛氏者薰洗斋宿或见林端有殿阁之形而聆钟鼓之响千灯发光拥锡来去屑然有闻予尝歎其山慨无所见手舒此画为之肃然作礼

跋莲社图

惠远师作净社四方不约而至者百有二十三人此其表然有称者师欲致范武子而不可得谢康乐欲同社而师不纳彼招之不来麾之始去亦各从其志也

跋戒杀文

礼云牛羊犬豕无故不杀盖君子心根於仁必不至暴殄天物佛家者流集杀生事作文以戒世使中人览之可以止杀迁善此书其仁者之用心乎

盘洲文集卷六十二

卷六十三

钦定四库全书

盘洲文集卷六十三

宋 洪适 撰

题跋二

跋登瀛图

右登瀛图一卷卷首攘袖醉者为苏世长伸欠者为许敬宗捉笔欲书者为褚亮凭栏目鵩者为刘孝孙一介附耳有所白者为苏勔交手对之者为薛元敬童子奉杯小冠者受之者为盖文达幅巾按股被酒而寐者为李元道捉笔运思者为孔颖达左手持杯者为李守素面之者为姚思廉童子奉巾盥反顾而吸者为陆德明坐柳下者为虞世南执卷【阙】条者为颜相时带解欲结者为于志宁撮巾羽衣倚老木者为房玄龄杖筇而相语者为蔡允恭袖手芭蕉旁者为杜如晦凡学士十有八员坐者十立者三倚者四醉者一其供给之人坐而奏乐者六人立而句乐者一人司笔研者三人侍左右者五人掖者一人白者一人进器者五人职器者五人执器者亦如之意钱於马前者三人蹴羽钱於驴前者一人执靶者八人举鞵负笠持帕者各一人牵驴者一人臂隼与休者各一人凡供给於前後者四十有六人巾之人二十有七帽之人一结髮之童七垂髻之童十有一其马十有二受鞍羈者十羈而欲鞍者与羈而 者各一驴一隼一狗一鵩如驴隼狗之数而倍之曲栏见其面之三长案方牀茵坐之具二十有二笙笛箜篌乐之器八酒尊茶瓟果櫺水盘食之器九十香鼎燎鑪书櫃印室笔墨巾冪用之器十有八箠服箠膾围人插其腰者二古木大小五芭蕉大小五柳一凡画中之物如此合而名之曰登瀛图其人物器用草木羽毛之状虽屡经摹写犹存妙处梗?遐想英标植愚祓陋正观之治岂无权輿故曰廊庙之材非一木之枝帝王之功非一士之略

又跋

唐文皇既已罗羣英入幕府因命阎立本肖象题其爵里名氏曰十八学士写真图予始传此画所识姓名有与史氏不同及阙文者因并存之画云苏壹字世长刘存标字德祖苏勔字谨行薛庄字元敬盖文达字文达李元道字元易李守素字仲筠姚思廉字简之虞世南字德施颜相字时睿房玄龄字乔松蔡允恭字克逊此画虽不可指为祖述阎本要知非出近人所作

跋周生卷

或讥周生儒其家乃束书不务有棋癖予扣之答曰自始结髮与羣从兄弟游学昼孳孳焉志于奕师既寝则焚膏对局乐之终夕不厌洞然有意得心解处故曰进於技而学益以落予曰

子以棋夺学固非矣今年未冠技之精已籍籍荐绅齿牙间异日孰与子角彼书不能以记姓名劒不能为一人敌鹿鹿老死无一长者视子有惭色矣

跋陈承休所藏名贤帖

右欧蔡苏黄晁秦米公帖一卷莆田陈承休所藏予於五羊见之远方家鲜收书欲借汉唐正史尚艰得乃有博雅之士轴钜公宝墨自随忽如明珠美玉飞堕吾前擦几展玩便觉蛮烟瘴氛为之辟易

试夏守真笔

燕无函胡无弓车粤无笔燕之函胡之弓车非无也人皆能之也粤无笔材梗之也颖既俘于秦其苗裔南不踰岭虽有良工不能善其事九江夏守真客寄番禺乃能束鸡羊猩毛而圆健耐久与宣城诸葛毗陵周名相甲乙谚曰巧妇不能作无麪不托岂其然乎

跋欧率更临帖

欧阳率更真墨今其存者鲜矣况所临又王中令帖乎气骨洒然典型具在如明珠美玉不待褒拂而人皆知其宝也

跋吕子猷小简二

子杨子曰书心画也笔画形而君子小人见矣观吕公子猷之书可知其为庄重君子

予不及识吕子猷闻其律身有绳墨莅官如水霜非礼弗蹈今与其子子毓游维其有之是以似之者欤

跋李运使瑞芝颂

邇人失职诗之不作盖千有余岁嘉成美宣之什蔑闻耳矣临淮李公以白水龙蛇之辅駸駸笔橐绍兴丁丑芝产清庙公慕风人之归美乃集三百五篇之辞作嘉颂十章其句二百上下贯穿丰而不余起商迄周合鲁卫曹郃诸国所作妥然若成一笔无齐人不类之讥非深於诗者能之乎汉歌齐房气麴其垒

跋五代登科记

右五代登科记一卷予顷在三馆所抄中秘阁书五季文物扫地取士无足称特以国初卿相侍从皆当时以儒科进者因刊我宋科名记故并传之仍其旧书不复考正也

跋先忠宣公鄱阳集

先君以建炎己酉出疆时年四十有二矣平生着书多悉留樵李庚戌之春厄於兵燹无一余者绍兴癸亥还朝入直玉堂不旬日领乡郡去明年而遭祖母之丧服除未几有岭表之谪杜门避谤不敢复为文章谪九年而即世故手泽之藏于家者惟北方所作诗文数百篇乃独存谨位而叙之以为十卷刻诸新安郡未彙次者犹有春秋纪咏千篇云

跋李文公集

右李文公集十八卷以唐艺文志校之多八卷盖常山宋次道所定也建阳小本独多答开元寺僧书一篇亦不着目其辞反复温润与他文相类而集中又有所作钟铭知其为习之文昭昭矣既是正之冠以苏公序附其传於後

跋痲疽方

疽发背三尺童子亦知为膏盲之疾庸医既拱手无措或者又为高论以自神其术出传刘?子方以为得之神仙家而汤剂不一用者惑之歙县胡君所藏方简要而有大功郡酒官萧世京病此数日创大已如碗用其方而愈览者勿以为无奇药而忽之也

跋文房四谱

右文房四谱五卷参知政事苏公所集番阳洪某假守新安刻之四宝堂盖歙谿之楮洁白为天下第一黄山松煤自庭邽父子著名龙尾石与端岩相甲乙独管城子少贬然亦不落宣城下是书当传莫宜是邦予家所藏谱砚之书以五六顷居闲时颇尝采获大凡翰墨事冀以缀苏公书未就也岩邑无书可探阅不能终篇说歙砚者凡三家品诸李者有墨苑姑以踵此编他须异日云

跋文章缘起

右文章缘起一卷梁新安太守乐安任公书也按隋经籍志公文章始一卷有録无书郡之为郡且千岁守将不知几人独公至今有名字并城四十里曰村曰溪皆以任着旁有僧坊亦借公为重则遗爱在人盖与古循吏比後公六百年而某为州尝欲会粹遗文刻识木石以慰邦人无穷之思而不可得三馆有集六卷悉见萧氏欧阳氏类书中疑後人掇拾传着於传无益独是书仅存可藏弃世所传墓志皆东汉人大隶此云始於晋日盖丘中之刻当其时未露见也

跋吴少卿懋遗事

仓卒变故时搢绅先生忠义根于内则发见于外生且不惜岂复为身後名计也事既定则阖

口不自言故有严霜烈日之迹而湮郁不播白者当时尚尔况後世乎阳羨吴公以南宫舍人逢张楚之难宁捐生处死不肯作劝进表一字复欲奋笏碎伪相之首言言英风辈古为耦二十年来有贪天功者不使他人以忠义擅【阙】故公之令名士大夫间或不能户知之大编显扬真有子矣

题赵【阙】七逸图

泰陵初立词【阙】一【阙】得五人少蓬赵公其一也予兄弟仰高蹈景【阙】屈宋之驾而後先参辰莫快一覩其犹子能托绘事彰其家【阙】之美开卷肃然如升堂覩奥而瞻道德之光又以见公逍遥燕闲寄意笔墨进诸子於道如此彼有誉儿癖者真可奴仆命之

书吴滋墨卷

士大夫不公持论故月旦评不足为人轻重百工以艺定声价眡其物之美恶名斯判然歛人吴滋以墨客游缙绅间唯其松择而烟良胶对而杵力旦旦用之砚不淬笔不病使潘胡蒲史之品不能齐色而争先虽无王公齿牙之誉而增直三倍矣

题诸公与徐仲车诗简

盛德之士名与天壤不朽虽无五公诗札可也然先生高蹈丘园安贫养病今其孙蔬食益不饱非此其身在其子孙诚难测耶

题吴司諫遗墨

尚书郎吴公以笔札独步览諫坡遗墨则羲献宝章有自来矣

跋曾仲躬所藏张文潜草书

张右史文名满天下而後之人不知其能书观此墨妙真可以藏之什袭

论衡跋

右王充论衡三十卷王君是邦人也帐中异书汉儒之所争覩转写既久舛错滋甚殆有不可读者以数本俾寮属参校犹未能尽善也刻之木藏诸蓬萊阁庸见避堂舍盖之意

隶纂跋

东都隶刻今其存者几二百虽工拙规圆不同犹櫨梨橘柚味皆可以适口四十年来中原入于金石毁于炉好古之士不能多藏而悉见每介介焉予尝韵分其字为七卷释其文为三十

七卷尚患笔意不传则择其点曳不阙者?之以为纂得十卷一代法书亦足以窥其髣髴矣

跋元微之集

右元微之集六十卷微之以长庆癸卯镇越大和己酉召还坐啸是邦阅六寒暑今种山之乔木数十百章岂亦有甘棠存其间乎横空杰阁盖一城伟观扁表所书则其州宅之卒章也微之以文章鼓行当时谓之元和体在越则有诗人入幕府故镜湖秦望之奇益传所谓兰亭絶唱陈迹犹可想唐志着録有长庆集一百卷小集十卷传于今者惟闽局刻本为六十卷三馆所藏独有小集其文盖已杂之六十卷矣微之尝彙其诗为十体曰旨意可观词近【缺】往者为古讽流在乐府者为乐讽词虽近古而止于吟写性情者为古体词实乐流而止於模象物色者为新题乐府声势沿顺属对稳切者为律诗以七言五言为两体稍存寄兴与讽为流者为律讽抚存感往者取潘子悼亡为题晕眉约鬓匹配色泽剧妇人之怪艳者为艳诗今古两体其自叙如此今之所编颇又律吕乖次惜矣旧规之不能存也元白才名相埒乐天守吴才岁余吴郡屡刊其文微之留越许久其书独阙可乎予来踵後尘盖相去三百三十七年矣乃求而刻之略能讎正脱误之一二不暇复为詮次也书成寘之蓬莱阁

石经跋

蔡中郎石经在承平时已不多见今京雒壅隔虑其遂泯没不传也予既辑隶释因以所得尚书仪礼公羊论语千九百余字镌之会稽蓬莱阁凡八石庶几见者有趫然之喜

跋岐阳石鼓文

右岐阳石鼓文一卷顷在会稽得之鬻碑者而阙其第八时常平使者徐子礼善篆持以问真贋又得其旧藏复重一纸十鼓遂足初先公北归有宣和殿所刊复古图一帙图十鼓而释之以车攻篇冠其首韦韩二诗欧周二跋尾其後折衷以云汉之章更有司马天章公凤翔所镌韩公诗篋中所藏甚备复集东坡诸公诗文为一卷念昔登词科时实赋成王蒐岐颂於此盖拳拳焉呜呼鸞鷟不至豺虎同穴小雅诗废今五十年摸索遗碑可为恸哭淳熙丁酉六月盩厔书

书刘氏子隶韵

予初见刘氏子隶韵纪原凡隶释碑刻无一不有惊其何以广博如是及观其书乃是借标题以张虚数其间数十碑韵中初无一字至他碑所有则编次又甚疎略古碑率多模糊辨之诚为甚难予因作隶释目为之昏孔宙碑南亩孔鮒王纯碑粥糜冻馁文理判然此书乃以亩作敏以麤作麤此类亦不一汉人专以假借为事韵中略不表出学者何考焉

跋王顺伯所藏荆公诗卷

子顷在会稽整比隶释始识【阙】王厚之好古博闻赖其助为多作别十年千里命驾出其先正荆国公遗墨展玩再三敬书其後

跋丙申修改隶释

隶释成书十年矣再因考古始知杨司隶名淮不名厥张元益是幸伯之孙王曜非刘寛故吏胶东庙门是两碑石口诗非费凤碑陰校官碑以菰竹为孤竹之类增改千有余字除去者数板淳熙丙申息祕官山陰遂正之

跋赵子直尊人家錄

乾道丙戌廷唱进士名时着作君为第一某偶备相位侍立上侧奏言近岁宗子甚好学前举伯攄擢甲科儒林以为创见今汝愚遂魁天下可谓瞻前无隣本朝故事科举先寒畯有官人退居第二乞只依牒传次序勿令後來居上以见麟趾之盛天顏有喜良久曰姑循故事兹观赵侯家錄其至言潜德诚宗藩之标的金鑪教子厥有自来着作君须跋语因得窃识前事盖纪实云

池州隶续跋

隶释有续前後二十一卷乾道戊子始刻十卷于越淳熙丁酉姑苏范至能增刻四卷于蜀後二年雪川李秀叔又增五卷于越明年锡山尤延之刻二卷於江东仓台而輦其板归之越延之与我同志故郑重如比凡汉隶见于书者为碑碣二百五十八甄文器物款识二十二魏晋碑十七款识二欲令数书为一未能也今老矣平生之癖将絕笔於斯焉庚子十一月

淳熙隶释跋

右淳熙隶释目錄五十卷乾道中书始萌芽十余年间拾遗补阙续卷寢多鄞江史直翁苕溪李秀叔一再添刻南兰陵尤延之自秋浦侵板裨助苏台范至能以越本刊于蜀前後增加律吕乖次合而一之得圣贤岳渎祠庙四卷石经一卷旌孝讲德一卷河渠桥道二卷阡表圻铭十六卷杂刻三卷甄文器物款识二卷魏吴蜀晋三卷谱一卷图式八卷水经一卷欧赵说六卷碑乡一卷凡碑板二百八十五甄器二十七某人垂意古学见之欣然命掾史辑旧板去留移易首末整整一新传之将来或不束之高阁劳勤心目可无憾焉辛丑六月盘洲老人洪景伯书

盘洲文集卷六十三

<集部,别集类,南宋建炎至德佑,盘洲文集>

卷六十四

钦定四库全书

盘洲文集卷六十四

宋 洪适 撰

经筵故事 策题

昏书

汉置五属国

汉书匈奴浑邪王与休屠王谋降汉汉令霍去病将兵迎之休屠後悔浑邪王杀之元狩二年尽将其衆度河降者数万人号称十万既至长安封浑邪王万户为漯陰侯裨王四人皆为侯分处降者於边五郡故塞外而皆在河南因其故俗为五属国

臣闻胡马嘶北风越鸟巢南枝禽兽之情犹不忘本土故王制曰五方之民皆有性也不可推移达其志通其欲使之咸安其居而已汉武帝北征西讨斥地广土一旦得降人数万岂不欲使之知礼义识廉耻而遂为吾冠带之民乃寘诸边远使其自为聚落者盖虑性习风土之不同饮食起居之异尚或不乐久处则有不测意外之变故分处金城天水诸郡又各置都尉以治之终汉室不闻降人背畔亡逃之患所谓外而不内疎而不戚圣王制御蛮夷之道无以加於此也

唐宣宗面察刺史能否

唐宣宗诏刺史毋得外徙必令至京师面察能否然後除令狐綯尝徙其故人为邻州刺史便道之官上见其谢上表以问綯对曰以其道近省送迎耳上曰朕以刺史多非其人为百姓害故欲一一见之访问其所施設知其优劣以行黜陟而诏命既行直废格不用宰相可谓有权时方寒綯汗透重裘

臣闻宇内至广也斯民至衆也君门九重不能悉知其休戚必张官置吏以治之郡守县令岂皆有廉白之行强敏之材耶为之守者得其人则进贤退不肖可以振千里之治唐之法五品以上除授则归之朝廷以下则属之铨部虽有身言书判之制而限年躋级非复山公启事固已贤愚同滞矣朝廷之所选用非其亲旧乡党则转相汲引者且不能人人识之其材与不材盖不知也大臣犹如是则人主焉能知之夫以言貌取人尚或有失况于未尝闻其言见其貌者乎敷奏以言明试以功此有虞所以致治也能言者犹或不能行其敷奏无可取者抑又可知矣宣宗亦唐之贤主大中初政有正观之风史氏美其精於听断可谓有志于治矣终不能

比迹于可称之三宗者辅佐多不得人虽有宏抚良法不能力行而然也可不监哉

汉宣帝诛韩延寿

汉书御史大夫萧望之闻左冯翊韩延寿在束郡时放散官钱千余万望之当问事东郡因令并问之延寿闻知即吏按校望之在冯翊时廩牺官钱放散百余万遂劾奏移殿门禁止望之望之自奏职在总领天下闻事不敢不问而为延寿所拘持上由是不直延寿各令穷竟所考望之卒无事实而御史按东郡具得其事望之自陈愿下丞相中二千石博士议其罪事下公卿皆以延寿前既无状复诬愬典法大臣欲以解【缺】狡猾不道天子恶之延寿坐弃市吏民数千人送至渭城老小扶持车毂争奏酒炙莫不流涕

臣闻有功不赏有罪不诛虽唐虞不能以致治汉宣帝励精庶政综核名实信赏必罚称为中兴後世或议其仁恩少损臣谓纪纲不立则何以揀中衰之弊观萧望之察问韩延寿出于至公而延寿挟私以报之帝已不直延寿犹俟有司判其曲直然後行法延寿初守淮阳治甚有名及守颍川能变广汉告讐之俗黄霸断之因其迹而大治在郡三岁令行禁止断狱大减为天下最入守冯翊满岁称职为真恩信周徧于二十四县吏民不忍欺给良吏如此固已希有至其抵罪百姓攀车号泣朝廷岂不闻亦不能脱其死或谓刑失之重然夷考当时盖于定国为廷尉罪疑从轻人自以不冤又公卿议罪俱无异辞则延寿虽有治行不能掩其罪以一愆百宁有不治之患彼名声不及延寿而罪戾过之者必无漏网之幸也

周世宗斩樊爱能何徽

五代史周世宗击刘崇于晋阳樊爱能何徽引兵先遁帝欲诛之犹豫未决昼卧行宫帐中张永德侍侧帝访之对曰爱能等素无大功忝冒节钺望敌先逃死未塞责陛下欲削平四海苟军法不立虽百万之衆安得而用之帝掷枕于地大呼称善即收爱能徽及所部军使以上七十余入悉斩之帝以何徽先守晋州有功欲免其死既而以法不可废遂并诛之自是骄将情卒始知所惧

臣闻天壤之间虫鱼微物尚犹贪生而畏死况赳赳之士而欲使其冒白刃不避者以有赏罚驱诱之尔然熊罴之士带甲成林赏不信罚不必皆不足为用五代之君惟周世宗为英武南征北讨无不如志者能执劝惩之柄也盖无功而赏谓之滥恩有罪不诛谓之佚罚有赏而无罚则是姑息之政不足以激励士卒惟明主知其然故以爵禄结其心以刑戮鞭其後使其闻将军之令而凜如秋霜有进死无退生以守则固以战则胜以征则克矣又况为大将者爵位已崇珍宝已积奴妾音乐已盛名园甲第已侈爱其身不啻千金之子国家但易于行赏而恕于行罚使之无所忌憚则其下虽勇如贲获馭之非其人亦不能成功樊何皆一时贵将何徽又有旧勲而不免其死世宗贤矣哉

仁宗皇帝久任许元【缺 十三日缺曰御笔所缺

进故事切当今日之弊今後非因昏懦不职不得遽有迁易其兴利除害缺用缺

仁宗朝用许元故事优加旌擢显用施行】

仁宗皇帝皇佑三年以淮南江浙荆湖制置发运使尚书金部员外郎许元为侍御史元初为发运判官久之为副使既久又为使上谓执政曰发运使总领六路八十一州军其材货调用币帛谷粟岁千百万宜得其人而久任之今许元累上章求解朕思之不若奖励以尽其才乃特赐进士出身除侍御史留久任

臣闻汉之仓氏庾氏为吏者至长子孙唐用刘晏领盐铁诸使历二十余载仁宗皇帝久任许元实与汉唐同符而赐第除职所以奖励之道又过前代盖中外百官一职掌一事旬月之间或迁或徙犹之可也惟财计之臣非久于其官则不能知首尾源流若使其坐不暇席虽有研桑心计亦安能兴利去害而致钱流粟腐之如皇佑圣政真可为後世法

试馆职策题

为天下国家未尝无弊事善为国者因其弊而治之如俞跗扁鹊之疗病原其脉之表里量其疾之浅深鍼石汤液随所宜而用之则沈痾可以复起三代之政忠质文之不变则【缺】後不【缺】立国盖乐因循而憚改作诚非经久之道也今日之弊姑摭其大者论之官之冗极矣调于铨部者率常数百人僻远之簿尉至于逆用五年阙擢于朝廷者虽外台连率亦或待次至有俟校官十年之期者法不可不变也将欲严取士之式裁任子之令以清入仕之源其事果可行乎兵之冗极矣天下之财耗于供军者什八频年以武功行赏其官进则其俸增新招神劲忠义诸军其数多则其用广弊不可不革也将欲核虚伪之籍汰老疾之人以节蠹国之费其事果可行乎理财之政尽矣税赋有定而水旱无常爵已鬻道释已度盐茗酒醢之物皆有榷商贾之货皆有征财不可复生矣一有不时之须【缺】相视虑形于色其政不可不讲也将欲余多田之赢借间架之【缺】以规足用之效其事果可行乎贪赃之风甚矣州县小吏蚕食齐民鲜廉白之操仕至于二千石尚或簠簋不饰谿壑无厌罹文法者相继三令五申无所忌憚其风不可不戢也将欲用鞭箠之令施黥墨之刑以遵祖宗之制其事果可行乎主上励精庶政宵旰焦劳思揅数者之弊而谈者或谓行之则伤恩起怨损忠厚之政若然则委靡苟且日趋於不振何以善其後所谓弊者终不可革耶夫核名实摠权纲两汉之君所以致中兴也考古验今愿闻至当之论将以告于上

乾道二年殿试策题

朕以不敏嗣承大宝循尧之道于兹五载寤寐俊秀始得亲策于庭子大夫褒然待问必有崇论远虑副朕详延盖闻唐虞之世法度彰礼乐着不赏而民劝画象而刑措都俞赓歌不下堂而天下治朕甚慕之今朕夙兴具食兢兢业业惧无以协帝华而绳祖武若涉渊水未知攸济间者设举荐之科下聘召之命而实材犹未出也塞徼幸之门申奔竞之禁而公道犹未行也广言路恢治具而纪纲未立择守令务宽恤而民俗未裕赃墨之刑非不严而未能使人皆君子之行钱谷之问非不勤而未能使国有积年之储屯田以实塞下或谓兵不如农改币以赡邦用或谓铁不如楮岂为之不得其要与抑文胜而弊难革与何视古之弗及也夫内修政事

宣王所以兴周综核名实中宗所以隆汉考之方策其施行之迹何如子大夫通达古今明于当世之务凡可以移风易俗富国强兵者悉陈无隐朕将亲览焉

代求昏书三

结庐在望相闻鸡犬之声克斧于行乃得凤凰之卜敢褻牋而致问用发币以通仪伏承某人执臬婉从协家人六二之吉而某人过庭退学习礼经三百之言念合昏以惟时抑系绳之夙定匪伊朝夕复取束楚之期若节春秋遂获芼苹之助

迁客居夷鲜矣?姻之问伍符乘障幸哉声迹之通克斧既谐抽毫宁後公之女有季兰之德某之子以前英为师念合昏以惟时喜奉匱之得助两家来往无山川緜邈之劳一日还归遂骨肉团栾之愿

倾盖南州相驩一日之雅束薪东野不爽三星之期爰发币以寻盟敢褻牋而致问公之次女习观笄豆德谓季兰某之弟涉猎简编誉惭华萼方合谋于二姓乃定好于一言不疑衔袖之书何待语冰之梦凤凰之占懿氏亦既欣然天壤乃有王郎恐非偶也

送礼书

风不相及好久阙于嗣音秋以为期礼游修于用币遥俟乌鹄之喜式知凤凰之和不敢腆绮牋更须金诺

送币书

华宗谋对已寻合姓之盟嘉礼造端游布请期之币将庇伉俪以宜室家不腆贄仪敢陈他牋

代许亲书

坚管鲍之深交兼金重诺讲朱陈之旧好奕世连姻拜况甚都告?敢後伏承令甥过庭有得蔽毛诗三百之言而某女子主馈禾闲惭家人六二之吉念风期之素厚更冰语以金同久勤颺介之临何幸懿亲之缀阅人多矣无如宅相之贤以子妻之即有门阑之喜

求亲书

持使者节徼前好于日边同君子寮接英游于领表以奕世倾盖之故无常人伐柯之难令女典训素渐佩断金二同之诚某人诗书愿学慕白圭三复之风方求伉俪之贤有赖烝尝之助问名斯始既衔袖之弗疑得请为期庶委禽之可卜

言定书

比获通家遂谋合姓既语冰之得诺敢諏日以结盟盖田庐鸡犬之相闻宜?牋凤凰之允叶匪伊朝夕请束薪束楚之期若节春秋凯采藻采苹之助有惭薄币已件他函

送礼书

歌风人之沍紵思得淑姬逢月老之繫绳吉占介妇可无纯帛往助?装不腆之仪别陈于素

大儿求?书

击柝相闻旧矣风期之讲伐柯有得欣然冰语之同发币云初褻牋敢後伏承令女佩箴佩幌已练习于妇功而某长子某学箕学裘亦践行于子职入官虽久主馈尚虚聿求伉俪之贤所赖烝尝之助繫绳不爽合卺可期食鱼而河必魴兹惟达裔乘龙而门多喜祇媿前英不腆之仪别陈其目

送礼书

为息覓?已得百黄金之诺行媒受币重惭双白璧之珍时既及于标梅助即期于采藻

次儿求?书

乡?德尊所谓文人行也儿曹下品欲以其子妻之相先一纸之书无待十缙之币伏承令女熟组紉于姆教可但鬘丝而某第二子荒篆刻于童蒙有惭弓冶方谋介妇迺得季兰曾衔袖之不疑顾析薪之焉用重诺过黄金之百轻缣非白璧之双食必河之魴斯焉偶大射如臯之雉何以瞻前

送礼书

遡江而上更同拜于除书采润之中岂偶谐于昏牋天借两家之便日从三易之占可无色丝以固前好欢欣交集宣布无穷

昏书

接鷄豚之社昔者知名诵魴鲤之诗难乎择对吉既符于泰筮礼必讲于贄戈伏承令女习惯执笏讲明举案而某人已称三语不废一经正兹中馈之虚幸矣淑姬之得匪朝伊夕即諏束楚之期先春後秋遂获芣苢之助

回朱氏昏书

介弟持衡方庆一庄之获行媒进牋遂谐二姓之驩发币鼎来报琼不腆先辈拏芳月窟振响

雷門妹子所乏婦容稍通女宪叶畴人之占凤喜归妹之乘龙结褵而九十其仪盖闻耳矣在
饋得六二之吉庶尽心焉

回许氏昏书

马牛之风不及复隔乡关凤凰之卜于飞遂谐昏牒鼎来纯帛有腠英瑶先辈摛词巍中于乙
科次女主饋未闲于内训里言不爽良匹焉依姊妹有归在同郡获同年之好苹蘩可采须行
媒申行潦之期

第三子婚书

扬舲假道方披拂于风仪倾盖定昏无往来之水语谋之泰筮讲此币仪伏承令女姆教雍容
已有采苹之德而某第三子师资涉猎未成折桂之名窃仰高门妄希嘉耦岂谓一言之决遂
谐二姓之欢食鱼取鲂既自欣于必宋射禽得雉将有媿于如臯

第四子昏书

仰先反之碑恭惟文人行也求小儿之妇得此季兰尸之泰筮既从币将敢後伏承令女采苹
采藻盖女宪之兼通而某第四子学箕学裘顾祖风之弗继不谓里言之达遂谐嘉耦之欢鷄
狗之音相闻曾里门之不远凤凰于飞曰吉岂昏牒之无因

第五子昏书

三世连姻旧矣潘杨之睦十緇讲好惭于竭末之间宋城之牒岂偶然渭阳之情益深矣伏承
令女施鞶有戒是必敬从尔姑第五子学箕未成不能酷似其舅爰谋泰筮用结驩盟夸百两
以盈门初非竞侈瞻三星之在户行且告期

第五子黄氏昏书

平时讲德未披拂于风仪此日连姻无往来之水语讯之泰筮讲此轻缣休承令女姆教雍容
已习采苹之训而某第五子师资涉猎未成刻楮之功兹仰名门愿希嘉耦孰谓一言之决遂
谐二姓之驩鷄狗相闻盖邻疆之不远凤凰曰吉岂昏牒之无因

潭倅昏书

犹子连姻已协食鲂之咏友于择对复谐占凤之祥往助补衣敬输纯帛伏承令女久明妇道
家弟克守官箴虚中饋以有年赖前缘而偕老匪伊朝夕即諏束楚之期若节春秋遂获采苹
之助

长孙婚书

绣衣赫奕尝瞻父执之尊纯帛森罗兹缔孙枝之好令女女箴夙讲长孙家学粗传瓜代结盟有云来之深契凤占得吉匪媒灼之多言不腆聘仪已陈他牒

第七子昏书

里闾在望鷄犬之音相闻昏牒有凭凤凰于飞曰吉迺諏良日用讲贄仪令女习惯妇仪已佩采苹之戒幼子剽闻师说未荣拾芥之名中饋是述行媒可信想百两盈门之礼深媿前尘对三星在户之期愿寻宿诺

新涂昏书

企双井之儒门相闻击柝谐宋城之昏牒不假伐柯泰筮既从轻缣可讲伏承令女素闲姆训共钦四德之全幼弟久服师资未反三隅之问兹缘亲契遂缔欢盟愚子连姻已负乘龙之媿友于求偶复欣占凤之祥不腆菲仪式迎嘉命

姚氏昏书

鹫峰掉鞅尝同翰墨之盟鴈序弹冠复欵衣裳之会兹谐昏牒端有夙缘既泰筮之相从宜贄章之可讲伏承存心女史能尊彤管之贤而某束髮师门未饱牙籤之读述宜家之淑艾得采涧之季兰必河之鲂喜华宗之合姓如臯射雉疑前事之寓言

杨氏礼昏

讯敬仲之占卜云其吉纪宋城之牒天且弗违伏承艺圃拏芳儒科得隽长孙女稍知女宪所乏妇容既协比於邻封不徒劳於冰语鼎来币物已藏倩鴈之书庆集门阑将迓乘龙之喜

盘洲文集卷六十四

卷六十五

钦定四库全书

盘洲文集卷六十五

宋 洪适 撰

致语一

台州会太守致语

一麾共理欣铜竹之鼎来半刺焉依期金兰之耐久式开华席敢肃高轩恭惟某官辞丽孔门气麴屈垒万卷破五行之读七言膺一字之褒观泰阶之六符家声是似应郎官於列宿朝着甚休尚拥朱幡来临丹洞厥初班录已见慈祥赋冥冥云屿之诗江山得助追漠漠鹭田之句今昔争先通判密令後昆闽川雅望飞鳧大邑醞藉有余展骥偏城中和可法正字怀珠借润倚玉分辉三沐三熏犹有逾年之欸一觴一咏可无卜昼之欢南薰共挹於清风东谷正延於化日荷敷翠盖榴蹙红巾锦裯旋学柳之腰鴈柱促剥葱之指琼枝继佩相娱银海之前缥瓷酌醺莫惜玉山之倒但某等名联动桶艺恋州鳩仰侑笑谈辄陈韵语

子墨声名满上都同时曾喜得相如二年宁俟棠陰久一日先看薤本除已向云霄班玉笋却思风月佩铜鱼百川莫靳长鲸吸会即泥封虎爪书

秋閱致语【已下为广帅作】

入丁出丙应星瑞於清秋先甲後庚肃军容於大府式讲干戈之问不忘俎豆之陈经略决胜两楹宣威五管妙略独优於缓带雄棱自折於遐冲戴鷩武夫咸贾系桑之勇弄兵赤子复安负耒之居提刑露颖词锋耀奇文阵绣衣直指有部使者之声名尺籍伍符多故将军之威令运使才兼数器笔扫千人挽粟飞刍既貔貅之素饱拔距投石致鹅鸛以咸精当执矩之萧辰举饮醪之故事置酒何妨高会投壶然後雅歌天下不复用兵犹谨辕门之备军中无以为乐聊同舞剑之观但某等偶预贱工获瞻台席敢哦韵语少助欢情

使星两两下人间南伯来临黄木湾盖海旌幢龙户集折冲樽俎豹韬闲鉞锋似雪摇银海美酒如澠倒玉山宾主一时皆伟望璇霄不日侍天顏

又归路

精甲朱旗同百将一心之力高牙大纛启元戎十乘之行经略诗美壮犹望隆方伯名下真无虚士堂上自有奇兵静镇南州举行秋獮一鼓作气见从者之塞涂八阵成图觉鼙声之振海

师干已试女乐可前少迟千骑之归聊献七盘之妙象板促生莲之步锦裯回学柳之腰但某等滥缀伶箫获瞻使竹辄哀巷语以代涂歌风动旌旗熊虎开喧轰鼓吹隐晴雷襟裾夹道邦人出介冑填郛方伯来按轡传声真烜赫铺茵呈舞少徘徊林蛮洞蛮皆心警共看威伸讲武台

设蕃乐语

南越建邦乃夷落珍奇之凑北风应律正舶商遄发之期惟朝家申来远之恩故会府举示慈之宴经略政容狱市誉溢康庄得华裔之驩心知藩垣之大体治如方庆忿息崑仑之酋诗美郑公货通师子之国提刑凜然直指籍甚遐方奇器弗为不事齿牙之饰贪泉自饮蔑闻毫髮之须提举信着外区赋盈内府致栖陆藏山之宝侈拔犀擢象之储船交海中何啻四十余柁钱流地上亡虑数百万缗当其整楫之时爰共肆筵之乐嘉宾簪盍廉贾鼎来纒头夸衣卉之装屈膝拜赐花之况与之亢礼莫不令仪一醉宁辞此去布帆无恙再行益富岂有垂橐而归某艺习梨园营分柳陌初无棘句可助櫂讴

海山楼下水朝东此去弥漫拍太空秣载宁寻蕞尔国舟行好趣快哉风往来云汉经星外出入鱼龙巨浪中拜手君王零湛露举觴须似吸川虹

会肇庆新守乐语

守飞龙之潜邸方讲先声枉画鷁於长亭斯逢重客式张绮席以速朱轡知府和气粹然清埃籍甚阃奥难窥於畛域老成独有於典刑久韬双劔之光叠应三刀之梦惠露尝沾於电白不改棠陰德风将偃於嵩台共瞻竹使於焉肯顾可谓能谦我经略夙稔令名愿承英矩闻足音而有喜抚心曲以既降义笃邻欢情深主礼唤惊鸣之妙舞扬曳茧之清歌同乐良辰少留嘉话凤翔千仞岂为岭表之久居鲸吸百川且向尊前而径醉某等齐竽滥进由瑟未工仰奉台符辄成俚句

元戎好客过当时喜报江头鷁首飞欸曲西宾香作阵安排南食妓分围甘醪不必金貂换清话频看玉尘挥只隔嵩台衣带水未须轻赋醉言归

会肇庆旧守乐语

画戟终更说借恂之遗爱扁舟乘兴寻访戴之旧盟草木传声江山送喜某官圭璧尊朝之器梗桡耸壑之材周室中兴畴世家而登用臧孙有後振门閼以光华课独最於潜藩名久闻於邻壤潢池赤子处处服田山谷脰眉纷纷祖道入奉三年之计正深丙夜之思不替高情肯远行色我经略有怀德宇欲对谈城欣都骑之临存秩初筵而留宿决西江之水美誉长流倾北海之樽清欢无尽某等偶叨营籍未习乐均仰奉台躔敢陈乐诵【广州有三江自广西历康端至广曰西江自循梅而至曰东江自南雄而至曰北江】

再岁专城屈令才西江人至说清埃瓜时解组飘飘去雪夜乘舟得得来一笑坐开桑落酒几
声乐奏越王台元戎预起阳关恨不放谯门玉漏催

会黄雷州乐语

儿童知姓识天际之归舟宾主开颜投井中之去辖绮罗分秀桃李呈妍某官稟瑞玉渊腾辉
金社追贾马升堂之作驰机云入洛之名暴白题舆芬芳剖竹过家上冢之南海有如西州垂
组夸乡不东阡则在北陌我经略自移犀印遂濶尘谭喜闻衣绣之归复有盍簪之歆乃开华
宴共对良辰拨弦齐裂帛之声趣拍进垂螺之步居二千石今为五领之达官倾三百盃好继
八仙之豪饮某等偶因薄技获佐清欢仰奉指呼敢陈乐诵二难辞藻琢琼瑰入洛当年擅轶
才五岭达官今寂寞九龄高躅久尘埃分符有此二千石投辖中之三百盃衣绣还乡真罕见
戏鱼同队几鸳鸯

平齐孙致语

三捷成功害去緑林之盗七擒献状声喧黄木之湾霁川陆之妖氛舞閭閻之喜气可无饮至
于以劳还经略文武威风诗书元帅念旷诛之羣丑将假息於十年近壤无聊或通宵弗能奠
枕潢池相煽致白昼不敢张帆乃运壮犹潜分精骑稟成算而势同破竹缚渠魁而今始除根
雨啸风号狐兔已空於三窟山行海宿车航如出於一涂提刑嫩德尊朝芳猷映世玉节壮澄
清之志绣衣专逐捕之权问当路之豺狼先於剪恶扫罗澶之虺 会此执俘运使擢颢龙渊
凝华象载愤涉水为舶商之患故禡牙光甲士之行被羽前登实赖糗粮之济挽车奉饗率皆
规画之余盖马服之裔孙有虎贲之鋭卒果能一举遂克万全元戎欣反旆之归数郡息鸣桴
之警乃陈勇爵式肆歌筵吹竹弹丝作西域泼寒胡之戏椎牛酹酒歌少陵洗兵马之诗某等
欢类毗丁技惭师乙辄成韵语仰奉台躔

山越逋诛岁屡更元戎指纵有奇兵长歌壮士归三箭必胜良筹妙两楹兔窟已空春草碧鲸
波无事夜潮平干戈便挽天河洗桴鼓从今不复鸣

会南恩守傅侍郎致语

东君送喜来紫橐之贤侯南伯论情开翠樽之雅燕筦弦献状戟纛增辉恭惟某官降岳高标
筑岩华胄磊落简编之读陆离翰墨之工口伐可汗虽张骞其犹劣心存魏阙嘉季子之来归
积有声名腾于远迩暂寄铜鱼之事未回金马之班清浄治齐自适西园之乐殷勤访戴肯为
南海之游经略夙企光尘愿亲警咳朱幡皂盖有此搢绅之英白饭青刍勤於馆谷之礼乃因
胜日少接清欢舞裯虽乏於楚腰歌扇【阙】传於郢曲香裊龙涎之妙柱烹马甲之珍乐奏
越王台铿锵可听坐对贤人酒醕酤何妨某等偶缀伶伦获趋崇仞敢停乐句仰奉台颜

向来烽火起边尘肤使南翔誉益振肯为鱼符临海角合归鹭序映朝绅高情如泛山陰雪喜
气能添泽国春一斗百篇推敏捷醉中端有语惊人

韩提舶解印致语

梅岭乘轺独最二年之课瓜时解组幸无三尺之拘觴豆既陈綺罗相映某官学传原道望重封侯铸轂古之伟辞韬达今之逸识屯田减漕续重华振武之功作郡移风肖延壽颍川之治荣拜輶轩之任尽司?货之权名落岛夷信孚舶贾侈犀象珠玑之凑戢戢帆樯入夔龙鵷鹭之行駸駸笔橐我经略自分铜竹益契金兰接惊坐之剧谈屡陪挥麈惜着鞭而远别未许歌骊方此日去簿书之劳而平时皆文字之饮留连去舳欵曲清樽促鴈柱以高张啓莺唇而低唱眉轩席次变宫又听於变商辖投井中卜昼难辞於卜夜某等齐竽已滥泗磬未工仰奉台光敢陈俚诵

万户封侯识面难南来清誉落诸蛮指挥浪舶风帆了谈笑木牛流马间四牡言归光帐钱一杯相属看弓弯行行日远长安近平步逍遥玉笋班

韩提舶钱行致语

介圭入覲共瞻星使之回一节以趋将动天顔之喜宾筵荐啓祖帐遂陈恭惟某官道探圣涯材推国器籍圃破九丘之读词源倾三峡之流揽轡剖符偃江淮之草木怀珠献象集山海之梯航致十倍之息以归公家无一毫之物而敢私市兼总转输之寄益彰盘错之能将奉计以造朝已指期而解缆驾轻车而就熟路难蹑高踪闚紫闥而攀台阶遂跻近着我经略久欣敷衽重惜分襟宝钗呈桃笑之妍长袖骋翠曾之妙异时问讯当在日筵此夕语离满倾若下即见鸿轩於清汉从教鹤怨於故山春草緑波装愁怀於南浦秋风白露寓归梦於北湖某等优子贱工乐家短技辄成韵语式写心声【太白诗朝登北湖亭遥望瓦屋山天清白露下始觉秋风还今居其地作亭用其旧名】

激浊扬清有渭泾鞭鸾归去侍天庭文星持节光南斗巨翼摩空击北溟黄木湾头波湛碧阳关声里柳吹青莫辞更尽一杯酒明日相思过短亭

衆官钱提舶乐语

岭表影纓仰九霄之星使日边赐札赋四牡於风人羣僚深恋德之情胜日展语离之会恭惟某官龙渊擢颖象载呈祥屈宋当作衙官曹陆羞称童子转输淮甸欲天下之澄清抚字江臯无庶民之叹息未蹇禁密暂拥皇华厉廉操於贪泉溢奇货於中国及瓜而代整鷁棹以言归不驾而行跨狨鞞而独步惟柳营之列将暨莲幕之衆宾久托光尘敢陈祖席操丝比竹歌阳关朝雨之词举白飞觴牵南浦春波之恨某等滥因末技获对芳筵上奉台顔辄成乐韵

泰山英誉冠当时五岭人人说绣衣平步便应持紫橐它年何止到黄扉迟迟暖日离筵啓渺渺澄江画舫归若问越装无一物篋中宝唾尽珠玑

广东春教致语

司马仲春振旅职在周官连帅比年简车闻诸汉志盖两军相交而尚犹执榼岂今日之蒐而可废开筵经略玉节远分金弢博览扫盘牙之夙盗耀骇电之雄芒不戮一人同子文之训楚既明三令有孙武之教吴提刑光动台阶望尊肤使玉辔见澄清之志固已振威绣衣兼逐捕之权宁忘除器提举襟怀磊落仪表清明武库文场久说声名之卓海灵陆宝暂【阙】经画之余共閱奇兵式逢良日日其拳勇角此蹶张分诸葛之阵图得逢门之射法虽介冑之色不可犯方肃戎容然俎豆之事则尝闻当行觴政自有折杨柳之曲何须迷蝴蝶之声倾緑醕以胜栢看红潮之登颊某等庇身治部接武谈优仰对顔行敢陈韵语

高管嗽嘈叠鼓忙春云轻覆飡军堂二星光动狐狸伏六纛威腾貔虎良海孽向来如薙草射夫无有不穿杨时平已卧边庭鼓不废蒐田谨旧章

归路致语

我武惟扬出旌幢而【阙】朝而毕洗兵甲以挽河经略智略少双文武备足崇宣力四方之烈妙折冲千里之筹懔秋肃之严威行春蒐之令典罢休武舞既讫事於鬪场罗列艷粧愿驻车於广陌新声发越轶态便娟所谓进步而若翔莫不骈肩而争覩某等偶因鼠技获仰虎符不揣凡才辄成韵语

辕门返旆到康庄甚宠传呼实鲜双丽锦轻翻青玉案高牙旁耸碧油幢令【阙】遐峤真无事盗息潢池不受降会见追锋归禁密独留威誉纪南邦

盘洲文集卷六十五

卷六十六

钦定四库全书

盘洲文集卷六十六

宋 洪适 撰

致语二

天申节道场所回栏堦白语

朱明纪至歌风式对於南薰赤伏告期绕电有光於北斗方臣邻之归美扣老佛以祝厘归涂正拥於旌旗夹道愿闻於管龠敢驻元戎之乘仍邀使者之车聊唤舞衫更陈口颂濯冠沐浴意能?已萃缙黄介万年乐备八音浮喜气香飘九陌凝祥烟双旌未用催茸纛四牡何妨款着鞭夹道邦人方属目试教舞袖略回旋

前筵祝圣致语

玉衡正而太阶平气【阙】夏里社鸣而圣人出节应千秋共肩戴舜之心遥拜祝尧之请恭惟皇帝陛下龙飞上治马化中兴聚精会神屈左智右贤之策悦近来远同彼疆此界之仁文物葳蕤规模宏远上瑞并书於史谍屡丰大播於民謡决天阊而开地垠昆虫被泽压月窟而震日域殊裔向风迓载夙之令辰腾无疆之嘉颂五帝足六已迈德於商周万岁者三愿齐光於箕翼臣等欢浮海角想象天顔喜动眉端言成口号

帝晖咫尺照龙楹绕殿嵩呼若雷霆朝土班齐鸾步武仙官瑞集鹤仪形奉觴亦有单于使秉笔应书南极星遐峤莫瞻天日表愿将湛露等沧溟

对厅致语

如山如阜如冈已祈泰筴以雅以南以龠式侑需觴广此上恩行诸督府烟云绚采草木欣荣恭惟经略鹭序名臣龙韬元帅治有清节振开元四十年之风民无叹声践孝宣二千石之训提刑蜚英表着借重澄清服领以南共仰使轺之久溯江而上即迎召节之盼提舶风期隽明德宇宏达海濒遐远幹奇货於古人天下中庸起高芬於鼻【阙】甫际绕枢之旦同倾拱极之诚赋苹鹿之【阙】秩蒲鱼之初燕销金罢镒既复复以指期鼓瑟吹笙故乐乐而与衆宜言饮酒所以合欢某等偶预音家获趋台圯永歌不足口颂敢陈

时逢化国日舒长解愠风来宇宙凉飞鴈闾祥瞻北极颁鱼锡宴暨南方纷纷人赞元侯德两两星舒使者光来岁广庭班玉笋斯辰同奉万年觴

王母队祝圣致语

流祥光於华渚倬彼成章来仙侶於崑丘欣然上壽恭惟皇帝陛下粃糠夏子冠冕勋华如星非星如云非云六符辉焕曰阳而阳曰雨而雨五韞叶调帝业等於山河王度式如金玉比屋迓可封之治殊邻修不战之驩泄泄融融庆承顔於长乐葱葱郁郁载望气於南阳式逢贯月之辰咸致後天之祝集三岛十洲之羽客献千秋万岁之瑞图宛宛黄虬曾发至尊之笑戢戢戴胜更羞玉女之珍臣妾等遥望细犂少留彩节辄成口号以助颂声

六幕纷纷啓瑞篇非烟深处下芝輶穆王扰扰不谋治武帝区区空学仙今代一人真间世【阙】时五老与疑年欢呼亦有南山颂谁解吹嘘上九天

对厅致语

冒海隅之出日咸爱嵩呼象天上之需云式均京燕貳觴既举广乐复张恭惟经略道贯六经声驰九牧治广谁如方庆尹京将选王尊提刑典学淹该赋才英玮叠使华之三组核吏事以六条提舶珩璜瑞世之珍杞梓昂霄之干暂烦持节即覩赐环参会皇文之时载赓帝武之什是日也日舍东井潮生南溟清籁集而薰风翔协气流而景云烂置九行之法酒礼备侯藩歌万壽於声诗心驰帝阙妾逢斯玳席来自瑶池密迓台躔可无口颂

天街躑躅跨连钱帝念遐萌辍隽贤玉节绣衣三絶席翠樽琼笋再开筵筦弦声动宫商叶雨露恩均草木妍定有千秋金监録明年亲奏御牀前

广西春教致语

地压坤方仰茸纛撞牙之重月躔青陆正简车蒐乘之时铠冑精明笳箫清亮经略任隆分阃功载宁边有裴公文武之材推郤縠诗书之府龙韬豹略折千里之遐冲鹤膝犀渠贾三军之余勇提刑行都九德气备四时厉柏寺之霜威夙参鹄鹭持桂林之星节先问豺狼运使猎秀青箱结知丹旆绣衣?举蜚数路之英声骊驾转输致列营之宿饱式諏日吉同整戎刚銳将鼓行壮夫剑立取上驷与彼中驷共观驰逐之能如小巫之见大巫默寝跳梁之计屡下奇胲之约益振中坚之容虽问甲兵不至於庙堂岂忘除器尽事军旅则闻於俎豆于以投醪开豫北之芳尊设湘南之勇爵某等未通乐纪见谓音官敢摭耳言用成口颂

元戎堂上有奇兵楼堞旌旗未易名光接二星瞻使节令行八桂畅军声指挥已定熊黑肃什伍才分鹅鸛成威烈远超铜柱外雕题交趾尽魂惊

道上致语

亘野弥川既葳师干之试闾郭溢郭共瞻方伯之归经略烜赫高牙雍容缓带赏刑兼用不推皮里阳秋策虑内充自有胸中兵甲讲周官之振旅统粤分以殿藩【阙】霁帐前之威愿看

掌上之舞回弓弯之双袖翻花簇之轻茵翩然若【阙】观者如堵某等员参四会技愧五穷仰奉台【阙】

广陌无风柳絮藏【阙】不起整戎【阙】洞【阙】累化青春寂师乙谐声白昼长无【阙】冠裳云塞道两行鈇钺雪摇光英英如此桂林【阙】便合腰金上玉堂

归府致语

竣事辕门顿兵幕府百将戢鸷强之勇三军书梟俊之功恭惟经略略妙两楹政成五袴比屋咸依於慈父御屏久疏於肤公已缮车徒荐临歌舞共诧斗南之秀更多冀北之羣粉白争妍奏八音而惜日丹青难写冠五岭以娇春某等备数贱工观光崇仞芜音自媿口颂敢陈

凝笳叠鼓压天南从此邦人作美谈北里声名皆擢秀东州歌舞总怀惭轻裘坐啸青油幕积甲高齐碧玉簪闻道家卖钁钏武夫归去亦醺酣

水教致语

楼船习战始汉室之穿池督府简师当楚人之竞渡雄飈借势逸浪回波恭惟经略文武威风诗书义帅苻泽并除於囊橐潢池复返於耕桑堂上自有奇兵克隆阃寄舟中尽为敌国聊试军锋提举龙劔分光蛇珠握宝中流击楫志久在於四方当路埋轮权遂兼於三使提舶英规瑞世懿德照邻驾传一封远矣九华之送【阙】楼四望安然珍异之来式聚星躔同观战舰得岑彭露洩之制【阙】董袭断继之功巨劔长枪如此舟师之勇多术大櫓潜消海孽之谋少停金鼓之声俯听笳弦之奏采菖蒲於古澗令节相逢张螭之华筵甘醪可醉某等未通西气稍习南音敢缀耳言辄成口颂

元戎肤使憩胡牀寓目舟师夏日长捷比黄头能辑濯勇於长鬣取余皇水中劔影蛟龙避帐下兵威狐兔藏见说潢池毁多?新来归去事耕桑

归路致语

巨舸休兵如得周郎之胜通衢返旆共瞻方叔之归恭惟经略识邃古今政兼寛猛比屋口谈於盛德偷儿胆落於雄名烈烈舟师置阵匪同於背水娟娟舞妓铺茵少试於凌波愿驻高牙以偿衆目某等寅缘短技瞻仰尊严不揆俚言敢陈韵语

油幢红旆届通衢共听歌诗我不诬弭盗初无沈命法应时谁用辟兵符翩然奋袖回罗绮观者骈肩足袴襦早晚天朝盼瑞锦好书【缺】石遗番禺

会肇庆黄通判乐语

淡墨造化龙之【阙】旧矣想闻轻车寻展骥之程俨然肯

顾元侯目喜【阙】为开清尊通判状元结绿辉山长离览初第策於【阙】举子之上价擅无双雠书於十八学士之间识明元二已丹霄之得路忽朱绂以去朝云外神仙何拘弱水海隅老穉始识魁星我经略素讲芳猷遂谐嘉话既获同於王事仍密迹於邻邦欲远方歆艶於大名故高会勤渠於缙礼裼袖看轻飞之妙翠翹回巧笑之妍汪汪千顷之波非徒德量油油三爵之酒方啓欢情某粗习箎弦得瞻履舄心声欲吐口颂已成

古锦衙标户户知瀛洲準拟上云逵当今便便五经笥自昔汪汪千顷陂肯向江边留鷁首莫辞花底罄鸱夷康沂成咏颁归诏剥啄相寻後会期

会郑韩二守乐语

嘉客聯翩合东西之鷁首元戎繾綣列左右之蛾眉商律既清华筵足乐某官片言寤主善政得民腾茂实於罗浮介高芬於龚召提封累化已罢盗而买牛当路知名岂呼卿而问鴈即闻前席遂筵要班某官讼敏憩棠威伸拔薤荆府见咏於太白颍川留遗於次公廊庙来询欲正铜鱼之拜儿童相记已谋竹马之迎行复陟明岂专敛惠经略式因暇日少接清欢久闻置驿之贤【阙】承英【阙】更得覲圭之裔来慰别怀舞衫呈回【阙】之【阙】歌扇度遏云之妙蘂渊留照不须对影以成三竹叶娱情莫惜引杯而满百某等偶缘末技获望余光仰奉指呼辄成芜句

江别东西说二贤鱼书同拜喜聯翩穉卿风采齐龚遂延壽规模载颍川玉麈挥谈飞玉屑金龟换酒泛金船莫辞痛饮娱清夜对此中秋璧月天

广东秋教致语

萧辰都试盖遵武备之常銳旅鼎来益壮戎容之气方一新於城堞爰大建於鼓旗赫然威棱崇我方面恭惟经略智谋辐凑声誉兰薰早陪议於枢庭荐制权於边阃赅汗致小偷之赎黑端行恶子之诛缓带轻裘自得折冲之略撞牙茸纛复临简力之秋提举德备四时学苞六艺振纓岭海久揽轡以占星剖竹乡邦欲怀章而就道提举运使青萍擅器赤箭标材卉服鬪衣称皇华之未有輶车骊驾政军食之是须知府统制郡寄远分祖风善继名高信布有黄石公一编之书世说关张为卯金氏万人之敌莫府既明於甲令武夫咸奋于熊黑铠甲鲜明皎如霜雪戈鋌犀利【阙】彼云烟控弦【阙】?叫之精画阵得鱼丽之法既陈勇爵斯啓华筵天下大安烽已沉於丹徼尊前一笑令须卷於白波其等因伍本牟预瞻巨阙芜【阙】自媿口颂敢陈

清秋大试斧寻柯噉咷谁言用楚歌帅阃威名传籍籍使台材业办多多兵机总是师黄石酒令同看卷白波见说邻偷蜂蚁聚远闻军政已投戈

归路致语

拥旆建旗肃尔元戎之令夸银曳彩欣然猛士之回恭惟某官道括古今材全文武发伏能张於耳目除奸皆得其根株已消枹鼓之鸣大洽袴襦之咏三千铁骑讫武事於关场十二金钗舞汜人之妙曲欲副阊郛之瞻瞩不辞按辔以迟留某等未洞八音已穷五技台符在望韵语载陈

旌旗猎猎战西风介冑精明霜与同拥道共瞻元帅至折冲谁许十贤功夸银拖彩征师喜回袖垂螺舞女工已向黄枢赞筹画便应归侍大明宫

设蕃致语

伏以栖陆隐沙物八蛮之奇宝接舳连舳起万估之去程秩此长筵视诸故事恭惟经略权尊牙纛望偃簪绅继宋璟卢钧之清掩任延锡光之绩德惟善政除下碇之苛征利涉大川无揭竿之多提舶素丝厉节紫橐储材领重寄於輶轩司殊方之?贿交【阙】中之舶通远客之越乡校都内之钱藉良筹而富国是日也阳月未尽陰云不生严风至而北户寒骇浪伏而南溟晏昔焉閱货之宴私彼珠玑今及束装之时宠之樽俎曦阳之恩既洽藏市之愿可知卉服氎衣已睢盱而就列夷歌胡伎盖兰闍以同欢【王导拜扬州宾客数百并加沾接惟相人未洽因过其前弹指去兰闍羣相同笑四坐并欢】环丰颊之敷腴肆 顔而茗芋所谓乌浒狼之外何独龙涎象齿之珍发千里万里之行倍三之五之之息帆开遥岛归期细数於朱明捆载衆香异物兼齎於黑暗某等级名頼倡效艺崇塔仰对牙居辄哦韵颂

舳人指日欲开樯洽此需云宠远商奇物试求师子国去颿稳过大蛇洋银杯更尽金杯饮黑暗仍兼白暗将方伯使华清彻底不闻私有橐中装

会广西田提刑致语

分綉衣於遐峤籍甚相传下文鷁於澄江惠然肯顾初筵卜昼和气添香恭惟提刑察院壮志烟高飞谈雾卷擅青萍之利器摘黄绢之好辞蚤甄獎於儒宗久简知於法坐齐名屈軼独殚翬翬之思流惠甘棠愿书下下之考蹈危机於贼窟存陰德於乡城少寄澄清即归献纳瞻二星之次遂借余光迺三舍之程不忘雅好我经略命舟问讯除馆俟音释七闰析别之怀觐数日周旋之欸【阙】情道故契益腆於兰薰亲仁善邻事可寻於瓜润唤紫尘之长袖飘叠穀之轻裾曲拨鵾弦声紆象板如淮有酒何慚南董之经并山为肴诚非邾莒之会某因缘丝竹瞻望壶觞仰奉指呼辄成韵语

北斗南边云物明?然天节仰祥星朝端獬豸曾张胆道上狐狸已匿形欲奉三章仁远峤定知五筦迓虚囿迓程肯顾交情厚莫惜花前倒緑罍

广东春教致语

国小大而制军夙垂邦典岁春秋而讲武用赫戎昭繄岭海之列藩以番禺为督府屯营之盛
斧钺则雄经略玉笋重臣银菟贤牧笑棘门之儿戏绍方叔之祖风百雉崇成益壮长城之扞
五兵素厉洊对蒐田之时提举提刑比德前英着名先进沃饔见澄清之志天应华星绣衣兼
逐捕之权人瞻畏日提舶运使眷深黄屋节厉素丝總?賄於巨舶蛮琛无艺转木牛於一路军
食有余式简良辰同亲武事耳目在吾旗鼓惟车尘马迹之从手足以积机关得弋法劒道之
说整我堂堂之阵肃然暨暨之容于以投醪於焉摄饮其争也君子实存酌兕之仪谓浊者贤
人斯对挥犀之坐某等未谙乐纪偶厕音官敢缀耳闻用成口韵

豪竹繁弦振粤台鬪场雨过淨纖埃台符欵曲三挥麈军令分明屡举杯兔窟久空春草出鲸
波无事早潮来已知樽俎遐冲折且欲班劳激趨材

归路致语

箕张翼舒已严终於兵事丝鸣管语致驩接於民心恭惟经略谋过孙吴政齐召杜御侮得龙
韬之妙抚封无犬吠之虞帅以门名仰旌旗之遡返家徒壁立倾城郭以来观爰进舞腰少凝
羣目台躔在望口咏载賡旌旆摇摇卷碧云元戎振旅入城闐蜚腾广誉孚朝野讲肄强兵动
鬼神无数冠裳声?昼两行罗绮艳娇春看看夜半朝宣室便把金犀换玉麟

盘洲文集卷六十六

卷六十七

钦定四库全书

盘洲文集卷六十七

宋 洪适 撰

致语三

天申节道场回栏堦白语

朱光发藻式临东井之躔碧缕腾芬共祝南山之壽愿徘徊於六纛更欸曲於二星欲进舞人助成喜气足音勿遽口咏已成

垂鱼拥笏萃官僚黄宅缙庐再祝尧九夏正中调玉烛五云为瑞烂璇霄无劳广陌张戎幕且驻高牙挽使轺观者如墙汗成雨为呼歌舞相欢謠

前筵祝圣致语

天命中兴符鬱葱於白水时迎上瑞荐清泚於黄河溥均湛湛之恩仰赞穰穰之福恭惟皇帝陛下成功一旅纳祉百神系丕绪於缀旒寘怀生於莫枕总纲振领尊居螭馭之中越契踰绳何取鸿荒之际久建橐而偃武同扇喝以垂仁陈六曲而措九刑皇风载赍集五章而扰一角協气横流斯逢里社之鸣共效华封之祝燕鹿鸣而食苹野式歌小雅之诗叽琼华而嚙芝英敢续大人之赋臣等技惭师乙欢等眊丁敢缉耳言辄成口颂薰风濯热自南来陛戟传声殿绕雷九奏鸣球陈露瓮八珍登俎奉天杯鑪烟结篆狻猊喷扇影分行孔雀开海角无阶就尧日但知长曝报恩鯉

对厅致语

五麟七凤滃照室之荣光百榼千钟均式围之广宴輿情闔悻嘉颂沸腾恭惟经略茹古涵今经文纬武元戎十乘久隆阃外之权泰阶六符当近日边之列提举提刑大雅宏达至德中庸不疑多有平反星虚贯索士安知所取予海羨牢盆提举材负能千任优共二巨舟如岛来异宝於殊方流马在途腐余粮於高廩式迓瑶光之庆同沾湛露之恩秩朱紫於初筵吟青黄之雅乐如渑有酒共瞻拱北之恭并山为肴更献维南之壽某寅缘丝竹瞻望簪绅不度俚言敢哦口颂

填然歌颂沸康庄郁郁梢云昼漏长礼浹三行盈緑醕乐催百戏拥黄堂挹泉清节推吴隐揽轡威声小范滂来岁同称千万壽天顏有喜举瑶觴【梢云瑞云也见江赋】

王母队祝圣致语

非烟非云瞻祥光而远集如山如阜介寿祉以同辞乌三足以前驱璈八琅而竞奏恭惟皇帝陛下功崇祀夏颂凝生商膺籙受符光启中天之业重规叠矩登闕上古之时成道德之安强总神明之祝佑东阡北陌屡多稼以逢年甘露嘉禾无瑞图之虚月梯航交至文轨大同邀宓妃玉女之车挹松子王乔之袂岳呼万岁纳虞氏之白环觞进九霞献瑶池之碧藕妾等蒿然布武?若贡诚辄吐心声式扬口号

想像编星拱紫微龙蛇日暖动旌旗恭惟虹瑞生虞帝远以鸾骖会宓妃云气先飞三足使风纹不皱六铢衣君王若问蟠桃木溜雨霜皮几万围

对厅致语

震夙庆辰瞻星流於华渚鼎来广乐洽云上於羣臣列坐编珠繁花烁锦经略廷中旧德岭表长城阜九牧之民熙然乐业最三年之计行矣趣装提举学贍家传言推世则洋洋领闻政司鬻海之权袞袞清班即快昂霄之志提舶韬藏利器充牣多闻通大艗之越乡载驰使牡迺明纶而造阙遂听朝鸡祥对舒虹诚深就日以九为节拜燕湑之渥恩於万斯年罄壽臧之善颂妾因逢玳席少驻羽轮已奏云璈乃赓口咏

心倾葵藿斗南边秩秩簪绅再就筵方伯举杯均舜酒外台连壁颂尧年望云螯拚跃三百【音陌】指日鴈行官九迁秘殿此时同广宴宫花深处拜传宣

广东水教致语

扬子之江心铸劒重午及时越人於水面鬪舟先庚有令既肯临於肤使可不召於麴生恭惟经略名简宸衷政敷物听海涉湊归颿之客山行无择地之人阃外之事则制之遐冲已折舟中之指可掬也猛士孔多提刑气备四时德翔千仞英声载路咸霽埋轮之威壮志横秋久存击楫之誓提举襟灵超卓识略高明粟漕盈仓智过长鞭之算舶商衔舳心期多?之消同集楼居俯观水战伐鼓而穹龟踊跃挥戈而画鷁纵横羽扇纶巾酷似周郎之赤壁牙樯锦缆惊回秦地之白鸥葭萌贾勇以摩肩蒲盗闻声而落胆投单醪而分饮直可拍浮尝角黍以知新便如竞渡某等偶阶丝竹获望尊罍敢缀耳言因成口颂

水战横江一百舟海山楼里坐元侯偷儿已罢三年伎猛士聊因五月秋不用辟兵酬令节从今行客但安流将军尽列长安第留取楼船震海头

归路致语

大翼蔽江过博昌之素习高牙塞道如长岸之言旋恭惟经略德浹提封望崇制阃按五兵於棹卒迎一节於邮籤水截潜蛟戟冲星之劒气体轻飞燕唤回雪之舞腰仰奉台躔洵存韵语

州民争看使君归千骑阗阗此一时鼠子已知焚大棹马人又是建丰碑但将海阁严军政不比湖亭习水嬉赤壁功成八十万小桥应奏舞腰支

会汪正字乐语

千里命驾如山陰乘兴而来一朝倾囂作河朔避暑之饮有重客而皆贺况良辰之难并声沸筦弦光生戟纛恭惟状元正字德辉览凤奇表匿犀腾鼉采於荆山呈夜光於隋掌黄甲早魁于多士终贾销声青藜夜访於老人向歆等誉谢先容之推轂举後觉以执鞭正垂上於云霄却平分於风月钱清督府迺枉道而肯临入覲法宫即尊朝而列侍我经略顷聯班缀欵挹风猷迨敛惠於桂林复亲仁於泥轼仍年分索凭尺札以摇情此日从容敷寸心而道旧欲娱密坐遂速高轩歌阳春白雪之词唤青笠綠蓑之舞盼兮美目虽东州莫并於西州酒有别肠盖大器难陈於小器某因侪伶竹获迓召棠同喜足音辄成口诵

一鸣曾使万人惊亘地驰声若建瓴此日东州披宿雾几年南斗避魁星共看骐驎腾夷路便接夔龙侍楚廷千里寻盟须举白海珍无谢五侯鯖

广东秋教致语

进退辨錡铙存周卿之六典前後中规矩法吴将之五申时届清秋令行督府经略龚黄抚俗颇牧总戎偷儿皆业於火耕估客久闻于露宿仍年专阃令三出於萧辰不日造朝官九迁於拱着提举运使学穷竹素德粹珩璜使指光华叠外台之五组宸心简注迎细札之十行簪盍鬪场鼓行猛士列方圆之阵法角胜负於兵锋歌南风而竞北风如临大敌取中驷与彼下驷自有神机惟熊威虎力之如斯何鼠窃狗偷之敢动式存勇爵遂秩宾筵七札张弓落盃中之蛇影一夫舞劒变掌上之蛾眉某等猥筵军伶获瞻戎幕共成口诵非敢面谀八月师田不失时武蠡赳赳震雕题耳批秋竹图骐驎锋莹朝霜拭鸛鵒连率名高方叔後外台志与范滂齐向来佩犢潢池子一一腰鎌走稻畦

归路致语

壮士负?如奏班师之凯元戎缓轡益隆御侮之声经略德辈前英政喧輿诵三校中秋之武久勤半夜之思红旗尚压於南荒紫橐即仪於北阙犀渠夹道已收旂动之威翠袖临堦却作弓弯之舞台躔在望口韵是赓旌旄照海塞通達共说元戎校武归三岁麟符寬远顾一方鼠子讐英威征袍剑立严师律舞?弓弯有妓围顷刻连营俱解甲室中宁复叹蚬蜃

鹿鸣燕致语

设科选士仰华旦之右文提笔擅场逢有司而定价自非白璧无瑕之侶安得青钱必中之功惟扬粤之东隅有张余之芳躅当时勋业能齐色於三阶後代宗师屡标名於千佛羊城是为盛府鴈塔相踵英【阙】瞻槐斯黄拾芥而紫劝驾腆元侯之礼开尊承嘉客之欢音沸筦弦

光生韦布恭惟经略诗仙济美吾道主盟决遣有如神明润饰皆以经术已同延壽执俎豆而兴校官不减文翁买刀布以齎计吏提举望崇岭表胄出云间使节森罗兼总儒林之柄牢盆充牣独贏岁抄之储提舶论议粹醇襟灵开豁典司浪舶每多栖陆之珍涵泳金籀自有传家之学喜羣贤之得隽指上国以观光遂延鄉社之先鸣且合漕台之高荐凡旧登於贡籍咸同集於宾筵所期浑化之荣以激方来之秀宫商间作醴笋交飞歌鹿鸣之三式侑吸川之饮象鸞鸟之百孰追击海之程某等偶缀贱工获披崇仞甲科可俟韵语敢陈采芹东鲁浪歌僖领海儒风异昔时学有渊源能贯道文如藻绣总紬奇轩然西笑騰三级对此南烹举一卮勋业权輿自今日广寒折取最高枝

会肇庆章守致语

遗棠陰於名郡载佩鱼符櫂桂櫂於长亭少留熊轼清尊卜昼和气回春伏惟某官擢干邓林席珍和肆自开龟而敛惠能去鰕以擅声仁浹遐萌无尺寸之肤不爱威清羣吏虽銖两之奸皆知绩既彻於法宫寄遂隆於潜邸於焉假道得以聚星我经略托契年家仰高仕路抚封借润重分邻烛之光置驿迎来已办厩刍之费式开欢席少接绮谈列頤景之轻桂进紫尘之长袖如渑有酒何慚南董之经并山为肴诚非邾莒之会某等因缘鼓吹瞻望壶觴同喜足音敢哦口颂

风翼翔嬉云路轻合班玉笋直承明鰕溪已作思棠雅龙邸先驰拔薤声阜盖朱轡仍敛惠青帘白舫岂争程元戎政欲倾家酿唤取佳人进麴生

福州会权府赵提刑致语

入疆而瞻使牡既亲显显之英諏日以合州鱼更结承承之契可无燕豆少欸符阶恭惟某官嵩岱吐晖淄渑纳度望早推於标的识独妙於襟灵屡符李合之占雅负范滂之志驾轻车於熟路再至闽川鞠茂草於圆扉一清汉律摄行方伯之事隐若长城之贤我安抚旧仰高山愿披宿雾把麾近镇遂托部刺史之天视篆黄堂幸聯大君子之躅欲腴兰心之好乃开竹叶之尊荧煌既聚於荀陈靡曼兼娱於郑卫十眉相顾虽非轻别於旧官百榼须空此去复拘於三尺某等梨园传艺柳陌分营辄缀耳闻敢哦口韵

三山分鼎肖蓬瀛印首云逵上使星缓带一年聊叠组破觚八郡久虚囷元戎自喜聯高躅胜日何妨醉绿醪雅望不应长揽轡便须笔橐侍天庭

会交代赵知郡致语

非桐不栖下凤仪於千仞及瓜而代解龟组於一朝少驻高轩乃张绮席恭惟某官清襟迈往雅量渊深毕原鄆郇文之昭见谓金枝之杰江汉滌漳楚之望来分铜竹之荣惠露所沾巫风丕变厖眉五叟欲祖道以攀辕细札十行即造庭而荷橐交代讲英声於朝野结永好於子孙方期接踵之初愿卜承顏之欸清香画戟载赓燕寝之诗朝雨轻尘未奏渭城之曲某等有欢

若下濫吹郢中共集耳言遂成口頌

雪意商量未肯忙使君归骑已腾骧二年治行留襦袴万户生涯足稻粱便去峩冠登要路谁能截镫欸行装胸中久矣吞云梦一举琼彝有别腸

盘洲文集卷六十七

卷六十八

钦定四库全书

盘洲文集卷六十八

宋 洪适 撰

上梁文

东湖上梁文

东海变为桑田漫作千年之调西山致有爽气遂萌三径之心顾穷人一事之难成宜智叟旁观而大笑子洪子生於浙右望出江东泛宅浮家叹萍蓬之无定架岩鬪壑怀桑梓之必恭悼木偶以何之骑土牛而甚钝周子至止非假步於山扃陶令归来聊结庐於人境绕树靡劳於三匝栖林姑逐於一巢因高城以为垣墉挹层峦而开户牖平湖湛緑闻渔父之扣船斜照穿红见樵夫之弛担方将买竹万个栽桃百科却师乙之诲箴弦课蛙丁以治菰韭东邻西舍接封胡羯末之游右粥左餐轶许史金张之乐乃諏吉日式举修梁少述襟【阙】并申颂祷

抛梁东三竿初日拂牕红盘中苜蓿朝朝是架上文书不疗穷

南芳兰手植茁新簪老莱便作斑衣戏日日循陔奉旨甘

西翼翼邻墙万瓦齐风至初无尘翳面不妨挥扇步桃蹊

北喜见边亭烽燧熄八荒壽域一时开处处楼台鉏枳棘

上郁郁非烟腾万状一天黄鹄自高飞旧日银河仍在望

下爱竹子猷今不借已开虚牖纳清陰更待高蝉吟永夏

伏愿上梁之後人皆奠枕门不呼医逐柳州之一贫送韩公之五鬼造化小儿不相戏梁上君子非所忧父子团栾问寝奏南风之曲弟兄笑语对床哦夜雨之诗

广州缓带堂上梁文

巨楹就斷得爽垲於守居缓带揭名壮遐陬之阃寄事皆中度下不告劳经略抚字慈祥剗栽闲暇庭息鼠牙之讼茂草鞠扉野无犊佩之人余粮栖亩饮贪泉而志洁挹溟涨而量寛治行鲜双欢謡不一数十处而起提阃时仰信臣十二月而成輿梁名高子产既新粉堞尽饰黄堂

以栋梁柱石之材运居楔櫨栌之用独营心匠咸听指挥方沼凝波闻宾莲之纪瑞高城作屏
有乔木之敷陰将率宾僚时开樽俎胡牀之雅兴故在投壶而雅歌甚休深有苇而浅有蒲不
减谿堂之乐右持杯而左持螯可拍酒缸之浮式举双枚因成短韵

抛梁东料戾微微晓色通桃李新栽千百本阳春都在笑谈中

南压枝荔子为谁甘红莲池上花争膩舶上风来客半酣

西堆案收回纸尾鷺缓带坐看霞送日桃榔叶底鹁鸪啼

北粉雉如山扞南国登临极目望中州便觉归心生羽翼

上青草黄茅祛风瘴天末神仙御白云执谷骑羊会相访

下抚字心劳歌匪野卖劔归来不带牛携锄竞去寻秧马

伏愿上梁之後牒诉长稀版图益进岁丰而鱼蟹有余风静而鷄鶩不近青油幕下少留宾客
之谈玉笋班中入奉鬼神之间

澹津卜筑上梁文

年登半百未皇蕞尔之居象应魁三甫遂归与之计方休它馆难缓吾庐澹津主人壮也安贫
晚而亨否际真主风云之会点明时柱石之班智拙谋身坚白莫齐於衆口恩深镂骨怀黄获
返於故乡念先公之始基为我里之佳处营置锥之壤何啻买山规纳驷之门殆同刻楮兹契
肯堂之志敢辞治第之劳起无地之楼台固多慚德对此牀之风雨况有善邻练吉日於历翁
付全谟於梓匠既安义负可举栋梁

抛梁东螺洲水转玉皇宫枉教地?传前古调鼎曾无尺寸功

南澹浦弯环玉一潭拂径已成高柳五当门须要綠槐三

西鴈序双檐入望齐步?同行多乐地梦魂那复到沙堤

北仅胜诗翁歌偈仄欲营杰阁贮宸奎待向北邻咨信息

上不用星官说乾象青天白日清明凌雨震风休薄相

下万轴牙籤重插架祇将清白遗儿孙剩有门间容驷马

伏愿上梁之後鼎饪导和巫医扫迹华髮庆采繁之助清尊交常棣之欢七子克家咸守诗书之叶诸孙满坐长寻梨栗之盟凡我亲朋共兹悦喜

楚望楼上梁文

江汉分楚望昔闻骚客之辞西北有高楼兹占蟪蛄之景工师喜於得木龟筮未尝违人绳墨既陈凿枘相合盘洲老人六年治圃三径成蹊桃坞梨原杂百花而竞秀溪堂水阁涌双???以交流戏鱼识鸣屐之声驯鹤顾随轩之步复营飞观以俯西郊慕元龙百尺之名哦孙楚五寻之赋恋梯云之新级如履坦涂试耿雪之曲栏已横疎影纵目而天光无际怡顔而日力有余丘壑足以起予草木谁不如我旁瞻庐阜纳爽气於櫺楹前对鄱池发长讴於辑濯将以登临之暇时乎醺劝之娱从他【阙】火下歌台且向园林穷胜事舞低杨柳月久灰年少之心栖老凤凰枝独结岁寒之友修梁升也短韵来欵

抛梁东雉堞连延紫极宫渔子入关争蚤市舡人击水快晴风

南万顷风烟性所耽细草重茵春亘野澄江横练月闌潭

西天际羌庐入望低棣萼楼台财尺五瘦筇来往印长堤

北美竹如椽潇洒国巢云上下啓轩窗一览芝山盈秀色

上落霞孤鹜供清赏一声长笛倚栏时待得蟾光紫蕙帐

下剩作茅庐容?马藕花开後羽觞频风掩郊扉回俗驾

伏愿上梁之後日涉而风雨不渝云卧而神仙可学笋蕹鱼醢进野老之晨羞羽衣虹裳邀仙妃而夜话其谁歇马同我盟鸥俛仰之间咏歌不足

花信亭上梁文

历载买山方策勲於此日羣芳得地有报喜之祥风乃作新亭用酬胜槩盘洲老人酷好行乐雅知倦游治盘洲百亩之园费中户十家之产物非容易而尽获事或艰难而晚成东阁西楼仅有一牛鸣之隔左花右竹几乎两蜗角之争弗蒂芥於胸中若羈縻於化外灰心久矣唾手得之胡越为一家无尔界此疆之异云梦吞九泽合远山近水之奇草木皆知燕雀相贺画栋侈丹青之饰雕栏呈红紫之妍四时携酒则亲朋足以娱嬉千里命驾则故旧斯焉欸曲野无青草拥春径之名葩鞠有黄华送秋林之清馥閱冬蒨夏敷之相继任朝荣暮落之自然已架虹梁须吟蜚纸

抛梁东日日来占花径风长把芬香迎杖履不将消息倩鳞鸿

南芍药留春不脱骖夹岸芙蓉争濯锦双头倒影媚澄潭

西丹桂盈林菊遶畦霜【阙】 时花恨老忧能忘处草惭低

北鸥思从容鱼足食梅花满眼雪花飘玉骨冰肌同一色

上东盼双溪西楚望稍踈问讯竹平安贪看穿花蝶来往

下兰蕙丛卑宜在野闲捻花史傍阑干我欲雌黄赓演雅【陆鲁望作花史】

伏愿上梁之後风光益好乐事不衰三百六旬而岁成常常乘兴二十四番之花信一一飘香
凡我同盟逢场作戏

容膝斋上梁文

寸地休心或发置锥之谄数椽容膝大胜环堵之居非坐井以观天犹乘槎而问汉亲桶但求
於细木门间不纳於高车斤斧论功龟鱼荐瑞盘洲老人技穷知止兴尽倦飞半百年而日苦
无多又踰十稔九万里而风斯在下安敢肆言鷖鷖不过於一枝凤凰始翔於千仞因山之麓
倚竹为庐每驻屐而少留必横琴而独乐尘外欲招夫五老饮中难着於八仙抵掌而谈不出
柳州之景曲肱而枕可寻蚁垤之游昼掩卷以盟鸥夜举杯而劝月小以成小斯焉取斯雾塞
华裊沉沉者所以败也风生圭窦绰绰然有余裕哉虽不上梁何妨下笔斋之东九曲双溪在
眼中人世最难开口笑兴来宁惜酒尊空

南斗大生涯亦可贪仙岛有【阙】 到个中真趣上登三

西矮桃得地渐成蹊游鯢自逐天池乐此处相忘尺泽鲋

北坐看蛮触干戈息度地休吟葛屨诗开疆尽扫槐安国

上芥纳须弥非说妄浅中狭见小丈夫岂识汪汪千顷量

下何必万间谋广厦南牕翹足傲孤松北垞转头无片瓦

伏愿落成之後四时常健一室易安危坐蒲团乌有髀消之患徐行草径更无股栗之忧凡今
之人与我共此

聚萤斋上梁文

三叶决科更编花萼之集一经趾美当慕桂芳之诗月兔未明风萤可聚授诸梓匠建此山房

盘洲老人世禅儒冠室标艺苑演纶螯禁仍父子者四人结绶鴈行踵弟兄於二府儿辈久闻於师说孙枝半离於童蒙欲增门户之辉须佩轮舆之戒念焚膏而继晷尚凿壁以偷光肄业能勤策勲可必张口如坐云【阙】虽怀绷簪笏以徒然听履而上星辰尽灯火简编之所致莫惜数年之苦学誓图千佛之荣名良弓之子必为箕有心相续强弩之末不穿缟勉力有终兹顿双枚试听六咏

抛梁东一生穷达卜童蒙 却数年稽古力拾青拖紫笑谈中

南烧烛寻书到草庵月练紫牕如白昼牙籤插架好穷探

西景到桑榆漫噬脐趣取光辉对黄卷任他檐外玉绳低

北更漏迢迢天又黑短檠参用也无嫌莫使凝尘弃墙侧

上万点飞星迷四望案头乾死可怜渠人倦欲眠渠亦放

下可但膏油灺五夜清霜十月叹飘零便有雪花相假借

伏愿上梁之後笔耕不辍书癖休医诗礼承家长作蟾宫之想朝昏挟策无貽萤烛之羞传之云衲味我药石

盘洲文集卷六十八

卷六十九

钦定四库全书

盘洲文集卷六十九

宋 洪适 撰

青词二十一首

代保安青词

屯蹇未亨虑貽灾於星曜呻吟有疾敢请命於天庭恭修禳谢之仪少沥归投之悃伏念臣蠢愚有素摄卫失经灾积在身痍生於背纏绵枕席亦既两旬更易医巫备攻五毒气羸则甚疾肿不衰深虞俯仰之间积有神明之谴博询巧历谓荧惑方舍於限宫私念暮年正甲子方周於岁纪顾忧阴罚难遣沈疴辄控危衷涓陈清醮伏愿高穹降祉列圣兴哀畀以百生更驻桑榆之景起之九死庶收药石之功

代为子谢安青词

天道无亲罔间衡茅之陋灵心允荅敢修蕙藻之恭上瀆高明采深战惧伏念臣男稟生孱弱赋命迍邐疾在脾经肿已形於顔面医穷脉诀危几至於膏肓当鸠车儿齿之年进鹅管乳丹之药保兹赤子实忧似续之微禱於皇天遂底安平之庆不忘豺獭之报少殚狗马之心清选嘉辰聿严宝供延琼台之真侣按琳札之冲科伏愿飏馭回光凶星退舍日穷于次月穷於纪前迓春祺胆不受怕心不受邪遂消厄会

乡城禳火青词

愆阳易节方迎万彙之通濫炤降灾敢後四墉之祝辄披丹悃仰叩苍穹伏念臣等结屋乡城连墙里巷惟时阳之既久致就燥以屡惊出廩竺之财难乎苟免漱桀巴之酒今也未闻虑炎炎或致於延烧皆惴惴不遑於宁处况经冬之无宿雪恐涉春复苦沈疴爰修回禄之禳更弭大陵之气物虽慚於玉瓚仪实按於金科庶消耄稚之殃愿妥心昧之食伏愿高真隤祉列曜垂光脱焦头烂额之忧赐饱食煖衣之佚永供万斛长依壬癸之神疾去六淫不患阴阳之寇

为大人禳谢青词

陟岵思亲恨循陔之甚邈开緘闻疾欲尝药以无繇不胜人子之情遂瀆皇天之听果蒙阴相敢控微诚伏念臣父顷以台评谪於岭表逢魑遇魅久窥白泽之图茹蛊践蛇致苦黄茅之瘴初传消息采剧惊惶肱三折以无医肠九回而终日谋之卜筮厄有星辰辄披恳禱之私即迓

安平之喜惟祭鱼之匪报爰舍肉而有祈恭卜良辰肃陈妙供伏愿凶躔转祸渊鉴发祥土地所宜冀适调於南食雷雨作解早整顿於北辕

广州狱空青词

阳舒阴惨盖禁民有三尺之科讼息刑清偶阖郡无一人之狱仰上灵之徧覆冀下愍以潜通窃念九州不尽衡山百粤本同荒服惟羊城之剧镇处鲸海之上游蛮蛋杂居常起鬪争之事鱼盐逐利易兴掠夺之谋多有重辜号为难治臣自叨符竹力念简书惟措刑不用四十年岂古今之顿异故要囚服念五六日虽大小之必亲仰体好生幸无殃死积下旬之决遣致三院之空虚爰择良辰肃陈净醺按多仪於琳札诵密语於琅函度既往之沈冤迎将来之景贶伏愿鸢轮来格渊鉴俯临悯此无知使之丕变迁善灭罪不烦磔鼠之词易俗移风永絶带牛之习

代为妻保安青词

上帝监观回吉凶影响之速下臣激切揭斋戒沐浴之?敢控丹诚仰尘洪覆伏念臣妻行年灾蹇恶曜昭临自抵仙羊之城常有河鱼之疾节宣既爽防岚毒以焦心疼癰相攻忽风淫之在足不胜呻吟之苦遂萌祈谢之谋履地未能呼天而祷兼门户亦多於坎坷致巫医不絶於往来肃简端辰?陈清醺伏望俯垂渊鉴为退殃躔起此沈疴获臻勿药之喜锡之景福共保如茨之休

大人保安青词

受生天地之中夙凭覆载请命星辰之下愿赐哀矜?即醺筵辄披愚悃伏念臣禀资穷薄涉世遭回自窜南荒於今五稔山河乖异惟瘴毒之满前魑魅逢迎致风淫之中左手挛足废气耗神昏汗多不可见寒食少无以自养每视荫以度日将卧蓐以周星良医弗值於折肱沈疴何由而去体询求巫卜推测吉凶谓罗?临照於命宫而荧惑迟留於厄度迨仲秋之换节方列曜以回光不胜祈祷之私预肃禋禳之具念陋邦莫能备物赖渊鉴有以亨诚摠真适届於中元徼福庸殫於下地冀臻景贶获度灾时伏望上帝假年衆灵转祸怜臣身久困於蛮貊察臣行无负於神明俯寛潢潦之诛特驻崦嵫之景脱孱躯於丑地迎大眚之渥恩末疾有痊得此蹒跚之蹻故乡在望庶能匍匐而归

广州狱空青词

土木营膳尝虞妖禁之干狴犴寂寥悉自神明之相肃陈清醺并沥微衷伏念臣典郡於斯更冬已再顷因海飓致区屋之飘摧复有隣偷念城垣之倾圯遵一日必葺之戒玩重门待暴之文既揆日以落成虑兴工而有犯兼远峤浸臻於俗易故仍年再格於圜空恐其画地为牢犹有哭林之鬼辄伸禋谢敢贡恳祈伏望列圣隤祥高灵委鉴俾风灾之息患冀阳雨之叶时盗贼不萌鞠室长闲於三木瘴疴自弭欢謡俱浹於四民

大人生朝设醮青词

寢瘵计穷不避再三之瀆吁空情切庶祈万一之哀尽沥危衷仰干仁覆伏念臣自嬰滯疾再涉隆冬足不良行如遇股夷之繇手无所措岂知指运之能既度日以减餐常通宵而夺寐怔忡自失废輶是忧居此炎荒阙然良剂犹赖神明之护尚容喘息之延斯届初生敢陈清醮居瘴茆之俗而不免固陋庶蕙藻之信而可以揭?伏愿渊鉴流祥殃星退舍悯其困阨赐以安平遭俞扁之高医复邯鄲之故步念痿人不忘起早脱旧疴瞻衡宇以载奔遂迎解泽

代为妻保安青词

天鉴无亲尝沥陈於丹款灵心善应非求报於含灵仰瀆高明采深战越顷以妻梦祥伊始微福无门向背起居恐触游房之禁忧虞生育冀逃就馆之灾独赖洪私俯垂渊覆果臻如达之喜更协惟熊之占偶奔走於微官致因循於宝供敢消今日并谢後时伏冀列圣协仁大圆融祉数口保团圞之庆穷年无坎坷之忧

大人生朝醮青词

射蓬纪旦益惊垂老之衰卧蓐积年不避祈哀之瀆仰干渊鉴曲听愚衷伏念臣景迫桑榆罪投魑魅自纏綿於未疾兹经涉於三冬奄奄无聊安否靡知於朝夕苍苍所覆护持犹赖於神明致使孱躯稍能运肘重惟丑地难遇良医无饮食奚以扶羸乏汤剂未能起废复呼天而有祷冀履地之可期不胜丹款之私敢肃潢污之荐伏望帝心融祉星度去灾体脱沈疴早占勿药之喜恩归故里获享诛茆之居

广州移右狱青词

狴牢易地当有事於禴禴土木弥旬可无干於禁忌敢取吉日用肃醮筵伏念番禺之城实参夷夏之俗濒海故轻於为盗穿墉者鲜克畏刑臣罄竭薄材侵寻累岁虽颡愚之习少革而牒诉之事尚繁盖三狱连墙或谓犯阴阳之说致细民触网罕能臻桎梏之空偶朽椽见仆於颶风酌衆论遂移于别壤赖万灵之委贖庶两造之息争乃遵秘笈之仪以落圜扉之始伏愿明神敷佑列象垂光器废韶箚省行露甘棠之听声沈枹鼓无鬼薪白粲之囚

代为妻保安青词

高高在上惟诚款之可通□□【音泯出太玄经】其中无祷祈而不荅仰瞻威咫尺敢达愚衷伏念臣顷以妻摄卫失经晦明召疾自踰五岭凡涉九龄或否或安长有呼医之事以朝以夕居多卧蓐之时虑行年易休王之期而厄曜在衡灵之限致斯灾蹇未速痊平尝丹悃之默投赖紫清之真荫遂迎景贖不致沈疴脱瘴疔黄茆之乡甫居

【缺】之喜以保孱躯?卜良辰敷陈薰醮遵【缺】式【缺】珠簏之洞章伏愿照鉴委慈

景游回【缺】不坎坷以屯如尽室旄倪常团栾而宁止代保安青词

大造无私散聪明而临下微臣有祷凭斋戒以投诚敢沥愚衷仰干威咫尺伏念臣材资凉薄运历屯遭艰难特甚於壮年临照弗迎於吉曜靡瞻匪父尚存钜痛之创非此其身又丧下殇之适行藏跋扈思虑乖睽祸不免於闺房殃更移於臧获鬼其瞰室医不离门端由俯仰之愆遂获神明之谴谨悼心而谢咎爰请命以乞怜汎扫闕坛森罗琅简实赖灵文之力庶几下愆之通伏望弦覆垂光凶星退舍团栾数口潜消无妄之灾荡涤滞冤丕变不祥之事

舍盖堂设醮青词

土木踰旬恐妄干於禁忌斧斤讫事敢?卜於禴禴仰扣苍穹庸披下愆伏念臣叨承君命来领州麾惟是正堂临於东序自寇攘而改作垂四十年因灾变而不居隔六七政立三隅之复壁【缺】两置以重檐幽暗而不纳天光空虚则殆非人境岂敢忽倾而视陋遂谋去故而取新目力所营尽更张於户牖足音相接将旅进於簪裾兹择良辰首开醮席伏望灵符发轫乾象吐芒有觉其楹无复高明之瞰乃安斯寝长兴轮奐之观

妻子保安青词

呼天去疾从古则然扫地谢恩涓辰有祷敢披愆悞上瀆高明伏念臣妻宜人妾沈氏顷失理於卫生臣第七男未免怀而婴恙巫医相踵咸无药石之功卜筮屡占谓有星辰之厄遂投恳欸旋获痊平偶迁徙以还乡致稽迟於拜况念愚息近成於肌热恐行年未脱於身灾不胜舐犊之情并展祭鱼之报庶迎景贶即弭余殃方琼笈之森罗冀鸂轮之降格伏望高真隲祉恶曜韬光先春後秋俱团栾而聚首弱妻稚子免?咀之关心

会稽谢土青词

土木兴工恐妄干於禁忌斧斤讫事敢?卜於禴禴仰扣威尊用披忱悞伏念臣官居偪窄地势拘牵薰风自南无复追凉之所时雨将降每怀巾湿之忧因增下以为高遂图新而改旧所虞穿凿以速咎殃或方隅乖避就之宜在神禁有犯干之罪落成之际醮谢为先乃按真科肃延清馭伏望高真委鉴列曜垂光吏牒少休宾案获盍簪之欸医经可弃妻孥迎高枕之祥

祈晴青词

上天之载帷播物以无私苦雨数来斯叩阊而有祷高明匪邈盼蠶可通伏念臣所守稽山是为泽国每博询於农事盖常患於水灾愆一年不获有秋则庶民无以卒岁兹累月愁霖之沍作致大田多稼之寢伤虽屡走於羣祠迄未消於疹气乃蠲郡宇恭设醮筵仗仙????之真官讲冲科之秘式伏望圆穹锡祉列曜垂光翻手为云弗使阴霾之积举头见日遂无凶歉之忧

澹津卜筑青词

卜筑澹津实?遵於先志用工累岁岂无犯於凶神欲保父宁敢伸祈谢伏念臣顷因罢相再获还乡乃兴土木之谋以为风雨之芘前檐後庑幸略就於规模右筑左穿恐妄干於禁忌已亨一区之佚久稽百拜之仪兹肃清坛仰酬洪覆伏望高真委鉴吉曜垂光老稚伸眉长受如茨之祉巫医扫迹自臻勿药之休

莱国保安青词

矫首清穹惟包涵之罔间倾心洪造庶盼蠶之可通敬布微悰仰祈渊覆伏念臣妻沈氏顷节宣之嬰恙尝斋戒以勾怜浸閱岁时有稽醺谢兹中春之在候忽右体之不仁衆剂俱投六旬未効虑行年之蹇剥有恶曜之照临或土功侵犯於神祇致风气纏绵於手足法筵斯启景贶是迎伏望列圣垂光灾星退舍良方相值早收勿药之功末疾有瘳复治采繁之职

谢土青词

九载营巢盖屡兴於土木一区按堵已久散於工庸虽帡幪寬风雨之忧恐禁忌犯阴阳之说仰祈洪覆敬沥丹衷伏念臣子舍既多孙枝亦衆自顷年之罢相归故里以谋居梁桷栋楹间架浸緜於岁月斧斤畚鍤方隅或触於神示岂云凝燕寢之香仅尔列蜂房之牖失细推於三白尝轻犯於九良独被隆恩不生奇祸大惧禴禴之缓妄希荡涤之私令日是諏清醺斯启伏望皇乾委鉴吉曜垂光既革故以除殃愿履端而受祉盘跚病妇寻故步而早安纠合童孙对衰顏而长乐

盘洲文集卷六十九

卷七十

钦定四库全书

盘洲文集卷七十

宋 洪适 撰

疏文

乾龙节功德疏二

四月维夏有开甲观之祥千岁为春遥罄华封之祝渊圣皇帝伏愿横流福物顺履泰亨问襄野之涂复回天步赐紫皇之药增梦帝龄

丙丁统日瞻华渚之流光甲子疑年指大椿而齐寿渊圣皇帝伏愿金僊助顺琳札与龄重易六爻将利艰於美里受天百禄遂问道於广成

天申节功德疏二

舒虹烁电日临东井之躔亘地罄天人献南山之颂敢凭蓬筑仰介枫宸?惟皇帝陛下高步皇衢重恢帝载剽甲兵而不用隐旒纁以无为德及渊泉二仪与之比大功光祖祢六籍所不能谈式对诞弥同祈难老伏愿休符锡美瑞谍葳蕤壽考用增不数与三之梦本支烏奕有开则百之祥

赤伏闔符光啓中天之运朱明纪至直逢贯月之辰哀净宇之缙黄增祥辉於箕翼恭惟皇帝陛下诗赉瑞駟业济时龙帝幄求衣常夙兴而听政边城静柝久宴闭以结盟庆河海之安澜洽昆虫而被泽时哉震夙人也讴吟伏愿佛老护持乾坤长久继天为子覆禹贡之山川梦帝与龄迈周王之壽考

天申节功德疏

天有三辰诞纪虹流之庆山称万岁争驰鰲拚之情繙蓬贝之秘文介冈陵之曼壽皇帝陛下伏愿荣光旁烛福物来崇题南斗之长生等西方之无量举苍杼而去檣机永振乾纲厮伯侨而役美门远超仙籍

天申节开启疏

蕤宾数七和哉玉烛之时嵩岳呼三清矣黄河之瑞仰凭楚贝少効涓尘太上皇帝陛下伏愿

翕受颂声横流福物齐踪邃古较尧舜以锱铢尚齿列僊笑乔松之呼吸

满散疏

天有三辰实纪虹流之庆山称万岁争驰鳌拚之情穷贝藏之秘文衍枫宸之曼壽太上皇帝陛下伏愿荣光旁烛福物来崇瞻金阙之殊祥鼎来戩谷受玉卮之缙礼永对懽謠

会庆节功德疏三

为天下君光啓蟬连之业祝圣人壽率同兽舞之欢?叩楚宫仰祈泰筴皇帝陛下伏愿毕辶百福丕冒八荒何必学仙求蓬萊安期之属自然享国过高宗祖甲之年

非烟非云腾神光而载夙如山如阜祈壽莢以同辞皇帝陛下伏愿莲相凝符贝編集福五帝足六已迈德於商周万岁者三更垂鴻於箕翼

皇乾眷命诞明主以中兴良月就盈增秘篇之上壽更凭宝?用祝遐齡皇帝陛下伏愿圣与天通福如川至五十而慕父母益重舜德之华八千以为春秋共献蒙园之颂

南华斋罗汉疏并序

绍兴二十年十二月一日舟泊?州梦至一古屋下忽街中水深没膝不可出遂登屋行数十步有编大竹为高墙随行人皆自彼下街予畏不敢进遂回复入屋下过一处如人书室有文书委地返顾尚有一介相随予将出户见随行者取文书已盈抱予恐其外有人令弃之既出户见堂屋下有数人坐於地以白轻纱为衣如深衣然柱间皆贴纸画人物予意其家有学画者既过堂前见数房内帐幕皆是墨画人物已过数间因驻足视之乃地狱罪人变相予方知是冥府复行入後廊下欲出无计因就地坐闭目诵佛觉有小介虫大如黑豆然缀粘衣上拂之不去忽闻人相笑声遂开目复行诸虫自落直後有横屋地形颇高最後檐际数尺见天如凿山作屋地者至彼见其上有一僧屋下有大穴数十予问僧求出僧指云入穴中闭目即可出矣予问既出以何为报僧云何以报为予再扣之即云只斋罗汉亦无所费予曰当作报谁僧云但言回施六亲眷属予入穴觉其中皆是沙努力以下颇如今之砌台不觉擦平处而寤

一梦入冥念欲归之无计六亲指路如已死而复苏净记当时之言?修开士之供因仍摄事荅谢愆期仰冀慈悲曲生欢喜

饶州岁会道場疏

南楚名邦盈鄺居之万室暮春良日崇赛具於羣神历甲子之一终繇戊辰之三会初心无怠大报益?扫宝刹以妥灵扣琳宫而徼福驱厉鬼兮山之左共祈奠枕之安祀盘庚於門之西那复济帷之患式修故事愿出余财

广州狱空道場疏

五羊都会抵重罪者居多三院空虚传昔年之未有仰真乘之庇护肃宝相以薰崇伏念此邦
濒於大海逐鱼盐於多桨易萌剽窃之谋杂蛮蛋於齐民常有鬪争之事诬是非於馱舌轻性
命於鸿毛某自佩郡章不留庭讼念草茭兽猕岂仁政之宜为然莠养禾伤即奸渠之浸长每
原情而用法不任意以逞刑仰体好生敢令瘐死政非成於五月狱偶无於一人爰启?筵广搜
贝藏拔沈冤於既往严净福以无边伏愿慧剑解剖於恶纏法炬开明於善地慈悲所化永无
犍佩之羣远迤可封不必鼠墉之听

广州狱空道場疏

遐萌丕变浸消囂讼之风幽圉屡空悉自法云之护适当开岁爰启?筵伏念某典郡於斯隩冬
已再访游禽於絶涧每戒深文鞠茂草於圜扉洵臻善効尚虞桁摺之下或有檻牢之冤仰赖
慈悲为之洗涤伏愿刑章益措无重罪之繫囚慧力无边跻斯民於壽域

广州祷晴疏

田畴将获既屡苦於愁霖鄽市无聊亦难营於饱食爰哀净侣仰扣上灵伏愿阴隲下民导迎
善气积霾解駁无翻手以为云圆象清明遂举头而见日

谢晴疏

沈阴弗解实怀苦雨之忧慧力无边遂启清阳之祷方鑪烟之上达已氛暄之四除恩则甚深
报於何有更祈慈覆益庇含生

谢雪疏

五日为期即获同云之庆千岩俱白载瞻积雪之祥稽首陈词斋心拜况尚邀帝力终佑民编

祷晴疏

田家作苦惧雨势之伤麤蚕事既登待日华而收茧惟霖淫之未已辄斋洗而有祈伏望渊鉴
弗违积阴丕变副此下民之望赐之旬日之阳庶无偃仆之秀岐可以纵横於巧织

谢晴疏

翻手为云致织妇耕男之愁叹举头见日快牛童马走之清明岂凉德之能然顾彫恩而何报
更期时若以及秋成

谢雨疏

踰旬不雨正怀旱暵之忧卜日叩阍即获云霓之应连縣甘霖沾足多田吏逃失职之愆农有逢年之喜恩将何报言不能宣天且不违愿终十雨五风之惠人之所欲庶底千仓万箱之收

祷雪疏

岁聿云暮未瞻积雪之祥天且弗违愿赐同云之庆爰趋丹宇参露赤情冀三白之应时免大陵之作沴

设厅请观音祷晴疏

一秋常雨既屡控於祷祈千手大悲岂不怜其饥谨念多稼已伤而无几顾来麤未播而可忧倪霪霖之弗休将流亡而莫救敢迎妙相来憩黄堂愿广布於法云即尽驱於沴气庶使提封之衆免沦草野之凶

谢晴疏

叩莲宫而祷请?奉紺容扫棠舍以庄严敬披丹悃惟回天之有力能出日以开明解四境之怨咨副九衢之瞻仰慧光所烛愿长运於慈悲遗秉可除庶少扶於冻馁

水陆疏

千灯之丛一室不异一灯一月之照千江便成千月物理如是佛法固然伏念荆门顷遭戾会或家屠於剧盜或命絕於凶年或析骸於竈觚鼎耳之旁或蹠血於车轮马足之下豚无掩豆若敖氏之鬼长饥瓜不表犀冥漠君之冢何在既沈魂之未拔宜和气之弗充凡此遗民殆非平日竹篱茆舍常濫炤之相惊白叟黄童亦四时之有疾欲求不尽之福乃肃无遮之筵伏望一切虚空四维上下广大云之法荫同作证明变甘露之珍羞率令饱满一郡得沾於乐果三涂永脱於迷津仰冀觉慈曲垂洞鉴

芝山水陆疏

买山作圃虽久閱於岁时画地种花已粗成於畦迳念开鋤於积土或伤犯於遗骸常怀不忍之心兹肃无遮之会伏愿慧炬烛於潜壤法云登彼沈魂使之捐蓬颗之居往生乐国於此饱伊蒲之饌早脱迷津

金台开堂疏

新会乃五羊壮县金台有诸佛道場须得当人式杨正法某人解第一义续无尽灯道既心传

何惜逢場作戏机能口伐未尝把缆放舡而今踢倒净瓶休要横担拄杖请升猊座为证龙华

仁王请长老疏

举拂白槌须是棒头有眼寻枝摘叶尽皆雪上加霜惟仁刹之道場乃羊城之净社当求觉者为阐宗风某人末法津梁丛林耆杰迅机激电一喝可以接人挈行传灯三关端的继祖愿携鋤斧坐断禅牀莫辞辛苦远来要看斩新拈出

请西竺长老疏

西竺近作名蓝财去城一牛鸣外南方希有道眼谁进步百尺竿头丈室既虚真源曷振某人能判公案见许作家远游寂寞之滨全无?苴之习几年飞锡真个得鱼忘筌今日拈槌定不向空钉橛愿闻一喝为破羣迷

云封长老开堂疏

斩丁截铁须还本分钳鎚摘叶拈花不脱前来窠臼欲宣妙旨允属当人长老道价甚高丛林所许彻开关捩笑他钝鸟栖芦不坠宗风真个泥牛吼月此百粤践蛇之境界乃六祖覆鉢之道場肯随岭上之云为指庭前之栢要看横说豎说见得奇哉妙哉

代为母还水陆疏

佛起慈悲之心随缘必应人有呻吟之苦修善或除徼十方贤圣之灵设三界冥阳之会伏念母氏尝萦疾疢浸閱冬春三折肱而和为医曾弗逢於良药一举足而不忘母爱有祷於宝坊赖正觉之开顏致沈疴之去体是修净供不违本心伏望一切空虚四维上下瞻十地坐莲之相三乘皆具大乘闻五天译贝之文一食为无量食咸生欢喜为作证明所愿福德川增灾殃冰释数口保团栾之乐四时消坎坷之忧

代为妻还水陆疏

居色界无色界之中爱纏未脱惟法声非法声所暨善报相随尝祈大力之尊愿肃无遮之会已叨慈荫敢替前言某昨以妻某氏欲火所然业山弗坦惟四大假合之妄未悟空花而十月满足之时且临坐草不赖诸佛菩萨孰悯一切衆生辄申合爪之私遂获免身之吉偶微官之奔走致净供之愆违伏望三界冥阳四维上下来饱毗阳之饭同作证明预闻优鉢之香悉皆清静所愿分光慧炬蒙庇法云涤曩夙之过邮崇来今之福利如是因如是缘如是果俾无六甲之虞归依佛归依法归依僧更迓一丁之喜

荐张正甫疏

萍蓬无定共嗟旅食之穷人琴俱亡忽见佳城之闭仰凭佛力少助冥途伏愿洗涤宿尘除恶
纏之烦恼济登彼岸瞻宝相之光明

荐亡?赵氏疏

平生蘊德内外无有间言一旦遡幽俛仰已成陈迹追色辞而结想仗?呗以泄哀伏惟出帝王
之後而不习骄奢擅闺房之秀而能闲礼法独居八载不践二廷披宝荚而晨课有常受秘籙
而斋居甚确世味真同嚼蜡道心可谓斩丁故能一弹指间不觉三寸气断六姻无不相吊七
日又复如驰伏愿慈荫云深恶纏冰泮如露如电如梦幻夙悟斯言大雄大力大慈悲为跻彼
岸

荐赵监庙疏

相随曩日夙期事业之成一诀终天孰谓死生之隔供桑门之净侣演贝叶之妙文有赖慈悲
为崇福德某人襟灵开豁论议该通奥篇远探於羲农健笔仰师於韩柳出名家而延赏旧矣
奉祠逢近属之来归释然让爵喜愠不形於色得丧莫累其心人之难能世所推重暨参佛祖
顿悟禅宗地水火风了觉此身之妄梦幻泡影豁超是观之空念再世之契深在诸亲而情厚
忽闻音讣采切哀惊不胜悲悼之私少仗庄严之助伏愿济慈航於彼岸分法炬之余光善纏
恶纏烦恼纏悉皆解脱我相人相衆生相益契真如

祖母周祥疏

日薄西山已怆含饴之远律中南吕俄臻升谷之新顾葑制之云终想慈顏而如在惟是一心
之痛不胜五体之投仰慧炬以无边庶冥途而有助伏愿幻尘席卷福海航安诸如来舌相广
长遍覆色界无色界善女人耳根清净常闻法声非法声

祖母忌辰疏

望断新阡阻一官於千里悲纏讳日惊再见於三秋虽合爪以有祈曾含饴之莫报伏愿【同
前疏】

祖父远忌疏

幻心未灭孰知空果之非祖武是绳久痛灵根之殒适临讳日采切哀惊伏愿法雨沾濡迷云
开豁寻光见佛既不入於稠林如渡得舡遂即登於彼岸

亡妣忌辰疏

职叨丞郡记弧矢於初生养缺循陔痛杯圈而罔极适际傖幽之日不胜追远之情伏愿借润

智渊分光慧炬或因六十二见而造罪障尽得断除不於三四五佛而种善根遂生安稳

宁海荐亡妣疏

生我劬劳适至垂弧之地思其居处不胜吹棘之情痛三釜以莫伸瞻六牙而有祷伏愿慧灯分照法鼓闻音清净诸尘起蘊麝名香之想济登彼岸生莲花宝座之中

枢弟水陆疏

人生如寄兴哀常棣之诗法力无边邀福菩提之路肃三界冥阳之会伸百年兄弟之情亡弟大资享壽不及六旬邈幽已临三七平生举措或有误於斯心厚夜沈沦恐未登於彼岸痛深同产诚叩大慈净供无遮共饱毗耶之饭恶纏悉解愿归兜率之宫

诸子为母氏水陆疏

吹棘凯风痛益深於七子伤心素鞶礼遽浹於三年永惟罔极之恩?卜无遮之供亡妣顷婴未疾奄弃浮生曜魄如驰惊再升於新谷杯圈徒在怆久废於长筵哀戚有终劬劳曷报虽平生之积善恐人世之多愆致尚滯於迷津或未登於彼岸设三界冥阳之会徼四维上下之灵愿赐慈悲曲垂揅拔法云敷荫尽解脱於恶纏慧炬分光即往生於乐国

盘洲文集卷七十

卷七十一

钦定四库全书

盘洲文集卷七十一

宋 洪适 撰

祝文

台州谒先圣文

昔先圣之门以政事居文学科之右盖能推惠浹民与区区镂章雕句者端有间然某缀第词林进污羣玉之府便亲露请来贰此邦而初试民政日夜惟念未能深烛厥理然罄心究精问可省否不敢少负所学効职之始是申祇告惟先圣鉴之

谒诸庙文

郡丞所以贰守一圻之事实关掌焉某备数道山私请得外以来为是邦之佐虽心乎斯民不敢有负而初试从政大惧莫克逃责佩章之初是用澡思控诚以祇见於祠下惟神尚佑之

造阁告土地文

昔下邳赵兴每至官舍必移穿改筑故犯妖禁而爵禄益丰汉史书之某附赘郡贰公宇仍幕寮之旧陋冗叵居独东偏有地掌许因芟薙榛莽作小阁焉暇日可以放目远览复废蔬畦以植杂花而疏池其间以冀纵步徜徉之适阴阳家或以拘忌为言而延袤无几不可避屯取休大惧畚筑之非获戾於上下神祇是敢援赵兴之事以请惟聪鉴其宽赏之

辞先圣文

某未更州县条章弗之习再岁任职诵所闻不敢念其私偶逃吏议而去不敢不告

辞诸庙文

某佐州再岁於公无抄忽之补而一身免疾且不以罪斥得偕妇息问昔涂以归神之惠我亦私矣更书有期陈酒拜祝

祷苍山神文

昔王阳不度印嶰九折之阪遂成孝子之名某以父远谪亟欲归侍避天台数驿之迂冒苍山万仞之险事与昔殊心乎其亲则同也问涂未几仍日之雨如注瞻空默祈赖神之灵屏翳夕休溪杀其涨故朝得以涉进而止於兹山之麓而云雾屯冪不见巔岫天光韬而未登念鸟道嶄絕旁临邃壑或雨兴於上淖艰於下尽室百有余指将必有僨越之患惟神兴哀终此大德

谢鬲湖神文

家累千金不垂堂坐国有六职实禁川游故冯河而死者兹谓轻生而近墙不立者然後知命比浮一苇遽絕重湖中流而遇风波虽噬脐之无及明神能出云雨庶稽顙以能通爰瀆龙顏冀安鯨浪果获监观之助遂无沦溺之虞平昔明心谓鲁连之可蹈从今束手与范蠡以相忘瞻覆辙之在前乘扁舟而知惧非因噎为之废食盖吹藿所以惩羹敢寻前言辄邀灵驾物云不腆効祭兽之报焉意则无它异操豚而祝者

祈晴文【已下二十七首系代广帅作】

凜秋将半愁霖弗休穉者怀忧居者告病奔走丐祝岂无明灵惟神之尊大庥此土愿借威力一扫阴氛时阳舒光更得追责罄折祠下惟神临之

谢晴文

下潦上雾积旬弗已民以为戚吏职其忧惟神聪明歆荅如响鑪烟方布氛噎已清坐致讴吟一变穷惨神功如此岂望报乎洞酌揭?以谢灵祝

祭勾芒神文

天子命我尽牧南海之民农人告予将有西畴之事念铜虎谨班春之职出土牛示嗣岁之期敢恭明神以庇此土俾曰雨曰阳之若致如梁如茨之收

祭风师文

大块噫气扇物功溥入律之初祀事适举五日应期无盲无颺

祭南岳庙文

暮春三月有司率故事并走於羣祠惟帝之灵放於四海粤分实有别宫焉庶几邀福使瘴疠熄灭雨风节调民获宁壹而更有以救过惟帝其鉴临之

祭南海神庙广利王文

诸侯祭其封内名山大川古制也惟神筑宫专祠实尸南海之戚休民之奉事?不敢怠暮春之吉祀有常典庶几邀神之福使瘴疠熄灭雨风节调民以佚居吏得以捄过惟神其听之

祭十贤文

惟公咸以抗节之旧流德南纪吏民奉祀久而益?则公之所以庥於此土虽千百年犹昔日也春律之季祠以徼福

祭王中令文

某自广易闽道出曲江谒文献张公经祠而我外王大父列祀西室盖公敛惠斯土虽数十百年烝尝之礼不替某获分余荫而幼失所恃棘风寒泉之思无一日忘也今瞻印像貌怆然有感念瓦缺壁穿丹青彫剥遂以私钱委邑官葺饰因陈牲酒之荐惟公其鉴之

祷南海神庙文

大凡一封之内神受命於天吏受命於君以分幽明之柄其责等也某材智无长滥受牧民之寄夙夜自厉靡敢留事今历三时矣独是盗贼未能灭心累化盖此邦岸大海扁舟出没易於反掌习俗相煽轻死抵法化之弗销而刑之弗惩也是用斋洗露诚乞灵於神惟神之灵大福此土庶赖威力潜变愚民使之懊悔自新不复为多?大櫨之计山行海宿如出坦涂吏责既逃而神之更生斯民施则甚博

祭勾芒神文

三载鞭春宁复一牛之爱羣心望岁甫兴九扈之期徼於明神监此洞酌愿相卖刀之俗益侈求箱之储

祷南海神文

岭之东雨阳不时炎凉倏变烟岚四起中之则病故远官者以瘴疠为忧某奉藩於此鞅掌簿书夙兴暮休不无劳瘁冲冒之患而尽室数百指起居饮食安能自适厥中念非明神默相则何以弭灾得吉今躬谒祠下是用私有祷焉庶几仰借威灵之护使一门长穰无呼医问药之事异时秩满咸遂安归则皆神之赐也沥恳控诚神其鉴听

秋祭诸庙文

秋灰斯飞季月琯兮人无札瘥嘿呻叹兮可以卒岁污邪满兮匪灵之佑曷臻此兮鸣□拊鼓崇报事兮物云不腆酒则旨兮春秋兰菊芳芬继兮不嘏以笑灵既来兮永庇我民祓去哉兮

禡牙文

维年月日具官以牲酒之洁祭於军牙之神国家仁民偃革不用边亭十载无战鼓声有蠢叛鲸啸於章贡凭陵城郭假息扇凶某把麾东广实摠师衆皇帝有命发兵循潮往扞岭阨用固吾圉缮甲磨剑前茅有行典有禡祭不敢不?勾神之佑覆其妖巢不烦接刃螳斧自衄无使逋诛貽耻於神急急如律令

祭南海庙文

昔?獠啸凶长驱数郡锋摩番禺藉神之威不能摇毒遂衅钟鼓而斯民免蹀血之患纶函宠封以荅阴相岭以南户知之惟神之灵放於四海岂限彼疆此界哉今章贡叛黥婴城连三月矣生齿何辜沦胥涂炭天戈云集未奏肤功岂神能摧孽獠於前而不能殪魁渠於今也施明灵以助王师左翦右屠毋俾假息隣封洗兵则吾之境内益奠枕矣

祭勾芒神文

迓木官之御序告耕耘既饬之期出土偶以挥鞭无穀觫可怜之状揭?邀佑望岁祈丰鉴斯蒞藻之微赐以余粮之喜

荅祭飓风文

往岁季秋飓风三作发屋拔木濒海诸郡皆病之乃季秋月朔有赤青气见於东方人指以为飓母越九日乙未箕伯煽怒济以疾雨蓬勃之势张甚惟前事之可虑也因斋心有祷赖神之力曾不崇朝雨斩风回害弗及物沥酒以谢吏其敢後

奉安天王文

在天宝时神能出威灵有功於西域始诏天下策祠高墉今五羊缮治城堞念像设晦昧是加粉饰及其毕功沥酒以告惟神永庇我民以扞外侮

春飧诸庙文

春律之杪农事繁兴馨醑沥肠格神乞灵时雨时阳无灾风潦瘴疠消殄五谷既好神其赐之指期以报

祷东庙文

某洊岁牧人赖神之力谷稼胥熟枹鼓稀鸣得以捋过而瘴疠不作民乐其生往者顛黥狐鸣尝有祷焉果得阴相奸鉄權毒大庾以南无遁逃蹂躪之患某今去终更财八旬浹说者谓闰

岁多瘴敢邀终惠使尽室数百指及期安归仰沥丹款惟鉴听之

立夏东庙祝文

每岁立夏守臣承天子命有事於庙今祝册及期不至窃意章贡道梗奉之者或有失坠不敢废常乏祀躬以牺币致告俟册至当嗣走祠所惟神鉴临之

秋飧诸庙文

秋箭且尽凡封内血食之祠有司弥祀之所以为民効西成之报也惟神庇之至於今矣说者谓逢闰必瘴念茆黄惟时不可不虑敢因报有祷俾无菑无害左餐右粥优游衣褐则神之加惠我民有终矣

奉安南海王文

惟神以聪明正直庇南海之民凡有疾病忧戚靡不奔走邀佑城之南有别宫焉比因缮堞鼎新祠房而像设昏剥遂加崇饰练日之良妥灵荐馨惟神有灵永福斯土

奉安十贤文

予城东北隅有屋数楹列晋唐刺史十人之像皆有清节善政可以矜式後來宜世世血食无愧偶因飓风瓦飞栋折非甘棠勿翦之意既新雉堞遂葺祠宇饰像设以吉日具牲酒再拜妥灵惟神视今如昔永庇我民使踵後尘者无旷职之责则所以报事益?矣

奉安土地文

惟神有祠於守居之西实司此土而血其食久矣仍年以来楹桷漏罅风雨不除图像?昧弗称祭荐【缺】日吉陈牲酒以告神其临之

谢舶船风便文

大贾乘巨舸往来蛟龙沧溟之中一瞬千里风稍失便则沦溺破碎不可救非神相之安能布帆无恙今也归橈泊步人免鱼腹之患而珍宝襍裘所以富国甚腆则报可忘乎酒旨牲硕惟委鉴焉

广州辞庙文

某备官番禺行足三?赖神之佑岁穰盗化使縣薄得逃大呵而私室衆累不嬰茆黄草青之疾今天子不以为不材复使治闽问涂有期陈牲酒以谢惟神终惠之

辞南海神文

某司南粤之印自秋涉春者三神职其幽某职其明非神福之则安能岁登盗革讼希事理使得追谴呵之域其私则数百指之累老者康少者遂所谓茆黄草青之瘴絕不复染今天子不以某菲薄材下复使司东粤之印戒行有日罄折谢颺尚期长途终此阴相

荆门谒先圣文

某诵圣人之书垂四十年游宦之日居其半谗巧陞厄一纪家食始得临民於一障不敢以远且小而忽之也班禄之初敢不祇告

谒庙文

某弩猥无取冒恩典城实与神分幽明之柄其不能抚摩凋伤而徇已之私神当降之罚至若时雨阳弭疾病神不可以不助之也

祈雪文

涉冬少寒天且不雨非时雪以镇之则开岁必有疠疫之患方卜日致祈已如响荅固尝示缤纷之兆矣罄折以祷神其听之

谢雪文

荆门不见雪距今四岁一祷而三日再白神之为赐大矣馨醯沥肠何足言报

祭勾芒神文

推天驷以观祥不愆举目出土牛而首事何惜碎身率属乞灵为年祈谷愿鉴污邪之祝使歌华黍之诗

祈晴文

雨自暮春至今或歇或作三其月矣农虽得麦而不能暴蚕出也使腐为飞蛾是与不赐之收等耳神歆此土其能忍而不恤之耶

祭武安关王文

某结髮读史固已仰王之忠烈矣玉泉穷山而精爽不鄙之至於今血食岳降之日远迩奔走犹生之年某贫不择禄水陆之涂三千里而至此此外有官事之责内有长穉疾病之虑引领企

踵而心已驰於彭蠡之阳矣印绂所绊不得进拜祠下敢具卮酒以荐惟王其右之

徽州谒庙文

某奉天子命易守兹土佩印之三日踵故谒於祠下神当时其雨阳消除水火盗贼疫疠之事以陰相於上私而不公神则殛之

祈晴文

麦秋矣雨不止则穉卧而损其收也蚕簇矣日不出则蛾将飞而茧无以暴也歉岁之後俟来麤以捄而红女徒劳将无丝可贸也二者垂成神不终惠何以彰庙食之灵也吏闻惟腥可罚可斥而民不可以不畀矜也

谢晴文

某以雨害蚕谷乃甲寅迟明奔走乞晴登车之始雨足未断谒祠而返人已彻盖不旋踵清风起於东北扫除重陰化蒸溽而清凉青天白日衆所瞻仰吏则不德何以感召惟神有大威灵曰阳而阳如反覆手卮酒一肉何足拜况

谢雨文

歛在羣山中厥土燥乾水不可瀦六七月之间十日不雨则闵闵然有无年之忧越五月乙巳云霓不作禾已秀亡以趋泽方斋心沥辞将以癸亥拜手祠下乃壬戌之昼骤雨相仍黎明复有沛然之赐肥瘠沾足人用欣然神有彫恩何以言报

祈雪文

三冬屡有雪意或云同而解或霰集而止或雨过而霁去春不再旬若终无六出之祥则民必有疠疾吏不敢嘿斋心乞怜惟神其相之

辞庙文

某仓台旬岁秋毫无补兹蒙误恩擢之郎位且总军赋於京口启行有期拜祝而去

镇江谒庙文

某从事笔墨心计濶疎猥蒙误渥督饷京口数道出兵馈饷艰梗乏兴之罪惧不可逃仰祈阴相以济国事?职之始敢不告?

奉安土地文

惟神职兹土旧矣庙宇下窄祷赛弗蠲吏卒哀财一新楹桷偶有土木之役因尽彻旁屋稍迁爽垲得日妥灵敢荐薄具

辞庙文

某给饷二年偶逃大谴天书横及俾归班列具舟将行拜祝於庙

绍兴谒文宣王庙文

某罢政还里方省愆咎误恩遽及来守稽山涖篆之初敢以敬告

谒诸庙文

某受命守藩涓辰涖篆仰邀阴相敬荐清觞

祷庙文

东储有疾天子是忧并走灵祠式祈阴相有司奉命即日投诚愿垂拥佑之慈遂迈康宁之福

诸庙祈晴文

闰秋灵雨殆且盈旬矣多稼垂成而坏之岂不重可忧也神之血食於此久矣其忍不救之耶变阴为晴易於反掌奔走乞灵惟神其听焉

再祈晴文

揆辰?祷仅逢数日之晴改月连阴复苦半旬之雨天时若此岁事奈何敢逃再瀆之非期救一方之患

谢晴文

七八月之间旱盖为常岁之忧五六日至於旬连有愁霖之害尝控诚祷遂开积阴愿终赐於鉴临俾无伤於刈获

辞庙文

某守越踰年旷官是惧上章引疾拜命奉祠言归有期沥觞以谢

盘洲文集卷七十一

卷七十二

钦定四库全书

盘州文集卷七十二

宋 洪适 撰

祭文一

祭钱仲文

公之种学朝夷夕耘罗书数万比栢差鳞日游其间撷芳茹芬发为词章凤髓龙筋律古作者刊落腐陈輿台郊岛甲乙渊云一第愿公逸翮弗振黑头挂冠莹莫可尘结庐岩阿松菊称宾我辱葭莩寓我桑粉外堂请疑倒廩倾困浦思山哀倡玉赓珉公不我鄙再三沐薰春榭秋畦一笑同醺雄辩剧谈舌本津津我官中都别袂始分公游天台率岁之春返旆过我缱绻情亲我归江东叹兴参辰声翼再来新诗逾勤复命未几哀讣已云悲哽填膺雨泣缤纷耳言具在手墨方新如何一诀兰销芝?千里飞觴侑以斯文

祭熊承议文

惟公德?金昭玉温相狎竹素言涉其津芳芬清埃籍藉榆粉含徽韬曜非此其身幸哉有子得隳金门赞治名城擢象夸银起家甚休荣章逮亲文阶六进式峻朝绅循陔自南彼兰之芬我贅别乘公行丈人承颜一再谈绪相欣天乎嗇年奄忽徂泯枳棘荐肌此情楚辛有醴既旨有饌既陈魂兮其来是将有闻

祭亡姑文

往者伯祖官会稽姑沦末疾年方笄宁川有兄枳棘栖藁葬萧寺久不治犹子监郡行县时一觴来奠垂涕洟仲氏使节闽川持归骨故里终可期魂之来?其有知

祭董莘伯文

挽髮识面忘形定交寓君梓里尺五诛茅徒步造门握手适郊有唱必和轴膺牛腰女弟择配占吉凤爻缔好申盟投漆以胶我归故乡判袂神臯君官隣郡徘徊贼巢仰事大官心降尻高自我不见霜枫五飘书札方翮忽寻里蒿失我好友抚膺号咷呜呼哀哉君之嗜学如食而饕君之骋辞轨则风骚植性和粹志操昂霄谓宜六轡驰鹜天朝近不得年美木先凋藐尔孤女无子承祧天则不仁直士蒙妖雅雅语言嶷嶷风标想像平生别酒以刀呜呼哀哉隔山河兮迢遥望殡宫兮寂寥酒欲奠兮弗亲魂之去兮来招

祭王侍郎文

遥遥华胄太原之王代有贤牧流芬五羊若琨在齐僧孺在梁镇之在宋方庆在唐并载清德如冰而霜我公是似奕叶相望铜虎其符金犀其章鸡始鸣矣公坐黄堂粤俗苟且吏具无纲训狙警鼯束马辔纆奉牍序进流汗怖惶遐萌蜚户狃习犷强绳以周索烛察隐藏灭心累化善者相庆夙寇多桨出洲入洋草薶禽猕商有肖航官府丕变中原之乡豆区釜锤一其概量缙黄宣淫此偶归良冥漠旅骸相从高冈盲风怪雨昔害今祥卓然治行趣赳龚黄谓宜赐玺归鹄鹭行太岁在己岂事之常仁人必壽冤哉彼苍某姻连之旧来踵门墙自公之疾视剂披方同戚宾僚从容诸郎穷夕不寐冀公小康吁不胥祉弗际扁仓温温初言表露肺肠今不闻矣心焉遇鉞缩酒泄哀魂其来尝

祭王侍郎文【为大人作】

往在政和伯父执宪公缔华姻弛担授馆我於是时盖倾初面其後尊荣揽辔王畿屈大丈人博奕同嬉公於是时数会鲜离泊我出疆金陵话别半世来归公持使节迎我过我慰藉契濶我谪真阳公休豫章舣楫河壖閱世炎凉公来问疾不改故常扶胥之镇控蛮辑蜚帝私远人起公来殿孰谓此生握手再见纷纷世道反面革心交亲落弃恨其未深不有君子寂寥义襟两年相距道羸十舍水湊陆来憧憧日夜咸曰南伯无如此者小大斩斩遵矩守章宿奸蒐慝有剗无藏鲸波馘盗鷁首丛商佛宫沈沈立祠以绘天书当来惧失所赖鬼憎刚方委魄荒外公昔唁我我今吊公死者丘首生者涂穷清酒一恸瘴氛改容

为大人祭家叔文

半世漠北声问中睽王畿再见使节喜持共居里社娱慰相得永日一桮佳时五白我落炎方君归自闽谓宜翔迅尚?吾门吾门微矣天铄长翮末疾不起九原永隔海中一沕今散昔浮惟君了了超然孰俦改辕末期棺不得抚寓哀陈觴老泪飞雨

祭王侍郎文【为景杨作】

台岭之南獠蜚裸处汉氏初郡风移椎踞五管今二广为天府瀛波拍天大?之渊民狙素习犷不可镌奇货街艘彼贪者泉清朝得人方庆之後象轴锦池褒纶温厚我公闻命北面拜手人曰我公盍官中都此瘴疠乡非人所居公曰不然异天地乎维舟泝潏輿轿隄岭即浮曲江猿狖之境它人怖畏公一不省开府佩章有芾其棠事纷如蝟窥罅抉藏治如京辅不陋其荒孰为官非阁法遵例孰为吏非偷堕委靡孰为民非怙强使气孰害於教僧有畴匹孰逋於盜囊橐巨室孰弄於市衡斗不一曾未一年刮剗羣弊耄嬰加额曰见之未野鸟啸凶昊天降厉呜呼哀哉某高门自出又奉良姻盛德未报远讐忽闻约束行李前轺灵輶慈亲生疡夙莫尝药天难是丁志负曩昨抚膺长恸寓此洞酌

家叔起灵祭文

竹林就荒今十旬兮升堂开卷閭无闻兮尘留玉麈蔽蒲茵兮引脰诉天冤告人兮黄墟阴阴
宫既新兮翩其丹旒遡良辰兮泪落入尊格归魂兮

又代叔祭文

灵呈呈兮含幽叶吟吟兮输愁与灵整兮将驾指潜阍兮高丘蹇难忘兮语言掩韦编兮泪流
酒在尊兮命酌魂其来兮母游

又代嫂祭文

呜呼夫家则叔戚党惟私嗟悲风之殒烛目六印以无期聆弱女之嚶嚶泣相对乎孤嫠狐兔
将与为隣永不返夫故栖驻素骖而进酒尚髣髴其中之

又代弟祭文

霜风掠掠吹我高原有寒者鹄铄其长翼茂松之下维彼灵丘卜云其臧祖载有日寤寐平生
丛悲中肠旨酒是陈灵其歆止

祭赵安人文

惟灵婉婉高门德称柔嘉作俪宗英采苹涧涯事请壽姑兰献其葩谓宜秀眉服荣六珈忽兮
即冥画櫟以沙痛摧孝女慈感童牙呜呼哀哉某等同僚君子好或通家讲闻壺范承讞兴嗟
沃觴祭幄匪物之华

祭从祖弟景杨文

呜呼景杨君旅食而枕疾兮不克谒医而问砭竟委骨於他邦兮櫟莫凭而视斂复远葬於异
县兮阻临穴而送?企双表而寄心兮酸搅肠而中慊我方哭季父於往秋兮君又遡三泉而奄
奄曰吉人必有後兮何斯言之不验百年其犹一梦兮君曾不比夫伸欠呜呼怀君坚白之辯
雄兮与呼卢之气贍较牙籤之寡多兮证金根而抱槩仪得縑以底信兮厉白圭使磨玷挹快
阁之夜光兮涉家园之春艳酌我以琉璃之钟兮琥珀注而甚醑或泛鷁於兰汀兮或闻鸡於
茆店乘小驷而炎驰兮汗浆流於僮僮我策蹇以殿後兮衣纷披而巾垫蹶羽人之木路兮閤
樵夫而席占杂诙谐与譔诮兮儻顔间之潏潏已矣乎俯仰皆陈迹兮空?然而结念惟君百怀
之弗展兮燎方扬而息焰若椅桐未材而枯摧兮六博中道而堕塹期简吉以卜居兮筮则逆
而龟厌遂齎恨以过隙兮谁适墓而挂剑清泪写如铅水兮沃单盃而反玷

代难老祭景杨文

呜呼给事之後四子三孙各为草子旁无它昆我也不天庇叔之尊叔近下世弟复不存何知

奇祸萃汝一门莫莫盖高谁能叫阍知与不知填悲悼冤弟之秀发自比璵璠谓宜亢宗视鸿而轩云何折羽不脱丘樊念我与弟如亲在原交叹终鲜倡簏和埧惟仲之春我方北辕弟出钱我宿郊步园曾不逾时些无来魂仰空一恸声不可吞昔谋结庐共依毁垣我归召匠弟且祭璠图未乾墨耳犹在言不废同筑以奉堂萱弟有四男黄口之鵷经纪分忧俟其冠昏翩翩素旗往潜荒村灵有知乎来歆此樽

祭朱仲举文

昔岁入岭如故於新兰言可久草味同薰饫我连篇以玉易珉回车班荆销南浦魂曾不数月归全远闻今我来思瘴茆再春省念陈迹搅肠受辛呜呼哀哉濯濯英韵如孔翠珍白袍者纷勇倍气吞战艺京师再屈益振少寄一弟必驩二亲盈才怪壽匪今一人埋志孰从长吉元宾薄醪写哀尚何如云

祭梁侍郎文

赫赫东州人士冠冕有?梁宗鼎鼎通显自我宋兴接武鸣珂几人雁塔三冠甲科再世秉钧前参後何人门之懿藉甚荐绅高山乔岳栴杞盘根淑气所鍾代有伟人惟公之英相臣之子早据要津声落人耳龙飞白水遂执羈勒密依日月康侯昼锡时方外诤俾镇方面鸛义蜉结剗磻丕变帝念久外俾还中都少貳夏官将柄斗枢忽婴沈疴退卧漳滨十年问鑿养气颐神駟仆忽驰孰不惊闻呜呼哀哉惟公兰玉策翰墨勲久矣定交寅缘登门杯酒通家情同懿亲曾不披雾有负心曲寓文渍酒恨此蜷局

祭从兄难老文

呜呼自我还乡同兄之居朝言夕语繙弄琴书暇时杯酒奕博投壶杂以笑譌朋友之如自兄它徙恨不数见相过必欸不忍背面兄既卜筑仍复隣墙日赞鸠僦彼栋此梁曰有?梅封之後堂朱栏雕砌自以输香有舞有歌乐未渠央我来炎方钱我双港警北帆南别愁分两方春之季得冬日书盈纸谆谆询我归与曾不旬浹仆音忽至校得书时兄已下世天胡不仁天此良器卉衣孔单不能渍泪呜呼哀哉自大王父遂分两支夕拜之後别驾绣衣绣衣父子继踵九泉别驾早殒兄又不延三房孤嫠衰經参同行道感伤有此灾凶惟我连蹇官心已灰谓其接屋杖屨之陪羣从雕落孰相往来逝者之憾存者之哀数千里隔参辰则近病不问状敛不抚櫟銜此酸辛痛如受刃流闻卜兆石潭之阳尚期遄归以送窆藏嗟嗟难兄人琴俱忘

祭邓提举妻恭人文

稟生高门林下之秀鸣凤其昌移天协繇承姑竭孝纷悅夙兴春秋庙祀藻絜絜馨恭上接下间言斯寝淑行柔性宗姻所稔邑开汤沐荣对鱼轩谓宜鹤髮壽考百年岚熏雾染遂婴沈痼砭剂弗良奄至大故呜呼哀哉某寅缘宦侣通家给驩妻孥相从如至亲然自闻整装方惜远别忽焉降厉填此悲咽酒旨于觴食丰于豆再拜灵帟文以为侑

祭吕教授母夫人文

生於高族乍嫔儒門禮?巾栉職謹萃繁稱蘭比行有淑其德里社姻連指為壺則擇隣海子露
穎祠林望我莫府情好方深遂悲棘風奪其慈母式陳一觴莫盡淒楚

衆官祭邓恭人文

猗與夫人名儒之後典訓克閑女德之茂作俪君子見謂宜家言采其藻居約去奢事姑如母
逮下以慈鍾禮郝法克兼有之恭侔舉按賢過斷織顯顯壺彝聞者仰則載榮鸞誥未啓國封
天不與齡豈數之窮嗚呼哀哉某等借潤使台並列賓案獲聞懿範如古所載忽傳僣幽悼興
於心羅饌縮酒尚其來歆

路祭吕母文

嗚呼夫人有子未冠名馳須次芹水掇空蓮池論議卓詭文采陸離金蘭耐久情比塤箎以子
之賢知其母儀髮既剪栢圈已非吉士嬰罰僚朋集悲泛彼行舟次河之麋素旗翩翩遠哉
其歸取醴以載庶几中之

同寮祭吕母文

早服圖史之訓克恭萃藻之職鄉閭范其禮法宗族稱其慈和金社流光芝玉相映及見其長
策勲詞壇正伸三釜之養遽起蓼莪之悲某等定交賢息并游蓮府登堂之拜未遂就木之讞
已聞漬酒素帋悲不能止

路祭邓恭人文

質蕙兮行蘭禮容兮德音儵忽兮僣幽怨天兮斬年作嫔兮君子三歲兮使還端蓍兮探筮日
吉兮時涓靈衣兮塵翳總帳兮素筵美櫓兮問途寄舟兮江干薤歌兮鏘挽飛旒兮翩翩荐誠
兮有載莫盡兮悲酸

衆官路祭邓恭人文

風吹空兮寂寥幽云屯兮秋之朝睇前止兮霧擁搖敗黃兮瘴茆悲夫人兮四德俱卜嘉耦兮
名儒湯沐兮石窳榮華兮軒魚忽積疴兮弗痊惜不遭兮俞跗聞靈氛兮辰良橫主舟兮江隅
挽丹旒兮再拜顧薄醑兮生刍

祭罗权郡文

惟君有充然之學而發為絢然之文有粹然之德而見諸隱然之仁色不形於慍喜交無間於

故新研吏牒之靡密究下情而谆谆故人皆知其为嫺德君子而政见称於远方齐民惟平生之蹈景幸逾年之同寅偶旁郡之阙守择贤者而拊循当问途之话别见君意之悲辛谓金兰之分笃乃黯黯於临分何期婴此沈痼隔生死於斯辰惊讣音之闻耳泄哀涕之纷纷竟绊骥而弗展铢风翻於乘云望灵輶之戾止寓哀悰於一尊

衆官祭罗通判文

惟公萤牕种学足用三冬泚笔成文有作者风登名鴈塔腾誉儒林牛刀小试卓鲁销声遂驾星屏益密厥称远佐南海人仰盛德究心吏治何枉不直摄麾新昌少借循良遐萌相欣召父南阳仁者必壽孰询彼苍呜呼哀哉某等或以游官同君子寮或以道义结金石交弥年相从见谓倾盖河梁衔杯黯黯于迈期以数月拏舟相寻鵬集承尘遂聆讣音失此吉人谁不凄惻泄哀斯文有泪盈帛

祭韩权郡文

嗟嗟少汲韬负轶才学耕文获续美中台人避剧烦君曰我愿蚤炊外台声埃?显题治中輿绊骥未展摄麾端溪治如畿甸烛抉隐藏贪慳股弁慈父蜚謡吏具丕变暂临恩平饮惠胥贺天不仁远子鵬兆甌昔者桂林实始识君相示肺肝似兰斯薰谓宜振翮乘凌高云齎志盛年讣骇初闻厚终恤孤矢心古人斗酒则菲搅酸莫云

衆官祭韩权郡文

惟公有逾人之才见施於为政有汲古之学见许於伦等器利盘错牛无肯綮铢两藏奸免不可幸民手额而感惠吏重足而迁行故康恩两州之治独寡二於五岭问千里之长途庶啗?之一骋嗟秀木之摧风遡泉台之夕景呜呼哀哉某等金兰心叶胶漆情亲怀话言於畴曩狎杯酒之殷勤昔公之别渌波粼粼今以柩来瘴茆复春栖泪目睫文不槩悲再拜一酹公其中之

墓祭韩权郡文

儒采兮雅言分紫兮弥年彼苍兮殲良芝?兮蕙叹瞻召父兮杜母有善政兮差肩扬芳兮耀远传循吏兮不刊朱明兮换律瘴草兮荒烟寄遗骨兮南纪俟後人兮谋迁想平生兮凄哽渍薄酒兮潸然

又同寮祭文

呜呼尺波电谢今昔同悲嗟我吉人而止於斯遗爱在民棠芾四郡较德松铭方来传信有夜者台有潛者隧埋玉南荒执友揽涕魂兮归来歆此一醑

盘洲文集卷七十二

<集部,别集类,南宋建炎至德佑,盘洲文集>

卷七十三

钦定四库全书

盘洲文集卷七十三

宋 洪适 撰

祭文二

路祭胡提舶母文

商飈急兮飞尘榕阴阴兮昼昏寒泉之思兮孝子飞旛启兮悲哉夫人惟夫人兮以子贵叠紫
诰兮鸾回厥纸使节煌煌兮甘旨鹤髮壽眉兮含饴受祉忽嬰疾兮天降厉问琼茆兮既辰棹
櫂兮江湄喝松雾兮楚挽陈薄醑兮悲辛

衆官路祭文

惟灵训服图史职共萃繁嬖德君子礼法之闲笃生时英乘使者车鸡鸣问安有荣板輿龐眉
黄发人仰壽母忽兮染痼悲哉题湊秋云暮矣凄其以风灵輶呵涂指舟之中再拜一轂瘴氛
变容

祭梁尚书文

惟公有剗鯨理剧之才而彰於盘错有裕国富民之术而见诸施为主计文昌钱流地上摘伏
京兆道不拾遗出殿价藩章章善绩天夺懿德朝露易曦呜呼哀哉某诺仕之初得簪寮案猥
叨赏接轡其匱穷契阔东西白头如故未展豪芒之报惊闻雕落之音飞泪荐诚文不泄意

祭陈安抚父文

惟公隐曜含和里评冠月季祉贤嗣诗礼饱闻拾芥巍科扬声荣路皇华方伯鼎贵未央告第
出纶屡荣潜隧某效官东治双表是经乡之吉人遐想高躅况官侣之好情笃鲤庭岂只鸡之
词不如昔者磬折以荐灵其格思

祭黄提刑父文

惟公德比玉温铲采家食挺生哲嗣允蹈义方高折蟾枝飞声乌府三持使节仁匝炎州密印
之荣袞袞未艾某效官东粤道迓佳城乡之儒先钦想遗范矧鲤庭笃尝寮之好岂鸡酒嘿前
人之词荐此寸诚恨不躬酌

代祭张右相母夫人文

卓哉夫人天稟淑姿纷悦竭孝图史鸣徽媲德名门郝法鍾礼言采其苹湘之釜錡笃生真儒为天下霖忠高洗日望藹扞参义方有训幼与择邻欣欣栖中兹惟严君丞相在朝夫人西来皇帝异恩以駟骑催帝谓吾相思奉板輿邮籤奏邸日报起居为母之荣瞻前寡二鸾诰叠封貂冠虞侍燕及孙曾芝玉竞秀黄髮有诗如鲁壽母萱凋夜色兰罢晨馨天乎祸集闻者涕零素旗摇摇在湘之阴一束生刍千里驰心

祭程参政文

番水潏潏番山嵬嵬伟人辈出未光三台英英我公天荒始开五行一览七略兼该笔精墨妙穿月掀雷发名首科垂斗之魁颺顔前席仕无良媒高骧夷路汗跼駑駘乃立螭坳帝坟以裁乃上左掖比伦大哉乃侍经帙蘊抉秦灰乃拜夕闕疏入天回乃启北扉塲花听槐乃幹枢机庙谟是陪身退甚勇夸綉昼来婆娑家林如绿野裴岁在渊猷道变九垓天子改弦注想实材再三辞疾札书日催人参揆路妙运陶坯沛乎鱼壑匪夕盐梅士期栋隆博求楔楔人期儒效布武熙台云胡不懋美疾行灾?占子鵬历过黄能呜呼哀哉某等旅进词坛皆下下才拔三得二指珉作瑰绸繆光接且挽且推永怀评目有膺恩颺哀哀吾州耆旧凋摧又失钜公泰山之颓讵惊远迓謠辍提孩德容永隔芳躅尘埃饌登于俎醴陈于罍一恸三?辞不尽哀

祭熊运使文

呜呼天有间气上为列星揽其光芒人以文鸣濯濯我公番川之英手翻五车撑柱肠膺召泓进穎散绮敷琼旁观辟易三叹同声乃游木天乃仪冰厅雅宜为诰以续六经孰不拭眦看公鼓行彼柄国者浊乱渭泾庙荐康瓠周鼎非馨卷其黼黻光迸山扃鸡羣退步鹄侣寻盟雕鏤月露鞭逐风霆能人纪事孝子求铭作八分字走四裔名荒凉愚溪呼柳不膺申吊湘累专鄂之城才高数蹇参恨千龄药伤苏枯春在双旌毗歌于途闻者耳盈三绶若若封提旧京谓趋严召为公为卿恭惟乡耄扶翼後生饫以鼎膋私其旦评牵丝远来密倚澄清遽闻駟讵泪堕心惊辉沈词伯来者孰程短章大篇归之六丁滔滔汉水旄举舟轻三尺所阅一觞莫倾抽哀属札式寓寸诚

祭方金坛文

呜呼五羊襟期首末四年清尊列舞短韵大篇无欢不同无句不联非疾非夕不相弃捐情无猜隐如兄弟然分携八载小牋翩翩开春季月我宦畿内闻君旅食遥心晤对我方入郢君已言迈君知我来停舟返旆欣然一见岁寒不改我冗君还怅不欸会曾未再旬而棺已盖终天遂诀承顔弗再呜呼哀哉君有家学得之青箱君有远识论议轩昂区剖万事语塞在旁胸中泾渭余子参商平生友爱追随鴈行连佐幕府不游异方盘根未试鋌锋匱藏元昆换节君必阶归仕以此淹校考顿迟年过四十小选甫离得邑句金牛刀割鸡裴回一壑尚远瓜时天忽降戾疾不可医我亦肮脏同盟者希失此莫逆有过谁规骧首總帟曷日循题飞文矢哀泪若

纓縻持荐卮酒君其中之

祭镇江都统张少保文

呜呼边人猾夏燃脐自亡孰乘此机恢我故疆公提将符慷慨誓衆韬略家传胆有余勇胸山之围边骑云集疾驰援兵蒙犯暑湿大伊覘虚石□夺险神助积雨?者为塹鏖城之北如风扫叶还宁寘渠人畜相蹶追奔臯桥振旅旧屯不增卤获咸以实闻踰淮治堡勾归繼属假之岁月犁庭可卜得疾马上遂在膏肓将星夜陨谁不悲伤我总军须周旋连月促膝高谈壮怀激烈望公药喜何期永诀渍酒吊庐揽涕如屑

祭王枢密文

惟公挺挺英标鄱川之望穹木千寻擢秀青嶂洞然胸宇议论宏放高骞月窟为诸儒倡入判五花辞推哲匠出护坤维颐指百将再来禁琐帝呼辈行印绶若若挟三牵两遂登筹幄日吐忠说沛乎纵壑倚以为相黄能作厉邈魄潜壤宸衷震悼一监沦丧呜呼哀哉某夙讲清尘近接乡?宦路背驰参辰迢仰代匱掌制晚依翰长宾堦屡登契越畴曩问疾半旬宛其长往敬酌一觴莫展悲怆

衆从官祭王枢密文

惟公道苞坟索材冠伦魁轩然仪表籍甚清埃顷入帝城奋迹麟台东掖西垣燕许大才梦刀作牧馭叱卬嶰千龄胥契一节复来礼文野蔕议论天回起草玉堂号令风雷荣陟宥地光并三台硕画嘉谟丹宸虚怀倚以柄国舟楫盐梅忽婴沈痼梁坏山頽某等武接夔龙谈城屡陪洞见肝膈中无疑猜半旬不面逝水伤哉饌洁于俎酒登于罍瞻枢一恸文不写哀

祖庙焚黄祭文

某人品凡下无所取材蒙被德荫浸叨两地始入西枢得以恤典追贲祖庙某印组所拘无因躬至松楸之下谨以太子太傅黄告一通俾弟某上冢以告伏望垂光委祉益焘其後

祔庙焚黄祭文

某材智弩劣无以过人蒙被慈训叨窃儒科入朝侥幸浸跻臚仕三釜不伸每深痛慕始入翰苑继擢宥庭皆有蜜章增饰祔庙某印戟所縻不获躬至松楸之下谨以少师太师黄告二通俾弟某上冢以告

白茆焚黄祭文

某幼被慈教致叨儒科入朝踰年遂躡两地季夏之月以阶迁中奉继有北门西府之除再旬

之内三进国封恩渥重仍增贲幽壤重惟菽水之养莫报劬劳想象音容罔极增痛虽松楸不远而系官有守不得诣前谨以庆国魏国楚国夫人黄告三通遣男桴上冢以告

白茆焚黄文

某典枢辅政方惧满盈复拜误恩遂跻相位顾惟非据实自慈训禄养不伸罔极增痛圣代渥典洵赐恤章大国旧封益上新泽系官有守展慕无阶

彬州焚黄文

某资禀凡庸无足比数远籍慈荫浸窃官荣掌枢秉钧再膺恤典顾瞻松楸邈在他邦有子有孙弱不可遣展扫弗?有负显报

家庙祭考妣文

澹津之址基我先君南迁不返齎恨泉下布椽治础遗训在耳历载二十始遂肯堂之志会有稽山之命不克俟落成而去家庙居中实存手泽敬惟鉴佑孙曾保之

家庙祭祖考文

某罢政还乡始获卜筑以遂先志误恩遽及怀会稽之章就道有日不克俟落成而去新此楹础永荐觚鼎敬惟鉴知益焘其後

家庙告高曾祭文

澹津之基发自慈训前岁归里始获肯堂斤斧未休往镇禹会勾祠得请兹克奠居家庙处中式报遗荫永期燕妥益焘後人

故县焚黄文

某顷叨秉钧朝廷推教忠之泽以光祢庙始荒邾子之国去夏迈阶迁中奉复进淇澳之封暨逢郊禋遂徙大名之壤仰惟盛德焘後恤典便蕃而风木纏悲罔极何报兹因冬朔并举黄告三通燎於墓下

滏潭焚黄文

某往岁当轴去冬遇郊再沾恩荣以显祖武故祖考自亚傅而冠三孤祖妣自莒国而进卫国兹因展墓谨以黄告四通燎于祠下

金山焚黄文

某以庸常之材昨流光之庆往年当国再有恤典以责泉隧还乡未几迫於守越故三少之命未及燎黄兹因冬祭敢告於墓下仰惟明灵鉴此褒章

辛卯滌潭焚黄文【同景严】

国家恩厚辅弼虽去位遇郊犹得崇报於祖庙某等凭藉德荫饗此官荣双奉恤章获伸绳武之孝祖考繇帝保而跻帝傳祖妣则有大国之封冬朔扫冢敬以黄告三通焚于墓下惟灵其鉴之

故县焚黄文

某凭藉德泽奉祠佚居遇此郊禋庆延两世惟我显考位极帝师虽封国尚有秦壤而怨家之姓也不欲以污栗主之神故仍用旧邦复受新渥维冬之朔敬焚黄告仰惟明灵其鉴之

白茆焚黄祭文

恭惟母氏裂全魏之封今九年矣某沾被慈荫两以郊霈俱仍旧国再开新渥身滞远乡既不得展扫丘壠而燎燔黄告又不以时兹因男桴赴调入浙始得白於墓下泚笔擦泪惟灵其鉴之

祭余文特文

惟君粹然之质盎然之和结交四海白圭不磨少年逸气已凌虹霓仕路连蹇晚得一麾彼苍者天何者尼之甫出都城即以疾归一室八年药裹不离我治盘洲君好苔竹苍头手舆花下追逐蹒跚学步指拟亨复水阁一觴月亭一曲投醪耐久惟日不足信宿不面已飞子鵬情话盟寒佳城遂卜感伤陈迹泪若惊瀑

祭枢弟文

呜呼亲则手足义则友朋少小同志刻苦窗萤联中科目濶步蓬瀛继踵词禁遂陟枢衡自昔监郡始相契濶三十年中少会多别细数从容七十其月园池相望苔竹蒙密对酒赋诗曾无虚日建康之归恨君有疾日望药喜杖策可必天乎不仁鵬鸟入室铛脚情话今折其一悲苦填膺伤感陈迹酌此一觴泪若泉出

枢弟周祥祭文

呜呼终天之诀於今旬岁想象平生屡飞清泪风梗鵠原暮景憔悴倾此一觴悲在心髓

枢弟大葬祭文

呜呼生死之隔忽其三年追思友爱陈迹依然松桧成列日迫新阡灵輶将启丹旄翩翩陨泪
渍酒痛横九原

祭菜国葬事文

呜呼幽明路隔倏其三年尚想往昔鰥鱼自怜罗列刍灵将捐松阡攀车一酹泪如流泉

诸子

鳴鳩均一大哉母道棘心天天劬劳曷报日月交驰三食新稻泣血一觞魂飞宅兆

盘洲文集卷七十三

卷七十四

钦定四库全书

盘洲文集卷七十四

宋 洪适 撰

行状

先君述

先君讳某字光弼饶州人曾祖讳某祖讳某贈中大夫皇考讳某通直郎贈右大中大夫妣太硕人董氏先君登政和五年进士第主台州宁海簿会令去掇其事民旧苦市绢不均先君始令物力百千者赋一匹大姓王隆多买田不受税岁才五十匹至是数增三倍余以次定赋蠲贫弱者四千八百户李氏富而戇家藏妖书号二宗三际经时节集邻曲醺香火祀神元未尝习也奸人诡入伍中通其女既泄即告县逮送狱先君入食有小吏偶语喜甚诘之曰李氏辈赂钱五十万故喜先君曰是下狱属耳而赅吏若此可缓乎即呼囚庭下委曲问情得并告者平决之吏骇顾失色方腊反台之仙居民应之踪捕反党及旁县一日驱菜食者数百人至县丞尉皆曰可杀先君争不得丞尉用赏秩不踰年相继死皆见所杀为厉云拜南京国子博士未上贼犯杭州经制使陈公亨伯檄主饷奏功迁宣教郎为秀州司録事宣和六年秋大水田不没者什一流冗塞路仓府空虚无赈掇策先君白郡守以荒政自任悉籍境内粟留一年食发其余糴於城之四隅外损市直钱五戒米肆揭贾於青白旗上巡行无时扶其旗靡者皆无敢贵余不能自食者官主之立屋於东南两废寺十人一室男女异处防其淆伪涅黑字识其手东五之南三之负?樵汲有职民羸不可杖有侵牟鬪器者乱其手文逐之皆帖帖畏服借用所掌发运名钱钱且尽会浙东纲常平米斛四万过城下先君遣吏鎖津栅諭守使截留守噤不肯曰此御笔所起也罪死不赦先君曰民仰哺当至麦今腊犹未尽中道而止则如勿掇宁以一身易十万人命讫留之居亡何廉访使者王孝竭至郡曰平江哀号欣饥者旁午此独无有何也守具以对即延先君如两寺验视民肃然无出声孝竭曰吾尝行边军政不过是也违制抵罪得为君脱之且厚赏呼吏草奏先君曰免戾幸矣安所赏但食犹未足公能终惠复得二万石乃可孝竭以闻米如请而得至麦秋民相携以归前後所活九万五千余人州人既不死凶年先君出无不手加额呼为洪佛子累官朝散郎丁大中忧还乡奔丧太硕人年七十矣与弱孙在秀诸卒以城叛卤掠无一家免过门皆曰此洪佛子家也毋得入贼平先君还过临安时苗传刘正彦出逃未伏诛上将迁狩建康先君上疏言今内难甫平外敌方炽若轻至建康恐金人乘虚侵軼宜遣近臣先往经营庶事告办鸣銮未晚也时庙谟已定不能从既而悔之上问宰辅近谏移蹕者为谁今安在丞相张和公时知枢密院以对过秀邀先君至平江欲以为部使者招二凶适捷书至乃止将辞归和公曰吕丞相欲见君即遣直吏介谒俄有旨召见时方墨衰絰丞相脱巾服衣之既对上以国步艰难两宫远狩为忧先君极言天道好还强者当弱弱者当强此正春秋邲郢之役天其或者警晋训楚也所言反复当上意上曰卿议论

纵横熟於史传有专对之才朕方择使无以易卿先君以母老父丧恳辞不许擢徽猷阁待制迁五官假礼部尚书为奉使大金军前使令与宰执议国书先君欲有所易辅臣获其文不喜遂抑迁官告一日归别先君持太硕人拜且泣时长子适甫十三岁逖以下皆緇葆呱呱省别行路不能仰视先君弗子也淮甸贼蠭起兼淮南京东等路抚谕使俾李成以兵护至南京成乃方与耿坚围楚州以责其降敌为名实持叛心先君遣书抵成成曰汴涸虹有红巾非五千骑不可往军食绝不克惟命先君闻坚可撼陰遣说之曰君越数千里赴国家急山阳纵有罪当禀于朝今擅兵攻围名勤王实作贼尔坚意动遂强成敛兵先君行未至泗境谍云有迎骑介而来副龚璿曰事叵测虎口詎可入送兵亦不肯前先君不得已遂返即上疏言李成以朝廷不抚恤稽军饷有引衆纳命建康之语今靳赛据扬州薛庆据高邮万一三叛连衡何以待之方含垢养晦之时宜选辩士谕意优进官秩畀以京口纲运如晋明帝待王敦可也疏奏上遣合门宣赞舍人贺子仪抚谕成给米五万石令第将士名賙恩初先君戒所遣吏须疏从中出乃诣政事堂白副封时方禁直达忤宰臣意以托事滞留降承议郎许出滁阳路张守忠李贵嘯颍上道益梗提举官范湜张銳尝招慰之旋复乱先君至顺昌闻贼有至近郊以牛驴市物者约与相见譙门下先君晓譬切至曰自古无白头贼贼竦寤请归报其渠迺为书至其窟穴守忠贵听命率所领入宿卫守忠初名俊入朝赐今名李贵即俗所谓李阎罗者先君间关至太原留几一年敌遇使人礼益削及至云中其将尼堪迫遣与副使官伪齐先君曰万里衔命不得御两宫以归大国度不足以有中原当还诸本朝迺违天以奉逆豫豫可磔万段顾力不能忍事之耶今留亦死不即豫亦死偷生天地间甘鼎镬不悔也尼堪怒命壮士拥以下执剑夹承之先君不为动旁贵人喟曰此真忠臣也止剑士以目为踞请尼堪怒少霁遂流通于冷山与假吏沈珍隸卒丘德党超张福柯辛俱副使至汴受豫命知恩州流通犹中国编窜也云中至冷山行两月程距敌二百余里地苦寒四月草始生八月而雪土庐不满百皆陈王乌舍聚落乌舍使诲其八子或一年不给衣食盛夏至衣犊布番课四隸采薪佗山尝久雪薪尽至乞马矢煨面而食绍兴二年使者王公伦归为上言之即下秀州存问家属赐银绢二百适未冠得监南岳庙先君辱於乌舍十年多为诗文以讽皆忧国伤时语乌舍尝得献取蜀策持以问先君先君历陈古事梗之乌舍銳欲吞中国曰孰谓海大我力可乾但不能使天地相拍尔先君曰兵犹火也弗戢将自焚自古岂有四十年用兵不止者又数数为言所以来为两国文事今既不受使迺令深入教小儿兵交使在礼不当执乌舍或应或否一日大怒曰汝作和事官却口硬谓我不能杀汝耶先君曰自分当死顾大国无受戮行人之名此去莲花冻三十里使之乘舟一人荡诸水以坠渊为言可也乌舍义而止两宫蒙尘五国城尝遣私人奏书并献胡桃梨修粟面诸物两宫始知赵氏中兴永佑陵讳闻先君北乡血泣旦夕临後遇讳日即燕山开泰寺为文以荐其略曰故宫为禾黍改馆徒馈於秦牢新庙游衣冠招魂但歌於楚些虽置河东之赋莫止江南之哀遗民失望而痛心孤臣久縻惟呕血又云盛德之祀传百世以无穷在天之灵继三后而不朽故臣读之无不掩涕敌已遣使约和乌舍问所议十事先君条析之甚至曰封册是虚名年号本朝自有金三千两景德所无东北宜丝蚕大国有其地矣绢不可增也至於取淮北人猺民害计本朝必不可景德之盟南北所得人皆不取载书犹在可覆视也乌舍曰吾固欲取投附人诛之以惩後何为不可先君曰昔魏侯景举十三州地归梁武帝欲以易其侄萧明於魏景遂作乱陷台城仆两帝中国所监决不从乌舍稍悟乃曰汝性直所言不诳我我与汝如燕遣汝归议遂行所存沈珍丘德党超三人既而莫公将北来议不合囚涿州事复变道蒙古帐其帅闻洪尚书名争邀入穹庐出伏伶歌舞举浑脱酒以劝

到燕一月越王乌珠族乌舍党与坐死数百千人独先君故与持论身几死数矣乌珠知之故得免燕人重先君执节争持酒食相劳苦先君间行?市物色谍者得赵德书机事数万言藏故絮中以归曰顺昌之役敌震惧丧魄燕之珍器重宝悉徙以北意欲捐燕以南弃之王师亟还自失机会虽再?河南後必更成具以乌舍问答语并两宫诸王主所居报上是岁绍兴十年也明年夏求得皇太后书遣邵武男子李微来上大喜因御经筵谓讲读官曰不知太母宁否凡二十年虽遣使百辈不如此一书遂官李微其冬复以书曰敌已厌兵势不能久异时以妇随军今不敢携朝廷不知虚实卑辞厚币未有成约不若乘胜进击再造犹反掌尔所取投附人民欲保守江南归之可也独不监侯景之祸乎若欲复故疆报世讎不宜与胡铨封事此或有之知中国有人益生惧心张丞相名动殊方可惜置之散地并问李赵二相安否献六朝御容徽宗御书其後和定佑陵太后【阙】先报凡四年中以文书至者九数陈军国利疚谓施行之则宗社生灵之福留中皆莫得闻先君言无隐情归国以此触罪诸子惧深祸过庭不敢一问北事故忠谋秘策不详得独系帛书所存大略如此尝有旨以先君母老赐钱百万又与将仕郎恩泽五人它赐予者三参知政事万俟卨出疆上知先君急阙命其副特持赐金帛十二年二月适遵濫登博学宏词科宰臣以所试制词进读上顾姓名问曰是洪某子耶父在远能自立此忠义报也可与陞擢差遣故遵除秘书正字适为删定勅令官继亦改秩入馆自博学宏词改科即除馆合自遵始次月宰辅贺皇太后有来期上曰洪某身?敌区乃心王室忠孝之节久而不渝诚可嘉尚某之二子并中词科亦其忠孝之报也士大夫苟能崇尚节义天必佑之先圣福善恶淫之训於某可以见矣语在慈宁宫回銮事实初宇文虚中既换敌官欲扳先君分谴乃力荐于敌庭换先君为翰林直学士力辞获免虚中为详定礼仪使始造赦其文复及换授先君诉敌相韩昉乞於真定或大名养济图逃归计昉怒虚中赞其决遂换中京副留守复力辞昉大怒降留司判官为承德郎趣行者屡矣誓以死不就职敌法虽未换官曾被任使者永不可归敌欲以计堕先君令校云中进士试者监上道先君月损食阳为有疾病状既至谓院官曰今取士以诗赋吾故学经耳曰岂不能出语策士乎考官孙九鼎者有大学旧为以疾闻得回燕敌议遣奉使人各还其乡因赦及之它使者幸稍徙多占淮北无敢言淮以南先君实以饶州闻张公邵朱公弁亦自言和州徽州人既议和还淮以南使者故先君三人在遣中用事者多曰此等人若放了几时更有今不留後必为我患归计屡欲变参知政事王公使至燕先君得敌陰谋从坡上与馆中人语为留守易王所获对吏将驰流星骑上其事副留守渤海人高吉祥素嘉先君忠委曲护出之且易以它牒先君行月余方以元牒奏垂入境追者七骑至及诸淮则在舟中矣至盱台以奉使无状自劾上方以来归为喜报无罪可待日以御札趣覲既至阙登时见内殿奏事罢力求乡郡养老母上曰卿忠贯日月志不忘君虽苏武不能过岂可舍朕去也赐内库金带鞍马既又以马惊复拜赐又赐御铭盾制琴一黄金叁百两帛五百疋象齿三百斤县香酒茶诸果物中使日踵门咨访宸章沓至且谕旨将柄用皇太后之归也过燕先君冒禁朝焉至陞对乞赐见明日即召之慈宁殿已设帘皇太后顾帘人吾故识尚书矣命彻之问劳优渥语必称尚书赉予系道东朝对外庭臣唯先君一人见宰相秦桧肆言无所避弥三日不休曰张丞相敌所尊憚乃不得用钱塘暂蹕而景灵太庙极土木之工示无中原耶语侵秦皆类此秦谓适曰尊公信有忠节得上眷但官职如读书速则易终而无味要当如黄钟大吕乃可閱九日进徽猷阁直学士提举万寿观兼权直学士院敌来取赵彬辈三十家先君疏言昔晋韩起谒环於郑郑小国也能引谊不与敌既限淮臣官属皆吴人留不遣盖虑知其虚实情伪也彼方困於蒙古姑示强以【阙】国若遽从之彼将谓秦无人

而轻我矣後三日复上疏言或以不与之故致渝盟且曰俟渊圣皇帝及皇族归乃遣又言王伦郭元迈辈以身徇国弃之不取缓急何以使人辞益愷切经筵进故实引楚平王止子旗伐吴言事因吴取州来楚弗与校抚民治国五年而後用师今淮右之民劳罢流散宜时使薄敛勿令转徙无告中兴急务也秦益不喜初敌围楚州久不下时秦留尼堪所敌使之草檄谕降有室捻者在军知状先君与秦语及故事因曰忆室燃否别时托寄声秦色变而罢明日侍御史李文会论先君在朝必生事遂出知饶州时太硕人春秋八十有五昼锦□下学士大夫荣之明年大水秦方钳天下舌不得言中官曰鶚从皇太后北归者宣告變理乖盤洪尚书名闻华夷顾不用秦闻系鶚大理狱成鶚实不识先君特以敌中知名故鶚既流岭海谏议大夫詹大方指先君与鶚刎颈交更相称誉遂提举江州太平观未几丁太硕人忧先君恨牵久使事承顏阙养空囊中办大葬一椁一石心营指授终日挟杖与工佣等劳而御史中丞何若犹论先君为睥睨钧衡谋不靖者服除复得太平观州通判李勤与太守王公洋同僚陈公之渊积不相能且幸以讐进诬先君作欺世飞语王陈与闻之有雅憎先君者从中实其事殿中侍御史余尧弼以为言王陈罢去先君责濠州团练副使安置英州既至得僧舍数楹於黄茆丛竹中居之泊如地产奇石遣僮嬴粮幽讨罗列四壁下手斧凿昼连夕丁东其间闽人倪督老矣以承务郎守郡自谓秩卑无奥主闻新兴守以巧中迁客取使节意跃然效之鈎先君为奇货使主兵官左右狙罅隙捕鍛家奴狱中欲持一两事酿成罪以梯己未及发警死其後徙居城北山中仍年谿涨通衢没其栋先君容郡人避水扶繻老稚填溢堂庑几千指皆廩食之数日水退然後去先君半世朔庭入翰林不旬浹还乡三秋执丧之日过半屏徙厉土岚毒侵淫訖无珍膳良药自辅二年而瘴作盖不食十有八日惛不知人尝少寤口占秀州掾事授诸子呼天请命夜梦之帝所有宣赤章云云者诘朝即能食至于复初後二年乃卧未疾谪九岁始复左朝奉郎主台州崇道观居袁州未踰岭疾革以二十五年十月二十日薨于南雄後一日秦亡讎至辅臣入奏上嗟惜久之即复敷文阁直学士制曰有功见知圣人醴於用赏不幸而过君子为之动心矧予严近之臣备载忠勤之绩眷倚方渥爱憎随生坐一眚以投荒积九年而不徙人无言者朕甚念之洪某学有本源气存刚大惟知忠力以卫上不顾险夷之在前御君命以于征厄海滨而不悔诚贯白日声震朔方义重於生耿恭无王门之望天将悔祸苏武持汉节而归大节无亏多言不宥遂解禁林之直卒迁瘴岭之南閱岁滋深余龄可悯宜畀真祠之逸仍增延阁之华尚对宠光归安乡社自圣上躬万几还逐臣非罪者先君适以不起闻而圣意哀厚首得旧物使及其生存而宠之故训词惻怛如此遗奏未至特诏赠四官推遗致恩别以一孙官江东漕司庀丧事先君少英傥有奇节以诸生待廷试京师伯父给事位南牀王黼为中执法慕先君为人欲女以女弟给事以同台故曲为平章先君恳拜曰妇所以事舅姑也家素壁立今暴得一官乃令鼎贵荐女身得计矣如父母何暨擢第朱勔复请昏资送万计且陷以显仕拒尤力朱不获命齎榜中周审言壻及之周直内阁服金带为秀州守先君廼在幙下人为先君惜之视之蔑如也使北得修职郎四人时有六子独适预名三以官弟侄且乞以一弟晬奉甘旨晬起布衣夺哀为秀州判官凡弟侄及姊妹之家以先君入官者七人庶弟孤侄虽多力为谋昏对前後赐物班内外之亲无余嬴不为问舍求田计窳窳即功始假贷有一壥未及获而贬已贬犹岁割粟以贍亲之贫者至自奉恶衣粝食不择初抚谕京淮降空名告身二十通以便赏功存其半或求窜名郤弗应封以还尚书懿节皇后之姨高氏与其夫赵伯璘隶悟室戏下贫甚先君屡賙之范蜀公之孙祖平敌不以为官佣奴之先君使以东坡所为蜀公铭白曰我官人也敌曰东坡书之不疑矣即释之先君资以归装贵族有流於黄

龙府优籍者二人先君嘱副留守赵伦除其籍刘公光世之庶女小丑在敌豢豕为赎以重价求匹偶衣冠之家略为人奴者赎之数十人张待制宇发自蔚州死云中先君过荒寺见其槩携之至燕山授其仆锤禹功使葬司马侍郎朴握节以死居数年无有能明之者先君为陈本末诏以忠节显着赠兵部尚书其归也北人治饧具几月後使者至敌多问先君今何官居何地先君天性强记书无所不读虽食不释卷稗官小说亦暗诵连数千言宣政间春秋之学絶先君独穷遗经贯穿三传在冷山摘褒贬微旨作诗千篇北人抄传诵习欲刻板於燕先君弗之许於姓氏尤精官制部日使者胡公直孺尝问祖之所自出先君曰姓书以胡为陈胡公之後陈妨姓也若以諡为氏齐亦有胡公岂独陈乎盖胡自有两祖春秋有胡国尝以女聘鲁襄公经书夫人归氏薨则胡以国氏归其姓也今为安定胡氏晋胡奋其後也魏孝文入洛改功臣复姓以纥骨氏为胡今所为河南胡氏者是也同列董公将戏曰董亦有二祖耶曰昔颶叔安之裔子董父善扰龙帝舜赐姓曰董封诸鬲川鬲夷氏其後也又辛有之二子董督晋典晋於是有董史因为董氏董狐其後也二公叹服善琴奕好古能别三代彝器见书画不计直必得之乃已有书万余卷名画数百卷皆厄兵烬居穷絶域复访求裋载以归四夷附録所载西瓜先君持以献故禁圃及乡圃种之皆硕大西瓜始入中国有文集十卷春秋纪咏三十卷輶轩唱和集三卷帝王通要五卷姓氏指南十卷松漠记闻二卷金国文具録一卷先君刚直言不诋不发虽与人尺牋无一字过誉有胆略遇大事敢为平居慷慨有经略四方之志常语诸子曰在北方久料之熟矣今其势日削可以凭轼取之过河朔时见父老指其子孙云是皆生长兵间已二十余矣不知有宋我辈老且死恐无以系思赵心不幸大忤时相挫抑颠沛天不假龄齎志没地诸孤不孝不及见其成大功名也苍天苍天安所声痛先君自为从官不报考功课故官止朝散郎以赠至大夫职至徽猷阁直学士爵至鄱阳郡开国侯食邑至一千一百户壽至六十八娶沈氏左大中大夫复之女封硕人初先君眷恋庭闈不忍去太硕人以移孝显亲谆谆勉之且曰妇孝足以宁起居切毋以我老关念既越疆塞马益南牧音邮絶不相及太硕人倚门积忧几罢寝食硕人左右虞侍极意顺适致太硕人康宁及见先君之归其择师教诸子则不远千里拊妾侍尽恩纪爱其出隆於已生叔妹娣姒细麓柔刚不同一切得其欢心中外语妇德之最必以为法即世五年先君始还以不见为戚故终不忍复娶洪氏始居乐平之金山自曾祖府君种德重义以气节闻子中大夫蚤世二孙幼府君慨然思所以成立计即挈诸城中访先生之贤力教之因占籍鄱阳长孙讳彦昇起家遂给事中大夫虽不遇至先君益显八男子适左奉议郎主管台州崇道观遵左朝奉郎秘书省正字兼权中书舍人迈左宣教郎通判袁州逖右宣义郎徽州婺源丞逊右承务郎佥书连州判官事邈右承奉郎江西安抚司准备差使遽迅未仕四女子嫁左从政郎池州建德县令余执度右迪功郎潭州湘阴县主簿王駉将仕郎臧栋一尚幼孙男十一人擢右迪功郎江东转运司准备差遣秘檐楸栌桴楫 棹櫓榭孙女九人初先君既得合葬於滌潭去五里所其乡曰和风南管得故县之原瞻爱其山川呼畚鍤画墓位曰吾百岁後必於斯从二亲不远矣薨之明年孤适等恸哭行所卜问丛辰五行家曰十一月丙申吉将以其日藏事忍死纪实求立言君子大书且以备太史氏采择云绍兴二十六年二月二日孤某等泣血书

卷七十五

钦定四库全书

盘洲文集卷七十五

宋 洪适 撰

墓志一

韩承议墓志铭

韩氏自忠宪公以进士起家在仁宗朝参大政其称甚崇赠太师讳亿有子八人达者半日知制诰讳综曰司空东国公諡献肃讳绦曰门下侍郎讳维曰司空崇国公諡庄敏讳缜袭貂珥簪天下尊至庄敏生大中大夫赠正议大夫讳宗武正议生奉直大夫通判洺州赠朝议大夫讳璆是为君之考君讳黯字少汲其先盖真定人自忠宪居京师遂着籍君藉荫入官调萍乡尉禽盗满品迁右承奉郎金书连州判官厅事改广西转运司主管文字通判廉州肇庆府德庆阙守遂摄府事又摄南恩州六迁至右承议郎绍兴二十三年正月戊戌卒年四十九妣荣氏曾氏皆赠恭人娶李氏大理寺丞处廉之女封孺人二子长元鼎次元龟元龟先亡君性精敏遇盘错自喜以兴利去害为己任居官选愷者与民之所戚若疣赘在体必欲抉去之猾恶吏胁息不敢为非然根於忠厚严而不刻在桂办职有声一时上官多闻人争令出其门下在廉关决得其平德庆守贰交恶事废不振君至剔磔一新初公量踰制一耗三吏复并缘乾没典负者肆其扰君毁量息弊检核常赋无所漏失遂罢贡金之敛脍折租之直仁枯锄强公私盈足泅水阤氏渊薮流逋夺民田鹵子女设牢檻摇毒一方莫敢牾君捕置于理百姓件其治行句诸台闻之俾即真时连帅方公雅材君相与推挽请于朝报未下至南恩不数月而死方公既遣君之犹子获柩念其子少而故乡未能归也则为买地于广之番禺县王置原凡窆窆之事具为区处以其年四月庚申葬之复具石碑文而纳诸圹使其孤异时瞻拱木议归葬有考焉铭曰韩胄诸姬显于宋之兴垂祉续休代有名公卿裁犀断蛟君发其矧曷畀以材而嗇厥龄有郁彼阡知己所营後人其昌视文斯铭

第三子墓铭

予佐天台郡罢有日闻家君谪英州理装亟行时第三子病创甫痂落次嫠女内子病且棘叫七男女与之诀独是子伤鰥不自胜憩旁榻涕泗交下既少间予取捷道趋家君寓所及之豫章诸子奉其母还吾乡閱月有执书汗而前者言吾子创之毒未荡治隆暑登道邪热中蘊痼遂痢咽不粒者浹辰矣居顷之别膝下回见吾子屹然存其骨喜吾之归则强内糜饮匙匙必吾亲授斯须不许离去日昃则命乳保拂笙枕以俟如是者二十日气垂尽犹取松桃荐茗以进我忽曰我头疼然隙中得无风耶扶之起絕矣吾子名摺字习之五岁齿二兄从师即加巾不肯舛?为小儿状诵书酬对必欲偕仲氏或疾病休止则咨惋以为不能及苗而不秀命也夫

其生以绍兴十年九月之六日其亡以十七年八月之六日明年某月某日葬之滸潭祔祖之莹也父鄱阳洪某为之铭曰婺女之泣岂将与母睽乎豫章之役岂忍死须臾俟吾之归乎孰知夫彭殇夭永之齐乎则吾能无悲乎

叔父常平墓志铭

绍兴十九年八月壬戌前提举福建常平事洪公卒得年六十既斂犹子某日往哭退将比辑公之胄出官行俾其孤逸求声於文者志之逸拜曰逸将以今之十一月壬寅藏大事苟远取达官闻人惧不及期敢以属吾兄某辞不获乃为之文曰昔包牺氏既衰共工氏以水纪伯九域共氏其後也後世避怨为洪氏在吴有庐江太守矩在唐有集贤学士孝昌五季乱始自歙徙名数於饶之乐平又七世始家鄱阳讳某於公为曾大父生赠中大夫讳某代有芬懿董范?閤中大夫生公之考讳某至给事中终徽猷阁待制荆湖南路安抚使赠左光禄大夫政和中给事公历三院御史拜琐闥立朝八年公入国子学磨砢涵浸校官第文屡占异等以荫授承务郎监在京草场淮宁府工曹以给事忧去没丧监洪州苗仓江宁府司録京东制置司干办公事通判密州剧贼丁一箭王大刀衆数十万掀郡邑围城七日矢石旁午楼櫓摧塌公登陴励衆矢着右股无慑容乃造蘊笆木架为蔽扞守者赖之夜遣壮士火营毁其攻具贼不酬欲而去密人德公岁时蒸尝之入通判江州未行丁张夫人忧没丧主管江州太平观台州崇道观四满秩又通判鄂州未行擢提举两浙市舶赐五品衣鱼迁提举福建常平茶事福州民张圆觉自言遇鍾离先生授以五花杖因?髮从浮图教颇能谈人往来证瓯粤机鬼媚佛一咻千煽闐然神之谓之张圣者扶携耄稚丐庇澡雪至暘道无退心尝欲作建州大中寺齐民罄委贄积日荐百万恶少年扳名伍中潜有不逞谋它在位者犹豫福祸茹不敢宣公斧其杖迎刃而碎惑者始靖遂以状闻验治抵法摄行宪事半岁多所平反公自少栖心禅宗在建康日从南遁铨公游尝夏行县黎明陟山日初吐輿人呼盖声受虚谷豁然有得遂称一了居士板輿养缺即坦坦无宦游意庵居穷山蒲茵楮帐而已尝识于壁曰山居不问人间事饱饭支筇看补篱不治官簿十有四年朝廷休之起贰武昌先葬元配於城东怀德乡之上福里公自为壽藏闽川代还乃简材市甓欲营道院於墓侧曰轩裳非我嗜也将晦远人事倘羊余景不幸遇疾既亟家人欲祷释老氏公曰死生夜旦尔何祷为将易箴召荐福道行师与语世间法寄禄七迁至承议郎既纳禄转右朝奉郎公讳昕字光佐母张氏永嘉郡太夫人三娶皆王氏前孺人真定府路安抚使赠少师本之女通书能文尤尚竺典盛年去粉黛之饰自号寂照道人次孺人提点江西刑狱汝舟之孙亦先公没今孺人其娣也男右从政郎铸钱司检踏官逸五女长居室次适左迪功郎建州州学教授李绮余尚幼孙男三樁櫟女四公色温气平喜愠不形於顔口无譚言接贵贱尊卑一如闻人一长不啻已有在闽部中官属有获谴其长者必曲为营护凡居官不为惊人耳目事以压衆牵誉去咸思之为铭曰仕不汲汲西都之杨丁年闻道襄阳之龐晚選其时弗高厥飞人以拙归一笑领之天不祉公公则无憾琢辞于石式款其坎

赵孺人墓铭

有宋贤宗室女出自永熙陵盖汉之六世孙湖南部使者士鹏之第五女年十有八为我伯父

桂林郡通守番禺洪公讳昭之冢妇江西部使者属讳壽卿之继室有淑行驯德詣于上下人不见其愠容予羣从兄弟三十人君为丘?合贵贱指三千誉之一口姻表州里闻者皆贤之凡十三年而寡人以君华年妍状必不久於洪氏既三年湖南公守临川遣其弟迎之车乘鲜明甚都既至绮寮广厦丝竹攒耳颐指如意方择贤士为匹偶君誓而弗许曰姑老矣二子童騃不敢以累老者父母百方不能夺俄恳请而归入门欣然不以见纷华而改其操桂林公没世久王夫人齐家井井有条序而货橐不丰江西君无同父弟闡以内惟妇姑数穉人其宋濂不可一朝居而君泰如也时节宗戚相问遗君不少阙斥簪珥囊衣自办不以告其上或遗之鲜衣必献诸姑有副而后敢服姑疾煮药进膳不懈夕则侍寝有间而后敢退扫一室夙兴诵旁行书已则閱稗官说有他出二子诲其箴缕之事常在侧家塾晚休必使诵书于前其遣闲谨独之术如此与诸姒不啻若同产以斯须不见面为怀迟明女奴络绎讯兴寢状既盥接踵省问移晷不忍散否则争相迎致趣之者袂相属步摇所向和气随之东往则西怨曰奚为後我无少长刚柔咸慕而归象之女嫁矣其节益坚绍兴二十八年七月己巳食於姑前失匕筯而暝年三十有八尊卑内外哭之过乎哀橐其息也?其庶也右承务郎汪德?其倩也?年十一月甲申封于郭外土湖之阴其皇辟之宫也昔鲁襄公三十年宋灾火至伯姬之宫左右请避之伯姬以不见保傅之姆夜不下堂遂死于火孔子贤而闵之其卒其葬已见於春秋又书其諡又书其送葬之卿盖汝坟汉广之风日衰鲜克以礼自防况於诸侯之女乎今巨室名门华衣鲜食图史不关其心悍妬奢淫者多矣况於天子之裔乎此而不铭孰可以铭铭曰怨耦偕老冶容壽考絀恨重泉呜呼天道

郑宜人墓志

有素冠踵门遥望文书?袖谒入则孙君某老也外自宝阶予敷席肃之坐作而曰某老不孝之罪上通於天每生衰絰中不可复名为人昔者母氏常曰吾与汝两家大父俱以儒学射科帅节州符丕受光渥汝必强学趾美母作前人羞某老年益长业益不成以坠我母训既调建昌司理参军母氏则曰彼染珥笔之俗多椎埋奸典狱之责重汝狭中不善媚上官弗戒且贾斲某老又坠母训不能书绅三省考满未得代遭诬成狱以囚服往母氏方枕疾闻之寢剧某老碎心齟舌惧不一见慈顏即日取爰书自诬而母氏终不能起钜创沈痛一若速化局躋天壤何以赎莫大之衅独求文纳圻使壺范振白於後庶几少塞凯风寒泉之思复念曾大父大中公繇临朐徙江陵有田荆門而少师公坟墓在焉吾父客番禺十五寒暑与公里門相望今陆走二千里泣血护櫟归窆大父之莹之侧复在公封内敢以铭为请予既际孙氏父子於吾乡又将假守其乡无说以辞乃受其状而叙之曰宜人郑氏严之建德人左朝请大夫知宿州讳弇之孙江陵丞讳续之子左中大夫徽猷阁待制鄜延路经略安抚使赠少师讳琦之妇右朝请大夫知汀州祖善之妻四男长某老以建昌故贬秩一等为右从事郎次彭老右迪功郎监南岳庙先卒次亨老将仕郎次永老二女子长嫁进士李良翰次未笄孙男二人女一人凡为孙氏妇四十有五年从夫爵三受封自孺人为宜人以绍兴二十七年四月十六日终其壽六十次年十一月甲申葬于荆門之长林县曰杨乡柘子步初宿州以女女少师有贤行是为越国夫人孙氏嘉夫人之德欲締好於郑越国乃择其侄以室其子宜人在家警慧柔靚不流侈习喜图史箴戒之书既嫁不以世姻而简尊卑之礼谨谨妇道不见缺亏省问燠寒抑搔痾痒退则临澹澹姜桂之事宗族称焉靖康之难汀州官于汾寇至将闭关宜人曰老姑隔远必子

孙为忧事急矣母特俱死君守职不可出我则携帑去之遂蒙犯豺虎崎岖走家越国相持以泣倚门之念犹不替宜人委曲寛晓居亡何汾州更尽还当是时微宜人老者几不能生盗亘江汉尽室顺流而下旅食三郡伏腊不腆宜人衣麤食恶不?怀及汀州三仕半刺史家道少振宜人益节俭服饰不事鲜好持不杀戒食无贰味信释家者之说旦旦取其书诵之训子弄孙仁浹婢御无毫髮冒疾心汀州老於官途多内助也予闻宜人甚爱厥子而建昌亦孝世无鍾离公弗使脱幽圉以凭斂其肯恻然於陆氏一杯羹乎哀哉乃为之铭曰孰蔑其子使母戚以死阙地其从姑兹惟受祉

盘洲文集卷七十五

卷七十六

钦定四库全书

盘洲文集卷七十六

宋 洪适 撰

墓志二

刘府君墓志

绍兴二十六年十月癸酉成都刘府君卒於梁山年六十五其孤徒行迎柩以明年十月辛酉葬于华阳县普安乡白土里又明年十月万州使君仙井何公櫜舩江夏予造焉万州曰室人击鲜治具谓当有嘉客而君乃肯临我则开口一笑良已前定因出诸郎行酒曰是皆刘出也刘公成都人有二女其长归于我若干年而逝继室以其季公疏财好客其女目濡耳习咸有家法越三日又会于南楼曰昔吾守景陵也公曰闻云梦泽之名旧矣不一往非鄙则病遂御舳东下山容浦思振笔嘲咍兴远辞绮仞积囊篋一旦蜚归心索酒展别摩拊甥孙悲来下泣婴恙中道以不起闻今既窆且祥矣未文其圻非君其谁宜为万州英迈不虚美者予曷敢不诺乃考其辞曰刘在成都为右姓羣从同坊閤閤相接所谓夹寨刘家府君少不羣有奋拔志尝曰刘氏善富数世所不足者非财也不学无以崇孝享宗则作家塾聚书求师友合同族之子姓朝夕咨讨居亡何从兄长源擢政和进士科府君谥于衆曰非舌耕明验坎入頽宫以诗学屡最其列从兄黻为户部郎又入京师有声于贤关月校季选同舍生自以不及府君有宝带鼎贵求旃弗与或曰啗之可以仕子何爱焉曰学不遂命也带其褊矣既而曰匹夫怀璧罪将及即拂衣西归彗汜三径与雅人望士娛其间奴僮走异味於数十百里觴豆杂袭放歌乐饮井中车辖後前相因少城为冠盖冲游客入疆闻府君家居则策马径进否则不歇鞍而行仕其邦者府君未尝賫刺过之便坐有棋局客至必对韬其艺不尽出也会通国之善者与我终日不名负胜人始惊其奕思无敌同产求分财不能遏则自占田庐之下下者或缘手尽复推予之绵州守临邛朱轺简州治中唐安杨次臯茶马属和义王兴孙其女兄弟之夫也白头交驩无违言好施惠出天性凡以冠昏贫病死徙叩门勾贷无戚疏高下皆实而归至有争?不到官府惟府君曲直则頽首听命始冠有外姻为无赖子所辱遇之涂与俱立县尹庭下其人少长山谷间未识市井诣曹不能出一语府君抗声为辨数得直衆繇是异之绍兴初敌骑犯饶风蜀骚然不安急欲遁逃府君曰敌入汉中樵苏不踵前有劔关後有河池重兵必不为我患与其宗家高枕不去蜀人曰夹寨刘家未避贼皆复治生业後果如其言晚以赏延得将仕郎非其好也时进士兄以湖北使节摄行帅事屈府君入莫府意不恡而去府君讳革字某曾祖讳某祖讳某生湖北常平讳某以故累赠朝议大夫讳某妻某氏子某尝试礼部孙某壻则所谓万州使君今为右朝请郎名渠靖康相之弟也铭曰【阙】簞多金者裂儒衣官桑榆者倒行逆施则轻毛鼂禄不可羈嗟若人者几希

朱安人墓铭

夫人饶州乐平朱氏赠右宣教郎同县夏公讳某之妃左朝奉郎知洪州南昌县康佐之母夏氏三世壽母年皆望百夫人始执箕帚逮事祖姑以及其姑节适寒暑燥湿进甘膳唯谨有疾亲絮汤液不去侧缝纫漱浣之事必躬亲之人故称为夏氏孝妇勉其君子游学四方有籍籍声人故称为夏氏令妻蚤居家浸贫或忧其事他姓则毅然自誓诲其二子曰康父尔干家之蛊毋远阡陌以奉我水菽曰康佐尔努力校官究六经百氏之说毋荒于嬉以开厥家二子衔训不怠夫人见其伯焦心治生则喜仲旬岁一归叩其说则又喜天子即位于睢阳仲徒步入阙上疏论时政尝求可使絶国者其子在选中或以亲老尼之及归以告夫人谯之曰立功名显父母其孝大於録録下也其後仲子擢进士丙科壹为尉再为令奉板輿之官事有疑必后而後行夫人尝以省刑罚薄税敛为戒素有识鉴其子与僚朋接必从屏间窃听其语已而曰某贤人也可以友某小人也欲其子必思有以远之故称为夏氏贤母夫人生少疾春秋高视听不衰食生饮寒少壮所不及岁时庆会内外戚疏遮前塞後以其次曹集奉觴饮之既虽多而不乱以子恩封太孺人又进太安人以绍兴二十七年六月辛亥终壽八十有四【阙】已先卒某人某人其壻也孙男四人女六人曾孙六人玄孙一人顾言曰勿远营宅兆康佐乃卜所居之西帷锦坡食盖其县之某乡某里也以次年十一月壬申塋走书币来谒铭始予举博学宏词南昌实同年进士讲同郡之好而知其学问之富予贰郡天台而南昌官奉化壤相接也则闻其官事之办及予省亲炎荒再道江右会之于吉水又会之于南昌益得其弦歌之绩母之教然也其可以不能铭为解乃铭曰笏鉶孔时萃以笔之不爱其织惟乐告之有言恤纬谁者导之黄发紫诰斯其所以报之文其哀石後也考之

向通判墓志

公讳仲堪字元仲饶州乐平人绍兴二十七年三月甲午以右朝请大夫通判贛州卒年五十八後二岁予守荆门公兄直秘阁伯奋以节镇京【阙】予言曰吾昔为吉州元仲自贛告相见期吾临章江日夜迟其下弟弗至而讞实闻在原之痛时往月来犹昔也将归扫先人坟墓祔其葬今压於上命不得视其棺入土天将何以纾吾悲将予铭纳诸丘中使死且不朽我亦擦泪不恨予曰贛州法当铭公言不可忍听其能饰以辞会予从歙未克作今年其子友益卜四月乙酉合夫人氏之丧葬于县丰乐乡贵潭之山遂以秘阁公所为状来【阙】君忘荆門之【阙】乎予即日次其事【阙】子姓派於宋繇春秋以来称世有人至我宋复盛有笃行君子讳宋尹者生右朝奉大夫讳蔚大夫生赠少师讳久中尝知汝州至徽猷阁待制娶丞相清源王女曰魏国夫人何氏是生公公方少时头角嶷嶷然补太学弟子员一时侪流倾下之以门功脱褐授承务郎主管亳州明道宫摄开封丞权贵人请托不闻耳朝士一辞贤之监在京都茶库叠受赏渥它日版曹借以临剧至辄办再满秩改监京西排岸司宣和中诏举材可治民者公为户部尚书康公执权得遂知福之长溪县绳奸液枯剖析滞讼效异等验白濒海作战舰起缙钱它邑骚动惟长溪无秋毫扰丞相李公纲言公可用通判洪州江西故多盗帅梁公扬祖以严治获者必抵死尝委公审二盗吏抱成案来前摘公书纸尾公问盗皆【阙】在吏曰盗服矣官当占位落笔尚何问公曰吾不见囚则如勿审同寮或讐其立异公曰得一切便宜从事者帅也付之吏则有三尺法执不回盗得死减论梁大喜自是为霁威盗有生者

幕府事无巨细必参公谋居亡何梁入为兵部侍郎语人曰吾见上当首荐向君暨梁疾不能朝公亦以忧去又通判池州贛州贛承叛卒喋血之余百姓甫免毒螫公数行太守事摩抚疮痍流庸尽还大贾讼盐债鞠系数十百人延岁月不决公曰质剂按牒今焚亡余矣穷民繫牢户非瘐死不得出为白外台请之朝咸得释公智略炙輶见事风生持论纚纚有本末坐上客倾听方事之丛它人圜视无措公笑语指麾冰释缕解使有位於朝其建置当不録録或专一城使一道必能为人所难惜乎年不过六十位不过州佐抱才弗施事止此配何氏直龙图阁琬之孙魏国从子也事姑孝药膳非经手不进诵释氏金刚经悟四句偈临终沐浴更衣集子妇付家事一语不乱公卒之明年六月辛卯也年五十七累封宜人男子六友益右从事郎淮西江东总领所贍军库友旦右迪功郎广德主簿友□友正皆将仕郎友恭未仕女子二长适右迪功郎巴陵主簿程湜孙男三可大弥大必大孙女四今年实绍兴三十年铭曰厥智穀转犹玉弗珩前挽後推止刺史半彼平平者印累节召缩手褻间不嘖以笑贵潭之宅维龟墨食後昆振振曰君子泽

徐府君墓志

绍兴二十九年慈宁宫太后圣壽八十天子进觴展庆推锡类之泽凡九品有秩其亲耄齿者咸得官封饶之乐平徐君讳某以其子前太平州司户参军某之故特封右承务郎致仕制书下君秀髮豪眉舒绅拥笏伛躬下拜孙曾绳绳导趨後先远近姻族无少长皆往贺象轴锦韬争快先覩君侈上之恩熙羔酌醴日与宾客相娱乐丝竹箜弦之声辈作肃饌酬对精神不少衰以某年某月某日卒春秋九十有一予中表或与之有连不憚岭厄袖其事来乞文乃为之崖略其说云君之字某其先自洪徙焉曾大父某大父某生广东转运副使某累其贈至通议大夫父某君尝提笔与逢掖游会亲疾归视方药讫丧遂无干禄意隐居治生其心计絶人远甚不夸多田以圉夺窶人子不以子金钱求倍称之息不射时幹货以垄断一乡閱数年钱流地上乃筑室石砚之阳走奴隶求古今方策于异州旁县延致知名士教勒子孙族兄某渥江东使者节番其治所也君则闭关省人事家书为之疎阔岁乙卯大饥米石至万钱皆闭余君倾困不小靳又输粟郡乳聚饿者于僧坊哺之或求其别圃君曰是尝以佳花遗我归其金而予之券或以田质积岁无以偿则火其约闻人急周之唯恐後始室某氏再某氏四男某某某三女为某某某妻孙男若干女若干曾孙男女若干君自择壽藏于某乡某原卜次年某月甲子窆铭曰富而仁善充其身旄期而出纶有息业文宜昌而屯将在後之人

白宜人墓志铭

绍兴三十年冬直宝文阁许公遣书抵予曰吾不幸失匹将以日月葬方整比事迹须君为文以铭之予曰公我丈人行也而从妹又辱为介妇我於东阡北陌间闻宜人壺德旧矣敢不诺居无何公亦以讞至会予持节过家其孤闻诗迎于道手母氏之状曰古者有挂劒之信君忘之乎先君有治命敢以请予即受而叙之宜人白氏讳庆通字慧应太宰秦国公相徽宗讳时中之第三女公相在位时呼延夫人即世二女已聘遣闥以内宜人悉尸之媼御数十辈事以小大必咨而後敢行其颐指条序虽老成人自叹不及丞相爱奇之遴所归於是鄱阳许公擢第有令名遂归焉舅姑春秋高安于乡里朝廷设八行科郡以皇舅金紫公应令深辞不出宜

人生不及盥饌暨持喪哀懼過制歲時祭祀則臨庖?眊滌濯執器上食必躬親之遇諱日口誦佛語不輟雖逮事者不能過也寶文翔歷內外五十年帥節州麾所居播惠閭助為甚多謗起桂林將簿對比郡宜人曰君俯仰无一毫愧怍行乎庸何傷公既直所枉猶坐瘕死者為累家食垂十稔宜人慮公以榮槁綴懷客至修具甚設使相娛樂平居對案而食僅【闕】侍前日下?必舉觴三五行如賓朋然故寶文方羊林壑泰如也宜人生相家乃不喜文綉珠翠之飾所謂時世粧者見則鄙之諸婦若女從其夫之官必以同僚通家為戒曰富貧不并日語奢儉异尚或耻或羨則不安其室矣一日呼季女啓筭曰吾周身是家人驚問之不答閱日而逝三受封至宜人壽至七十有二卒以二十九年十一月丁未葬以三十一年十一月甲辰兆以乐平县长城乡之卯龙坡子十人男闻一右文林郎徽州績溪尉次闻义前卒次即闻诗右文林郎常州晋陵簿次闻礼右修职郎纯州巴陵尉尝贡礼部女长前卒次嫁右通直郎知蕲州黄梅县管镌右承事郎徽州祈门丞程遜通仕郎胡如愚二尚处嫁程氏者亦前卒孙七人壽俊將仕郎壽朋壽祺壽邕余女也白氏故某州人有左神武将军者在国初勲臣籍生保州刺史諱延嗣太平兴国中賜第京师永昌坊贈相国公葬于壽春其後遂為壽春人保州生累左骁卫将军諱文质贈燕国公以女妻大魁刘輝於布衣时故其子始用文变武【闕】进士起家历守蔡润二州有能名贈魏国公諱某【闕】为宜人大父自保州而下以丞相故皆贈太师金【闕】諱某寶文諱某以左朝請大夫复直秘閣後宜人若干日而終銘曰生身相門侈习弗蹈嫻德儒先鏘鏘偕老双劒联飞松栢夹道有子有孙為善之報

盘洲文集卷七十六

<集部,別集类,南宋建炎至德佑,盘洲文集>

卷七十七

钦定四库全书

盘洲文集卷七十七

宋 洪适 撰

墓志三

慈莹石表

太夫人沈氏常州无锡人祖讳宗道赠朝请郎考讳复仕至朝奉大夫赠左中奉大夫妣令人陈氏政和五年先君及进士第太夫人之兄太学博士松年在京师闻先君名订婚焉先君既调官与太夫人归乡家故贫有妹未行太夫人倾奁中装资遣之先君官浙东西奉祖母安舆太夫人承颜色一以顺朝晡所食寒燠所衣节适尽志祖母即时病视絮汤液不去侧夜分不脱衣倦则假寐建炎三年先君奉使朔庭时祖母年出七十方寇盗旁午外无宁居泊家秀州长子适才十三穉儿多未免怀不敢以家事辞繁太夫人是赖他姬有子太夫人恩之有过于已出者一姬甚畱以太夫人鍾爱其女意小不怿故笞辱之以挠太夫人啼声一闻则戚然见顔面必俟其嬉戏复常乃悦终不少譴其母盖其仁厚出天资行於自然未常有所强勉数数然也生理既薄所仰以给者唯先君奉入衣服饮食取财足至诸子买书或捐钱数万不靳训之曰尔父以儒学起家尔曹能一人趾美我不恨尝为之迎师千里外虽隆寒盛暑不使辍叔氏之妻既移夫于他门矣复失匹无所于归太夫人并其母畜於家不与娣姒时异讠又嫁乃已平生靖重口不桂人之过差心不念人之旧怨左右童侍不闻一厉声见一怒色盛德着於闺庭放乎乡党远近戚疎识与不识讲太夫人贤以为口实绍兴八年十一月二十三日不疾而终享年五十初先君宦吴久又寓秀男女昏嫁在焉太夫人稍储奉余买田一?於舅氏仓卒弃刀筲乡关回远莫能办归计诸子禀舅氏指护櫟往无锡以明年十一月辛丑葬於县开化乡白茅山之原窆之四年先君持节南归祖母故无恙所留九男女皆在旁而太夫人独下世先君痛之常欲反柩於乡而阴阳以为吉卜不克徙後十二年先君薨诸子用治命不敢祔二莹相望千五百里春秋祭祀弗洒弗扫遵通判常州日以行县数上塚适使浙西即移官厯得一拜墓下前年遵守吴门始能立屋数十楹於墓道西居僧以职香火迈官於朝从督府江上继廷劳使客且报聘六往来县中皆以王事奔命不获往松秋结恋为诸子无穷悲今适在京口尺五拱木扁舟三日事尔而又不能孤坟异县惧数世之下樵苏之不禁也乃书石表诸隧上陵湮谷变知其为鄱阳洪氏慈莹尚勿圯也太夫人以先君恩封令人赠硕人以遵入翰苑赠淑人以四子恩追封鄱阳郡夫人以遵入枢府进博平郡始时执丧者子孙十人历二十六年唯他姬子邈不幸死凡男女孙曾其存者三十有九盖子十五人八男七女适遵迈以太夫人薨後始中博学宏词科遂龔官荣蒙禄仕而三釜之养不泊矣悲夫适今为左朝请大夫户部郎中总领淮东军马钱粮遵左中大夫同知枢密院迈左朝奉大夫前起居舍人逖右承议郎铸钱司主管文字逊右宣议郎浙西安抚司准备差使遽迅皆右承奉郎女三蚤卒次嫁右

从事郎董公衡公衡卒更嫁左朝奉郎楚州通判余执度次嫁右承直郎王秘次嫁将仕郎臧栋次许嫁同进士出身朱曦颜孙二十四人十四男十女槻秘楸檣桴楹棹榘?椿?机楠槻右迪功郎湖广总领所干办公事秘右修职郎楸将仕郎槁右从事郎与秘皆监南岳庙檣将仕郎棹右承奉郎许嫁之二女壻左承事郎金书平江军判官木待问左迪功郎饶州司户许及之曾孙四人男曰忱先君讳某终徽猷阁直学士鄱阳侯赐諡忠宣赠太子太师

罗尚书墓志铭

公罗氏讳汝楫字彦济其先自豫章辟五季之乱徙家於歙遂为歙人曾祖讳仁昇祖讳承吉考讳举以公故累封至右朝请大夫罗本春秋时小国在襄之宜城又徙荆之枝江衍姓皐陶之後国近楚後为楚所并苗裔遂氏其国涉晋及唐闻见史策其名未彰彻至公而罗氏始大

公强记妙言语年十六贡辟雍角出侪类乡先生胡仲为司业每对客诵其文博士毛友龙雅好古能於稠衆中辩所作第政和二年进士教授郴州眉山唐庚见其诗击节赏之改兴国军永兴丞遭母胡宜人丧後为池州仪曹历江东转运司干办公事通判江州擢枢密院计议官又通判镇江府监登闻鼓院除大理丞迁刑部员外郎以次面对谓养子之禁不寛则杀子之风不革请因贫困而以襁褓之子与人者毋拘以异姓占奏详尽即拜监察御史不阅月迁殿中侍御史抚州两陈四系狱误论轻罪者死公上疏冤伤之始诏天下断死刑守以下引囚问姓名乡里然後决廷议防守江淮异同乖戾公言大驾幸临安以江为墙壁淮为藩落二者备等耳今武昌至当涂营垒相望淮濱独山阳一军非策也刘錡以孤军郤敌於顺昌他师亦踊跃争奋请更戍以休其衆间谍各私其璽封言人人殊请西府择一谨信者总其事江西羣盗窟穴潮漳之间踪捕者不越境请三路宪臣通治之户部符【缺】郡折民口紬绢一缣八千请从其便输本色或以田业多寡率财供军公言州县有被灾害什四以上及盗贼未衰息者若雷同箕敛则民不堪命官吏以趣办受赏者请删其科又乞调武人作两淮守置都统制以护南北诸屯革窜名赏籍人以劝立功者迁起居郎权中书舍人迁右谏议大夫兼侍讲上问或谓春秋无褒然乎对曰春秋上法天道春生秋杀若贬而不褒是有秋无春也上曰自王安石废春秋学圣人之旨寢不明近日得其要者胡安国与卿耳中官梁邦彦用蓝珪例免减借月廩外戚钱恺用潘长卿例落阶官公皆论其不可又请獎用五岭进士以风厉远学迁御史中丞条陈治狱理财宣诏握兵之弊皆中时病或请下州郡分掾属比辑续降条法施行之公言祖宗画一之法悉出仁恕艰难以来奇请他比有罔密文峻之失其便於後者宜疏为令否则削之马院旧占富阳沙田为牧地马不至而民代输如故公请还其地予民迁吏部尚书兼侍讲东朝归自朔方天子以孝治天下廷中持橐而奉亲者公及魏公良臣林公待聘凡三人公在经幄上屡问卿父安否尝以当迁一官易绯鱼为亲宠居顷之以父母春秋益高恳求便郡奉甘旨除龙图阁学士知严州三衙卒入州境捕民为兵公【阙】其人归之有【阙】辖始至遗鞍马缣帛之类甚腆公郤之【阙】而果有私请白焉集黄堂其僚欲奉瑞不许居三岁旬闲提点江州太平兴国宫四其任筑室焉聊山之阳疏岩斲壑亭榭爽旷父子白首乡党荣之岁在戊寅大夫公即世公执丧茹哀後二年五月丁亥薨年七十盖绍兴二十八年也积官左朝请大夫既谢事进一秩讎闻赠四秩长子遇明堂恩赠左通奉大夫爵新安郡侯邑户一千五百实封三百三淑人吕氏王氏俞氏後二年三月乙酉葬於县之宁仁乡汪龙原以俞淑人祔六男子今皆除丧矣长某右通直郎湖北安抚司主管机宜文字吁右宣教郎主管崇

道观颉右承奉郎监泉州市舶务頌右承务郎监镇江府排岸愿右承务郎监饶州景德镇類右承务郎监临安府新城税二女子右从政郎荆南节度推官胡昌右奉议郎金书常德军节度判官俞穉其婿也孙男十三人表臣右承务郎监宣州水阳镇彪臣右修职郎婺州兰溪簿元臣介臣克臣信臣世臣力臣似臣阜臣縉臣正臣扈臣女三人曾孙男二人公形貌颀硕音如洪钟上尝谓其南人似北平生寡嗜好於物无所玩自以布衣起闾巷服饰皆事朴素与人交不强相取下对人言若恐伤之或有片善称之不容口可以推穀则举手不以为难其学问醇正笔力雄健言必关於教化不出奇以譁衆取宠前後论谏数十百篇反覆详尽粹然皆忠厚之说入朝八年以令名始终不一遭诋訾有东山猥稿二十卷奏议八卷外制二卷藏於家始某举博学宏词公实持文衡及假守新安公殡在堂入哭之恸诸孤楹然来谒铭谊不得不诺去郡之明年乃克为之铭曰

罗以国氏鼻祖咎繇晋唐有人未都大僚竭竭尚书超轶系谱攀翔帝城自结当宁台评谏纸霜凝笔端语妙鸛阁弊革天官论思十载名声寡双河图峻职钓濞辅邦七十执丧华髮素韞终始宦岐莖无一失汪龙之阳松柏布布四山如厉永閼冠屨

俞淑人墓志铭

龙图阁学士新安郡侯赠左通奉大夫罗公讳汝楫之夫人湖州安吉俞氏女也曾祖讳汝尚屯田郎中赠左正议大夫祖讳温父朝议大夫赠少师考讳俟敷文阁直学士吴兴郡侯赠右宣奉大夫绍兴二十八年五月二十七以八月二十五日终积封淑人又二年三月乙酉合葬於徽州歙县汪龙之原淑人柔嫕简静幼不嬉弄暗诵孟庄诸子书知妇人法度之事刀尺缝紵不学而工母和义郡夫人陈氏性严淑人垂髻在旁遇其笞怒妾媵必委曲营护譴者多赖以免吴兴公绣衣持斧过江东闻新安公之贤以淑人配之新安公笔耕起家尚俭朴门中无华靡之饰淑人来自冠族处之晏如前夫人有四子爱均已生新安公在谏垣御史府吴兴公以从橐尹京两家鼎贵金玃照映淑人出覲其亲有侍?之孝入翼其夫有齐眉之敬左右内外不一见其骄奢之色新安公退而里居淑人则进其子於学晨昏定省必问所以修业状俱卓然有立呜呼其贤如此四子颉泉州市舶务頌镇江府排岸愿饶州景德镇類临安府新城税颉右承奉郎頌以下皆右承务郎孙男五人女一人某既为新安公作铭其子复以淑人之铭为请乃铭曰父兮显显夫兮振振其生也何恨山兮聯聯水兮綿綿有子兮营其阡

莱国墓铭

莱国夫人姓沈氏讳德柔常州无锡人左中奉大夫讳复之孙太学博士讳松年之女魏国夫人之侄年十有六归於洪氏为太师魏国忠宣公之冢妇尚书右仆射同中书门下平章事观文殿学士鄱阳公某之夫人事魏国甫三年自嘉禾奉柩至无锡治葬时魏公留北庭予家八弟妹食指稍衆夫人职其忧厥後魏公落南予从天台归时遭秦氏废锢又往来?下家用益不足一衣一缣无不质诸人如是一星终夫人不戚戚也暨天日清明予起典州历侍从持钧枢间八年夫人六拜恩封至赐国于莱始欣欣眉伸偿已往困未尝以荣渥自大予从会稽归得别墅於城阴筑台观艺花竹夫人喜同其游临水看山常至日昃归则孙枝洗洗含饴足乐俯

育僅幼极其慈爱不幸枕疾七寒暑以淳熙六年八月二十一日薨年六十有一夫人性和易口不道人长短故中外娣姒踈近族姻终始无违言昏嫁叔妹五尽心不讳劳凡器物簪珥弗少靳病中自办敛具衣衾衾褥一一皆备身後事则无片语及之予素恶钱谷米盐之问阖门百口伏腊琐碎率皆夫人区处故梱内之事略不累予方寸得以涉园忘归呜呼而今而後无助我者矣男子九槻承议郎通判德安府秘奉议郎江西安抚司主管文字脩文林郎江东茶盐司干办公事檣宣教郎主管仙都观桴承事郎檻承奉郎监泉州市舶务承奉郎二蚤世女子三长欲嫁而卒次嫁宣教郎知分宜县许及之先二年卒次嫁宣教郎知鄱阳县薛绍孙男二十倬俨皆承务郎汲偲僦价侨侄俛侃傒传佃儻仔球俭俦伉孙女十以八年十月辛酉葬於鄱阳县怀德乡之徐村铭曰苹蘩诗缺松檟成列百岁之後与子同穴

盘洲文集卷七十七

卷七十八

钦定四库全书

盘洲文集卷七十八

宋 洪适 撰

乐章一

番禺调笑

勾队

盖闻五岭分疆说番禺之大府一尊属客见南伯之高情摭遗事於前闻度新词而屡舞宫商
通奏调笑入场

羊仙

黄木湾头声闋然碧云深处起非烟骑羊执穗衣分锦快覩浮空五列仙腾空昔日持铜虎嘉
瑞能名灼前古羽人叱召会重来治行於今最南土

南土贤铜虎黄木湾头腾好语骑羊执穗神仙五拭目摩肩争覩无双治行今犹古嘉瑞流传
乐府

药洲

传闻南汉学飞仙炼药名洲粉雉边炉寒竈毁无踪迹古木闲花不记年惟余九曜巉岩石寸
寸沦漪湛天碧画桥彩舫列歌亭长与邦人作寒食

寒食人如织藉草临流罗饮席阳春有脚森双戟和气欢声扬溢洲边药竈成陈迹九曜摩挲
奇石

海山楼

高楼百尺迓严城披拂雄风襟袂清云气笼山朝雨急海涛侵岸暮潮生楼前箫鼓声相和戢
戢归樯排几桡须信官廉蛤蚌回望中山积皆奇货

奇货归帆过击鼓吹箫相应和楼前高浪风掀簸渔唱一声山左胡牀邀月轻云破玉麈飞谈

惊座

素馨巷

南国英华赋衆芳素馨声价独无双未知蟾桂能相比不是人间草木香轻丝结蕊长楹穗一片瑞云萦宝髻水沈为骨麝为衣賸馥三熏亦名世

名世花无二高压闍提倾末利素丝缕缕聯芳蘂一片云生宝髻屑沈碎麝香肌细賸馥熏成心字

朝汉台

尉佗怒臂帝番禺远屈王人陆大夫只用一言回倔强遂令魑结换襟裾使归已实千金橐朝汉倾心比葵藿高台突兀切星辰後代登临奏音乐

音乐传佳作盖海旌幢开观合绮霞飞渡青油幕好是登临行乐当时朝汉倾葵藿望断长安城郭

浴日亭

扶胥之口控南溟谁凿山尖筑此亭俯窥贝阙蛟龙跃远见扶桑朝日升蜃楼缥缈擎天际?翼缤翻借风势蓬莱可望不可亲安得轻舟凌弱水

弱水天无际相去扶桑知几里高亭东望阳乌起杲杲晨光初洗蓬莱欲往宁无计一展弥天鹏起

蒲涧

古涧清泉不歇声昌蒲多节四时青安期驾鹤丹霞去万古相传此化城依然丹竈留岩穴桃竹连山仙境别年年正月扫松关飞盖倾城赏佳节

佳节初春月飞盖倾城樽俎列安期驾鹤朝金阙丹竈分留岩穴山中花笑秦皇拙祠殿荒凉虚设

贪泉

桄榔色暗芭蕉繁中有贪泉涌石门一杯便使人心改属意金珠万事昏晋时贤牧夷齐比酌水题诗心转厉只今方伯擅真清日日取泉供饮器

饮器贪泉水山乳??甘似醴怀金嗜宝随人意任受恶名难洗真清方伯端无比未使吴君专美

沈香浦

灾区万国侈奇香捆载归来有巨航谁人不作芳馨观巾篋宁无一片藏饮泉太守回瓜戍搜索越装舟未去薏苡何从起谤声沈香不惜投深浦

深浦停舟处只恐越装相染污奇香一见如泥土投着水中归去今公早晚回朝着无物迟留鸣櫓

清远峡

腰支尺六代难双雾鬓风鬟巧作粧人间不似山间乐身在帝乡思故乡南来万里舟初歇三峡重过惊久别玉环留着缀相思归向青山啸明月

明月舟初歇三峡重过惊久别玉环留与人间说诗罢离肠千结相思朝暮流泉咽雾锁青山愁絶

破子

南海繁华最城郭山川雄岭外遗踪嘉话垂千载竹帛班班俱在元戎好古新声改调笑花前分队高会樽罍对笑眼茸茸回盼睐蹋筵低唱眉弯黛翔凤惊鸾多态清风不用一钱买醉客何妨倒戴

遣队

十眉争艳眼波横蛺蝶袖回风曲已成绛蜡飘花香卷穗月林乌鹊两三声歌舞既终相将好去

勾降黄龙舞

伏以玳席接欢杯灑东西之玉锦裯唤舞钗横十二之金咸注目於垂螺将应声而曳茧岂无本事愿吐妍辞

答

眄流席上发水调於歌唇色授裾边属河东之才子未满飞鹑之愿已成别鹄之悲折荷柄而愁缕无穷剪蛟绡而泪珠难贯因成絶唱少相清欢

遣

情随杯酒滴郎心不忍重开翡翠衾封却软绡看锦水水痕不似泪痕深歌罢舞停相将好去

勾南吕薄媚舞

羽觞碁布洽主礼於良辰翠袖弓弯奏女妖之妍唱游丝可倩本事愿闻

答

踏软尘之陌倾一见於月肤会来苹之洲迷千娇於雨梦且蛾眉有伐性之戒而狐媚无伤人之
心既吐艳於幽闺能齐芳於节妇果六尺之躯不庇其伉俪非三寸之舌可脱於艰难尚播
遗声得尘高会

遣

兽质人心冰雪肤名齐节妇古来无纖尘不蛻西州路争得人知是艳狐歌舞既阑相将好去

渔家傲引

伏以黄童白叟皆是烟波之钓徒青笠绿蓑不识衣冠之盛事长浮家而醉月更辍调以吟风
乐哉生涯翻在乐府相烦女伴渔父分行

词

正月东风初解冻渔人撒网波纹动不识雕梁并绮栋扁舟重眠鸥浴鴈相迎送溪北画桥弯
蝶蛺蝶溪南古岸添青葢长把鱼钱寻酒瓮春一梦起来拈笛成三弄二月垂杨花糝地荻芽迸
绿春无际细雨斜风浑不避青笠底三三两两鸣榔起新妇矶边云接袂女儿浦口山堆髻一
拥河豚千百尾摇食指城中虚却鱼家市三月愁霖多急雨桃江绿浪迷洲渚西塞山边飞白
鹭烟横素一声欸乃山深处红雨缤纷因水去行行寻得神仙路楼阁五云心不住分凤侣重
来翻恨花相误四月团荷钱学铸鳞鳞波暖鸳鸯语无数燕雏来又去鱼未取钓丝直上蜻蜓
聚风弄碧漪摇岛屿奇云蘸影千峯舞骑马官人江上驻天且暮借舟送过沧浪渡五月湖中
菱芰遍丝纶欲下相萦绊却棹舩来芳草岸呼侣伴蓑衣不把金章换碧落云高星烂烂波心
举网星光乱跃出鲤鱼长尺半回首看孤灯一点风吹散六月长江无暑气怒涛漱壑侵沙觜
颭颭轻舟随浪起何不畏从来惯作风波计别渚藕花舒锦绮采莲三五谁家子问我买鱼相
调戏飘芰制笑声咭咭花香里七月凛秋飞叶响长吟杳杳澄江上秃尾槎头澄一网丝自纺
新炊菰饭更相饷渡口青烟藏叠嶂岸傍红蓼翻轻浪鰖沈浮双漾漾闻鸣桨高飞拍拍穿
林莽八月紫萼浮绿水细鳞巨口鲈鱼美画舫问鱼篙暂櫂欣然喜金螯顷刻尝珍味涌雾驱
云天似洗静看星斗迎蟾桂枕棹眠蓑清不睡无名利谁人分得逍遥意九月芦香霜旦旦丹

枫落尽吴江岸长濲黄昏张蟹断灯火乱圆沙惊起行行鴈 半夜系船桥北岸三杯睡着无人
唤睡觉只疑桥不见风已变缆绳吹断船头转十月橘洲长鼓枻潇湘一片尘缨洗斩得钓竿
斑染泪中夜里时闻鼓瑟湘灵至 白髮垂纶孙又子得钱沽酒长长醉小艇短篷真活计家云
水更无王役更田税子月水寒风又烈巨鱼漏网成虚设圉圉从他归丙穴谋自拙空归不管
旁人说 昨夜醉眠西浦月今朝独钓南溪雪妻子一船衣百结长欢悦不知人世多离别膈月
行舟冰凿罅潜鳞透暖偏堪射岁岁年年篷作舍三冬夜牛衣半暖何须借
滕六晓来方命驾千山絶影鸟飞怕江上雪如花片下宜入画一蓑披着归来也

破子

渔父饮时花作荫羹鱼煮蟹无他品世代太平除酒禁渔父饮緑蓑藉地胜如锦

渔父醉时收钓饵鱼梁?翅闲乌鬼白浪撼船眠不起渔父醉滩声无尽清双耳

渔父醒时清夜永澄澜过尽征鸿影略略风来欹舴艋渔父醒月高露下衣裳冷

渔父笑时莺未老提鱼入市归来早一叶浮家生计了渔父笑笑中起舞渔家傲

遣队

春留冬及一年中杜若洲边西又东舞散曲终人不见一天明月一溪风水緑山青持竿好去

盘洲文集卷七十八

卷七十九

钦定四库全书

盘洲文集卷七十九

宋 洪适 撰

乐章二

鹧鸪天【次李举之见寄韵】

报答风光思更新安排好语续阳春罗曾玉藻英华别信手银钩点画匀
歌妙曲想光尘相望尺五叹参辰曲终强对红颜笑欠我高谈惊座人

生查子【收灯日次李举之韵】

廉纖小雨来噤瘳轻寒乍丝竹送迎时灯火阑珊夜
铜壶漏故迟银烛花频炧怀我独醒人健笔方飞洒

蝶恋花

漠漠水田飞白鹭夏木阴阴巧啜黄鹂语金鑊诗人新得句江山应道来何暮
好向金门聯步武何事双旌却为丹丘驻琼笋十分须一举看看紫诏催归去减字木兰花【曾猷父落成小合次其韵】

藩车容裔挺挺风流追两地粲斗分星诗句当年汗简青
疎帘披绣共看横云晴出岫新月如钩来照琼彝醉小楼

好事近【东湖席上次曾守韵时莫曹同席】

风细晚轩凉妙句初挥新墨綠水池中宾佐对嫩荷擎綠
坐看新月上云头清臂【阙】寒玉只恐朝来酒醒有文书羈束

虞美人

芭蕉滴滴窗前雨望断江南路乱云重叠几多山不似倦飞鸥鹭便知还
角声更听谯门弄夜夜思归梦鄱江楼下水含漪辜负钓滩烟艇綠蓑衣

卜算子【席上赠瞻明】

修竹拂疎棂淡月浸凉榭四畔青山进好风金鸭香煤炷
宝唾粲珠玑长袖飘兰麝莫问更楼夜若何且结高阳社

江城子【赠举之】

冥冥云屿两经秋落霞收断烟留小合凉生清馥凝金虬乘兴开颜那草草烦玉腕举琼舟
明年此日楚江头极层楼望丹丘只恐溪山千里碍凝眸重倚栏干相忆处寻过鴈作书邮

减字木兰花【太守移县饯行县偶作】

使君情愔念我明朝移县去一醉相留和气欢声到小楼
暂时南北莫唱渭城朝雨曲此去农郊收拾童儿五袴谣

浣溪纱

邦伯今推第一流几因歌席负诗筹一时文采说台州雨脚渐收风入牖云心初破月窥楼翠
眉相映晚山

秋

望海潮【题双岩堂】

重溟倒影五芝含笑神仙今古台州山拥黄堂烟披画戟双岩瑞气长浮前事记鳌头有百年
台榭千室嬉游墨宝凄凉风凌雨蠹尽悠悠规恢共仰贤侯当政成五月景对三秋飞栋干云
虚櫺受露放怀不减南楼宾燕奉觥筹妙绮笺琼藻声度歌喉只恐棠阴成後趣去侍凝旒

好事近

小合过重阳愁对轻篁团色喜得蛩牋新唱似夜光明月
萸房菊蕊定相怜酪酎娱蕉叶犹记去年今夜听歌声清切

清平乐【次曾守韵】

风鬓飞乱寒入秦筝鴈情似云阴浑未展两脚更飘银线
横枝有意先开玉尘欲伴金罍何日舞裯歌扇後堂重到惟梅【郡有惟梅堂】

选冠子

雨脚报晴云容呈瑞夜雪萦盈连昼千岩曳缟万瓦堆琼稍稍冷侵怀袖鹤擎神仙兔园宾客
高会坐移清漏想灞陵桥畔苦吟缓辔耸肩寒瘦 向此际色映堂阴香传梅影寒力更欺尊酒
左符词伯蛮牋巧思不道起风飞柳舞态弓弯一声低唱蛾笑绿分烟岫任盃行潏潏为公沈
醉莫教停手

好事近【为钱处和壽】

缥酒颂青春不减宜城桑落楼下玉人凝笑散万英千萼
绣衣当日帝王州横飞看雕鹗闻道赐环书下向金门持橐

鷓鴣天【次曾守游梅園韵】

领客携尊花底开薄寒初送雨声来一声未弄林间笛几片低飞阁下梅
酬的慙少迟回不妨春雪散银杯玉肌莫放清香散更待晴时赏一回

浣溪纱【饯范子芬行】

整顿春衫欲跨鞍一杯相属少开顏愁蛾不似旧时弯未见两星添柳宿忍教三叠唱阳关相
思空望会稽

山

又【以鸳鸯梅送曾守是日曾守携家游南园】

报道倾城出洞房水边疎影弄清香风流更有小鸳鸯蝉鬓半含花下笑蛾眉相映醉时粧梦
魂不到白云乡

又【以鸳鸯梅送钱漕】

玉颊微醺怯晚寒可怜凝笑整双翰枝头一点为谁酸只恐轻飞烟树里好教叙插鬓云边淡
粧仍向醉中看

又【席中答钱漕】

忆得熙春晓立班使星曾入紫微垣归来小饮友芝兰投辖风流今复见开尊礼数自来寬更
看宝唾写乌栏

清平乐【以千叶粉红牡丹送曾守】

轻红淡白蓬闾神仙谪魏紫姚黄夸异色到得海边初识
玉栏不语如顰虚教春尽三分却问檀心谁向多情更属东君

生查子

桃疎蝶惜香柳困莺惊絮日影过帘旌多少愁情绪红惨武陵溪緑暗章台路春色似行人无意花间住

思佳客【次韵蔡文同集钱漕池亭】

花信今无一半风芙蓉出水几时红看成弱柳阴阴緑自在迁莺巧语中
风傍户月留空金尊相对醉珠玑归鞭欲指江南处回首霞标忆旧峯

朝中措【曾守生辰】

当年召父治南阳千室颂慈祥今代天台太守声名已达岩廊
风流闲暇胡牀乘兴燕寝凝香好去花甌视草珠庭喜见微黄

江西文派有新图诗律嗣东湖十首齐安书事君王曾问相如
牙籤繙架银钩落纸美玉明珠见说诏藏金匱後來天下浑无

又【邓盐生日】

青云垂下不争程绣斧寄澄清黄木湾头人闹耳边都是欢声
仙家咫尺波涵渤解路挹蓬瀛十日东君不老一星南极长明

又【师生日】

斗南楼阁舞祥云为寿几多人有客恰如东海年年为满金樽
无双治行儿童咏德草木沾仁只把空虚三院亦须笑傲千金

又【苏少连母生日】

西崑当日下云輶采藻奉苏仙玉节荣看常棣斑衣笑俯芝兰
寿觴争举歌紫蛾緑香袅龙涎须与寄声鸾鹤飞来岁岁年年

又【黄师宪侍儿倩奴】

嘉禾一别十经春清泚记垂纶今日天涯沦落遽然一见佳人

酒浮重碧声低云叶香
趣霞裙准拟魁星归去
他时相会金门

浣溪纱【壽方稚川】

占得登高一日先跨云来作地行仙
天将黄菊助长年健笔已凌枚叟赋
高怀欲着祖生鞭駮駮影组向甘泉

临江仙【邓盐生日】

向日鵷行瞻凤彩共朝直上金銮
却来持节海云边身兼三使者名是一仙官
汉室中兴高密冠千年苗裔蟬连左弧嘉庆儋祥烟橘中招四老同醉酒如泉

又【会黄魁】

北斗南头云送喜人间快覩魁星
向来平步到蓬瀛如何天上客来佐海边城
方伯娱宾香作穗风随歌扇凉生且须灑灑引瑶觥十年迟凤诏万里寄鹏程

又【稚川生日】

钓濑怀珠山韞玉谪仙至自蓬莱
他年勲业上云台棣华开幕府莲沼屈英才
南极隆光秋烂烂门阑香雾紫回须将寿卉荐琼杯篱东明日菊借取一枝来

又

烟湊横岚霞抱日望中衰草稠稠
西风吹恨着扁舟马卿多病後方寸不禁秋
颇念银壶行緑醕共听渔子清讴梦魂飞过海山楼人随秋易老情寄水东流

又【傅文生日】

干吕青云垂宝露结邻恰挂初弦
瑞光腾踊杂非烟骑箕瞻鼻祖孕昴控胎仙
勲业子卿全汉节壮怀久寄林泉举觴低唱脸舒莲寿高人七十果熟岁三千

又【寿周材】

瓜瓞緜緜储庆远闲平代有名人
一襦五袴说朱轮云逵鸳缀近雷社虎符新
政是泗滨浮磬日潘舆一粲欣欣鸾歌飞起杏梁尘巢莲龟问岁介寿酒融春

又【送罗倅伟卿權新州】

远驾星屏临百粤康沂户户歌功使君五马去乘骢卖刀无旷土赠扇有仁风
莫唱渭城朝雨曲片帆时暂西东促归行拜紫泥封云霄先步武三接未央宫

江城子 【黄魁】

当年提笔上词坛琢琅玕涌波澜晁董声名一日满人间底事远烦骐驎足梅岭外砚云边
元戎倾盖有余欢酒杯宽语离难只恐江滨明日起青翰暂去平分风与月迎细札步金銮

又 【黄宪生日代作】

江如罗带抱山青好风轻五云横北斗南边晔晔使华星两路平反多少事培吉德賚长生
当年乌府振冠缨稔英声起鹏程垂上丹霄回首志澄清雪片深深梅着子归路近看和羹

醉蓬莱 【代上陈帅生日】

正中秋初过重阳相近金茎多露玉燕开祥喜气浮庭户览凤千峯骖鸾八桂未展青云步碧
玉簪边红莲池上羽仙旁午 少日声名珠玑黼黻晬 分符喧轰持斧带缓裘轻足远人襦袴
唇注樱桃腰欺杨柳歌舞新蛮素满酌金觥寿公千岁东台西府

满庭芳 【代上陈帅生日】

昴宿光芒德星家世当时飞舞华旗风清玉宇珠露缀瑶枝八桂苍苍耸壑问椿木同数秋期
黄堂上油幢转影美酒注金卮 英纒名字早青箱传学黄绢摘词说江东治行召杜肩齐畏爱
双行五管收绣斧却把旌麾欢声沸明年此日公在凤凰池

千秋岁 【代上帅宅生日】

顔朱鬢緑天与穰穰福旄钺贵崇汤沐华轩鱼映锦紫诰鸾回幅为寿处玻璃凿落斟醪醕
瑞雾蟠华屋露浥秋兰馥香篆起歌裙簇衣斑丹穴凤色润东牀玉鸾共鹤年年来听神仙曲

眼儿媚

黄堂风转碧幢开笙鹤九天来三冬爱日一方惠露人在春台
持盃多赞松乔喜低唱列金钗明年此日紫微垣里光应中台

鹧鸪天 【胡提舶生日】

月上初弦映左弧葭吹六琯转璿枢日边远近瞻新渥天下中庸系两都
犀献角蚌回珠皇皇星节烛扶胥满斟北海樽中酒请寿安期润底蒲

长相思

朝思归暮思归塞鴈三年不见飞断肠天一涯 千思归万思归梦到窗前拂淡眉觉来双泪垂
又

柳青青酒清清雨脚涔涔忆渭城一尊和泪倾 山青青水清清水阔山重不计程愁堆长短亭
好事近【别傅文】

柳岸碧漪深底事催人行色无计曲留情话只别愁如织
小蛮樊素两倾城几度醉狂客明日扁舟西去听歌声不得

点绛唇【别宪帅】

天末相逢醉中不讶车茵污一声鸣橹惊散眠沙鹭我是行人却送行人去听金缕莫辞甘醕
别泪飞寒雨

南歌子【童岭作】

云拂山腰过风吹雨点来田园好处有池台记着相逢时节海棠开蝴蝶那无梦鸳鸯亦有梅
藏钩解佩两三杯明日水边沙际首空回

好事近

烂漫海棠花多谢东君留得眉寿堂边风景与蓬瀛咫尺
桃红李白竞争妍绿野尽春色只欠樱唇清唱怕行云南北

盘洲文集卷七十九

卷八十

钦定四库全书

盘洲文集卷八十

宋 洪适 撰

乐章三

生查子【盘洲曲】

带郭得盘洲胜处双溪水月榭间风亭叠嶂横空翠团栾情话时三径参差是听我一年词对景休辞醉

二

正月到盘洲解冻东风至便有浴鸥飞时见潜鳞起高柳送青春春在长林里绿萼一枝梅端是花中瑞

三

二月到盘洲繁缣盈千萼恰恰早莺啼一羽黄金落花边自在行临水还寻壑步步肯相随独有苍梧鹤

四

三月到盘洲九曲清波聚修竹荫流觞秀叶题佳句红紫渐阑珊恋恋莺花主芍药拥芳蹊未放春归去

五

四月到盘洲长是梅黄雨屐齿满莓苔避湿开新路极望绿阴成不见乌飞处云采列奇峯絶胜看庐阜

六

五月到盘洲照眼红巾蹙勾引石榴裙一唱仙翁曲藕步进新船鬪楫飞云速此际独醒难一金钲覆

七

六月到盘洲水阁盟鸥鹭面面纳清风不受人间暑彩舫下垂杨深入荷花去浅笑擘莲蓬去却中心苦

八

七月到盘洲枕簟新凉早岸曲侧黄葵沙际排红蓼团团歌扇疎整整炉烟裊环坐待参横要乞珠丝巧

九

八月到盘洲柳外寒蝉懒一掬木犀花泛泛颇黎盏蟾桂十分明远近秋毫见举酒劝嫦娥长使清光满

十

九月到盘洲华髮惊霜叶缓步遶东篱香蘂金重叠橘绿又橙黄四老相迎接好处不宜休莫放金尊歇

十一

十月到盘洲小小阳春节晚菊自争妍谁管人心迹木杪簇芙蓉禁得霜如雪心赏四时同不与痴人说

十二

子月到盘洲日影长添线水退露溪痕风急寒芦战终日倚枯藤细看浮云变洲畔有圆沙招尽云边鴈

十三

腊月到盘洲寒重层冰结试去探梅花休把南枝折顷刻暗同云不觉红炉热隐隐绿蓑翁独钓寒江雪

十四

一岁会盘洲月月生查子弟劝复兄酬举案灯花喜曲中人半酣添酒留罗绮车马不须喧且听三更未

阮郎归

澄清阁下藕如船
扁舟曾采莲
向来辛苦叠青钱
而今知几年
人去也客凄然
酒泉添泪泉一杯
今夜且留连
断肠芳草边

浣溪沙【席上别王巨济先是两姬免冠王夺两秩继以章罢】

丹桂飘香已四番
杖藜携手自今难
黯然离恨满江干
壁上两冠元是?花前双韵几时弹
中秋後夜与谁

看

满江红

暮雨萧萧飞败叶
增添秋色登高会
痴风吹散山居嘉客人
世难逢开口笑
老来更觉流年迫
到於今黄菊满园开
无人摘珠履
凑铢衣窄紫翠裙催
牙拍索松儿添半战
酣相吓橘绿橙黄时节好
舞停歌罢门墙隔
酒醒时枕上一声鸡
东方白

又【郑宪席上】

累月愁霖知今夕
是何天色秋老矣
芙蓉遮道黄花留客长
有霜螯来左右
谁言枥马能煎迫
眄高穹重叠起
顽云星难摘
罗绮盛牕轩
窄心已醉肩须拍
更十分行酒再三相吓
凤诏十行归路近
桂华千里明年隔
趁闲时楼上共凝眸
芦花白

临江仙【盘洲饯汉章】

两载绣衣频驻节
金莲曾印青苔
匆匆归去寿琼杯
曲终挥别泪
江上片帆开
记得秋宵山吐月
酒酣同上层台
杖藜何日解重来
相思凭过鴈
飞送一枝梅
浣溪沙【景庐以米书眉间一点黄之曲饯送郑宪因用其韵】

举目霜林叶叶黄
使星归骑未须忙
烟鬟千叠弄残粧
内殿恩光承雨露
外台风力挟冰霜
应怀三径杂花

香

又【席上再作】

不见丹丘三十年
青山碧水想依然
自惊绿鬓已苍颜
月在柳梢人径醉
雨荒院菊有谁怜
绣衣归与故人

言

生查子【姚母寿席以龟游莲叶盃酌酒】

碧涧有神龟千岁游莲叶七十古来稀寿母盃频接绣衣牵彩衣喜庆相重叠龟紫萃孙曾鹤髮何须镊

又【枕上作】

贪看端木花难办销金帐庭下舞琼瑶飞到?眉上衰病不禁寒对景频惆怅梦寐到凌风倚着青藜杖

鹧鸪天【席上赏牡丹用景裴韵】

莫问甘醪浊与清试将一酌破愁城海棠过後荼蘼发堪叹人间不再生
心已老眼重明嫣然国色带朝醒耳边听得兰亭曲一咏流觴已有名

又【十九孙入学因作小集次景裴韵】

两塾弦歌日日春不容坐席更凝尘常思芳桂攀燕窠未见童乌继子云
流庆泽仰家尊揅荒阴德过于门从师已是平原客毛遂怀绷作弄孙

好事近

春意渐盈盈窗外小桃堪折若问得人怜处是轻颦时节
主人特地出红粧不要云心月三径虽然冷淡有采莲舟楫

满江红

春色匆匆三分过二分光景吾老矣坡轮西下可堪弄影曲水流觴时节好茂林修竹池台永
望前村綠柳?茆檐云封岭蜂蝶鬧烟花整百年梦如俄顷这回头陈迹漫劳深省吹竹弹丝
谁不爱焚琴煮鹤何人肯尽三觥歌罢酒来时风吹醒

又【立夏前一日景卢借坡公韵】

雨澍风慳双溪闷几曾洋溢长长是飞霞散綺岫云凝碧修禊欢游今不讲流觴故事从何覓
待他时水到却寻盟筹输一燕舞倦莺吟毕春肯住才明日欠池塘綠皱小荷争出童子舞云
浑怅望吾人提笔谁飘逸记去年修竹暮天寒无纵迹

又【和徐守三月十六日】

雨过春深溪水涨绿波溶溢桃李是杨花吹絮草茵凝碧驹隙光阴身易老槐安梦幻醒难覓
筭六分春色五分休才留一鴈鹭静文书毕尘外趣壶中日喜兰亭修禊郊垌炊出合璧连珠
同啸咏怒猊渴骥尤清逸酒斟时梁上暗尘飞无痕迹

又【荅景卢】

衰老贪春春又老尊罍交溢凝目处清漪拍岸四山堆碧白也论文情最厚维摩示病心难覓
到盘洲车骑太匆匆觴浮一春再见官期毕归路近长安日奉清时明诏送回更出上殿风霜
生颊齿元龟献替图无逸记而今杖策过溪桥留行迹

又【黄堂席上荅太守】

燕寝香凝官事了诗情充溢归後院花容争媚柳眉添碧老子胡牀常自叹轻裙长袖从何覓
探城楼此际夜如何更筹一人已老春将毕临曲水才旬日快朝来雨过鱼儿争出淡酒一杯
空酩酊黄堂千骑真安逸问朱幡何日到丘园聯綦迹

又【席上荅叶】

百计留春春不住愁怀填溢争如对宝梳压鬓翠环铺碧紫绶金章都是梦云庐花坞如何覓
劝金杯浅笑傍宾筵须均一前夜月新离毕收澍雨呈红日荷主人情重五云齐出一颗樱桃
天付与数声水调人飘逸叹荒园三月百花残无踪迹

南歌子【雪中和景裴韵】

闰岁饶光景中旬始打春拥炉看雪酒催人梁上不曾飞落去年尘
未暇巾车出何妨举盞频斜川日月已成陈想得前村仙子晚粧匀

又【呈叶宪】

多病都缘老寒阴可惜春栽桃种竹怕因循移转篮舆藤杖未开门
真率须如约安排欲效顰莫将箏笛损精神自有啼莺舞鹤解随人

又【示景裴弟时叶宪明日率真】

顽健输村老嬉游付後生七旬才有五清明须趁良辰美景遶园行
云意将飞雪天心未肯晴难将性命作人情只合拥炉清坐閱医经

又【喜晴用前韵】

住得如筛雪方欣有脚春谁云三尺不须寻若是诗僧月下许敲门
钜竹多中断残梅竞小颦畦丁说与主林神扫洒板桥前径待吾人

又【示裴弟】

强作千年调难踰五度春脊令继踵漫相循休要关心药裹也扃门
蕙帐银杯化【自谓】纱窗翠黛颦【谓弟】烧香试问紫姑神一岁四并三乐几多人

又【寄景卢】

南浦山罗列东湖水渺弥主人好客过当时斗转山横时候醉如泥
莫管莺声老从他柳絮飞野园春色别无奇船上有花多酒未须归

好事近【席上用景裴咏黄海棠韵】

睡足淡梳粧喜见诗人元白不觉艳红妖紫坏花仙飞格
须知玉骨本天然不是借人力准拟小春重看望秋灰无射

卜筮子【太守席上作】

五凤望中仙五马人间贵舞态歌声尽出羣乌鹄巡檐喜
昨夜值狂风痛饮元无味说与谿门漫打更却怕催归骑

满庭芳【辛丑春日作】

华髮苍头年年更变白雪轻犯双眉六旬过四七十古来稀问柳寻花兴懒拈筇杖闲遶园池
尊中有青州从事无意唤琼彝人生何处乐楼台院落吹竹弹丝奈壮怀销铄病费医治漫道
游鱼听瑟弦绿绮山水谁知盘洲怨盟鸥间濶瘞鹤立新碑

又【酬徐守】

风搅花间雨怪柳下人人懒拂愁眉年荒省事投辖井中稀架上舞衣尘积弦索断箏鴈差池
南柯梦转头陈迹饥鼠穴空彝新年官事少秋蛇春蚓重叠乌丝更出奇花判百病都治报道
行厨办也乌鹄喜龟鹤前知更书近鴈行浸远长对去思碑

又【酬叶宪】

帶酒消愁逢場作戏何曾擇地伸眉詩筒來往如我與君希喜得青春有潤添日月歎曲臨池
盤洲有山肴野?安用設鷄彝老來空自笑一頭梳雪兩鬢吹絲便常逢社飲聳不堪治曾就
新年真率花神報蜂蝶皆知東風惡江梅欲盡荐福莫叢碑

又【和叶宪韵】

柳徑花台熙熙春動游人珥墮簪遺枯藤到處綠刺惹冠衣雪後園林更好琮作佩香滿橫枝
巡檐久留連一笑不管午陰移盤洲今雅集皇華飛蓋揮塵遲遲覺龜魚增價草木生輝梁上
不教塵落談文字酒散星希明年好玉津隨駕回首記襟期

又【再贈叶宪】

同病相憐凍吟誰伴漫懷舉案齊眉槐安夢境一笑自來希未到斜川見雪春飲半尚壓銅池
今思古拊盆擊筑蛩鼎問夔彝何時天意解并游花塢旋掃蛛絲對壺中閑日冗牒休治四坐
同盟情話飛玉塵萬事多知杯盤省淺斟隨意真率視前碑

又【答景盧遣懷】

蝴蝶夢魂芭蕉身世幾人得到龐眉十分如意天賦古今希晝日猥叨三接摩?翼曾化鯢池槐
陰下深慚房魏那敢作封彝鴈行爭接翅北門炬燭西掖綸絲幸歸來半世園路先治漁唱樵
歌不到鸛燕語何畏人知編花史修篁千畝封植具穹碑

又【酬趙泉】

春日花畦雪迷筠塢柳梢未肯低眉泥深路滑車馬往來稀平地琮琤盈尺冰凍解澹水如池
皇華喜爭添泉貨不鑄尚方彝光陰駒過隙髭髯如戟容易成絲把詩盟長講酒病休治兩兩
垂螺舞徹藏羌管人已潛知檣烏轉錢流地上褒詔便刊碑

又【酬趙宪】

當國無功歸田有分四山濃抹烟眉春雲多變清晝惠風希欲踵蘭亭故事溪水漲簪盍鷺池
臨修竹一觴一咏考古到辛彝當時龍袞側親聞臚句天語如絲漫三年博士局冗爭治底事
綉衣留滯青天瑞奴隸皆知迎歸詔鸞台鳳閣名記壁間碑

又【再作】

草閣烟橫花蹊雨潤傷春誰畫鴉眉藥囊未減尊酒自然希堪嘆雲和挂壁弦半絕鼠啮龍池
投壺罷凭欄玩古羅列父丁彝龜巢添綠皺殘梅片片新柳絲絲恨風狂折竹鶴病誰治自信
年衰景短甘冷淡應也天知壩簾奏清歌醉墨一一上圭碑

又【景卢有南昌之行用韵惜别兼简司马汉章】

雨洗花林春回柳岸窻间列岫横眉老来光景生怕聚谈希何事扁舟西去收杖屨契濶鱼池
流觴近诗筒暫歇焉用虎文彝 良辰怀旧事海棠花下笑摘垂丝叹五年一别万病难治几处
绣衣尘迹歌舞地乌鹊曾知君今去珠帘暮卷山雨拂崇碑【汉章作山雨楼景卢为之记】

又【再作寄卢景】

旧日盘洲藏钩卜夜松儿笑拣双眉老人好静此乐数年希尚记乘舟西遡楼卷雪曾到雷池
今非昔畏寒闭户弃擲夏商彝 入春踰两月轻烟非雾细雨如丝任风颠花架不憚装治想得
醉吟膝阁家园事争解详知归来好猿惊鹤怨孤负辋川碑

望江南【荅徐守韵】

嗟故岁夏旱复秋阳十雨五风皆定数千方百计为灾伤小郡怎禁当
劳抚字惠露洽丁黄田令吹烟常蔽野居民安堵不离乡祖道免齎粮

又【再作】

倾盖侣古语诵邹阳曲水一觴今意懒阳关三叠重情伤离恨落花当
人截镫归骑莫仓皇谁肯甘心迷簿领不如袖手傲家乡高枕熟黄粮

西江月【雪中】

小室坐氈重叠红炉兽炭交加一卮村酒吸流霞窻外寒威可怕
心在盘洲种柳眼看密雪飞花银杯缟带不随车江上渔蓑难画

又【再作】

席上酒杯难减鼎中药味频加老人争得脸如霞镜里衰容人怕
檐溜尽成冰柱前村变却梅花琼瑶破碎为行车冻雀盈枝堪画

盘洲文集卷八十

附录

钦定四库全书

盘洲文集附录

宋尚书右仆射观文殿学士正议大夫赠特进洪公行状

曾祖炳赠少保曾祖母何氏赠纪国夫人祖彦先赠太师秦国公祖母董氏赠秦国夫人父皓徽猷阁直学士赠太师魏国公諡忠宣母沈氏赠魏国夫人本贯饶州鄱阳县年六十八

公讳适字景伯其先徽州人唐末避乱徙乐平之洪岩世以耕桑为业自高祖府君【士良】笃义方之训力教子孙每以事过郡至潞潭爱其山朝水抱可卜宅兆则郑重求之立庾屋其上为往来贮储地疾革命家人曰葬我必於彼後世青紫当不絶越十六年为元丰乙丑长孙给事中【彦昇】遂以进士起家是为公伯祖又三十年政和乙未曾孙忠宣公继之是为公皇考又二十七年绍兴壬戌公与介弟文安公【遵】中博学宏词科後三年仲弟今敷文阁待制同修国史【迈】继之给事之後官者七忠宣之弟侄官者九子孙曾孙官者二十六忠宣尝叹曰秦氏置我死地曾祖潜德焘後而禔章无因齎恨泉下矣公初除执政即当转官勾高祖恤典上惻然从之诸公议以大夫告第既有尼之者遂寢公为儿时已颖异十余岁日诵三千言忠宣连【缺】因寓嘉禾及使北公年才十三已能颞任门户时值敌骑犯吴间关奉秦国魏国挟五弟三妹归鄱阳指衆食贫忠宣奉入在秀复迎挈以往凡九年而魏国弃诸孤忠宣又久留朔方公茹悲含辛破涕自力以奉秦国之欢躬率三弟刻意问学为文自出机杼皆中程度一时名人多折辈行与之交外氏居无锡公奉魏国之丧往依以葬时河南复为王土尝拟宰臣贺表有宣王复文武之土光启中兴齐人归郛讙之田不失旧物之句仲舅博士沈公【松年】一见奇之勉以为宏博之习初用出使恩得修职郎监南狱庙调严州录事参军浙西提举常平司干办公事既以词科赐第宰臣进读制词太上皇曰父在远其子能自立为可嘉宜与陞擢差遣於是为勅令所删定官改左宣教郎入秘书省为正字才数月忠宣南归以直忤秦桧即去国公以奉亲自列通判台州将终更忠宣有英州之谪台守与公不相能尝行县至黄岩令以繫囚十数辈匿堂庑间诡以狱空告公坐令听事闻大呼声即诘视诸囚皆叫号称冤因备其事申诸司归白守守以为不关白长官撰弹文迎秦意秦讽言官上之坐免官往来於英以奉忠宣温清里门聚食数百指皆仰给於公公处之怡然凡九年而忠宣薨服除起知荆门军以惠爱为政首奏便民四事太抵以均敷茶额钱所出甚於常赋茶商执害民之柄而托吏为奸民力重困官田以附种为名而不稼纳租麴引失立法之意而重叠出镪大札代它州之贡而多方取办乞罢行之又荆门自兵火後学校废弛遇大比则附试江陵解额五才得一慨然以作成为已任力请於朝由是军得自解发额亦稍增其旧改知徽州先是朝廷立赏鬻官田当路急於受赏督迫甚峻属邑一切望风公下车民竞赴愬公曰赏可慕民独不可爱耶乃戒属邑有虐吾民者必劾已而使者罢去民卒得寛郡多讼分产不平者公究其端以官印关书吏倍有邀索民宁匿关而惮费以故成讼公下令许民持关立庭下不以蚤莫即时呼吏印给之无毫髮费旧讼顿息其简易近民率如此提举浙西常平茶盐事诣阙且

对适文安知平江府引嫌当避乃移节江东尝奏论役事其略曰元佑指挥合役坐闲人户不及三番处令雇募苏轼谓圣恩欲使百姓空闲六年是以绍兴二十六年之旨歇役六年者与白脚同行之数年下户得以宽佚间者宣州守臣有请欲不候六年再差上户有司误以歇役六年之文冲改下户畏避多致流徙盖土户税钱有与下户相去十百倍者必俟差遍下户则富家经隔数十年方再执役臣守徽州以婺源一县言之有差及一贯税钱者民间哀诉诚为可念乞仍行二十六年指挥庶使细民鼓舞德泽又如一都之内上等五户税钱各五十千中等五户税钱各三十千各曾应役若以歇役六年再差恐中等五户侥幸终免乞自第一户差至第十户然後再差所贵役法均平上下称便人以为切中役法之弊江东实为乡部公又尝兼提点刑狱事风采凛然不可干以私逆亮败盟有旨令沿江监司条具恢复事公上奏谓逆亮既殒大定嗣位未必诸国服从若能仰顺天时遣使归疆则王师不血刃而得土宇实天下之幸万一敌众尚强自淮以北别无争立之人则宜多遣有胆力人密传诏檄使中原义士各取州县因以畀之王师但留屯淮泗募兵积粟以为声援不必轻涉其地以务力争俟蜀汉山东之兵数道俱集见可而进迟以岁月必有机会可乘恢复故地何翅破竹庶几兵力不顿可以万全车驾亲征至建康因上殿陈言江乡之民以旱荒而迁徙淮甸比遭敌骑之扰复还故乡则所弃之产已为官司估卖形势之【缺】者十不偿一佃者量纳租课无补於官而有害於民乞断自绍兴二十八年以後凡州县所卖逃产许原业人子孙以原估价就赎专委提举常平官觉察太上褒予甚饰时待制为右史受命迎使客入对太上顾其副张抡曰洪某三子其材皆可用公激烈初心念先志之未酬每思尽瘁曰边防曰民兵曰防江曰积粟曰赈济流民皆次第为朝廷言之除尚书户部郎中总领淮东军马钱粮当海州解围又有符离甲申之役沿淮列戍襁负而归者踵相蹶供亿之费数倍於曩时公以书生从容心计略不见其趣迫之色有旨犒解围军兵而镇江府前军之右军与太平州之武锋军以在围中独不预公从权比附且倍其赏军士莫不驩呼又以便宜招安海道尝为过者又谓沿边已招纳降人若使之饥寒失所则必怨望如萧扎巴一家余二十口券钱最多日不过千六百金尚不给用则其余可知乞将已有官人与给料历进勇副尉与依武勇给券四口或五口以上亦与添给口食其临事机识大体类是总所建治京口名虽淮东而所总多江东浙西财赋尝奏乞以浙西江东财赋入御勿复增荐举添官属庶名正事顺可以办集又尝请於朝皆为户部所沮公登政府始请行之淮东至今蒙赖就除司农少卿隆兴二年二月召还改太常少卿权直学士院旋又兼权礼部侍郎上初讲郊丘之仪公建议合进胙德寿宫及改定乐章并郊回用雅乐与减乐工之冗员皆当於礼而适於时文安公罢西府公亦上章求去上谕令安职复遣中使赐以珍茗越三日与右正言尹穡同赐对选德殿上顾谓穡曰洪某为人温粹文词有用论事皆可行褒獎至於再三穡出惊叹曰圣眷乃如此言者既攻文安雅不欲公留及是始无相撼意阅月除中书舍人汤丞相【思退】罢免公当草制侍御史黼公武贲有语公露章求去且乞身於上前甚力上曰前日公武谓思退有罪而卿称之为大臣制词中无谴责语乃其死党朕曰朕令作平词非其罪公武执弹章在手乞留榻後已却之仍徙置户部矣时敌再犯淮甸羽书狎至书诏填委上焦劳至夜分不寐或夕召或细书咨访公独当内外制视草之余应诏密启默当上心始淮上斥堠不明将帅无申发文字公奏乞预堤防海道又乞降亲征诏以激励士卒敌既寻盟首为贺生辰使上谓副介龙【大渊】曰前日洪某侍玉辂见其容貌甚悴岂有声色之奉耶方欲大用之可谕意令自爱公附奏曰家素无侍妾近以法服执绶车辂撼顿失其常度咫尺天威有战栗之色报国之躯敢不自爱既越境金遣同签书宣徽院事高嗣先接伴

嗣先之父司空尝有德於忠宣者故见公加敬且询先世甚详公因逊谢相与驩甚颇得其要领以归乾道元年五月除翰林学士仍兼中书舍人辅臣奏例无翰苑下兼西掖者上曰洪某在後省甚振职且要其整顿纲纪秦垧提举太平兴国宫公奏秦桧欺天盗柄戕害忠直当锢其子孙若一人奉祠则其党与皆有弹冠之望所谓一叶不去将寻斧柯者矣上即从之故事给舍缴駁施行者皆封付三省是奏乃以付公明日召对上曰所论秦垧甚当异日有缴奏只须批勅以来不须聯章虽朕意所向而不可行者但论之如缴论巫汲之不当被召余尧弼之不当复职莫汲之不当除编修计议官议者皆以为当未尝一为亲故千求除授有改秩而避免作县别得差遣者虽门下士亦不置以故人服其公盈旬乞免兼职上曰执政有缺朕今用卿既因缴马监崔良辅转官事上数称善至乞令大臣讨论赏典处上云卿今自作执政可以讨论六月除端明殿学士签书密院事上语参政钱公【端礼】虞公【允文】曰三省事与洪某商量蚤朝遂不先退东西府同班奏事自此始诣德壽宫谢太上皇曰上用卿为执政朕亦谓从官中无逾卿者卿父精忠今人臣所无朕尝谓苏武不能及顷归自敌中欲除执政为秦桧所忌挤排使去上天有报卿兄弟相继辅政公每遇奏西府事必极意展布至三省则终不敢出位尽言一日偶及皇甫倬军告乏户部祇将桩积钱应副上云无分三省事卿有所见第言之八月除左中大夫参知政事十二月拜左通奉大夫尚书右仆射同中书门下平章事兼密使明年三月久雨上迎天竺佛请霁减膳却荤公以燮理亡状独三上章乞罢免且面奏求去上曰春间自是多雨卿奉法守公近年宰执所不及第安职台諫因论列上随事谕之諫议大夫林安宅至居家待罪遂以观文殿学士提举太平兴国宫明日上谓参政叶公【顥】曰宰臣奉法守公纯诚不欺近年无如洪某者台諫搜索细故不存公道安得如此人而用之公自西府至相位才旬月而进呈之际多所开陈大抵以诚实不欺为主见有负於国害於民者必正色拒之宁已任怨而必欲使君立於无过之地用人第取实材不采虚誉可予不以疏而弃不可予不以亲而私有受荐而终身不知所自者上尝曰今日可谓存公道卿等所拟无不当可见留意选择公奏蒋芾尝语臣无事可论缴臣云前此见行事有特字者皆是非法今不敢下一特字自然无可论缴上曰蒋芾亦有此言因奏臣到政府数月见陛下行事未有不循典宪者今蒋芾尚欲审特旨常思祖宗故事更愿陛下思其所以益崇圣德上曰朕与卿等共守之上欲幸白石教塲阅三卫军马公奏云阅武固有名第闻三衙潜储鹰犬外人以为出猎又闻準備驪鹿传之远方恐损圣德上曰朕意不如此於是戒诸将不得以鹰犬自随用兵後调度不给献议者欲复免行钱上曰曹泳所行惟免行一事至今人以为是今日岂可不及曹泳继是有乞借房缗收职田立宫观岳庙额添交子增乳香之直令诸郡献羨余者上以为伤国大体公亦力赞以为不可行上欲亲见问郡守以观能否公奏乞降旨去阙期半年令奏事之任自是一经睿鉴能否判然诸郡多得良二千石时有辅郡守献言欲如汉太守许上计上问可以行否公曰汉法令长吏守丞岁终上计大略似今攢帙耳郡守不可以自来惟严助以汉廷切责乞奏三年计不可行人以为善对然公始为执政即奏减机速房吏人它日又奏乞降旨不得存留三省并密院额外吏人将上承旨司谢褒者至漏舍坚请存留王兴祖等四人褒之子梓实在四人中公奏朝廷久不治吏互相循袭无所忌憚乞与放罢编管上然之户部吏有稽慢公亦惩治不贯侍郎林安宅上章待罪上曰断一二吏何至如此虽圣明可恃而羣小固已愠矣又安宅乞降度牒千道限广东一季尽鬻公奏诸路分科甚扰乞减半付漕司俾从民便无得分下诸郡上深以为然马司治马甲买牛皮五千五百而御前又买五万内侍复传旨下工部买十三万公奏漕西去年水潦漕司期限逼民多杀牛纳皮上曰如此却是公

然使人杀牛军器所妄计耳祇买一万奏曰陛下务农重谷恤民如此天下幸甚中旨朱彦宗守婺公奏彦宗虽故翊善子而娶长公主女家居婺此命若出恐骇物听寻改知泰州殿中侍御史张之纲论不差陈宋霖华初成事以初成姓名藏之章疏中公奏白其事上取履历视之明日曰华初成数放罢又尝勒停年已及岂可复使为郡卿敢理会台谏事可见无私朕终夕为之喜监察御史刘贡初除公尝於上前誉之有术士薛言中出入贡门因为人求官於密使汪公【澈】事泄送临安府会奏事上称贡能治钱塘寄囚事云适已除殿中侍御史公因斥其过且言除书未啓当封还上曰卿等如此无隐向来宰执所无贡遂罢去皇甫坦以方技进尝与右史陈【良佑】同坐客舍谒者导陈先坦怒不同升盛骂谒者奋而来前遽出怀中一饼以献公掷之地曰君诚有道何不为吕洞宾韬光尘外而仆仆朝市正须仙食非所愿麾使出翌日奏曰通国以神仙待皇甫坦不识陛下以为何如人上已知昨日事笑曰颇能布气治病耳昨日中宫赐之酒陛辞已大醉语言不伦故如此凡公之所行人多为之岌岌而公奋已直前无所回避林安宅既登谏坡或劝公为去就以避之公曰主上圣德远过汉唐之君士患不逢时今身登宰辅恨无以报国苟一日留有竭吾愚尔吾於安宅异同国事也患失非所计讵堕其口去国不数月除知绍兴府浙东安抚使在越一岁有半为治得大体而无废事不求治赋而用自足吏畏民爱至於今思之请祠以归提举临安府洞霄宫待制在西掖上曰观文在朝肯宣力林安宅怀奸不能容今已三请祠矣姑从之有大藩阙即复用矣公既归素不为求田计闾舍之外得负郭地百亩翦除荆棘列岫如鹜双溪上下引以为兰亭曲水之饮渚洲窈深花木映带位置台榭随力兴作野服瘦筇终日婆娑其间人视之不知其为丞相也目其地曰盘洲一卉一橡皆有题咏杂亲朋醺倡为一帙曰盘洲编平生澹泊老犹嗜书不倦晚岁为文益古轶出西京之上尤好汉隶略去笔墨畦迳而落纸典型深得东京用笔意治越之暇训释考证博极古书为隶释一书廿七卷嗣有附益为隶续十一卷其後时有删润合释续为一而是正之以属越帅刊行为书史失去不复存副本公每以为恨有文集一百卷藏於家淳熙十一年二月二日薨於正寝公自撰遗表至是上之天子震悼赠特进官其後如格爵至鄱阳郡开国公食邑五千二百户实封二千六百户娶沈氏封莱国夫人左中大夫【复】之孙即太学博士【松年】之女魏国夫人之侄先五年薨公为墓铭效汉人立双阙因自作小传俾後人刻其上男九人□朝奉郎通判兴州秘承议郎通判光州榴蚤亡橐文林郎池州建德县丞檣宣教郎知隆州府武宁县桴故承事郎楹承奉郎监汉阳军酒税糠早亡?承奉郎监台州商税务女三人长欲嫁而卒次归及之次嫁承议郎知袁州宜春县薛绍孙二十人倬承务郎监筠州新昌县须税俨汲皆承务郎汲监舒州山口镇偲僖傭侨佺侯侃傒傅佃偶仔佻俭俤伉一未名孙女十人长适迪功郎隆兴府武宁县主簿杨汝明次将仕郎权当国次承务郎监镇江府江口镇税张履信余皆在室将以明年三月甲申葬於郡四十里徐村之原合萊国墓兴州君録公事状俾及之詮次以备太史氏之采择公为总赋属文安择壻及之为隆兴元年进士实文安领贡举公以文安之言信之不疑一见即相器重出疆辟使为属既而以疾辞虞雍公在政府复两学官阙欲以及之及之辞公曰兹我意也可以见子之所存矣顾録録州县且二纪有负期待前年冬解秩分宜紆道往省公喜见顔际从容余月垂别恋恋阅月未再而公之訃闻矣呜呼今尚忍言之及之自登公门颇闻忠宣公之往行为详而公之忠鯁诚实似之与人交无长语而情好周尽收拾孤幼周恤贱贫为己责而不为己恩荐举必首寒素不为势利所夺涉於欺诞者虽已举而犹劾之郊当奏长孙念渭阳之恩未报密以表弟沈自强之名闻命下子弟族党方知之终其身饷客不随俗之好恶为侈具书札往复不贷一荷

幅溢语闲居十六年未尝通朝士书虽宰执除拜贺辄亦不讲晚遇英主骤登宰辅曾几何时而秘殿珍祠优游绿野天日临照始终不渝非公之忠实不欺畴克尔耶诸子稟公之训悉从常调试邑颀厚能自持诸孙诜诜多秀发或者用不尽之器业其在於斯乎待制方膺上异眷颀付史事及之辞不获命乃摭其凡而次叙之若其详则有公之奏藁语録在公初名造字温伯一字景伯云淳熙十二年十一月日壻许及之谨状

宋宰相赠太师魏国洪文惠公神道碑铭

周必大撰

公姓洪系出共工氏後避仇以洪易共三国有庐江太守矩唐有集贤学士孝昌五季自歙徙饶州乐平又七世始居鄱阳隱德田间至公高祖士良力教子孙以学爱滫港山川而置仓焉命其子曰他日葬我仓下青紫当不絶後十六年元丰乙丑孙彦昇果以进士起家事徽宗历三院御史至给事中徽猷阁待制遂为大家公之曾祖讳炳赠少保妣纪国夫人何氏曾祖太师秦国公讳彦先给事弟也妣秦国夫人董氏父讳皓政和乙未进士後徙乐平之洪岩仕至徽猷阁直学士赠太师魏国公諡忠宣母魏国夫人沈氏公初名造字温伯一字景温後改名适字景伯幼穎异日诵书三千言忠宣公自嘉禾司録应选使朔方公年十三已能任家事率五弟三妹奉祖母及母避乱归饶母亡复过嘉禾食忠宣之禄日夜帅长弟文安公遵次弟翰林学士迈种学绩文至忘寝食用父出使恩补修职郎监南岳庙调严州録事参军浙西提举常平司干办公事绍兴十二年与文安公同中博学宏词科宰臣进呈所试制词高宗曰父在远子能自立可嘉宜与陞擢遂除勅令所删定官後三年翰林公亦中选由是洪氏文名满天下改左宣教郎入秘书省为正字才数月忠宣公归自朔方以忠言忤秦丞相桧斥补乡郡公亦出通判台州将满而忠宣公以散官谪英州台守观望拟弹文纳当路转示言者以为风闻坐免官往来岭南供子职阅九年秦薨忠宣北归亦道卒服阕起知荆门军公才智有余临民惠爱二十八年应诏上寬恤四事凡公私以例取民钱岁数千缗悉除之郡久为盜区大比士附江陵试解额仅存五之一公作成日衆乞自辟试闈稍还旧额继有登科者改知徽州会鬻官田监司慕赏迫州县公独寬之初至讼析产不平者纷然公曰此吏求賂不印关书之过也命人户毋拘早晚齎书庭下立为印给其讼遂絶为政得要类此范文穆公成大来为户掾公一见知其远器勉以吏事暇则商榷着述自足范公官业文笔高一世每德公云擢提举浙西常平茶盐会文安公守平江易江东路尝兼提点刑狱盖乡部也持正不私风采振厉二十二年车驾视师金陵公因朝覲言本路昨旱荒民逐食淮甸复困边兵今虽怀乡而田产官已斥卖不即给佃乞断自二十八年後许业主若子孙用估价赎还天语褒饰再三时翰林被命迎使客上曰洪某三子皆可用也公於是历陈边防民兵积粟振民等事朝廷益知其才除尚书户部郎中总领淮东军马钱粮孝宗即位海州解围符离用兵供亿繁夥公心计周密暇裕如平时会有旨犒海州之师镇江及武锋军有实在围中而不与名公比附倍给以便宜招纳海道逃卒归之督府归正者接踵而至或无以贍其家因公奏乃计口添支公谓以总领淮东为名而财赋实隶浙西江东乞以两路入衔後公登二府竟行其说迄今便之隆兴元年就迁司农少卿明年召貳太常兼权直学士院又兼权礼部侍郎上初讲郊祀公乞进胙德壽宫及改定乐章汰乐工冗员人谓礼与时两得之七月文安官罢西府公即求去上遣使赐茶谕令安

职寻因夜直同右正言尹穉召对上称公温粹文词有用论事可观穉先颇睥睨公知上眷乃已九月除中书舍人内直如故汤丞相思退免侍御史晁公武论公草麻无谴责语公亟请外上曰公武言卿党思退朕谓平词出朕意固却其章仍徙户部侍郎矣方羽檄交驰书诏填委或夜召或细札咨访公独当内外制时时奉诏言事如乞防虞海道降诏亲征多契圣心大用之意已定敌既讲好首命公为贺生辰使北遣同佥书宣徽院事高嗣先接伴自言其父司空有德忠宣相与甚欢得其要领以归乾道元年五月除翰林学士仍兼中书舍人大臣奏翰苑不应下兼掖垣上曰洪某在後省振职欲其整顿纲纪耳秦垾子祠公执不可上径批依奏封以付公明日赐对宣谕曰卿论秦垾甚当虽朕意所向不可行者第言之巫汲被召余尧弼复职莫汲为密院编修官公皆缴奏而止又奏免外制上曰执政有阙朕将用卿公因缴马监崔良辅转官乞令大臣讨论赏典上极称善且曰卿且执政自可讨论六月遂除端明殿学士佥书枢密院事上谕参政钱端礼虞允文曰三省事与洪某商量东西府始通班奏事公赴德壽宫谢高宗曰上议用卿吾谓从官中无踰卿者况卿父精忠古今所无顷欲大用阻於秦桧今卿兄弟相继入辅此天报也八月以左中大夫参知政事十二月拜通奉大夫尚书右仆射同中书门下平章事兼枢密使公自佥枢旬月入相感激异知任怨革弊以诚实不欺为主人才可用疎远不弃不然虽亲旧弗予上每称其心存公道进拟无不当公奏中书舍人蒋芾语臣无事可缴臣答云凡降旨云特者皆非法今一切无之上曰芾亦及此且谓特旨宜审公奏陛下动遵成宪愿思芾言益崇圣德上曰朕与卿等共守之驾幸白石教塲阅三卫军马公前奏将帅有潜蓄鹰犬备狩猎者上即呼诸将戒谕初议召见郡守观其能否公言旧惟见阙马今乞阙远近并令半年前奏事之任遂为定制二千石多得人矣公自执政即奏减机速房吏三省枢密院毋留额外人有承旨司谢褒者力乞存留四人其子存焉公怒取旨编置政府久不治吏上欣然以为允户部事有稽慢公迫主令治之侍郎林安宅上章请罪既又欲给度牒千道付广东期一季尽鬻公请减半仍戒科扰安宅滋不悦马军司乞牛皮五千余为马甲御前抛买五万工部别得旨市十三万公奏数多限迫上曰军器所妄计是使人杀耕牛也第买一万而已中批朱彦宗知婺州公言此资善堂翊善朱震之子虽可与郡然彦宗娶潘氏乃婺州长公主家遂改泰州二年殿中侍御史张之纲论陈宋霖当与差遣而潜附所厚华初成於其中公发其奸上视初成履历曰屡放罢又尝停官且年已及岂应与郡卿敢及台谏可见无私朕终夕为之喜刘贡初除监察御史公赞上得人会术士薛言中同贡子为人求官於枢密使汪澈汪送有司上未知也早朝上称贡能治钱塘寄囚已批出迁殿中公与执政及薛言中事且云除书未启当封还上曰卿等如此无隐向来宰执所无之纲寻以忧去贡遂罢方士皇甫坦谒公公薄具其礼坦怒云云公责之曰君诚有道胡为出入宫禁妄谈祸福耶明日公奏通国以神仙待坦陛下谓坦何如上已知公责坦笑曰颇能布气治病昨日宫中赐酒醉语已无伦矣公既叠忤言路适林安宅为谏大夫或劝公引避公曰吾与安宅异同国事也上知吾忠岂可患失逆为去就乎适春霖公引咎乞退上曰春自多雨卿第安心安宅遂与台官合辞论公上不听安宅至家居待罪公亦力请上不得已三月辛未除公观文殿学士提举江州太平兴国宫而谓参政叶顥曰宰臣奉法守公诚实不欺无如洪某重违言者耳不数月起知绍兴府浙东安抚使治得大体复勤小物军民安之阅岁有半提举临安府洞霄宫时翰林在西掖上语之曰贤兄三请祠姑听暂闲公素不营产业自越归得负郭地百亩因列岫双溪之胜位置台榭引水流觴种花艺竹命曰盘洲一椽一卉题咏殆徧安居十有六年身名俱荣子孙满前近世备福鲜及公者淳熙十一年二月辛酉薨於正寝前自撰遗表上之享年六十八爵鄱

阳郡开国公食邑五千二百户实封二千四百户初赠特进诸子遇恩累赠太师魏国公娶沈氏太学博士松年女追封魏国夫人母夫人之侄也先公五年薨葬郡四十里徐村之原公为墓铭效汉人立双阙因自作小传俾後人刻其上明年三月甲申诸子奉公柩合葬焉男九人长槻朝请大夫新知贑州江南西路兵马钤辖次秘朝请大夫新知南剑州櫟早亡 朝请郎权发遣长宁军櫟朝请郎前军器主簿桴故承事郎楹朝奉郎新知庆元府定海县櫟早亡楫通直郎前权金书荆门军判官厅公事女三人长早卒次适通奉大夫同知枢密院事许及之女前卒次适朝散大夫两浙西路提点刑狱公事薛绍孙二十四人倬承议郎江南西路提点刑狱司干办公事俨故承事郎知常德府龙阳县丞汲奉议郎荆湖南路提举茶盐司干办公事偲承事郎新知江州瑞昌县倅承事郎甫承事郎新提领建康府户部贍军酒库所干办公事侨侯侃承务郎新监建康户部大军库门倅承事郎新权金书汉阳军判官厅公事傅将仕郎佃倬仔倅倅承事郎新监无为军崑山镇伉俊仁倅承事郎佑倅倅女孙十二人适文林郎前广南西路转运司主管帐司杨汝明修职郎新无为军巢县主簿权当国通直郎两浙东路提举常平司干办公事张履信乡贡进士程洋承务郎张鏐将仕郎邢谔将仕郎王待问进士高倅迪功郎新信州弋阳县尉王元春余在室曾孙男五人芾蘊将仕郎藺蘊荀曾孙女一人公器业早成与人交诚实无浮礼文华天赋济以力学步骤经史新奇富贍兄弟鼎立自成一家罢政後论着益多四方传诵有盘洲集八十卷尤耽嗜隶古为纂释二十七卷隶续二十一卷屡加删润合为一书将踵欧阳文忠公集古録赵明诚而下弗论也必大早与文安及翰林同朝公由常平入对始识公又尝与贑州为僚金陵故其子孙以副枢许甥状请碑墓道先是太常以文惠易公名文固然矣壬辰夏予奉祠过饶适连年水旱流移系道公宗支繁庶或不自给人人言相君賙我且及恤贫已责事甚详夫居家均惠若此在公固可知矣遇?补舍长孙密奏表弟沈自强酬渭阳之恩命下乃知是皆宜书铭曰思文孝宗云汉章天有臣洪公优於代言孝宗神武志平北路公践帷幄言整军旅帝方克勤如日运行公总衆职甚称上心帝推至公天无私覆相业伊何才能是授谋皆予同德惟乃知周旋二府仅越三时保厘东郊注想未替归心浩然何待奉计荣名燕居十有六年为而不恃五福天全赫赫斯文振振厥後诗以声之公乎不朽